

國家文物局

清代傳記叢書



明文書局印行

清代傳記叢刊·綜錄類⑦  
周 駿 富 輯

國朝耆獻類徵初編(二十)

卷九三五  
卷一〇二

(清)李桓輯



明文書局印行





國朝耆獻類徵初編卷九十三目錄

卿貳五十三

誠存

素爾訥

梁冒堂

蔣賜榮

挪奕孝

曹錫寶

戴第元

西城

穆精阿

福隆安

弟福長安  
子豐紳濟倫

--	--	--	--	--	--	--	--	--	--

146-004

國朝耆獻類徵初編卷九十三

通奉大夫前署江西巡撫江西布政使司布政使湘陰李桓輯  
卿貳五十三

誠存

誠存正紅旗滿洲人章佳氏由官學生於乾隆二十年考補繕本  
筆帖式四十年授山西朔平府理事同知四十四年遷盛京刑部  
員外郎四十七年調吏部員外郎五十七年升禮部郎中嘉慶四  
年授山西道監察御史七年奏查八旗則例載八旗婦人守節十  
五載及年逾四十而身故者各旗查明咨部題請旌表等語乃  
歷年八旗所辦成案拘於年逾四十身故一語致二十歲以外守

節至四十以內而身故者不能同邀 旌典不足以昭平允請嗣後守節已歷十五年而身故者准各旗咨部辦理得 旨下部議行七月擢鴻臚寺少卿十一月遷通政司參議八年以匿名揭帖案奏 聞旋訊出正犯兆昌誣陷狀 上嘉其據實奏辦交部議敘尋議加一級五月擢鴻臚寺卿九月遷光祿寺卿九年授太常寺卿十年升大理寺卿十一年擢都察院左副都御史時浙閩廣東三省洋匪未靖疏陳弭盜之方八款一外洋無耕種之地近來米船出洋該處地方發米牌一紙販運射利接濟逆匪宜禁米出洋以絕匪類糧食一外洋水盡鹽滷皆仰食內河宜令弁兵堵禦以杜內河取水一嚴巡邏按日報明駐劄以專責成遇有劫案按

駐防日期察究一檄臺重地多添弁兵以嚴防堵如有私通逆匪買米取水並私販火藥器械等事該營兵查出從重究辦一除盜之根源外洋之盜半屬內地積匪令一鄉之保甲族長如有匪類首先密報州縣從重懲辦則姦宄自不能容身一查盜之隱匿盜賊偷竊隨在有寄頓之所令地方保甲遇有窩匪之家密行首報免其株連賊及贓物更易於追捕一州縣規避處分諱盜爲竊應令報盜者由州縣以及大吏一體呈明不坐以越控之罪一紳衿出資捕盜宜量加鼓勵毋許州縣冒爲己功如是則賞罰明而捕盜益力奏入 上以所奏多有可採飭督撫議行十二年二月京察屆期以衰老原品休致十五年十月病卒

國史館本傳

右 國史館本傳

素爾訥

素爾訥鈕祜祿氏滿洲正紅旗人乾隆二十年由繙譯舉人補步軍統領衙門司務二十三年升主事二十六年擢員外郎二十九年調戶部銀庫員外郎三十年授江西道監察御史三十一年正月命巡視北城奏言五城文移檔案並不收存署內具呈人等俱在漢御史私宅投遞應請議定章程上命軍機大臣查察尋議各城御史嗣後一切案卷收存公所滿漢御史均應每日進署理事民間呈詞公同接收辦理或遇昏夜緊急事件始准在私宅接收次日會辦七月奏稱五城司坊官員事務繁劇往往因處分不能升轉前經部臣奏明俸滿卽保送引見附於卽升人員之



末以次升用將處分帶於新任但該員等選法例應先儘外省卽  
升報滿之人得缺仍覺壅滯請嗣後先用卽升五人次用照例升  
轉一人輪缺選用部議如所請行又奏請將五城兵馬司吏目衙  
署移駐城外尋部議吏目微員不足以資彈壓將各城副指揮移  
駐城外其副指揮原管地方改歸正指揮及吏目分轄三十三年  
正月擢吏科給事中時山東黃縣丁憂主事王碩赴京控知縣涂  
祖瀾需索規銀強拉牲畜等款 命往會撫臣富尼漢查訊尋奏  
涂祖瀾不能約束書役藉端需索復任廬戶籍差拉雇王碩呈報  
丁憂未敘親生嫡繼字樣經縣指駁令家奴唐英頂覆控府控司  
批飭審訊又令家奴匿不到案均請交部議 諭曰如此則鄉紳

之風必熾而地方官不能管理矣涂祖瀾無罪王碩著交部嚴議  
十月擢內閣學士兼禮部侍郎銜十二月授都察院左都御史三  
十四年五月署禮部尙書八月奏參鴻臚寺卿朱績經修理衙署  
以未經入奏之事冒昧出示令鋪戶房閒與衙署毗連者全行拆  
毀請交部嚴議 上是之十月復署禮部尙書兼鑲白旗蒙古都  
統十一月調鑲白旗滿洲都統尋擢刑部尙書十二月充經筵講  
官三十五年調戶部尙書三十六年三月京察屆期 上以素爾  
訥勤慎稱職下部議敘十一月 命在紫禁城騎馬旋調理藩院  
尙書 上賜三班九老宴遊香山令畫工繪圖素爾訥與馬三十  
七年署工部尙書三十八年正月署禮部尙書閏三月復署工部

尙書四月 諭曰此次 常雩大祀豫期詣 皇穹宇拈香仰瞻

列祖神牌見有字色模糊之處諭交太常寺堂官查辦乃該堂官祇將上年冬至祭祀時恭請出龕入龕之寺丞任策祥送交刑部治罪刑部亦並未切實根究僅以任策祥照律問擬顛預具奏因令軍機大臣詳細查訊始據德福奏稱恭請 神牌出龕入龕係寺丞任策祥其自供案請入亭內恭昇至 壇及祭畢由 壇迎奉供案係贊禮郎珠通阿並查明珠通阿係原任副都統雅爾呼達之孫是德福之意存袒庇已屬顯然而素爾訥當德福面奉時亦在旁與聞其語何亦隨同附和乎此案若非朕洞鑒其隱則任策祥獨當重罪而珠通阿竟因堂官袒庇得以脫然事外何以

服任策祥之心而使太常寺官員知所做懼所有任策祥珠通阿  
一案見據軍機大臣審擬具奏另降諭旨旋議請將任策祥珠通  
阿均照大不敬律治罪素爾訥德福請 旨治罪下部嚴議部議  
擬職 上加恩改爲革職畱任四月署工部尙書七月署禮部尙  
書八月奏參太常寺卿謝溶生乖張偷惰每朔望分詣 壇 廟  
點香及輪派 園丘 祈穀兩壇行禮並不親往又縱容家人嚇  
借奉祀生銀兩請革職治罪尋鞠實論罪如律又奏參安徽學政  
朱筠夫察欠考生員捐貢得 旨朱筠交部嚴議四十一年四月  
調都察院左都御史九月 上以其年邁不能辦理旗務罷兼都  
統職四十二年以原品休致四十八年卒

右 國史館本傳

梁冑堂

梁冑堂浙江錢塘人乾隆二十一年順天舉人補直隸欒城縣知  
縣二十八年丁父憂三十一年丁母憂三十三年服闋補寶坻縣  
三十六年升薊州知州四十年調深州四十二年補保定府知府  
四十三年升清河道四十六年擢山東按察使四十七年五月以  
山東巡撫國泰縱情婪賄未能據實奏參部議革職奉 旨加恩  
以道員降補時豫省河工需員 命冑堂前往河南交富勒渾差  
遣委用十二月補直隸通永道四十八年調清河道擢直隸按察  
使五十年授直隸布政使五十二年運弁張廷儒被劫親赴蒲溝  
審訊得 旨梁冑堂所辦甚好著將伊失察段文經及司監人犯

越獄處分准其開復五十三年七月 命署理山西巡撫旋 命  
署河南巡撫以嚴督屬縣漕糧迅速開運得副冬兌冬開定制交  
部議敘五十四年正月擢河南巡撫五月奏報豫省情形 諭曰  
各屬雨澤未經一字提及朕念切雨暘無時或釋梁有堂不能仰  
體朕懷遲延若此豈以擢用巡撫遂爾自滿不以民爲重耶又言  
河南舊河身兩岸沙壓田畝不能耕種奏請蠲免得 旨允行七  
月請將月隄加培高厚以爲重門保障 上是其請 命繪圖以  
進五十五年二月升直隸總督 賞戴花翎 賜黃馬褂五月奏  
添建海河閘座七月奏畱順德府同知嵇璜奉 旨梁有堂奏順  
德府同知嵇璜前經擢升知府因兩耳重聽以知府銜仍畱同知

原任今又屆三年限滿例應甄別乃梁冑堂猶復奏請畱任其意不過以嵇璜爲大學士嵇璜親弟瞻願情面曲事姑容梁冑堂著交部嚴加議處十一月以鉛礦試採無效奏請停止十二月奏阿布噶卓哩克圖王進京在宣化縣被竊請將該縣議處 諭外藩入覲經過州縣向無派人護送之例若一一賠償或致捏報詐冒之弊前多倫諾爾遺失銀兩該督請賠曾經敕諭梁冑堂復有此奏實屬不曉事體五十七年閏四月奏拏獲越獄之瞿紀瞿套兒恭請 王命正法奉 旨辦理稍過各省情形雖距輦轂甚遠然皆朕率土之民此後各省不得任意從嚴九月奏查辦直省蝗蝻上以冑堂不將三河一路提出轉將該縣李培榮升擢通州回



奏仍稱三河有蝗之時在李培榮交卸之後始終回護曲爲開脫  
苦草職從寬畱任又以直隸省順德廣平大名及河閒景州旱災  
先後故漕五十萬石 命旨堂督率給賑嗣因直隸京南一帶貧  
民紛紛就食京師 諭曰該省早經截漕辦賑當此嗷嗷待哺之  
時豈得拘泥成例待至九月始行散賑梁旨堂以防汎爲名駐劄  
長安城黃帝處僂置地方賑務於不辦何不知輕重緩急若此傳  
旨中飭五十八年 命在紫禁城內騎馬五十九年 上巡幸天  
津口堂迎 聖 賜御製七言詩一首祠傍琴高蹕小停前行旋  
復返舟船從心已自加入歲較我猶然少六齡僕僕可稱清且健  
肫肫極情理而經望霖意苦同斯際歌管仍陳卻懶聽六月奏廣

順等府得雨奉 旨梁冑堂自春閒至今往來各屬朕殷憂已閱  
半載今通省得雨實堪慶幸著賞給大荷包一對小荷包四對嬭  
餅一匣以誌喜慰七月奏正定等屬河水驟漲田禾淹沒得 旨  
務當實力經理又奏永定河伏汛漫口得 旨趕緊堵築 諭曰  
梁冑堂年逾七旬駐劄河干督辦工程朕甚憐之特賞大荷包一  
對小荷包四箇以示眷注又奏馳赴固關查勘災區奉 旨該督  
年逾七十精力稍減應善調攝以資料理旋奏覆勘分別撫卹事  
上覽奏甚慰八月奏正定等處積水漸消分別借助籽種請帑  
二十五萬糧二十萬石以賑被水州縣又請將通州等三十三州  
縣未完糧銀八十一萬五百穀六十三石豆六百九十五石酌贖

免一半得 旨全行豁免六十年大計劾州縣左爲鑽才力不及  
奉 旨該員經梁冑堂奏請調繁何僅闔三年又以才力不及填  
劾左爲鑽著照部議降調該督忽行調繁忽行參劾並未據實聲  
明既於政體不協且易啟督撫任意軒輊之漸及經飭令明白回  
奏反含混其詞不自引咎殊屬非是嘉慶元年恭與千叟宴 賜  
御製詩如意靈壽杖大緞荷包帽緯等物十月奏隨征出力人員  
仍輪缺升補奉 上諭不應拘泥若此著申飭十一月冑堂年八  
十奉 召入京 特賜御書耆壽宣勤扁額封圻著績徵嘉瑞節  
鉞升猷引大年對聯紅絨結頂貂帽藏佛如意朝珠蟒袍補服帽  
緯大緞荷包等物二年六月 諭曰工部奏此次巡幸熱河沿途

橋道查對丈尺多有不符直省辦差官員通弊朕所素知念梁河  
堂在總督任多年辦事勤慎諒不肖因此細事有所染指務須秉  
公查奏若該督有心袒庇是失察於前復欺罔於後朕不得不加  
以懲儆懷之慎之七月奏永定河上游水勢暴長東壩新催堵工  
衝塌合龍稍緩奉 旨該督更當加意督率堵禦剋期合龍用副朕  
眷注並 賞給荔支一匣又奏風雨交作工所危險當督率工員  
搶護平穩奉 旨該督年逾八旬尙屬奮勉特解小荷包兩箇以  
賜用昭眷注又奏永定河漫口堵築合龍 上覽奏欣慰又奏黑  
龍江兵丁全出直境 諭曰該督悉心調度不辭勞瘁甚屬可嘉  
著賞嵌碧霞私帶環三塊大小荷包等物另 旨優敘三年正月

論曰直隸總督梁冑堂年已衰邁於地方吏治不能整頓伊任臬司於刑名自尙諳悉卽著補授刑部尙書七月授漕運總督四年以尙書銜守護 裕陵六年以年老原品休致回籍是年八月卒奉 上諭原任尙書梁冑堂由知縣擢任封疆在直隸多年內用刑部尙書旋經簡畀漕督後派守護 裕陵本年春閒因其年老准以原品休致茲聞病故殊堪軫惜事下禮部 賜祭一壇予如升候選郎中孫甯吉一品廕生候補郎中

右 國史館本傳

蔣賜棨

蔣賜棨江蘇常熟人祖廷錫原任文華殿大學士諡文肅父溥原任東閣大學士諡文恪俱有傳賜棨由貢生捐知府乾隆二十一年銓授雲南楚雄府知府二十四年調雲南府知府二十五年大計卓薦二十六年丁父憂二十八年服闋特授江西廣饒九江道三十年調江安糧道三十三年六月擢兩淮鹽運使九月調山東鹽運使三十四年上以賜棨父溥宣力有年擢賜棨倉場侍郎三十五年調戶部右侍郎兼管錢法堂事兼襲一等輕車都尉世職三十八年二月奏裁關差精微批文舊例關差赴任在戶部領精微批文一道由戶科挂號請用御寶以杜假冒益緣明季稅

差雜出莫可稽考遂爾沿襲至今賜棨以無裨實政宜刪去以符  
體制得 旨允行又奏凡內外臣工章疏方交部議時准駁未定  
乃已先見邸鈔恐鄉愚無知傳說易滋淆惑請俟議覆後再由六  
科發鈔 上從之四月管理順天府府尹事三十九年六月轉戶  
部左侍郎仍兼管錢法堂事九月奏事太監高雲從以漏洩內記  
載伏誅賜棨曾與談論褫職十一月復予襲輕車都尉在武英殿  
行走四十年授順天府府尹四十二年復任倉場侍郎仍暫行兼  
管府尹事四十三年奏奉天陝西麥石採買運通其由通抵京照  
例責成坐糧廳及大通橋監督接運得 旨允行五十一年奏修  
通陽門暨大通橋各路運糧石道五十二年復任戶部左侍郎仍

兼順天府府尹五十六年兼管樂部嘉慶三年奏開川楚捐例四年以失察山西已革附生尉維茂違例改捐京職部議革任奉特恩補光祿寺卿六年二月京察降四品銜往 裕陵守護仍襲輕車都尉世職食俸十一月丁繼母憂回籍守制七年三月在京卒子三繼勳見任河南布政使世襲一等輕車都尉世職繼煥原任山東督糧道嘉慶十五年故繼輝二品廕生加捐員外郎原襲兵部學習行走嘉慶十年卒

右 國史館本傳



圖書集成  
原列在  
卷九十三

二

鄒奕孝

鄒奕孝江蘇無錫縣人乾隆二十二年一甲三名進士授翰林院編修二十六年充會試同考官三十三年充陝西鄉試副考官三十四年充會試同考官三十五年充順天鄉試同考官遷右春坊右中允三十六年七月轉左中允十月升翰林院侍講三十七年充會試同考官四十年充會試同考官四十二年遷右春坊右庶子充文淵閣校理四十三年四庫館書成議敘加一級四十四年轉左庶子尋擢國子監祭酒五十一年四月兼管樂部事務十二月上以朱載堉樂律全書與律呂正義多疎漏歧誤之處命會同管理樂部之皇六子及德保常喜分別各條詳晰訂證書中

凡例體裁逐加考評載於提要之後五十二年三月升內閣學士兼禮部侍郎銜九月充武會試正考官十月 敕定詩經樂譜諭曰朕前披閱朱載堉樂律全書樂譜內填注五六工尺上等字並未兼注宮商角徵羽而於雅頌烝民思文諸詩以時俗豆葉黃等牌名小令分譜未免援古而入於俗又所著琴譜一絃之內用正應和同四聲長至十六彈不勝其冗而一音之中已有抑揚高下是徒滋繁縟而近於靡曼有類時曲曾經降旨交皇六子及鄒奕孝等將朱載堉樂律全書內疎漏歧誤之處詳晰訂證分別各條載於本書提要之後以垂永久而昭雅正因思詩三百篇皆可歌詠魏晉時尙有文王鹿鳴等四章但未著宮調學者茫然不知

而朱載堉詩譜又固執周詩不用商聲之說以角調譜國風徵調譜小雅宮調譜大雅羽調譜周頌而專以商調譜商頌夫商調乃宮商之商非夏商之商此其穿鑿拘墟不待辨而自明豈足與言五音述三百哉且古樂皆主一字一音虞書依永和聲雖有清濁長短之節合之五音六律止於一句數字內分抑揚高下不得於一字一音之內參以曼聲後世古法漸湮取悅聽者之耳多有一字而曼引至數聲此乃時俗優伶所爲正古人所譏煩數之音未足與言樂也從前朕親定韶樂細繹 皇祖欽定律呂正義考定精審皆主一字一音實爲古樂正聲所當遵守見在朝會大典鐘鼓鏗鉦備極莊雅朕前於經筵之典令歌抑戒之詩於瓊林鷹揚

兩宴令歌械樸干城之詩皆親爲指定而三百篇全詩三代以後  
未有全行譜定者朱載堉所譜又復雜以俗調或自行杜撰不可  
爲訓所當詳加訂證叶之宮商俾操縵安絃之士皆得矢詩遂歌  
更足以昭美盛著派皇六子等會同樂部大臣悉心精覈其詩篇  
內應用某宮某調者俱著詳審文義定爲某宮某調仍於各譜駢  
注七音字樣彙成一書俾四始六義之文皆可歌詠分寸節度悉  
符正始元音庶幾考古而益進於古以副朕條理集成引俗入古  
至意十一月充文淵閣直閣事五十三年七月授禮部右侍郎八  
月充順天鄉試副考官五十四年四月充殿試讀卷官六月調工  
部右侍郎八月充順天鄉試副考官十月轉左侍郎五十五年三

月充會試副考官十二月充經筵講官五十六年命提督山東學政旋調福建學政五十八年卒

右 國史館本傳

鄒奕孝字念喬由進士授編修累官國子祭酒 上臨雍講易天行健一節奕孝以聖學帝治反覆敷陳 上動容嘉嘆擢禮部侍郎調工部充經筵講官管理樂部奕孝深通音律郊祀大典中和韶樂皆奉 敕編定

右傳秦瀛撰

臣等奉旨查核  
六八二三

一

曹錫寶

曹錫寶江南上海人乾隆七年由舉人考授內閣中書二十二年成進士改庶吉士三十一年散館改刑部主事三十三年遷員外郎三十五年充河南鄉試副考官擢郎中三十六年充會試同考官旋授提督山西學政四十年擢山東糧道四十二年護山東巡撫國泰奏已故衛千總甯廷言之子惠因向千總張繼渠索追旗丁借項不遂用刀札死繼渠甯惠曾向糧道曹錫寶具控因彼時各旗丁在臨清收兌飭領運千總張繼渠就近查追致釀人命諭曰國泰奏甯惠札死前幫千總張繼渠索取一摺著該部覈擬具奏此案甯惠因向張繼渠索取糧船零件賠數起衅彼時升任



糧道汪圻既已賠修船隻其繩索等項所費無多自應一體賠補乃仍責令窮弁兵丁措辦殊屬見小至甯惠因索欠未得曾向糧道曹錫寶具控乃不卽審理仍令張繼渠就近查追以致釀成人命殊屬推諉非是汪圻曹錫寶均著交部嚴加議處又 諭曰曹錫寶見交部嚴加議處之案昨春於山東行在召見察其才具原不勝外任著來京以部屬用八月大學士阿桂代奏錫寶候缺需時懇自備資斧在各館修書或在部額外行走奉 旨曹錫寶著在四庫全書館行走旋充滿洲源流考纂修官四十七年四庫全書館議敘得 旨曹錫寶加恩以國子監司業升用四十八年滿洲源流考成議敘加一級五十年正月與千叟宴三月 諭曰曹

錫寶候補國子監司業得缺無期見出江南道監察御史一缺著  
胡翹元調補其陝西道監察御史員缺卽著曹錫寶補授五十一  
年六月奏協辦大學士和珅家人劉禿子房屋寬敞器具完美恐  
有借端撞索情事應密行偵訪嚴加懲創 諭曰御史曹錫寶奏  
和珅家人劉禿子本係車夫游管家務服用奢侈器具完美苟非  
侵冒主財刻扣欺隱或借主人名目招搖撞騙焉能如此當卽面  
詢和珅據奏劉禿子名全兒本係世僕有旗檔可查因家人眾多  
宅內不敷棲止是以令其在宅西興化寺街居住一向派在崇文  
門稅務上照管一切素昔尙爲安分樸實平時管束家人甚嚴向  
來未聞其敢在外閒招搖滋事或因扈從在外日多無人管教漸

有生事之處亦未可定請旨飭派嚴查重處等語和珅既經稱伊家人全兒久在崇文門代伊主辦理稅務例有應得之項稍有積蓄亦屬事理之常若伊倚藉主勢實有招搖撞騙或於額稅之外擅自加增以肥私橐亦未可定著留京辦事王大臣會同麟恩及都察院堂官卽傳曹錫寶令其逐條指實如果有以上情節卽一面從嚴審辦一面據實具奏不可因和珅稍有回護又諭曰前據曹錫寶奏和珅家人全兒一摺已交留京王大臣等查辦矣曹錫寶如果見全兒倚藉主勢恐有招搖撞騙情事何妨指出實據列款嚴參乃徒託諸空言或其意本欲參劾和珅又不敢明言故以家人爲由隱約其詞旁敲側擊著留京王大臣詳悉訪查詢問務

得實在情形朕於此案總期根究明白並非因此一虛言欲治和  
珅更非欲爲和珅開脫爾京王大臣等不可誤會朕旨將曹錫寶  
加以詞色有意吹求使原告轉成被告亦無是理務須平心靜氣  
虛衷詳問如曹錫寶果能指出全兒藉端撞騙款蹟訪查得實一  
面從嚴審辦一面據實具奏不可因和珅稍存回護若稍存回護  
是陷和珅且自陷也將此由四百里諭令知之嗣爾京辦事王大  
臣等將查詢情形覆奏 諭曰據奏傳詢御史曹錫寶稱我與和  
珅家人全兒向來從不認識伊在崇文門管理稅務我亦並不知  
道伊於額稅之外有無擅自加增及別項情弊亦未有人說過我  
因聞全兒住屋服用甚是完美於是過興化寺街畱心察看見其

房屋甚是高大我想伊係家奴焉有多貲造此華屋恐有借主人  
名目招搖撞騙之事是以具奏等語曹錫寶既云全兒情弊未  
人說過又未親到伊家何以又稱聞全兒住屋服用甚是完美究  
竟聞自何人必有著落若非有人說過則曹錫寶何以知全兒住  
在興化寺街而經過時卽畱心察看況京城內外大街小巷房屋  
甚多御史無逐戶查問之理若非中有成見何以獨於全兒住屋  
如此畱意耶看來該御史意欲參劾和珅而又不敢明言故爲此  
奏隱約其詞以爲旁敲側擊之計傳旨詢問則又遁詞掩飾不覺  
其自相矛盾殊不知朕辦理庶務於是非虛實務須徹底光明從  
不宥顛預完結示人疑案著畱京王大臣再行詳詢曹錫寶如果

和珅有營私舞弊款蹟不妨據實指出朕必質訊明確如果得實不妨將和珅治罪仍著王大臣等將全兒滋事不法之處究竟問自何人據實明言毋再任其狡飾並令繇恩派護軍統領衙門司官一員帶同曹錫寶至全兒家看視住屋究有若干儻有高樓廣廈儼同府第之處卽其罪案若不過照尋常齊民房舍稍覺整齊亦難律以專條任用大臣等辦事而大臣亦不能無驅使之僕若無殷士俊等之招搖滋事實據真贓第以睚眦浮言遽將中外大臣家人築行查拏治罪有是爲政之理乎仍著將查看詢問緣由由驛覆奏畱京王大臣等奏遵旨派員帶同曹錫寶至全兒家察看據稱未察虛實遽行具奏實屬冒昧查該御史如果得有實據

自應列款奏參今遽以無根之言冀博建白之名應請交部議處  
疏入 命曹錫寶赴熱河召對錫寶面奏全兒倚勢營私並無指  
實原爲和珅杜漸防微起見 諭軍機大臣梁國治等覆詢自認  
杜漸防微一語措詞失當咎無可追經梁國治等奏請將御史曹  
錫寶交部嚴加議處部議降二級調用 諭曰吏部議處曹錫寶奏參  
和珅家人劉全兒一事並不能指出實據僅以虛詞入奏應照奏  
參不實降二級調用一摺曹錫寶奏參和珅家人全兒房屋完整  
等情該御史如果訪有全兒招搖撞騙實據卽行列款奏參審訊  
得實卽擬以正法亦屬罪所應得設有和珅營私舞弊情事該御  
史果能據實指出奏參朕亦必質訊明確將和珅治罪乃曹錫寶

第以和珅家人住屋服用完美恐有借主人之名目招搖撞騙等語入奏似此虛詞朕將如何辦理耶因命畱京王大臣等節次詢問伊並不能指出實據又傳彼前來行在朕面加開誠詢問亦無指實惟以杜漸防微之語搪塞若照部議降調亦所應得第念該御史究屬言官一時未察虛實以書生迂拘之見託爲正言陳奏姑免實降著加恩改爲革職畱任五十三年八月充順天鄉試同考官九月以御史祝德麟奏參司業黃壽齡考錄不公錫寶曾將黃壽齡聲名不好向祝德麟言及未能自行奏參降二級畱任五十七年卒嘉慶四年 諭曰已故御史曹錫寶曾經奏參和珅家人劉全兒倚勢營私家貲豐厚一事彼時和珅正當聲勢薰灼之



際舉朝並無一人敢於糾劾而曹錫寶獨能抗辭執奏殊爲可嘉  
不愧諍臣之職今和珅治罪後查辦劉全兒家產有二十餘萬之多  
是曹錫寶前此所劾信屬不虛自宜加之優獎以旌直言曹錫寶  
著加恩追贈副都御史照加贈官銜給予廕生該部照例辦理二  
十一年禮部奏請曹錫寶入祀鄉賢祠 上以該員平日居官立  
品俱孚物望允之子江廕七品京官任大理寺評事緣事革職旋  
起爲中書科中書

右 國史館本傳

乾隆五十七年壬子春御史劍亭曹公卒於京邸手書遺其子曰  
誌墓之文必求石君朱中丞爲之蓋石君先生最知我而其文必

傳也其婿陳慤以其孤江書來告哀且求銘曰此先君子之遺命也予泣曰我何以傳我友哉然吾何敢遽銘吾友也慤屢趣之曰姑有待越嘉慶己未江將扶其繼母趙淑人之柩歸合葬於公阡固以請珪曰我今可以報吾友矣公諱錫寶字鴻書又字劍亭江蘇上海人祖贈公煜曾父贈公培謙母張淑人以康熙己亥年十一月初三日辰時生公幼而穎敏絕倫見愛於祖父母弱冠以第一名入學乾隆辛酉以國學生舉北闈鄉試壬戌考取內閣中書丁贈公憂戊辰起直軍機庚午補中書時與莊殿撰培因同直齋名莊旣取大魁人望屬公傳忠勇公將奏擢侍讀力辭忠勇公笑曰人各有志不可強也丁丑會試中式殿試二甲五名進士改庶

吉士丁張淑人憂扶喪南旋忽遘瘍疾委荼將十年手鈔經史古  
詩文華嚴皆成部疊架作詩尤長於五古有陶謝韋孟真意丙戌  
散館改刑部主事戊子遷員外郎庚寅充河南鄉試副考官擢郎  
中辛卯充會試同考官督學山西乙未授山東糧道丁酉以旗丁  
鬪毆命案墨吏議來京以部員用在四庫全書處行走分辦黃簽  
考證書成議敘以國子監司業用乙巳與千叟宴 特旨授陝西  
道監察御史丙午上封事劾奏大學士和珅家人劉全衣服車馬  
房屋踰制先有竊知其事者漏言於和乃星夜毀其跡於是奉  
旨畱京王大臣勘查僭妄蹤跡竟不可得而公危甚馳赴熱河待  
詢當是時和珅當路已十餘年中外無一人敢投鼠者聞公此舉

皆咋舌噤不能吐氣一二有心人仰屋竊嘆而已亦未敢頌言君  
賢皆曰曹公禍且不測然上竟不以罪公也部議鐫二級奉  
旨改爲革職畱任蓋先帝保全言官故卒無敢中傷之者丁未  
充文淵閣詳校戊申轉掌陝西道巡視北城八月充鄉試同考官  
九月以他御史事波及降二級畱任庚戌後得嘔血疾自是貧病  
憊甚乃自作年譜壬子正月十九日亥時卒於官年七十有四越  
八年今上親政六日而和珅下獄正月十八日賜死今上於  
是追念曲突徙薪之功惟公一人而已二十八日特下明詔曰  
前御史曹錫寶奏參和珅家人劉全倚勢營私家賞豐厚時當和  
珅聲勢熏灼舉朝無一人敢於糾劾而曹錫寶獨能抗辭執奏殊

爲可嘉不愧諍臣之職今和珅治罪後查辦劉全家產竟至二十餘萬之多是曹錫寶前此所劾信屬不虛宜加優獎以旌直言著加恩追贈副都御史伊子照加贈官銜給予廕生於是天下聞之莫不同聲心折呼 聖明萬歲而天道久而必信也嗚呼公眞不朽矣何待珪一言以爲輕重耶憶珪初識公於丁卯八月公視學山右珪爲晉藩相聚者三年中間離合亦不數數見也而公獨以珪爲知我且遺言其子必求予銘予感公意乃以姪女孫許字公之子江公娶張性孝爲姑剗臂生女一嫁海甯陳愨繼趙生女一嫁青浦王肇嘉側室郭生子江三品廕生卜以嘉慶四年己未冬某月某日祔葬趙淑人於吳縣七子山清涼塢背丁面癸公及張

淑人之墓所銘曰

鄧林蔽霄萬族穴巢有孤鳳凰神飛哀號燎原一歎獸走鳥焦嗟  
鳳逝兮 帝命下招公今在天扶雲一笑噫我後死仰聞絕叫  
聖人旌直豈爲一人闡幽彰善忠正氣伸榮袞誅鉞惟 皇福威  
垂蔭世世視此碣碑

右墓誌銘朱珪撰

劍亭胸襟瀟灑早入 內廷隨 巡侍直時有篇章流傳日下及  
登進士改庶常復由部曹擢爲侍御因見朝貴家人貪縱不法劾  
之詢無實據吏議請革職 詔特原之仍令留任及至嘉慶己未  
正月 上追念其慷慨敢言不愧諍臣之職且其事亦非失實追

贈副都御史并廕其子爲中書蓋異數也

右湖海詩傳張維屏錄

定例五品以下官非殉寇難無贈官給廕者五品官亦無追贈至正三品者乾隆閒御史上海曹錫寶上章劾和珅家人劉全一事不愧諍臣加 恩追 贈副都御史子給予廕生天下聞之莫不  
同聲感歎呼 聖明萬歲

右紀聞陳康祺撰

戴第元

乾隆丙午秋珪與戴編修心亭典江南鄉試爲心性交先是壬午  
主江南試者君之父篋圃先生最稱得人庚子君之季父編修均  
元癸卯君之弟修撰衢亭相繼司衡與君而四天下豔稱之越戊  
申君卒於湖北學政任珪聞而悼歎若失今年夏篋圃先生率修  
撰君扶彭夫人之喪過浙予逆之於北關舟次閏五月九日先生  
移館於江頭以疾終於旅次予往弔之修撰君泣請銘不得辭按  
狀先生諱第元字正字號良圃考曰玉庵府君妣溫太夫人初由  
徽州遷江西大庾縣水城孝友坊生而穎悟絕人年十三入縣學  
二十有六癸酉舉鄉試甲戌中明通榜選興安縣教諭丁丑成進



士改庶吉士庚辰授編修壬午副錢侍郎汝誠主江南試所取多  
 讀書窮經之士如江永朱筠戴震者癸未充會試同考官乙酉典  
 山西鄉試丁亥授江南道御史巡視北城戊子視學湖北辛卯丁  
 父憂服闋甲午補掌四川道御史巡視中城乙未轉掌江南道御  
 史升戶科給事中丁酉轉禮科掌印京察一等巡視南城典湖北  
 試巡南漕戊戌次子衢亨殿試第一人是時君弟均元與兩子皆  
 入翰林一家四人為詞林增典故焉是冬奉 命視學安徽明年  
 升光祿寺少卿晉太常寺少卿壬寅丁温太夫人憂服闋乙巳補  
 太僕寺少卿丙午以疾致仕戊申彭夫人卒夫人同里生以勤儉  
 操作相夫窮達如一教子嚴皆成大名晚精持通梵典明年柩過

杭先生卒修撰君暨兄子嘉穀扶先生夫人之喪反葬於江西先生起家寒素兄弟父子鏗振清華遞持文枋以根柢淵源之學提倡羣雅而先生爲之杓首其貌溫溫躬躬望而知爲長者長君齋心淨業先生晚而證道孳孳日進惜乎未竟其志年逾耳順而遽長逝也先生生於雍正戊申六月五日卒於乾隆己酉閏五月九日年六十有二夫人生同年月其日二十有六卒前先生一年十二月十四日年六十有一子二心亨乙未科進士翰林院編修直上書房先卒衡亨戊戌科一甲一名進士翰林院修撰文淵閣校理直軍機處山西學政孫嘉穀女四女孫四某年月日合葬於某

銘曰

德勝著漢經盈籛先生鬱龍世蓬瀛業白有子珠光熒厥季實大方開英看植華表翬雙丁

右墓誌銘朱珪撰

大庾之戴自文端公父太僕寺少卿第元始以翰林起家乾隆乙未僕少弟可亭相國子心亨同成進士散館皆授編修戊戌文端繼之以大魁除修撰父子兄弟並在詞垣而主試督學之差星輶交馳絡繹道路故其時階皆未崇天下翕然稱西江四戴

乾隆中大庾戴篋圃僕少請增 至聖誕辰祭祀 高宗諭曰國家尊師重道備極優崇自有常制援據禮經實不同於尋常廟祀戴第元乃欲於彝典之外輕增一祀轉爲褻越不足以昭隆禮士

不通經所奏宜損原摺發還

右紀聞陳康祺撰

國朝詩林卷之九十一

三

西城

西城滿洲正白旗人姓巴雅拉於乾隆二十二年四月由生員考取中書承襲佐領二十七年四月經大學士傅恆保奏擢戶部員外郎四十三年十月授陝西道監察御史四十八年三月擢湖南辰州府知府五十五年擢湖南鹽法長寶道五十八年九月擢貴州按察使六十年二月調湖南按察使時逆苗石柳鄧等滋事西城於赴任時途次卽帶兵至大營殺斃賊苗甚眾經雲貴總督福康安以打仗出力守城有功保奏 賞戴花翎四月擢廣西布政使六月調四川布政使十二月調陝西布政使仍在軍營辦事嘉慶元年六月調江蘇布政使十一月調安徽布政使二年二月授

奉天府尹四年七月授太常寺卿遷工部右侍郎五年三月授  
正紅旗漢軍副都統五月以年逾八十 恩賞紫禁城騎馬六月  
調正紅旗滿洲副都統六年正月擢都察院左都御史鑲紅旗漢  
軍都統二月奏言烏里雅蘇臺塔爾巴哈臺等處於總辦大臣外  
有協辦大臣而協辦大臣無專摺奏事之例卽有單銜入奏事件  
應先送總辦大臣閱看始行鈐印馳遞則總辦大臣內縱有不公  
不法應當奏參之處各協辦大臣因限於定例緘默不言卽或關  
係緊要不得不奏之事軍臺險無印色包封亦不冒代其馳遞更  
恐臺站官兵權時接受仍暗送總辦大臣閱看不但不能奏參甚  
至被人預先陷害其弊不可勝言應請 敕下此二處嗣後遇有

公同陳奏事件仍照舊會銜外並准協辦大臣等照回疆例每年或二次或三次專摺恭請 聖安如有密奏事件卽據實奏參不得仍前隱匿推諉得 旨允行九月兼鑲藍旗蒙古都統十月諭曰西城年已八旬嗣後遇朕御門辦事著不必隨班上階以示體卹七年四月卒子二長寶興二等侍衛承襲佐領次寶麟原任太僕寺主事

右 國史館本傳





穆精阿

穆精阿滿洲正黃旗人姓伊爾根覺羅由繙譯生員考補刑部司務乾隆二十二年擢主事二十五年升員外二十七年升郎中三十一年授江南道監察御史三十九年四月調京畿道御史五月巡視南城四十年五月署刑部右侍郎九月山東益都縣民張治以夥竊疾死臨淄縣獄其母張李氏赴部控武生劉繩祖串賊誣扳命穆精阿往鞫十月審明張李氏所控因形迹可疑非憑空誣告按律減等發落褫繩祖衣頂是月授盛京刑部侍郎四十五年四月調刑部右侍郎兼正紅旗漢軍副都統四十七年十二月烏魯木齊都統明亮劾署宜禾縣知縣韋馱保不稱職請撤回刑

部筆帖式任穆精阿保舉不實降二級又失察賊犯寇大越獄部  
議革職得 旨降三級從寬畱任四十八年六月奉 旨審辦獲  
鹿縣生員王用中控生員王琇懷等交結縣官藉差苛派事無左  
驗用中架詞疊控拖累二百餘人按律戍極邊知縣周榮不修義  
倉違例移貯穀石擬革職十一月尙書福隆安家人富達善職斃  
夫役張二賄趙文達頂兇刑部不能究出實情奉 旨降三品頂  
帶仍革職畱任四十九年五月轉左侍郎九月 諭曰刑部堂官  
喀寧阿等上年於審辦福隆安家人富達善一案羣懷觀望不能  
究出令趙文達頂兇情形因降爲三品頂帶並革職畱任以示懲  
儆今福隆安業經身故而本年刑部辦理秋讞尙爲妥協喀寧阿

胡季堂穆精阿差晟杜玉林著加恩復還原職頂帶五十年四月  
工部員外郎海昇毆妻吳雅氏致死裝點自縊刑部檢驗不實降  
四品頂帶十月江蘇贛榆縣生員朱克笏赴都察院控族叔朱繼  
雨句串胥吏勒派河工夫價 命往會審朱克笏挾嫌誣告屬實  
論戍知縣李際壽折受夫價二千兩革職杖徒五十二年六月  
諭曰喀爾阿穆精阿降革處分俱已積至七案著將任內應得養  
廉各罰出二年十一月 差赴江西會鞠永豐縣革監王世俊控  
胞姪王黼賄道士王成奎畫符咒誑謀害一家係挾胞兄世儒改  
佃山地之嫌捏情妄控論罪如例五十二年二月 命赴廣西審  
辦灌陽縣民鄧燦秉控族姪鄧培祿裝傷誣告伊子培芝鬪毆斃

命訊調孫培芝毆死鄧澍屏屬實該撫擬以絞抵非冤抑論燦秉  
誣控罪三月湖北荊門州民人蔡士仁控州書廖正名勒索漕規  
命穆精阿回程順道審辦五月審明蔡士仁因納糧與廖正名  
爭鬧挾嫌控告廖正名曾向花戶索取由票截費計贓在十兩以  
內各分別按律斷罪十二月調鑲紅旗滿洲副都統五十四年二  
月京察議敘加一級七月 賞都統銜八月奉 旨穆精阿年已  
八旬著加恩在紫禁城內騎馬五十五年九月山東濱州貢生杜  
宜丰與舉人薛對元口角挾嫌架詞誣陷知州方應時不爲剖斷  
明晰致對元持械毆差釀成巨案對元弟武生薛樸元赴京具控  
命偕給事中和琳往審十一月審明對元毆差及宜丰誣陷屬實

擬罪如律臬司甘定進改換日期知州方應時捏飾遷延各分別  
按律定擬五十七年正月調吏部右侍郎十月卒 諭曰穆精阿  
熟諳刑名調任吏部以來亦屬勤慎今患病溘逝著加恩賞銀二  
百兩以示軫卹子亨明任二部郎中嘉慶九年卒

右 國史館本傳



福隆安 弟福長安 子豐紳濟倫

福隆安滿洲鑲黃旗人大學士忠勇公傅恆之子尙和嘉公主授和碩額駙乾隆二十三年授 御前侍衛二十六年三月兼管光祿寺四月兼管奉宸苑七月掌鑾儀衛事三十三年二月擢兵部尙書軍機處行走三月兼議政大臣四月調工部尙書三十四年正月授 御前大臣署總管內務府大臣九月署理藩院尙書 賜紫禁城內騎馬三十五年兼步軍統領七月管理藩院事十月授領侍衛內大臣襲一等忠勇公爵三十六年疏言馬兵例准鄉試又可在營升拔是一人而兼兩途請將籍隸大宛兩縣兵丁與武童一體應試取中武生再准鄉試部議 從之三十七年四月署



鑲黃旗滿洲都統五月散秩大臣銜阿爾泰總兵宋元俊奏參四  
川總督桂林在卡了軍營約令參將薛琮開道夾擊金川賊桂林  
略一進攻卽退並將護軍統領明亮副都統鐵保撤回薛琮以糧  
盡救不至戰歿全軍盡覆桂林捏飾具奏與鐵保終日酣飲將備  
罕得見面見在軍營修房居住勒取供應令提督汪騰龍交銀總  
兵王萬邦贖取金川所遮官兵 命福隆安往審六月奏審無酣  
飲勒派事桂林所居有預備貯米板屋三間無不見者薛琮告急  
卽令宋元俊往援惟官兵傷損不卽查奏屬實至贖取官兵係戶  
部司員汪承霈聞有巴旺布拉克底土兵送出迷失官兵信告知  
桂林取銀五百交汪騰龍備賞後未見送出仍將銀取回其王萬

邦給宋元俊札捏寫收銀贖人係爲宋元俊所愚請分別治罪  
諭曰宋元俊汪承需均著革職拏問同桂林一併解赴行在候訊  
至王萬邦初爲宋元俊所愚一經詰訊卽吐實情此案得以明確  
情尙可原且領兵打仗頗爲勇往免其革職治罪明亮鐵保汪騰  
龍已降旨革職鐵保仍遵前旨畱任在軍營效力未幾元俊議革  
職仍畱軍營桂林得 旨發往伊犁效力贖罪福隆安又奏言賊  
番踞守碉樓木寨時出伺我兵舉動軍營事應謹密方可乘其不  
備已申明紀律整肅軍容以杜賊番窺伺又言臣沿途查看山險  
路遙挽運維艱打箭鎗等處雖貯糧萬餘而軍營存糧無幾不能  
剋期趕運阿爾泰年邁請令陝甘總督文綬往章谷等處督運得

旨調文綬四川總督三十八年閏三月充四庫館正總裁四月  
加太子太保授正白旗滿洲都統三十九年四月御史李漱芳劾  
福隆安家人藍大在金陵館酗酒滋事鞠實擬罪部議革福隆安  
職 詔畱任十月疏言烏槍爲行軍利器入旗專操會操演習九  
進十連環所向無前各省綠營烏槍請照火器健銳二營進步連  
環式一體演習下部議行四十一年正月調兵部尙書仍管工部  
事務二月金川平敘功加三級 命圖形紫光閣 御製贊曰父  
定復叛子嘗媿之是用稽首躬請出師畱於左右俾習規畫頗有  
嘉謀協予廣益七月兼 文淵閣提舉閣事十一月充國史館正  
總裁四十二年四月暫署吏部尙書四十二年錦州副都統德福

劾協領福神保藉差斂錢 命福隆安查辦尋奏訊福神保斂借  
商銀交將軍弘晌所設差局幫貼差費公用弘晌並未入己但以  
宗室大臣見小滋弊請交宗人府會同刑部治罪福神保等發烏  
魯木齊效力餘分別杖責得 旨弘晌訊無染指亦未授意派斂  
著加恩以散秩大臣效力贖罪四十四年三月直隸總督周元理  
奏辦井陘縣民李馥等斂錢告官梁進文抗官毆差案步軍統領  
衙門緝獲案內逸犯供知縣周尙有苛斂侵肥各款 命福隆安  
同刑部侍郎喀甯阿錢汝誠會鞫尙有派累屬實抵罪周元理以  
徇庇劣員革職四十七年四月 上躬詣 零壇行禮 諭日常  
零大典朕親詣行禮 壇內一切禮器均宜敬慎安設乃本日常

禮時見 壇內懸挂天鏡僅止二盞又更衣幄次所設坐褥亦不  
整齊 郊壇典禮朕親詣行禮尙如此草率不敬若遣官恭代更  
不可問矣其罪甚大非尋常錯誤可比工部堂官羅源漢等近因  
福隆安患病精神不能周到遂各委蛇袖手而派出司員等亦俱  
怠忽從事以致種種玩誤不可不嚴示懲儆福隆安若照常辦事  
遇有此等錯誤其處分必較諸人加倍姑念患病屬實著加恩免  
其革職仍罰其公俸十年四十八年五月畱京辦事十一月 上  
閱朝審招冊疑趙文達毆斃夫役張二案 命覆訊 諭日前閱  
本年朝審情實招冊內趙文達毆死夫役張二一案忽疑其或有  
頂兇情節因詢之和珅福康安福長安俱不能深悉其中情僞因

派阿桂和珅福康安劉墉會同刑部堂官覆訊該犯等始猶堅供前情及研鞫再三據供實係福隆安管事家人富禮善主使責打趙文達聽從動手屬實此案既據審明可見從前刑部堂官司員不能盡心推鞫復令查檢原案初供係福隆安署步軍統領時移送刑部其原咨內本有家人富禮善喝令打之語乃刑部定案時趙文達挺身直認證佐匠役等亦隨同指供司官既不嚴詰而發堂官審擬時該員等亦意存觀望不肯深究顯預了事以致富禮善脫然事外福隆安病體至今未愈被家人始終瞞哄竟無見聞而刑部堂官不加駁詰推求未免有意瞻徇福隆安情面刑部堂官實咎無可寬所有該堂官及主臬隨同畫押之司官等俱著交

部嚴加議處至福隆安於此案雖原報本有富禮善之名及後改  
供亦實不知情但致刑部堂司官意存觀望實由平素恃朕恩以  
致人畏卽其過也此案若趙文達已經句決不特福隆安獲咎更  
重卽阿桂等亦不能無罪茲幸究出實情未致枉縱其情節尙可  
稍從寬減福隆安著罰公俸十年仍交部嚴加議處部議均革職  
奉 旨福隆安病後精神虛弱致被家人瞞哄前已罰公俸十年  
著加恩改爲革職畱任刑部堂官降爲三品頂帶仍帶革職畱任  
承辦司員分別降調革職四十九年閏三月卒 諭曰尙書額駙  
公福隆安醇良謹飭勤慎小心綜理部務宣力有年昨歲因舊證  
復發屢經給假調理賜藥賜醫方冀年力尙強可以漸次平復倚

昇正殷近聞病體加劇卽令伊子豐紳濟倫馳驛回京省視茲聞  
溘逝深爲悼惜著皇八子親往奠醑並賞給內庫銀五千兩派金  
簡經理喪事任內降革處分槩予開復前次伊家奴犯罪伊自請  
罰公俸十年亦加恩寬免應得卹典察例具奏尋 賜祭葬如例  
諡勤恪子豐紳濟倫襲一等忠勇公爵見官 御前侍衛副都統  
右 國史館本傳

### 福長安

福長安富察氏滿洲鑲黃旗人曾祖米思翰戶部尙書祖李榮保  
察哈爾總管俱追 封一等公父傅恆大學士忠勇公追 贈郡  
王米思翰傅恆俱有傳福長安乾隆四十年閏十月授藍翎侍衛



十一月遷三等侍衛四十一年擢頭等侍衛四十三年授武備院卿四十四年八月管理右翼稅務授正黃旗漢軍副都統九月兼公中佐領十二月調正紅旗滿洲副都統四十五年正月授總管內務府大臣並在軍機處學習行走三月授戶部右侍郎五月命紫禁城內騎馬四十七年四月兼署工部侍郎九月以闕浙總督陳輝祖抽換王賈望入官財物 命偕大學士阿桂赴浙江查訊旋鞫寶革輝祖職十二月押輝祖回京四十八年七月轉戶部左侍郎五十一年閏七月擢尙書五十三年正月臺灣逆匪林爽文平 上念福長安書諭宣勤列二十功臣繪像紫光閣 御製贊曰父兄及己胥國勳親英年習政其心孔純承旨參議亦克敬

申忠良之報並得圖麟五十五年八月恭逢 高宗純皇帝八旬  
萬壽福長安以總輯慶典交部議敘十一月 賞加太子太保銜  
五十六年調工部尙書五十七年九月廓爾喀平 欽定十五功  
臣福長安與焉 御製贊曰戚畹閥門家國一體兄勤遠征弟贊  
近理鴻邱之隔樽俎之間無不同心弗稱己關 上以廓爾喀之  
役福長安盡心襄贊以國事爲重非僅稱關己而已也五十九年  
二月吉林人濞闕額福長安奉 命往鞫瞻顧親誼曲庇局員  
上洞燭其情嚴行申飭 命軍機大臣繕寫飭諭福長安未卽擬  
旨 上責之降二級畱任四月調鑲白旗滿洲都統嘉慶三年八  
月四川首逆王三槐就擒福長安以日直樞禁 恩賞侯爵四年

正月 高宗純皇帝龍馭上賓 上令福長安總理喪事會科道  
糾和珅不法事鞫訊得實福長安以知情阿附緣坐 命革職拏  
交刑部籍其家及熱河貲產 諭曰福長安祖父叔姪兄弟世受  
厚恩尤非他人可比其軍機處行走與和珅朝夕聚處凡和珅  
貪黷營私種種不法罪款知之最悉伊受 皇考重恩常有獨對  
之時若果將和珅縱恣藐玩各款據實直陳較之他人舉劾尤爲  
確鑿有據 皇考必早將和珅從重治罪正法豈尙任其貽誤軍  
國重務一至於此卽謂 皇考年高不敢仰煩 聖慮亦應在朕  
前據實直陳乃三年中並未將和珅罪蹟奏及是其扶同徇隱情  
弊顯然如果福長安曾在朕前有一字提及斷不尙將伊一併革

職拏問見在查抄伊家貨物雖不及和珅之金銀珠寶數逾千萬  
但已非伊家所應有其貪黷昧良僅居和珅之次並著一併議罪  
尋大學士九卿等議照朋黨律擬斬請 旨卽行正法得 旨卽  
照所請辦理實屬罪所應得但科道中並未將福長安指款參劾  
而所抄貨產究不及和珅十分之一二和珅見已從寬賜令自盡  
福長安亦著從寬改爲斬監候秋後處決並著提往和珅監所跪  
看和珅自盡後再押回本獄監禁 詔革侯爵子錫齡仍准襲福  
靈安世職騎都尉八月 諭曰朕所以將和珅福長安拏問治罪  
者因伊二人朋比爲奸獲罪甚重不得不治以國法非朕初親政  
務卽將 皇考左右常侍之大臣遽加罪譴也但和珅情罪重大

斷無一綫生路是以卽賜令自盡福長安居官行事雖非無可指  
摘然與和珅之罪狀多端爲舉朝痛恨者則有閒矣福長安蒙  
皇考象養二十餘年今屆奉移 山陵之期福長安稍有人心自  
必以不能叩送梓宮痛心涕泣深自愧悔縱伊無此心而朕心究  
竟有所不忍福長安著加恩釋放伊平日在 皇考前常有捧茶  
之職今著前往 裕陵充供茶拜唐阿俾敬依 陵寢感念 深  
恩時加內省且伊父傅恆墳塋亦在附近地方並可追思伊父從  
前克承眷注永保令名將必撫衷自問於爲臣爲子之道今竟何  
如耶福長安著釋放後給假十日以便接收賞還查抄物件則朕  
於 皇考時服侍舊人苟可矜全必無置之重典與夫事遵國法

初不計較財貨之意可厭著於中外大小臣工矣十二月遷 裕  
陵員外郎六年三月因病呈請回京馬蘭鎮總兵成林據情代奏  
諭曰去歲福長安不過微患瘡癩卽藉辭不進 陵當差今竟  
敢稱染患骸疾呈請回京調理甚屬膽大豈不念 皇考陵寢在  
彼卽伊父墳墓亦在附近稍有良心豈忍棄捨回京無父無君殊  
屬可惡著革職卽發往盛京披甲七年四月得 旨福長安自去  
年發往盛京甚屬安靜一切差使俱能奮勉著加恩賞給驍騎校  
八年八月奸民私斫鳳凰城木植千餘株福長安以弊竇向策拔  
克告知畱心偵緝事 聞授興京城守尉尋向將軍富俊稟稱查  
至飛牛嶺見有人放火燒山卽衝火越嶺獲犯多名又於嶺北及

西溝將逃犯嚴緝務獲經富俊入奏 上疑其有意見長張大其詞 諭富俊密加查察果係將荒火捏報放火且有探親過路民人均被拏獲得 旨仍降驍騎校十年七月 上行圍福長安告求清塵灑道 允其請八月授盛京防禦是月遷二等侍衛十一年正月授圍場總管八月 賞三品頂帶仍 賞戴花翎十二年四月授熱河副都統仍用三品頂帶十一月 命往建昌審辦吹那木海等控案福長安於吹那木海越訴誣控之罪則稱無例可援至薩木皮拉旺多爾濟呈訴吹那木海明阿圖罪狀又置不審問俱交理藩院覈議 上責其意存推諉傳旨申飭十三年六月督修灤河至喀喇河屯橋座七月 賞副都統頂帶十月署古北

口提督十四年正月烏魯木齊都統色克通阿廢弛馬政接任提督辭大烈奏 聞福長安著任時不行奏參惟面告辭大烈以在槽馬匹不甚臆壯移咨覈辦 諭曰福長安在任已及兩月何不自行參劾必欲移交辭大烈查辦福長安係棄瑕錄用之人於此等關係營伍要事尙復意存顛預不肖據實奏參是何意見旋降圍場總管五月授馬蘭鎮總兵兼總管內務府大臣十五年七月奏 孝陵 景陵儀樹均已補栽整齊請將前定各樹戶每年交樹十株之例停止十六年四月奏添設 孝東陵饗殿內執事官三員均如所請十八年九月署古北口提督會逆賊林清滋事命帶兵至黃村搜捕餘匪揀派官兵赴軍營會剿十月獨石都司



曹綸從逆事覺 敕福長安拏獲解京十九年二月因失察曹綸  
 與知道謀又古北口提督任內動用馬乾銀兩下部議處尋議降  
 三級調用得 旨改爲降三級畱任二十年三月授正黃旗漢軍  
 副都統四月管理健銳營事務二十一年六月調正黃旗滿洲副  
 都統二十二年十月卒 賞加都統銜 上以福長安曾獲重咎  
 毋庸給予卹典子錫齡見官直隸試用副將

右 國史館本傳

豐紳濟倫

豐紳濟倫富察氏鑲黃旗滿洲人祖一等忠勇公傅恆父和碩額  
 駙福隆安自有傳豐紳濟倫於乾隆三十五年 命在內廷行走

四十年正月 諭曰額駙等向俱照公主封號授爲固倫額駙和  
碩額駙惟公主所生之子未經定例賞給品級於體制殊未允協  
嗣後在京公主所生之子至十三歲時係固倫公主所生卽給予  
伊父固倫額駙品級和碩公主所生卽給予伊父和碩額駙品級  
見在豐紳濟倫年已十三卽著賞給伊父和碩額駙福隆安品級  
著爲例三月從 幸盤山 賞穿黃馬褂四十五年二月授鑲藍  
旗漢軍副都統十月授奉宸苑卿四十九年十二月承襲一等  
忠勇公五十五年十月調止白旗蒙古副都統兼管光祿寺事務  
五十六年五月調鑲白旗滿洲副都統十一月授正紅旗護軍統  
領五十八年四月授上駟院卿五十九年三月因誤差革去護

軍統領四月調正紅旗滿洲副都統嘉慶四年正月授兵部右侍郎管理清漪園等處事務旋調戶部右侍郎二月轉左侍郎七月授總管內務府大臣崇文門正監督時 上令諸臣密舉所知豐紳濟倫保奏國子監祭酒法式善明白結實辦事妥協 上以法式善本年春間條奏荒謬且在祭酒任內聲名平常豐紳濟倫何以率行保舉 命大學士軍機大臣等訊問具奏尋 諭曰豐紳濟倫濫保法式善平日聲名才具僅以在伊家課讀從未向伊借貸一節卽以其爲人體面遽登薦牘實屬孟浪本應交部嚴議姑念其甫經辦理部務年輕未曾歷練且詢明尙無請託私弊著從寬交部議處部議降二級兩任五年七月管理樂部事務八月授

鑲紅旗漢軍都統 賜紫禁城騎馬時恭纂 高宗純皇帝實錄  
充副總裁官六年正月調正藍旗滿洲都統授鑾儀衛掌衛事二  
月升兵部尙書十一月充會典館副總裁官 賞黑狐端罩七年  
四月充武英殿總裁官尋以漢文平常改派侍郎英和是月內務  
府大臣奏請裁減各衙門兼攝司員 命將該大臣交部察議議  
上 諭曰前此豐紳濟倫召見時曾奏及伊係武英殿總裁於武  
英殿御書處司員不能管轄呼應不靈彼時朕卽覺其自滿矣茲  
據內務府衙門奏請將各處兼攝司員酌擬裁減內武英殿御書  
處並無內務府大臣兼管伊卽欲將兼攝司員裁減其有內務府  
大臣兼管之御船處咸安宮等處兼攝之員並未聲請酌減實屬

徇私近於專擅是以降旨將該大臣等交部察議此事顯係豐紳濟倫一人主見眾人隨從附和部議降二級調用均屬咎所應得但念一時更換乏人豐紳濟倫著加恩改爲革職畱任八年二月以川陝楚三省邪匪平定 恩予開復閏二月 上自燕郊駐蹕

以請輔校尉行急脫肩革掌鑿儀衛事兵部尚書在乾清門散秩大臣上行走七月充文淵閣提舉閏八月莊親

王縣課等奏 裕陵隆恩殿工程虧朽查係乾隆十六十七兩年

傳恆承辦三十五年福隆安賠修奉 旨豐紳濟倫係傳恆之孫

福隆安之子所有伊兒管職任著全行革退仍加恩賞畱公爵又

諭將賞過之黃馬褂紫禁城騎馬俱著撤回仍加恩畱戴花翎

九月授頭等侍衛在乾清門行走十一月授鑲藍旗漢軍副都統

十二月調正白旗漢軍副都統九年五月投馬蘭鎮總兵兼總管  
內務府大臣十年十二月失察大陡嶺青椿內外樹株被竊降頭  
等侍衛在大門上行走十一年正月復奉命署馬蘭鎮總兵兼  
總管內務府大臣二月因陵寢侍衛官房保固限內損壞上  
以豐紳濟倫在任有年於侍衛等作踐官房並不實心查辦罰令  
賠修仍交部議處部議降三級調用三月賞給四等侍衛仍在  
大門上行走五月因派隨圍射布靶不到奉旨查閱旋經領  
侍衛內大臣面試步射奏稱豐紳濟倫手內無力不能將弓拽滿  
諭曰豐紳濟倫係世家之子見正年壯爲何不能射箭著以公  
爵四等侍衛自備資斧前往盛京交將軍富俊教習富俊上陵

行禮帶伊同眾行禮凡遇查閱城卡行圍俱帶領操勞訓練八月  
擢盛京兵部侍郎十二年正月卒子富勒渾甯珠襲一等忠勇公  
見任頭等侍衛

右 國史館本傳

國朝耆獻類徵初編卷九十四目錄

卿貳五十四

劉峩

韓鏢

德瑛

虔禮寶

孟邵

蔣日綸

子子蒲

達椿

子薩彬圖

童鳳三

特克慎

補錄

蔣子蒲





國朝耆獻類徵初編卷九十四

運奉大夫前署江西巡撫江西布政使司布政使湘陰李桓輯  
卿貳五十四

劉峩

劉峩山東單縣人援河工例捐知縣乾隆二十三年選直隸曲陽  
縣知縣二十八年調宛平縣知縣三十一年遷南路同知三十二  
年調東路同知三十六年遷永平府知府三十七年遷通永道四  
十年十月丁母憂四十三年三月服闋補天津道四月仍調通永  
道八月丁父憂四十四年三月諭曰劉峩回籍已將一年著署  
理清河道俟服闋再行實授四十五年遷湖北按察使四十六年

三月遷安徽布政使十二月調山西布政使四十八年三月擢廣西巡撫五月遷直隸總督六月奉恩公弘景差家人持諭往靜海縣冒認入官地畝正藍旗都統福隆安以聞諭曰直隸總督於旗民交涉事件最多必須秉公持正不避嫌怨方爲無負委任劉峩平日人尙質實是以加恩擢用伊在直年久於朕辦理庶務一秉大公至正自應知悉著傳諭劉峩嗣後遇王公大臣等有地畝一切事件與地方官交涉者若不由戶部及本旗行文竟敢私自差人持諭前往無論事之是非曲直該督卽行據實奏聞一面秉公辦理七月長蘆鹽政徵瑞奏濟運剝船應設法調劑諭曰楊村剝運事宜從前方觀承辦有成規於速運通商兩無妨礙本

屬妥協近年因直隸總督屢經更換遇青龍岡決口未堵漕運緊急需剝甚多該道府辦理不善胥役藉端勒索紛紛封禁守候無期並將重載貨船差押起卸槩令騰空備剝以致客販聞風裹足船戶畏避不前不特鹽運無船貽誤課帑並恐商貨壅滯京師百物昂貴於民間食用大有妨礙著劉峩速往天津會同鹽政徵瑞督率道府等實力妥辦酌定章程以垂永久尋奏定章程一船宜編號均勻輪雇一赴通回空酌定期限一船價照例給發不得短少一漕米運載剝船一體用斛不得私用筲斗一糧船北上稍遲截留北倉以速回空下部議行是日劾中倉監督趙元搢喝令僕役毆民人身死擬元搢罪如律又審明那用旗租之三河縣知縣

王治岐真諸法八月赴山莊恭祝 萬壽 賞花翎黃馬褂十一月偕刑部侍郎姜晟鞠南宮縣民魏玉凱控李存仁傳習邪教挾嫌妄扳多人案審明存仁邪教屬實治如律玉凱妄扳無辜依誣告律論戍十二月遵 旨查禁武職衙門鹽規銀兩奏稱天津鎮標向有巡鹽盤費兵丁得餉無幾此項請仍畱給 諭曰所奏自係實在情形兵丁等得餉無多有此鹽規以爲往來盤費得實力緝私於眾商亦屬有益但仍應一體查察毋任額外借端多索四十九年八月奏大挑分發舉人經前任督臣改佐貳者二十六員內有黃虞等四員才堪民社請仍以知縣用九月偕尙書金簡會勘盧溝橋下游淤沙請於中泓五孔之上下游抽溝以疏積壅

諭曰盧溝橋下積淤年久必須挑浚寬深大溜方可直達若僅抽溝三道覺水緩不能刷沙日久又復淤墊著於中泓五孔口面全行迅速挑挖俾上下游一律寬深河流暢達永無淤沙停蓄之患方爲有益十一月奏附河旗地多被水衝沙壓不能耕種請緩租十三頃蠲租三十六頃除租六十八頃如所請行五十年正月與千叟宴是月奏古北口倉貯不敷應於北倉漕米內撥萬石爲本年夏秋季兵米得旨允行二月奏大名順德廣平河間等屬上年秋收歉薄至今未得透雨糧價日增請分別平糶六月奏大名等十州縣得雨愆期請借給口糧並先予摘賑七月請撥漕米十萬石備賑先後報允九月徵瑞奏捐銀三十萬兩備造濟運剝

船請交劉峩派員成造 諭曰此項剝船一千餘隻所需木料較多直省恐不能應手著於湖廣江西二省分派委員趕辦至成造船隻送到直省後並著劉峩交沿河州縣官小心經管毋得貽誤此後不得再雇民船致滋擾累儻有藉端累民者該督鹽政隨時查察嚴行奏參十二月奏直隸本年被旱全賴商販流通北倉存漕四十餘萬石若於來春起剝勢需封雇民船恐商販聞而裹足請俟新造剝船到齊時運通所有北河見在阻凍民船開春催赴天津備商販雇用湖北所造剝船已到三百餘起剝北倉米 上 諭其言五十一年正月京察加一級是月奏永定河南北岸下口受淤請加高河隄報 允閏七月奏大名縣本月十四日夜有賊

詩械入署劫獄斫斃多人同時入道署大名道熊恩紱被戕賊眾  
旋逃據獲匪犯五名草帽三十九頂餘聞拏奔竄殺守門兵丁出  
城請將署大名協副將舒通額革職拏問大名縣知縣吳之瑜元  
城縣知縣沈雲尊革職畱於地方協緝 諭曰大名元城二縣衙  
署同在府城而道府副將又同城駐劄該處衙役兵丁必多非山  
僻小縣可比乃賊犯等輒敢多人夤夜擁入道縣衙署殺死本道  
並斫殺家人兵役多人出城逃逸實屬罪大惡極目無法紀該署  
副將舒通額近在同城並不卽時帶領兵丁堵禦截拏竟任其肆  
行無忌結眾奔逃並無一名擒獲則其畏葸無能已可槩見自應  
革職拏問以示懲儆至賊眾聚集多人其平時必有糾約商謀情



事該縣知縣既漫無覺察而於廊房內拏獲匪犯五名草帽三十  
九頂又不卽時訊取供詞究出爲首何人黨羽何人乃僅以一稟  
塞責殊屬糊塗自應卽予革職俟劉峩前往查訊確情具奏辦理  
至大名一帶與豫東二省毗連該犯等逃逸後必越境奔竄著傳  
諭畢沅明興迅速選派明幹員弁於交界處所嚴密堵截如擒獲  
一名卽先行訊供一面奏聞一面卽於該處正法毋庸解送直省  
以致輾轉疎虞此時劉峩已率同臬司遊擊帶兵前往全保亦由  
正定起身前赴大名著傳諭該督等務須上緊躡緝先將見獲之  
五人訊究何處人氏是否案內正犯以致如此亦不可知不隱  
諱況道縣二署同時皆有賊人進內又欲劫囚搶庫同夥賊匪自

必眾多不可因搜獲草帽三十九頂遂信爲實數以致賊眾漏網  
務俾腎不畏法之徒悉就拏獲正以刑誅不可令其遠颺致稽顯  
戮也大名距省不遠想劉峩此時自己早抵該處仍將查明起衅  
情由並續行拏獲要犯幾名之處迅速由六百里加緊馳奏旋奏  
據大名元城續稟拏獲王國柱等同前獲之許三等五名嚴究據  
供向隨八卦教會首係山東單縣人劉洪見在該縣監禁頭目係  
廣平段文經元城徐克展十四日齊集許三家夥同戕官搶庫劫  
獄 諭曰該犯等以邪教餘孽竟敢夥同殺官搶庫劫獄實屬罪  
大惡極據供欲救單縣劉洪此時或竟潛往彼處滋事不法亦未  
可定著傳諭明興迅速前往單縣監提劉洪究問黨羽一面卽將

劉洪帶至省城嚴行監禁至劉峩見在自己馳抵大名務將此案逸犯迅速嚴拏務獲盡法懲治毋使一名漏網以致復畱餘孽至該犯供稱入卦會頭目係籍隸廣平元城二縣此二人見在會否就獲再此等兇犯多係極惡之徒劉峩至彼訊得實供即可先行正法多辦數人以儆兇逆不可久畱羈禁或致有搶劫脫逃之事亦不可任其輾轉扳引多有拖累以致人情不安或生別事尋癸臣於二十日抵大名已據革職署副將舒通額差弁赴肥鄉拏獲素與段文經徐克展等往來人犯十名又續獲五名審訊大槩情形並搜獲所藏符呪進呈 諭曰該犯等以邪教餘孽借焚香念呪爲由竟敢編造逆詞煽惑鄉愚公然糾眾殺官劫搶監庫看來

竟有謀爲不軌情事實屬罪大惡極不可不徹底跟究翦滅根株  
此時自又可續獲多名爲首之段文經徐克展會否就獲著傳諭  
劉峩卽將已獲各犯審明正法八月奏續獲楊進等十二犯連前  
共三十八名已據供認同夥入署搶劫者二十六名未入署而窩  
畱主謀法難寬貸者二人俟究明辦理 諭曰該督前後獲犯雖  
有三十餘名其首先起意糾眾殺官之段文經徐克展及往來通  
信之郝潤成動手殺官之張君德王成功各要犯尙無一名就獲  
於事何益況段文經徐克展以衛役而謀殺本官尤爲可惡總之  
首犯一日不獲此案一日不能完結至見獲餘犯多名並非賊首  
亦無可待訊之處不可聽其輾轉扳引遠處之人希冀查拏往返

延挨時日又致有搶劫脫逃等事著傳諭劉峩卽於該處正法九月諭曰據劉峩奏查拏段文經徐克展等犯文武共有三十餘員分布四路尙未弋獲等語此案今已月餘劉峩若果於此時派員實力廣爲搜捕何以尙未得該犯等實在下落直隸山東二省該犯同教甚多自必常在大名單縣一帶潛藏且教首劉洪係單縣人而劉峩卽係該縣鄉紳豈無親族佃戶鄉黨鄰里可以向其密行訪查況該犯等竄匿該處經地方官飭役查拏其民人等雖有知其蹤跡者或畏事不肖據實吐露若劉峩於鄉人中時行體訪或轉可得其消息卽量出已貲令伊鄉人等設法購緝多方偵緝以期就獲亦屬該督分內應爲之事此朕代爲籌畫及者不知

劉峩會否想到如此辦理亦自必早經奏及豈劉峩以單縣非其所轄耶恐伊束手無策亦未必能籌計及此乃常於奏摺中覘顏稱不至漏網實可謂無能朕代爲羞愧不知劉峩更有何顏面也由五百里傳諭劉峩知之旋因大名案內首犯未獲部議革職命從寬暫行畱任十月河南巡撫畢沅奏委員太康縣典史毛師沅於安徽亳州地方獲徐克展奉 旨迅速解京 諭曰大名聚眾戕官一案首犯潛逃經朕屢次降旨飭令鄰省各督撫一體設法嚴緝昨始據畢沅奏到於亳州地方將徐克展拏獲可見此等要犯逃竄亦不過在鄰近處所安知段文經一犯不仍在山東直隸境內潛匿豈劉峩明興專俟他省代緝而不自知上緊搜捕耶

劉峩前經降旨暫行畱任勒令今年終如仍不能獲犯令吏部屆期請旨今爲期已近甯不畏懼不思奮力嚴緝耶劉峩著再傳旨申飭儻限內竟不能緝獲年終該部請旨時定照部議革任不能稍爲寬貸也十二月吏部奏直隸要犯未獲暫行畱任之督臣劉峩等請旨革任諭曰劉峩身任封疆所屬地方有此等邪教傳布煽惑漫無覺察及聞該犯等糾眾滋事又不能星速馳往督率查拏以致遠颺節經降旨令該督等設法偵緝迄今仍未弋獲若照部議革任實所應得姑念該督等見在督率各屬設法查拏首要各犯未便遽易生手劉峩等俱著暫行畱任統俟獲犯後究明何處逗遛藏匿再行分別辦理另降諭旨五十二年正月諭曰

大名案內首犯段文經在逃節經降旨嚴飭各督撫上緊緝拏至  
今尙未就獲此案段文經與徐克展二人商謀起意在大名滋事  
係劉峩等專管地方乃徐克展一犯上年係河南委員拏獲而爲  
首之段文經迄今半載有餘該督並未設法查拏得其實在下落  
明興於段文經未經就獲猶可諉爲鄰省之犯然徐克展係豫省  
委員拏獲豈豫省能獲鄰境之犯而東省獨不能乎前吏部於年  
終題奏朕因該督等見在督率查拏未便遽易生手是以降旨暫  
行畱任原欲稍寬時日以觀後效劉峩明興尤宜感懼愧勵乃竟  
因已邀畱任安然坐視以緝拏要犯爲具文甯不思轉瞬又屆限  
滿獨不可將伊等從重治罪耶劉峩明興著傳旨嚴行申飭若仍



前因循怠玩不能將要犯速獲則是自取罪戾不俟限滿亦可治罪斷不能再邀寬宥母謂朕恩可以長恃畱任可以屢邀也三月奏大興等六十五州縣各得透雨 上以心存諱飾飭之五月奉旨查禁囤積疏稱保定河間等五府趙冀等五州全賴天津水運以濟民食若遽查禁恐商販不前請照舊流通惟嚴禁富戶不得窩囤 上嘉其奏 諭曰劉峩因段文經一案停止本年廉俸既經議罰所有降革處分准其開復尋因失察山東學政劉權之眷船被盜 命革職畱任先是貝勒縣億有護衛正柱控通州佃戶劉七抗租毆搶未結至是 諭曰劉峩見在天津距通州不遠於酌籌漕糧卸貯事竣卽應順赴通州將此案確實審辦具奏乃

該督遽由天津回省並未親往該處查辦劉峩之意不過因事關  
旗地護衛係縣億府中之人若將護衛所控情節審虛恐有礙縣  
備府中若以佃戶抗租毆搶爲實於地方官未便又不免心存  
袒護是以因循不辦不知朕辦理庶務一秉至公虛實惟求其是  
斷無袒護皇孫之意況此事孰是孰非一經研究無難立判劉峩  
身爲總督於此等事件竟至畏首畏尾拖延不決爲督撫者不應  
如此著傳旨申飭五十三年四月 命偕山東撫臣長麟等會議  
籌調剝船奏德州陳家莊等處間段水淺須用剝運擬分五站輪  
番轉輸至南糧出關後裝載尤重必須多備剝船請將倉場所撥  
官船四百五十隻押赴德州按站分運得 旨如所奏辦理十月

京營擊獲浙省管解茶油委員鄭俊業訊出沿途賣用官物情由  
先是戶部奏該員領解一年尙未到京四次行查沿途督撫均未  
咨覆降 旨訊問劉戡覆奏該員並未入境是月 諭曰前據戶  
部奏浙省委員鄭俊業管解桐油芽茶及飯食銀等項一年之久  
尙未解到經四次行查沿途督撫並未咨覆一事當經降旨令各  
該督撫查明覆奏旋經巡捕營會同將鄭俊業拏送戶部訊據該  
委員已於四月內到京究出沿途將額解官物銀兩私自賣用花  
銷等情而劉戡摺內稱至今並未到直竟同龔贖可見該督於地  
方諸務全不畱心復率行覆奏獲罪尤重著交部議處十一月部  
議革任 諭從寬畱任是月奏豫省漕船入境日期 諭曰豫省

漕船節年未能依限兌運衛河又多淤淺以致饋運遲延茲該三  
幫漕船於十一月初旬已入直境可符冬兌冬開定制並據該督  
奏稱將元城大名二縣衛河挑挖深通實力催饋所辦尙屬認真  
且豫省漕船入直隸境向未據專摺具奏此次一經入境該督卽  
行奏報所辦亦是五十四年三月奏永平府屬糧價較昂請酌量  
平糶又奏各屬緩徵銀穀再請寬限奏入 允行四月奏各州縣  
旗租積欠請分別緩帶 諭曰此項租銀若果因地方水旱災歉  
實欠在民自當分別緩帶然其中難保必無官吏侵那劉戕身爲  
總督不可不切實查辦著爾心密訪據實具奏旋覆奏旗佃以耕  
作餬口歲豐尙可按期完納遇水旱卽拖欠不清兼之地多鹽鹺

逃亡積欠實由於此疏入報 聞又奏磁州舉人鍾應柎扛幫詞  
訟咆哮公堂吏目沈封忱違例擅受請分別革審時大學士阿桂  
赴荊州鞫案 命會同查辦審明論罪如律六月奏新漕入境所  
需剝船千五百隻本敷輪轉緣催轉甚速更值河水暢流轉有往  
來不及之勢又台州等幫照例起六存四因湏急船輕未敢前進  
請仍照上屆例起四存六 上允其請七月永定河水暴漲搶護  
無虞交部議敘是月奏保定河閒等屬有被水較重處請一體賑  
卹報 允十月奏安平縣民王三殺死胞弟王七等三命並誤傷  
伊父身死請 旨依律寸磔 諭曰李世傑奏兇犯陳年富殺死  
一家三命於審明後卽恭請王命凌遲處死自應如此辦理劉峩

所奏王三情節較陳年富更爲兇惡且誤傷父命倫紀攸關猶復拘泥請旨卽此一端其辦事之不如李世傑已可槩見著將李世傑原摺鈔寄劉峩閱看五十五年正月 賜紫禁城騎馬二月巡城御史穆克登額等奏拏獲直隸建昌縣盜犯王二等供出會與馬十行劫錢鋪馬十一千人證提集直省二載餘未定案請 旨交部嚴加議處 諭曰建昌縣盜犯馬十等行劫錢鋪一案係乾隆五十三年二月之事既將首夥各犯提至省城自應卽行審辦乃案懸兩載至今尙未辦結事關劫盜重情實非尋常玩延可比昨將馬十提解到省臬司飭委保定府知府審訊該府復交清苑縣知縣究辦該縣米復松竟僅提齊寬辭熱河兒李五三犯審訊

轉置首犯馬十於不問且止將齊寬等訊過一次並未復行研鞫該齊於此等重案任聽宕延並不嚴催完結臬司富尼善既提各犯到省又不親行提問僅委之知府辦理而該府復以查賑爲名遷延行縣輾轉稽延全不以此爲事直省吏治可謂廢弛已極見派乾清門侍衛慶成同軍機章京策拔赴保定省城將米復松革職鎖拏前來質訊劉峩已降旨同富尼善及承審各員交部嚴加議處著先行革去花翎黃馬褂俟定案時再降諭旨又諭曰前據巡城御史穆克登額奏拏獲建昌縣盜犯王二等供出隨馬十等行劫錢鋪一案此係乾隆五十三年之事已閱兩載有餘該省早將正犯馬十等拏獲迄今尙未審結各該地方官推諉宕延該

督近在省城於此等要案置若罔聞劉峩在直有年雖非長才而平日居官尙稱謹飭是以擢用至總督數年以來尙無大過惟辦理地方事件不能措置裕如今於劫盜重案任聽屬員欺蔽輾轉玩延若非巡城御史將逸犯拏獲究出盜首則竟至釀成疑案有是理乎如此無能豈可復勝畿輔封圻之任本應立予革職發往新疆效力贖罪姑念其年已衰邁限於才識尙非有心玩誤著加恩以侍郎用尋 命署兵部左侍郎七月實授是月 諭曰直隸盜犯馬十一案審辦遲延劉峩未經查催尙係因公失察非江蘇高郵句容兩案書吏冒徵侵蝕有累閭閻書牘並不據實嚴參閱鶚元知情不舉者可比且伊在直督有年辦事尙屬勤慎所有兵



部尙書員缺著加恩卽以劉峩補授五十六年十月河南虞城縣民楊淑與縣役構嫌在部具控 命偕侍郎吉慶往鞫又 命赴江西審廣豐縣武弁包漕及崇義縣民發冢棄骸二案訊明論罪如律五十七年五月扈 蹕熱河 賞還花翎黃馬褂七月開復降革處分六十年因瘡疾請解任 諭加太子少保銜以原品休致旋卒 賜祭葬諡恪簡子澐官至兩淮都轉鹽運使

右 國史館本傳

乾隆乙卯八月兵部尙書劉公卒嘉慶丙辰七月公子澐將奉公柩暨兩夫人合葬持年譜家傳走京師乞余銘余與公初僅相識嗣公官兵部余官禮部每三五日輒相晤於直廬公性質直與余

近不善交遊不解奢麗亦與余近恆相就對語或並馬出紫禁城  
故交公雖日淺而知公心跡特深公卒年七十三歲仕宦凡三十  
八年惟庚子官湖北按察使辛丑官安徽布政使旋調山西癸卯  
官廣西巡撫甫兩月卽官直隸計其來往諸省僅僅三年庚戌改  
官兵部訖乙卯 予告亦僅僅五年其餘則戊寅初授知縣官曲  
陽癸未調宛平丙戌官順天府南路同知丁亥調東路辛卯官永  
平府知府壬辰官通永道戊戌官天津道旋仍調通永道辛亥官  
清河道旋署按察使併總督爲十一任皆在直隸余世居河間故  
知公政績亦特詳今誌公墓固無可辭公諱毅字先資號宜軒系  
出山西洪洞明中葉始徙於單縣至公十世矣世有隱德根深實

邃慶流後嗣乃生公卓然爲名臣公溫厚和平不露圭角又天性  
侃直疎疎落落似若吏才不足者然起家郡縣周知小民之疾苦  
與下吏之艱難官宛平時盧溝橋尙氏旅店多陰戕過客沒其財  
公委曲發其奸西山煤礦多藏匿亡命公偵緝散其黨官南路同  
知時擒白塔巨盜官湖北按察使時殲川襄劫殺之寇石首孀婦  
爲兄公謀產誣告久繫自戕邑令諱飾其事公據牘摘發一親鞫  
卽伏辜官兵部尙書時崇義有以掘冢竊葬官不受理叩闕者公  
奉命往勘鞫知冢在深山縣官畏路險未親驗故吏得舞文乃  
躬歷崎嶇覈實劾奏江西父老皆頷手稱希有未嘗不明察果斷  
也永平濱海之田旗民牙錯疆界不分互相私墾致訐訟無已時

公定以旗產據舊冊民產據舊糧不及原額者補以閒田溢於原額者則召民認墾塵案數百不一載皆廓清灤河遷徙不常兩岸之田東圯西漲牒訴紛然公定以康熙中舊河之椿誌不得以新河隔岸爲詞訟端立息山西私鹽壅官引商力與民食官課並絀乃擇富室以充商吏緣爲奸破家者眾公爲布政使時請於巡撫擬歸鹽課於地丁雖格不行然乾隆壬子繼事者卒如公議北河漕運歲雇剝船民以多累不肖應則改爲僉派弊益滋公奏定章程五條一輪轉以均勞逸一定限以免守候一雇值嚴禁扣剋一裝卸皆用官斛一截畱以速回空又議造官船一千五百以蘇物力至今爲永例任縣大陸澤黃河故道也數千載積淤成上腴盜

耕者眾訐訟者亦日起公爲簡賢能之吏經理丈量得良田八百九十餘頃奏請召墾升科遂爲沃野又慮圯漲不恆或爲民累並奏定官爲歲勘隨時增減其糧額未嘗不經濟宏遠也至嚴氣正性稟於天成官直隸時兩以伉直忤上官官湖北按察使時嘗特劾一巧宦之屬吏殊落落難合然受  聖天子特達之知倚任無所疑  恩榮錫賚至不可殫數或偶以公事獲譴亦皆  曲諒其無他迨老病乞歸  特加太子少保致仕敷歷中外三四十載以功名始終豈非以忠誠蒙  鑒察以正直邀  器重哉歿而  賜諡命曰恪簡恪肖其敬慎簡肖其不苛不濫知大體也公之生平  聖言定之矣千載以後豈能易一詞哉公元配王夫人早逝內

行無徵繼配樊夫人少公一歲先公六月卒嫻於禮法事姑至孝處娣妯至和撫孤甥如己出雖久富貴而勤儉如寒素膠西張維祺嘗爲作家傳敘述頗詳傳又稱公凡七子幼子濬公七十歲時側室許氏所生其六子則皆夫人出長潤與第四子涪恆隨侍公次源理家政次灑官淮安府知府次淇治經生業次滌舉人六子各任其才雖公之教亦夫人佐成之蓋紀其實云銘曰  
德政鐫碑繁詞日盛是是非非蓋棺乃定我銘公阡可質諸畿輔之百姓

右墓誌銘紀昀撰

臣等言屏多不有  
夕ノ一ト

韓錄

韓錄貴州畢節人由貢生捐納通判乾隆二十三年揀發山東河工二十六年授東昌府上河通判三十二年遷沂河同知三十五年調河南黃沁同知三十八年擢安徽潁州府知府四十年擢江南淮徐道四十六年正月授河東河道總督三月請於時和驛大隄外自祥符縣丞汛二十二堡起至八堡大壩西尾止築圍隄一千六百五十丈 上從之閏五月奏言東省運河之水全賴汶泗來源及各湖接濟必須隨時蓄洩得宜查汶河上游東平州戴村石壩等處民堰河勢頂衝其對岸停淤積沙挺入河心應將淤灘切齒挑溝以展河勢泗河下游卽爲府河由安居十里二斗門入



運河身淺窄民堰卑矮亦應籌辦蜀山馬蹯馬場南旺等湖隄外積水取土維艱見在三進重運盛行正開湖洩水之時堰根顯露卽可起湖邊灘土以培隄堰報 聞七月豫省萬錦灘黑岡俱長水丈餘八堡迤東焦橋一帶大隄被刷三十餘丈鏐請嚴加治罪諭曰此次河水漫溢甚屬洶涌但大溜仍走中路圍隄大壩已露出灘面韓鏐富勒渾聞信後卽親赴該處督率搶護辦理尙屬無過所請治罪之處尙可寬免惟見屆秋汛務須加意防護趕緊辦理以期工程鞏固尋奏祥符焦橋漫灘水已斷流補築圍隄十日內卽可完竣 上以鏐等率同在工大小各員集事迅速頗爲奮勉 命交部議敘旋以儀封北岸曲家樓刷坍隄工二十餘丈

復自五堡至九堡又開段漫溢三處 諭曰該處隄工塌卸漫水東西分流俱在運河關係匪細亟須催集夫料星夜堵築俾口門不致刷深則收功猶易時大河水勢陡長溜勢全歸孔家莊水面約寬百餘丈下注曲家樓漫口隄工續塌二十餘丈 上命河南巡撫富勒渾赴工會辦又 諭曰曲家樓漫口在黃河北岸切近運河關係漕運最爲緊要著韓鏞等勘明覆奏一面動工辦理復命江南河道總督李奉翰赴工次與之督率趕築嗣鏞偕富勒渾奏言惟青龍岡大李家莊及孔家莊三處灘勢最低河水匯注高與灘平灘面俱係新淤見卽趕緊興工報 聞又 命大學士阿桂於江南識案回京時就近往勘尋奏青龍岡灘面又塌寬七

十餘丈水深一丈四五尺而孔家莊等三處溝槽俱已挂口斷流  
諭曰孔家莊漫口已移改於青龍岡韓鏞等自應督飭員弁趕  
緊鑲護俾早完一日卽百姓早受一日之益旋命山東巡撫國  
泰赴工會同堵築八月河水漸落歸槽子堰亦俱墊竣惟正河斷  
流淤墊較高諭曰昨據阿桂等奏壩上合龍後仍復墊陷業經  
令設法籌辦矣至嵇璜所奏令河北流仍歸山東故道之語見在  
漫口下注北流之水祇有二分南下者至八分之多斷難迴狂瀾  
使之北注朕料必不可行阿桂與李奉翰韓鏞等目擊全河形勢  
令各就所見據實覆奏尋鏞奏言青龍岡始漫之時勢甚洶涌是  
以倒漾北行分入沙趙二河穿運歸海者不過二分北行未久旋

卽斷流全行南注其南北地勢高下顯然若於南行極窪之處建隄堵截欲迴狂瀾於北注誠如 聖諭必不能行且黃河大勢河底雖漸淤高而自豫省達江南入海終屬就下之勢未便輕議更張 諭曰地勢北高南下顯而易見但北流二分既經斷流韓鏞國泰自應於斷流時卽查明具奏以便籌辦至此時始行奏聞疎忽太甚四十七年正月開放引河大溜已分掣三四分金門水力亦減尋東壩忽又陡墊鏢等自請嚴議 諭曰東壩中間裂縫以致壩頭塌失則工程究未穩固此人事未盡不得諉於事勢之無可如何阿桂等須靜鎮妥辦以期必成見閭黃河以南運道深通而北河運道未免淤墊正屆重運北上不可無大員經理令韓鏢

往微山湖北運河查勘相機妥辦較爲有益其請交部議處正可  
不必二月赴濟甯會同國泰及巡漕御史毓奇查勘運道自濟甯  
汛在城閘下起至嶧汛黃林莊止分別作土堰柴壩及椿埽橋梁  
設立水站置備絞關並請於勘辦事竣卽赴工次 上以壩工合  
龍尙需時日東省運河關係緊要 命鏞仍往來東省隨時相機  
妥辦並 命毓奇幫同妥商嗣鏞逐勘伊家河荆山橋等處水勢  
復聞青龍岡東壩頭蟄埽恐運河不能容納急籌分洩之路因道  
出江南銅山縣潘家屯其地外灘高大河底七八尺及一丈二三  
尺不等請就河底估挑並再行抽溝洩水則下游益就寬深 從  
之尋鏞復回工次會勘時東壩已塌失三次遂與阿桂等議將挑

水壩改築大壩並於東壩後接築土壩三月復赴潘家屯會同薩  
載挑濬駱馬湖六塘河等處並汶泗兩河四月漫口合龍後又壩  
三十餘丈 命鏐璜等迅籌宣洩隨開潘家屯引河並於濟甯以  
北徒駭馬頰各支河濟甯以南伊家河等處復勘估展寬旋 命  
仍回青龍岡工次協同阿桂籌辦料物及堵築事宜尋阿桂等議  
於蘭陽三堡改築大隄開挑引渠道水進內從商邱七堡出隄歸  
入正河故道 上敕交大學士九卿議行五月鏐丁父憂四十  
年三月青龍岡合龍四十九年服闋授工部右侍郎五十年三月  
鏐因任河督時應賠銀十四萬餘兩 上以銀兩較多免其十分  
之七六月丁母憂五十二年服闋仍授工部右侍郎旋轉左侍郎

五十四年六月因江西湖廣糧船於鳳凰灘及漢口阻滯 命偕倉場侍郎蘇凌阿馳往查勘尋奏江西糧船因給發運費銀兩遲延湖廣糧船因帶臬司李天培木植致有遲滯 上命將兩江總督書麟江西巡撫何裕城交部嚴議並 命大學士阿桂赴湖北會同巡撫畢沅嚴鞫李天培九月 命偕工部尚書金簡與倉場侍郎蘇凌阿劉秉恬會勘通惠溫榆二河及朝陽門外護城河挑濬各工十月調戶部右侍郎五十五年二月 命同刑部右侍郎王德赴湖北審辦廣濟縣民人楊澐霏赴京控冊書陳見龍重徵勒折案鞫虛論罪如律五月 命往江南會同南河河道總督蘭第錫辦理河工防汛事宜六月因黃水驟長漫過毛城鋪滾壩等

處尋毛城鋪裏頭壩尾補築完竣王平莊民堰漫缺進水之處亦漸堵閉並於碭山一帶大隄酌作挑水壩草壩一律穩固 諭曰補築壩壩必須堅實完固不可稍有疎懈十月江南民人湯乾學以河工利弊十三款由步軍統領衙門呈奏 上命鑠同兩江總督孫士毅江南河道總督蘭第錫河東河道總督李奉翰按款覈查俱無確據論罪如律十一月南河總督蘭第錫以高家堰風損石工段落較多請築閘隄厚涸底水以便確估 上以第錫言未確實命鑠偕兵部尙書慶桂往勘明無庸築隄厚水 上從之嘉慶三年調兵部右侍郎四年三月 命守護 裕陵初鑠寄籍順天大興縣後改歸原籍至是復奏准入順天籍六年二月 上以



國史卷之四十一  
三  
鏐年老有病命以原品休致九年卒子樹猷以府經歷緣事革職  
尋捐復原官孫開泰二品廕生戶部額外主事

右 國史館本傳

德瑛

德瑛伊爾根覺羅氏鑲黃旗滿洲人乾隆二十四年由護軍補戶部筆帖式三十二年襲父護軍校安泰隨征準噶爾陣亡所得雲騎尉世職三十六年兼印務章京三十七年兼副參領四十五年升參領四十六年擢通政司副使四十七年兼印務參領四十八年擢光祿寺卿五十一年遷太常寺卿五十二年復調光祿寺卿五十四年仍調太常寺卿五十五年授奉天府府尹五十六年擢內閣學士兼禮部侍郎五十七年 諭曰盛京禮部侍郎專司祭祀德瑛由太常寺卿升授閣學嫻習祀典卽著德瑛補授嘉慶二年調盛京刑部侍郎三年兼管奉天府府尹四年五月調刑部右

侍郎六月授正紅旗漢軍副都統九月調正白旗滿洲副都統十  
二月遷刑部左侍郎五年 命馳赴熱河審辦芳園居庫銀被竊  
一案因緝獲逃兵陳洪訊出已革兵丁葛光亮等夥同偷竊其誣  
扳之徐守國等全行省釋奏入 諭曰德瑛查辦此案訊明誣扳  
各犯卽行釋放復因逃兵陳洪情節可疑奏明飭緝從此究出本  
案正犯尙屬細心著交部議敘七年正月擢刑部尙書管理緡書  
房事務二月授正白旗漢軍都統充會典館副總裁三月調鑲藍  
旗滿洲都統端陽呈遞 膳牌德瑛未候 召對先已回城 上  
責其疎懶交部議處尋議罰俸一年六月 命在軍機處行走  
賜紫禁城騎馬十二月三省鞫捕逆匪大功戡定 諭曰德瑛雖

在軍機處行走未久其素日陳奏亦時有所見著交部議敘八年  
閏二月充 實錄館副總裁七月因承辦 孝淑皇后奉安事儀  
會奏摺內措辭失當部議褫職 上以德瑛在軍機處行走又係  
刑部尚書事務繁冗且日係短視未能詳細閱看改爲革職畱任  
九月充崇文門副監督九年二月京察屆期 諭曰德瑛在軍機  
處行走小心勤慎著交部議敘六月調禮部尚書 命赴本衙門  
辦事不必在軍機處行走十年二月會典館呈進事例書寫擡頭  
錯誤德瑛自請革職得 旨改爲革職畱任十一年調戶部尚書  
十二年正月失察 實錄館提調官施杓等聽受請託辦事舛錯  
部議鐫級 恩准抵銷三月充 實錄館正總裁七月 諭曰戶

部尙書德瑛年屆八旬精神矍鑠供職罔懈見值伊生辰除御書扁額並優加賜賚外著加恩賞給太子少保銜十四年十二月兼署工部尙書旋因失察工部書吏王書常等先後偽造印文捏款冒領三庫銀兩物料 諭曰尙書德瑛失察六次且劄庫先行彙經伊畫諾者三此等文案並非緊急事件何迫不及待之有再本日召見據伊奏稱近日目力不濟所有彙案曾令伊子代畫筆跡間有互異並稱進署日多是以先行彙俱係伊閱畫但不察用項之緩急率畫先行此非勤職乃冒昧受人愚弄耳似此精神不能振作目力昏花豈能復勝尙書之任德瑛著革去太子少保銜降補工部左侍郎仍交部嚴加議處旋授正紅旗漢軍副都統尋經

部議降二級調用 諭曰德瑛三次標畫先行稟件伊雖常川到署人皆以其年老易於愚弄釀成重案其誤公之咎更甚於曠公前已降補工部侍郎伊精力已衰著卽以二品頂帶休致二十年卒

右 國史館本傳

廣雅釋義卷之十一

三

虔禮寶

公本姓楊初任高平縣知縣嘗自題容我山房云退思只願身無  
過守分方知樂有餘釀酒先栽三徑菊看山更擁一牀書可想見  
其爲人

右聽松廬詩話張維屏錄

按虔公字席珍一字律齋號古愚漢軍人乾隆己卯舉人官兵

部侍郎有  
椿蔭堂集



111  
ニ  
ノ  
ヨ  
イ  
シ  
ヨ  
ノ  
ラ  
ノ  
ノ  
ノ

三

孟邵

孟邵四川中江人乾隆二十五年進士改翰林院庶吉士二十六年散館改主事分刑部二十七年補官三十年升員外郎三十二年正月授山東道監察御史四月奏言臣道註銷刑部事件向係按月稽察江西司承辦德克精阿私造賭具一案填註二月初五日日到部三月初三日行文訖續又移稱尙有未獲之犯係經承誤入已結項下伏思造冊註銷原以杜遲延而防遺漏若明明未結之案何得率稱已結查見審各案例限三十日完結如人犯未齊例得展限使司員先期辦彙呈堂或其中有意見參差亦須早爲商定必送各堂畫齊後始准行文開除請嗣後造送註銷冊令承

辦司員呈堂畫齊原稟填註行文日期查對明確始行鈐印毋得舛錯以憑查銷下部議行三十三年充貴州鄉試副考官三十四年奏請定翰林編檢額缺 上斥其不知事理三十五年丁母憂三十七年服闋補貴州道監察御史四十年三月奏請禁鄉會試撥房分中以杜通融屬薦情弊部議以撥房之例原因分校各房試卷優劣不同稍存遷就轉致屈抑什文是以通融分撥且由主考分酌並不假手房考何至有屬薦等弊應照舊遵行又奏言入闈經頭人等歷年承辦朋比爲奸請嗣後仍令地方官選送膳錄書手正身入場分派受卷彌封膳錄對讀四所每十名內選取總書一名責令稽查經頭人等不准混入以杜藉端包攬部議如所

請尋禮部奏查出臨場不准條奏科場事宜之例請將孟邵交部  
察議 上以邵未能諳悉舊例情尙可原且陳奏二條已准其一  
所言尙非無當免其察議四月奏會試磨勘簽出應議之許士煌  
一卷係詩三房李殿圖呈薦主考取中撥與詩四房白麟今白麟  
照例處分其原薦房考轉得置身事外請 敕部釐定處分以昭  
平允 諭曰改撥之卷既由受撥房考閱定方換薦條卽與本房  
呈薦無異受撥以後功過皆當任之譬之部院辦事司員如實有  
所見不妄畫稟或與他人兩議原所常有若其言之果是堂官亦  
當從之房考之於改撥試卷事正相類卽有處分亦由其人之自  
取耳孟邵此奏不必行四十一年 命巡視天津漕務四十二年

命巡視臺灣四十四年升工科給事中四十五年丁父憂四十七年服闋補禮科給事中四十八年五月擢鴻臚寺少卿六月升鴻臚寺卿五十一年二月遷光祿寺卿六月升太常寺卿五十四年遷宗人府府丞嘉慶元年授都察院左副都御史三年以不能約束其子孟恩裕在外宿娼滋事部議降一級調用四年三月補光祿寺卿四月復任太常寺卿五年遷大理寺卿九年以原品休致尋卒子惇裕正三品廕生太常寺博士塔裕候選教諭

右 國史館本傳

蔣曰綸 子子蒲

蔣曰綸河南睢州人乾隆二十五年進士改翰林院庶吉士二十六年散館授檢討三十三年升山西道監察御史尋奏請停止考取內閣中書疏曰臣伏念中書考試原無定期各省士子無從按期齊到臨時招考不過舊寓京城及籍貫附近者詣部報名猝難周徧且查中書一官外升同知內升內閣侍讀及各部主事其官階在主事之下知縣之上而考試者以一論一詩得之未免視爲捷徑妄生倖心卽黃緣奔競亦不能保其必無查每科新進士向以庶吉士主事知縣三項分用合無仰懇 聖恩卽於每科進士引見時三項分用外添內閣中書一項遇有缺出照次銓補在

各士子會試殿試之後詩文字體歷經校閱既無煩另行考試且  
因材器使一歸 聖明簡錄則名器益昭公慎而傲倖躁進之心  
無自而生矣下部議行三十五年二月疏請停止督撫指名揀發  
人員略言臣閱邸鈔山東巡撫富明安奏請揀發佐雜並請將原  
比平度州吏目吳淞揀發來東補用伏思佐雜員缺凡揀選發往  
者俱可酌量差委該吏目並非東省必不可少之人卽謂才堪任  
以將來銓補他省何嘗不可故奔走之用惟銓補得缺較遲而揀  
發得缺較速是於該吏目爲便而於公事無關緊要也我 皇上  
聖明坐照洞燭竊道在撫臣諒不敢挾私實試稍行其邀譽沽名  
之計臣亦不敢以逆億之心遽爲揣測但以微末下吏例得在籍

候補原不須赴部投供撫臣何由知其任部候挑而徑行奏請既乖體制復涉嫌疑且本非見任屬員必其信之有素需之甚殷方可破格保請此在道府州縣中且難多得今以吏目得邀專奏或且依託聲勢遇事招搖卽同官亦疑爲督撫素所親厚之人結納交通皆情勢所難免合無仰懇 聖恩嗣後揀發人員築不准督撫指名奏請致開夤緣徇庇之端至吳淞一員業經揀發帶領引見合併聲明得 旨據御史蔣日綸奏請禁督撫指名揀發人員所奏頗爲近理督撫差委需人奏請揀發則發往之人儘可供其隨材委用何必於候補候選人員內指名請揀況伊等是否在京督撫何由豫知形迹之閒易招物議嗣後各省督撫請揀人員



不得於摺內指名附請至所有已經引見之吏目吳淞卽著掣回  
候補不必發往山東三十五年擢戶科給事中三十六年充順天  
鄉試同考官三十七年充會試同考官十月轉禮科掌印給事中  
四十一年丁母憂四十四年服闋補工科給事中旋轉兵科掌印  
給事中四十五年擢順天府府丞兼提督學政五十一年丙午科  
奏請南北中皿零數過半者均加中一名得旨允行五十二年  
擢大理寺少卿旋升光祿寺卿五十六年轉太常寺卿五十七年  
偕禮部尙書紀昀等奏請鄉會試春秋經藝停用胡傳以左傳爲  
主參用公羊穀梁允之五十八年升大理寺卿嘉慶四年升都  
察院左副都御史旋提督山東學政五年正月奏言山東民風質

樸士子亦多安分務學閒有一二不肖之徒恃符滋事鄉愚受其  
哄誘互相依附此等劣生實於地方大有關係惟是文武生員在  
本地方滋訟者學政衙門向無檔案可稽臣到任後卽行知各府  
轉飭各州縣遇有生員干涉訟案者摘取簡明事由隨時登記按  
季彙報到臣以便查覈疏 聞如所請行是月升禮部右侍郎仍  
留山東學政任尋調工部右侍郎來京供職二月轉左侍郎六年  
三月充會試副考官七月仍調右侍郎管理錢法堂事務十一月  
查勘八旗營房等工奏該處所報工程浩繁情形亦有輕重應酌  
量修理其營內官兵所居門樓院牆雖多坍塌之處但比戶稠密  
俱在大圍牆內大牆既經修理則周圍嚴整足資棲止應俟明歲

再令酌量續報交承辦衙門遞年察看輕重情形分案陸續估報查辦至見在應修之房閒牆垣應著該管大臣於春融時卽行興修俾該營官兵得安棲止得 旨允行八年八月卒子子蒲乾隆辛丑科進士改庶吉士洊擢至倉場侍郎緣事革職

右 國史館本傳

工部侍郎霽園蔣公卒於官大宗伯紀公旣爲狀矣其子太僕卿子蒲將奉柩歸睢州與湯夫人合葬於城東新阡而請予爲銘子實悲四十年老友之喪而與太僕談性命之學有深契何得辭按狀公姓蔣氏諱曰綸字金門霽園其號也先世由新建遷睢州至公高祖諱奇猷順治己丑會試副榜舉鄉飲大賓輸穀賑饑祀鄉

賢曾祖諱文臣祖諱禧運父諱辰祥乾隆壬戌科進士改庶吉士  
三代皆 贈如公官庶常公不壽公早孤太夫人撫之有成弱冠  
入州學累試冠軍食餼歲歉鬻鄉人女侍太夫人既而歸之不取  
其直鄉人稱其厚德丙子舉於鄉庚辰成進士爲予同考所薦士  
改庶吉士公方少年穎秀偕謁予師金宗伯海住先生顧大理息  
存先生兩師與庶常公爲壬戌同年喜予得人辛巳授職編修充  
國史館纂修總裁劉文正賞其修書盡心不詭隨丙戌保送御史  
戊子補山西道監察御史巡視西城發猾吏利誘某婦案繩以法  
奏請每科會試取錄內閣中書又奏督撫不得指名揀發人員皆  
得 旨允行晉戶科給事中轉禮科掌印給事中辛卯充順天鄉

試同考官壬辰充會試同考官丙申丁母憂己亥服闋補工科給事中轉兵科掌印庚子擢順天府府丞提督學政與金臺書院諸生講貫成就多士丁未晉光祿寺卿洊擢太常大理寺卿嘉慶己未升左副都御史奉 命視學山左未幾升禮部右侍郎轉工部左侍郎辛酉充會試總裁壬戌調右侍郎管理錢法堂事務時嗣君擢官罔卿父子同列眞盛事也太僕君獲異傳參同悟眞之學實有所得公亦心知其意曰吾老矣不能學也不失吾眞可矣嘉慶八年春感微疾數日端坐而逝時二月二十九日也距生於雍正己酉年某月日年七十有五配湯夫人文正公元孫女少勤苦孝於姑勤儉持家先公八年卒子三子蒲乾隆辛丑進士由庶吉

士改主事游至太僕寺卿次子藩蔭生廣西北流縣知縣次子藻  
孫三恩銘恩鏞恩鍾女四孫女三以某年月日合葬銘曰  
翹翹嘉植先我枯厥子拱壁翁莫扶睢州貽壺儷孔都庇爾松根  
苓於菟

右墓誌銘朱珪撰

嘉慶八年二月二十九日工部侍郎蔣公霽園卒其長子太僕寺  
卿子蒲以公與余交最久且相知最深以公行狀相屬且云太夫  
人歿時僅有傳一卷今將合葬於睢州城東新阡亦乞臚一二實  
行垂諸永久余誼無可辭乃據所聞見臚列行實而爲狀曰公姓  
蔣氏諱曰綸字金門霽園其別號也先世居江西新建元末遷河

南睢州耕讀相傳世有隱德至半坡先生爲公高祖諱奇猷順治  
己丑會試副榜考授推官舉鄉飲大賓以捐穀賑饑奉 旨旌門  
崇祀鄉賢 大清一統志有傳曾祖諱文臣增貢生祖諱禧運廩  
貢生考授學正父諱辰祥乾隆壬戌進士翰林院庶吉士皆 贈  
如公官公天性孝友幼丁庶常公艱哀毀盡禮兄曰誠早歿弟曰  
京公課之爲名諸生國子監肄業候選訓導壬辰卒於京邸公撫  
姪如子致其成立後官山東泰安縣知縣卒無子公爲立後公弱  
冠補州學生累試冠軍食餼爲孫虛船先生蔡葛山先生所賞鑒  
居鄉多義舉家故貧同邑某聘妻未婚值歲歉欲鬻爲人妾女聞  
痛不欲生公與其質出侍太夫人後某又欲鬻於富商而以其半

來贖公念某母老無孫以女歸之不取其值某亦悔悟今其子孫  
繁衍邑人稱公德不衰丙子舉於鄉座師爲羅徽五先生鄭炳也  
先生欲擬元以三場微疵未果庚辰成進士出朱石君先生房座  
師爲蔣質甫先生秦味經先生介野園先生張有堂先生改庶吉  
士習國書雖讀書中祕而不改儒素之風亦不染聲氣之習垢衣  
敝履神志脩然詞館前輩皆以爲可親而不可狎也辛巳散館授  
職充國史館纂修官所撰列傳有爲總裁劉文正公簽商者可從  
則從不可從必反覆考辨疏通證明無一字之遷就文正公反以  
此重之余於公爲同學與公居密邇常相過從見公遇師友慶弔  
皆從厚飲助初不以匱乏形儉濫嘗記其乞假歸里迎太夫人入



都苦無貲未卽行待秋俸以資僕馬適介野園先生卒同人約釀金爲助公括囊篋僅足五十金盡出以贖或謂宜稍爲路途計公曰畱此亦不足具資斧不如使吾心無虧缺也丙戌保送御史初未及公劉文正公曰是嘗斷斷與我爭者眞御史才也獨舉公第一戊子授山西道監察御史稽查舊太等倉力除積弊爲左都御史范公所重巡視西城聞某吏素橫奸未發會兵馬司吏目案呈有民人控婦悍求出一事公察婦無悍容而詞色悲痛其夫又說病不面質乃密詢其幼子得某吏平日利誘計得婦爲妾狀一鞠卽服乃置諸法乾隆三十三年奏請定用內閣中書例略云中書考試原無定期各省士子無從按期齊集臨時出示招試不過舊

寓京城及籍貫附近者詣部報名猝難周徧且查內閣中書一官  
外升同知內升內閣侍讀及各部主事其官階原在主事之下知  
縣之上而考試者以一論一詩得之未免視爲捷徑妄生倖心卽  
資緣奔競亦不能保其必無臣愚以爲每科新進士向以庶吉士  
主事知縣三項分用合無仰懇 聖恩卽於每科新進士引 見  
時三項分用外添用內閣中書一項遇有缺出照次銓補在各士  
子會試 殿試之後詩文字體歷經校閱旣無煩另行考試且因  
材器使一歸 聖明簡錄則名器益昭公慎而僥倖躁進之心無  
自而生矣奉 硃批所奏是該部速議具奏經禮部議准遂著爲  
令二十五年奏請禁督撫指名揀發人員略云在部投供候選各

官於督撫本非見任屬員何由知其任部候挑而徑破例保請既乖體制復涉嫌疑且恐該員得邀專奏或且依託聲勢滋生弊端請嗣後揀發人員槩不准督撫指名奏請奉 上諭御史蔣日綸所奏頗爲近理督撫等差委需人既經奏請揀發則發往之人儘可供其隨材委用何必於候補人員指名請揀況伊等是否在京督撫等何由預知形迹之閒易招物議日久且恐漸滋流弊嗣後各省督撫請揀人員不得於摺內指名附請將來河工請揀人員摺內附請之處亦著永行飭禁旋授戶科給事中轉禮科掌印給事中辛卯充順天鄉試同考官所得如李君世望沈君步垣沈君琨方君維祺翁君樹棠陳君鴻舉沈君杲之丁君志誠皆一時知

名士壬辰充會試同考官所得如裴君謙方君大川范君來宗李君鎔金君光悌朱君芑星李君嗣方君煒亦稱極盛丙申丁太夫人憂回籍己亥服闋補工科給事中轉兵科掌印給事中庚子春升順天府丞提督學政管理金臺書院延師必慎不藉脩脯助友朋訓迪必嚴亦不以月課應故事所成就者如吳君邦慶王君麟書桂君芳旋君杓蔣君攸銛白君鎔林君天培穆君隆阿李君熨李君光先李君光里皆蔚爲人望時文侍郎遠舉年未弱冠公閱其文卽識爲偉器曾許之云非惟才俊亦卜厚福不信九方相馬之識請觀豐城射斗之光今果如公言陳君預未第時將應試適其父望吏議或欲沮其入場公深賞其文弗爲浮議惑遂得入泮

第一後凡課藝皆公所指授卒成進士其弟雲亦出公門成進士  
廷試第二人蓋公究心經義於源流得失能識其真嘗選訂諸  
家制藝自乾隆丙申至嘉慶己未閱二十四年乃成書所得者本  
深故經其指授皆能掉鞅文場也聞公 召見時 皇上嘗以知  
文造士見許固有由矣丁未晉光祿卿歷太常大理寺卿嘉慶己  
未春升副都御史是年冬奉 命視學山左甫試青州一郡旋升  
禮部右侍郎調工部左侍郎奉 旨回京辛酉充會試總裁得士  
馬有章等二百七十人冬奉 命考取宗學景山各官學教習千  
成調工部右侍郎管理錢法堂事務計公服官四十餘年矢慎矢  
公常如一日秉氣素厚年登耄耋視聽不衰近歲步履少艱猶矍

直無虛日 皇上屢 溫語慰問公聞 命感激愈加奮勉二月  
二十日適值 御門公偶感風寒猶力疾先期赴 西苑具摺陳  
奏歸仍飲食如常太僕躬侍左右至二十九日神氣稍減旋進葷  
餌端坐而逝年七十有五公元配湯夫人睢州湯文正公元孫女  
年十九歸公家貧盡出奩具貨以度日自甘粗糲日以一錢易油  
紡織佐公讀妯娌中有豔飾奢華者相形之下夫人處之泰然及  
公貴顯夫人儉約如平時侍太夫人疾躬奉湯藥衣不解帶者三  
閱月撫庶子女如己出御下無疾言遠色慈善好施與遇人困阨  
輒爲之垂涕常以兒衣與匄者吳香亭先生曾詳其事於本傳性  
愛淡泊晚年長齋奉佛先公八年卒子三長子蒲乾隆辛丑進士

由庶吉士歷官太僕寺卿次子藩以公蔭授廣西北流縣知縣次子藻孫三長恩銘次恩鏞次恩鍾女四女孫三

右行狀紀昀撰

蔣子蒲

蔣子蒲河南睢州人乾隆四十六年進士改翰林院庶吉士四十九年四月散館改吏部以主事用十二月補稽勳司主事五十一年遷員外郎五十四年二月京察一等八月推升刑部陝西司郎中九月奏留吏部補驗封司郎中五十七年京察一等五十九年擢內閣侍讀學士六十年丁母憂嘉慶二年服闋三年補原官四年四月遷太常寺少卿六月轉通政司副使六年擢太僕寺卿八

年丁父憂十年五月服闋六月補原官七月遷宗人府府丞十一年六月轉都察院左副都御史九月遷工部右侍郎十二年充順天鄉試副考官十三年二月調倉場侍郎七月以北運河盛漲糧運艱阻 命往天津截留後漕糧暫儲北倉八月偕同官達慶奏北倉剝運漕糧其一百二十餘萬石若按期全運京倉恐內河凝凍辦理不及請運京倉一百萬石餘存通倉 諭曰本年五月間會據該侍郎等奏京倉運米路途較遠請將本年文武俸米二十萬石改貯城外四倉以便回空迅速當經降旨允行原不過一時權宜豈能動輒做照辦理今該侍郎又爲此奏不過欲使將來京員俸米仍赴通倉關領先爲此嘗試之奏一經准行勢必於二



十餘萬石之外續請多貯通倉翼改舊章殊不思偷漏回漕諸弊皆將由是而起斷不可行達慶蔣子蒲著傳旨申飭十四年二月以北新等六倉米色微變命以六部郎中降補五月復以通州中西二倉白米虧缺及失察倉書高添鳳私出黑糧重領米石褫職十月上五旬萬壽子蒲以編修起用十二月以前在工部侍郎任內失察書吏冒領戶部三庫銀物部議降調上加恩改爲畱任十五年五月擢司經局洗馬九月充日講起居注官十七年二月大考二等八月遷國子監祭酒十八年正月擢工部左侍郎先是駐守西陵貝勒永珩奏報泰陵寶城有應修工段命子蒲勘估相符派吏部左侍郎凱音布等承修二月凱音布奏

稱原報之外尙有工段應修復 命子蒲偕刑部左侍郎景祿往  
勘子蒲仍執前奏 上以諸臣所言互異 命總管內務府大臣  
蘇楞額往偕泰甯鎮總兵那彥寶詳查三月查明凱音布等浮開  
工段子蒲原估亦有疎漏部議降二級調用八月補宗人府府丞  
十一月轉都察院左副都御史十九年五月遷內閣學士兼禮部  
侍郎銜六月復擢倉場侍郎二十年以廣惠寺僧明心更名王樹  
勳冒捐知府經刑部訊出明心爲僧時子蒲曾從受戒 諭曰該  
犯假託佛法聳惑聽聞將子蒲爾時已爲內閣侍讀學士係四品  
京堂官乃惑於異說受彼五戒實屬有玷官箴著卽革職二十四  
年故子恩銘浙江候補運同

國史館本傳

右 國史館本傳

達椿 子薩彬圖

達椿鑲白旗滿洲人烏蘇氏祖素柱官員外郎父索秦官郎中乾隆十七年舉人二十五年成進士改庶吉士二十六年散館命留館教習二十八年散館補戶部主事三十三年四月遷員外郎六月擢翰林院侍講九月充日講起居注官三十四年四月轉侍讀十一月擢國子監祭酒三十五年十一月遷詹事府詹事三十六年四月授大理寺卿三十九年九月奉旨上書房行走四十年九月兼公中佐領四十三年六月擢內閣學士兼禮部侍郎四十四年二月命充四庫全書館總閱旋擢禮部右侍郎兼正紅旗漢軍副都統四十五年四月調鑲黃旗滿洲副都統十二月以

會同四譯館屋壞致斃朝鮮使臣部議革職畱任 從之四十七  
年四月以 常雩大典 壇內天鐙懸挂不全部議革任得 旨  
寬免十二月兼署工部侍郎五十三年失察本部書吏盜用印信  
部議革任 上復免之五十四年正月調補內閣學士兼禮部侍  
郎三月以上書房曠班七日奉 旨革職並予杖仍畱上書房效  
力行走四月 諭曰達椿身係滿洲在上書房行走怠惰予以革  
職固屬咎有應得但業經責懲畱在上書房效力著加恩補授翰  
林院侍讀學士五十六年二月大考三等降侍講四月補侍讀嘉  
慶三年三月大考四等奉 旨從寬降爲檢討仍罰俸四年十月  
擢司經局洗馬五年正月 諭曰達椿前因上書房曠班降調其

過尙輕彼時劉墉亦緣此降官今劉墉已爲大學士達椿尙未遷  
擢所有恆傑之內閣學士缺加恩著達椿補授尋兼正白旗蒙古  
副都統時達椿子薩彬圖亦任內閣學士得 旨內閣學士達椿  
班次著在伊子薩彬圖之前五月擢禮部右侍郎六月調吏部右  
侍郎七月兼翰林院掌院學士九月遷都察院左都御史十一月  
疏言御史明保兩耳重聽不能跪起訥素鏗額久患痰疾步履維  
艱每值引 見差缺輒先期告假以圖掩飾一時各科道等相率  
效尤避勞就逸請 旨將明保訥素鏗額開缺並請此後儻有三  
次告假者照規避例題參 從之先是薩彬圖以陳奏苛細失當  
降筆帖式發往 萬年吉地效力行走至是奉 諭達椿見已年

老薩彬圖著加恩回京以六部筆帖式補用五年正月 賜紫禁  
城騎馬兼鑲藍旗蒙古都統七月遷禮部尙書六年三月充會試  
副考官四月調鑲黃旗漢軍都統七年六月患病給假調理尋卒  
諭曰禮部尙書達椿持躬謹飭前在上書房行走多年尙屬勤  
慎昨因患病賞假調理方冀就痊茲聞溘逝殊堪軫惜著加恩派  
奕純帶領侍衛十員前往奠醑其任內降罰處分悉予開復伊子  
薩彬圖見加恩補授內閣學士候百日孝滿再行供職尋 賜祭  
葬如例子薩彬圖見任盛京戶部侍郎倭興厄見任二等侍衛兼  
公中佐領甯古齊見任左庶子薩哈達廕生見任通政司筆帖式

右 國史館本傳

薩彬圖

薩彬圖乾隆四十五年進士以主事用分戶部尋補官五十二年  
遷員外郎五十四年充貴州鄉試正考官五十六年四月擢翰林  
院侍講學士十二月充日講起居注官五十七年二月轉侍讀學  
士四月遷詹事府少詹事嘉慶元年擢內閣學士兼禮部侍郎銜  
四年三月授鑲藍旗蒙古副都統兼公中佐領四月以瀆奏原任  
大學士和珅隱匿財產訊誣 諭曰前據薩彬圖奏和珅財產必  
有埋藏寄頓等弊請密派大臣研究朕以其言不足取詳加開導  
不必苛求昨又據薩彬圖具奏向伊親戚問出和珅家掌管金銀  
內帳使女四名請交伊一人至慎刑司提訊所言更屬乖謬薩彬



圖並非原派籍沒和珅之員乃忽思越俎欲以一人獨訊數女子且開列使女之名形之奏牘達於朕前實爲從來未有之事若卽加駁飭恐不足以服其心是以特派怡親王永琅尙書布彥達賚同薩彬圖提集使女等再三究訊仍無指實是薩彬圖無知妄瀆之罪百隊難辭矣朕所以辦理和珅者原因其蠹國病民專擅狂悖薩彬圖屢以爲言竟似利其私蓄者豈視朕爲好貨之主敢以嘗試乎薩彬圖著交部嚴加議處部議革職 上加恩賞七品筆帖式 命往 萬年吉地效力十一月 上以其父年老 召來京五年閏四月 命以六部主事用十一月補戶部主事六年二月擢通政司參議五月遷太僕寺少卿七年復授內閣學士兼禮

部侍郎銜尋丁父憂八年十月授鑲藍旗蒙古副都統十一月授盛京工部侍郎十年查出領催徐秉鑑賄縱民人私入官山伐木緝獲各犯寘於法十一年八月回京授禮部左侍郎兼正黃旗蒙古副都統十一月調倉場侍郎十二年授漕運總督十五年四月倉場侍郎福慶等奏參倉儲虧缺上命戶部左侍郎託津等盤驗虧缺數目並短收浮出重領偷竊等弊將歷任倉場侍郎分別懲辦薩彬圖任內亦有失察黑檔重領米石之案命以三品京堂降補五月補光祿寺卿八月授盛京戶部侍郎十六年以奉天等處被災薩彬圖未經奏報降四級畱任復以災民流徙出邊諭曰薩彬圖管理邊門是其專責乃毫無覺察實屬溺職薩彬圖

國朝名臣列傳卷之四十一  
三  
屢經獲咎棄瑕錄用復不實心任事著卽革職二十年故

右 國史館本傳

童鳳三

童鳳三浙江山陰人由廩生於乾隆二十二年南巡進獻詩賦考取一等欽賜舉人授內閣中書二十四年在軍機處行走二十五年會試中式進士改翰林院庶吉士二十六年散館授編修三十年充廣西正考官授湖南學政三十一年丁父艱回籍三十三年服闋赴京旋授廣西學政三十五年廣西舉行庚寅恩科鄉試朱一沛原籍詩經臨場私改易經中式奏聞究訊並請嗣後舉貢生員所籍經書以入學原冊爲定由監生應試以上次試冊所注之經爲定將改經之例永行停止下九卿議行三十六年回京三十七年奉旨在上書房行走三十八年升左春坊左中允

三十九年京察一等充順天鄉試同考官四十年擢翰林院侍講  
四十一年轉侍讀四十二年充廣東鄉試正考官回京授陝甘學  
政四十四年御史戈源奏請清釐分省商籍隨偕陝甘總督勒爾  
謹奏查甯夏一府設有商學歲科兩試取進文童八名歲試取進  
武童八名該處承商之家俱係平涼慶陽二府及甯夏府屬五州  
縣人並無外省承充當商者今准部議必須外省真商親子弟姪  
方許應考若本省夥商幫商俱不准錄應請將甯夏商學原定之  
額裁汰以清弊端下部議行四十五年升右春坊右庶子回京轉  
左庶子充日講起居注官四十七年晉翰林院侍講學士四十八  
年轉侍讀學士充武鄉試正考官四十九年升詹事府少詹事五

十一年充文淵閣直閣事授山西學政五十二年丁繼母憂回籍  
五十六年來京奉 旨仍在上書房行走補鴻臚寺卿五十七年  
轉大理寺少卿六十年京察一等嘉慶三年二月升光祿寺卿三  
月升太常寺卿六月充江西鄉試正考官八月授江西學政四年  
二月擢內閣學士兼禮部侍郎三月擢工部右侍郎 召還京充  
實錄館副總裁兼署戶部左侍郎十月授吏部右侍郎提督順  
天學政五年轉左侍郎六年正月按試順德府以病奏請解任  
命進京調理行至眞定卒

右 國史館本傳

Vertical text on the right side of the page, possibly a page number or title, oriented vertically.

Vertical text on the right side of the page, possibly a page number or title, oriented vertically.

特克慎

特克慎郭勒沁齊穆克氏正藍旗蒙古人乾隆二十五年由繙譯生員考取筆帖式三十一年補理藩院筆帖式三十七年升察哈爾游牧主事四十年升員外郎四十八年調理藩院員外郎五十二年授福建督糧道五十四年調汀漳龍道五十六年擢山西按察使五十七年 命以副都統銜前往西甯辦理青海事務五十九年 諭循化貴德等廳令特克慎一體管理並將劫掠過客羊隻及疊劫蒙古牲畜之番賊嚴緝務獲旋獲棍楚克查汗他二犯賞戴花翎六十年九月調庫車辦理事務大臣旋授理藩院右侍郎嘉慶元年奏請車臣汗部落扎薩克貝勒嘛哈什哩 陛見



摺內未將生身熟身聲明 上責之二年三月喀爾喀副將軍蘊  
敦多爾濟奏土謝圖汗野夷佈得持刀斫傷扎薩克齊旺多爾濟  
審明正法 諭曰似此案件理宜將所取之供另夾漢單奏明蘊  
敦多爾濟年幼尙屬可原特克慎亦不知乎著申飭十一月因剿  
平貴州苗匪 上命理藩院行文曉諭眾蒙古王公特克慎具摺  
叩喜 上以其不知政體飭之三年八月授刑部右侍郎正紅旗  
滿洲副都統十二月 命赴三座塔審辦土默特台吉阿薩拉被  
誣謀死胞伯卓理格圖身死案特克慎照稅員西拉布原審以阿  
薩拉起意白幾保等六人同謀均擬凌遲時隨帶司員刑部員外  
郎廣音等再加研訊特克慎以眾犯既已承認不必游移繕摺具

奉廣音等亦呈報軍機大臣代奏 命喀爾喀親王固倫額駙拉旺多爾濟獲密得寶奏入 諭曰特克慎係欽差辦理緊要案件大臣乃照覈員西拉布所辦拘泥已見以致辦理錯謬殊屬無用特克慎卽應革職但念其在理藩院行走多年於蒙古事務尙屬諳悉著加恩賞給七品筆帖式卽由彼處自備資斧前赴烏里雅蘇臺隨將軍蘇赫佐當差效力贖罪四年九月 賞給藍翎侍衛授塔爾巴哈臺領隊大臣七年奉 旨回旗八年正月 命在侍衛處行走授理藩院額外郎中仍 賞戴花翎並 命在 實錄館行走校對蒙古文字十二月補郎中九年二月授內閣侍讀學士十二月授公中佐領十年五月以塔爾巴哈臺領隊大臣任內失察

署同知文海侵用庫銀奉 旨交部議處尋議降一級調用銷去  
軍功一級免其降調十一年正月授正白旗蒙古副都統四月調  
正黃旗滿洲副都統十二月 命偕奉宸苑卿廣興前往喀喇沁  
查訊塔布囊貢楚克多爾濟等控扎薩克納特那吉里第侵吞  
賞銀私賣倉糧各款訊係誣控按例懲治十二年三月 命往密  
雲縣查辦民人張海控六品頂帶石連詐收租銀毆斃民人陳蒲  
案訊係挾嫌誣控擬罪如律五月授都察院左都御史七月署理  
藩院尚書兼管咸安宮唐古忒學托忒學事務八月以塔爾巴哈  
臺領隊大臣任內輪年巡查金廠失察民人龐順倫挖金沙經伊  
犂將軍松筠奏請交部嚴議部議降三級調用抵銷二級仍降一

級調用 上加恩改爲降四級畱任十四年六月授鑲黃旗蒙古都統十二月因病請假半月 上允之尋又請展假一月 諭曰特克慎前因患病給假調治茲復請展限一月伊本係棄瑕錄用之人經朕加恩洊擢至左都御史在任毫無建白且年力衰老不能任事豈可復行展假應卽予開缺特克慎著以二品銜休致十五年正月卒

右 國史館本傳



國朝書獻類徵初編卷九十四補錄

卿貳五十四

蔣子蒲

原任總督倉場戶部侍郎河南元庭蔣公以嘉慶二十四年卒於京師遺命葬杭州道光九年臘月八日其子候補鹽運分司恩銘卜兆於錢唐象山之原公配湯夫人先公卒已葬睢州遂奉湯夫人衣履與公合葬敬於公爲館後進請誌墓勿敢辭按狀公姓蔣氏諱子蒲字南樵一字元庭先世由新建遷睢州至公五世祖諱奇猷順治己丑會試副榜輸穀振饑崇祀鄉賢高祖諱文臣曾祖諱禧運祖諱辰祥乾隆壬戌進士改庶吉士三代均以公父少司

空貴 贈如其官少司空諱曰綸乾隆庚辰進士由檢討累官工部侍郎 因史有傳公爲少司空長子幼承家學博涉通敏弱冠入邑庠乾隆丁酉以拔萃貢成均已亥舉於鄉辛丑成進士改庶吉士甲辰散館改吏部主事丙午升吏部員外郎是年考差已與試以母湯太夫人老病恐遠離陳請扣除嗣後考差皆不與丁未京察一等復陳請留京供職己酉擢驗封司郎中甲寅晉內閣侍讀學士乙卯丁湯太夫人艱嘉慶戊午服闋補原官升太常寺少卿調通政司副使己未湯夫人卒辛酉京畿患水奉 旨督理東塘飯廠公率僚屬綜覈人數散給以時男女以序公振外復捐錢給餅餌俾羸孤幼穉咸得果腹存活者以萬計前後奏疏凡六上

所以推廣 皇仁勤卹民隱者無微不至壬戌擢太僕寺卿癸亥  
丁少司空艱甲子扶櫬歸里合葬睢州城東新阡以湯夫人附乙  
丑終制入都補太常寺卿洊升宗人府丞丙寅調副都御史擢工  
部右侍郎丁卯轉左尋署吏部右侍郎奉 命詣清江查勘河工  
沿途不受地方供頓家丁自給廩食於工段帑項之準估準銷者  
鉤稽年月分析界域條舉詳盡無漏無隱奏入稱 旨是秋充順  
天鄉試主考官戊辰春 欽派淀津召試讀卷官悉心掄才得士  
稱盛是夏以戶部侍郎總督倉場時張家灣及通州康家溝一帶  
河道淤塞芻挽不能前公捐廉濬河躬自督催漕船抵通較往歲  
早二十餘日得 旨獎勵己巳以失察花戶舞弊事罷職是冬祝



嶺賞編修公喜重入詞垣克遂讀書初志壬申大考二等升洗馬  
轉侍講擢祭酒癸酉升工部右侍郎以查勘 陵工險補宗人府  
丞旋以副都御史署理倉場事務晉內閣學士甲戌復以戶部侍  
郎總督倉場公感荷 主知益加奮勉先是通州河經公疏濬閘  
數歲淤墊如故又北運河亦患阻淺公疏奏請 旨迅飭通永河  
道剋日疏濬以利漕運又疏奏北倉米石宜及時開放以裕兵食  
俱蒙 俞旨其他懲吏胥之奸憫丁弁之瘁於明察中加以矜卹  
至今漕員運弁猶追述公遺愛不置乙亥以王某冒捐職官公坐  
議其人未糾參復罷職公前後兩任倉場皆以事累干吏議花戶  
之弊如鬼如蜮其中復有把持之者清釐爲極難失糾冒捐跡涉

朋比實則其人託行善公爲所欺人以房瑄不絕交董庭蘭惜之  
時嗣君方赴浙需次公挈之來南寓杭者三年己卯祝 嘏入都  
患瘍卒年六十有五公性淡泊趨公外齋居一室旁無媵侍事親  
色養烝烝數十年未嘗一日離左右以仲氏作令在遠季又早世  
居常念及爲之忽忽不樂其來寓於杭也登眺湖山愛其深邃語  
嗣君曰吾身後必葬是汝母耐先塋歲久勿徇俗改阡必欲同藏  
做古葬衣冠例可耳延陵季子有言魂氣則無不之何拘形體哉  
今嗣君營葬遺命是遵可謂達於禮而弗徇於俗矣公配湯夫人  
爲文正公五世孫女翰林院檢討懋學公女名門淑德儉以持家  
一遵君姑湯太夫人遺訓先公之卒二十一年子一恩銘孫五光

裕光祿光福光祺光祐孫女六曾孫一自脩銘曰  
士族林列古睢陽惟公挺生勳德光愛名山水來錢唐千秋魂魄  
安此鄉

右墓誌銘胡敬撰

國朝耆獻類徵初編卷九十五目錄

卿貳五十五

曹文植

金士松

豐昇額

佛爾卿額

扎郎阿

哈魯堪

汪承霈

胡高望

秦承恩

--	--	--	--	--	--	--	--	--	--

國朝耆獻類徵初編卷九十五

通奉大夫前署江西巡撫江西布政使司布政使湘陰李桓輯  
卿貳五十五

曹文植

曹文植安徽歙縣人乾隆十七年舉人二十二年 聖駕南巡  
召試二等 恩賞大綬二十五年二甲第一名進士改庶吉士二  
十六年散館授編修二十八年 御試翰詹二等得 旨以應升  
之缺題奏三十一年派教習庶吉士三十二年入直懋勤殿 命  
恭繕華嚴經爲 聖母皇太后祝釐三十三年正月擢右中允充  
日講起居注官四月 御試翰詹 諭曰中允曹文植學問優長

因內廷有承辦事件未得與諸臣一體考試著加恩加一級十二月擢翰林院侍讀三十四年擢右春坊右庶子三十六年五月充廣東鄉試正考官九月授江西學政三十八年擢侍讀學士三十九年十月任滿回京十二月 命在南書房行走四十年十月充武殿試讀卷官擢詹事府少詹事十一月授浙江學政十二月擢詹事府詹事四十一年丁父憂四十二年叩謁 孝聖憲皇后梓宮 諭曰曹文植著賞緞一匹卽令回籍四十三年服闋赴補六月 命仍在南書房行走未得缺以前加恩食俸是月授都察院左副都御史七月都察院奏山東濰縣民人王吉控縣書劉鐸違例浮收錢糧 命文植前往查辦事竣回京 派查右翼覺羅宗

學四十四年二月充四庫全書館總閱官六月 派閱辦大清一  
統志十二月充三通館副總裁並同辦遼史元史遷刑部右侍郎  
四十五年三月調兵部右侍郎充武英殿總裁五月充殿試讀卷  
官十一月兼署工部右侍郎四十六年四月調署戶部右侍郎四  
十七年京察議敘加一級四月以失察 常雱大典承辦草率降  
三級畱任補戶部右侍郎四十八年正月充殿試讀卷官十一月  
兼管順天府尹事務五十年二月 派往辦理明陵工程四月  
海昇毆斃妻吳雅氏以自縊報經左都御史紀昀刑部侍郎景祿  
杜玉林審驗以自縊定擬具奏其妻弟貴甯復控檢驗不實 上  
命文埴與伊齡阿覆驗得毆斃狀據實奏 聞 諭曰此案曹文



同... 卷之十一  
二

埴與伊齡阿卽能秉公據實具奏不肖扶同徇隱頗得公正大臣之體甚屬可嘉著交部議敘五月晉擢戶部尙書八月 命與伊齡阿同往通州督辦漕務 諭曰本年漕船行走濡滯視往年抵通日期遲至數月而今歲回空較之上年十月回空者尙早各該幫銜尾南下竟無守凍之虞可見事在人爲果能實力籌辦自必立見成效前諭曹文埴等赴通令其察看情形通權辦理茲漕船俱已起卸完竣一律回空洵不負委任之意曹文埴伊齡阿著交部議敘以示嘉獎五十一年正月京察議加一級二月 命赴浙江查辦倉庫虧缺旋 命大學士阿桂赴浙會同查辦文埴等將通省倉庫虧缺已未彌補實數詳覈定議並酌立善後章程具奏

得旨允行三月浙江撫臣福崧奏籌辦柴塘歲修事宜諭曰  
此事卽著交曹文植等於查辦虧空之便親赴該處會同地方官  
詳悉履勘將從前石塘是否當建及柴塘坦水如何又須添建歲  
修並福崧另奏石料厚薄配搭成砌是否可行之處一併據實覆  
奏毋得稍存回護曹文植等皆係曉事之人必能仰體朕意也尋  
奏柴塘日受潮汐往來汕刷勢不能不有蹲蹠今旣以爲坦水若  
不隨時補修不能抵禦大溜坦水旣有歲修則坐爲坦水之柴塘  
亦應一律籌辦足以當潮勢之內衝而爲石塘之保障得旨如  
所請行當曹文植赴浙時奏懇給假歸省至是諭曰前雖有旨  
令曹文植於查辦虧空海塘諸事完竣後回籍爲伊母祝壽但浙

省盤查虧空既須逐細清釐而海塘事宜尤關緊要著傳諭曹文  
植務須悉心籌畫一切查辦周妥覆奏後再行回籍補祝多住數  
月有何不可八月文植回京供職九月 上以阿桂曹文植清查  
倉庫審辦失實交部嚴議部議降二級 上從寬畱任五十二年  
文植陳請終養 諭文植著准其終養伊久直內廷辦理部務頗  
爲出力能事善施恩加太子太保銜並御書扁額賞給伊母以示  
優眷五十四年 諭曰明年朕八旬萬壽前經俯允王公大臣之  
請舉行慶典在籍大學士蔡新尙書曹文植自必進京祝嘏第念  
蔡新年逾八旬而曹文植之母則年已望九若屆期蔡新精神矍  
鑠曹文植之母亦復體履康強伊二人自當前詣闕廷以申慶祝

之誠儻蔡新精力未能如舊曹文植之母亦漸形衰老則蔡新高年跋涉既非所宜而曹文植遠赴京師不能朝夕侍養伊母子亦未免彼此懸戀在蔡新曹文植俱係大臣心殷蔡向必不肯以私情上達因思福建安徽督臣近在同省見聞較切務宜畱心體察如蔡新曹文植有不能遠離之勢該督撫卽應力爲阻止儻伊二人以朕八旬萬壽未能與在廷臣工共申慶祝卽令在籍望闕行禮均足以展其忱悃也著該督撫將此旨告知蔡新曹文植以示朕優加體卹至意文植奏以見在情形來年儘可進京叩祝或臨時果有未能遠離之勢自當揣量不敢稍涉勉強總之上體 聖意下順親心諸事皆從眞實以稍抒感慶喜懼之悃得 旨若能

來朕誠喜但不可稍涉勉強當體朕心五十五年文埴至京叩祝  
聖壽 上賜文埴母緞二端貂皮十張五十六年二月 御試  
翰詹各官 諭曰編修曹振鏞雖考列三等但觀其才具尙堪造  
就且係曹文埴之子著加恩升授侍講四月 上賜文埴 御製  
圭瑁說摺圭墨刻二卷及 御製做蘇軾超然臺說墨刻一卷文  
埴具摺奏謝得 旨嘉獎六十年恭逢 高宗純皇帝御極六十  
年文埴奏請赴 闕申祝 諭曰曹文埴奏請進京瞻覲隨班慶  
祝一摺曹文埴於五十五年來京祝嘏逮今已逾五載該尙書瞻  
戀之忱自屬出於真切朕亦思欲一見惟念伊母年近九十侍養  
需人曹文埴實未便於遠離今閱所奏伊母體履甯適優游壽宇

中心感悅令曹文植早治行裝代申葵向等語情詞悃款又未便  
卻其所請著傳諭曹文植自行酌量如屆期伊母氣體微覺軟弱  
曹文植自不可遠涉來京若伊母仍舊強健亦不必急於起程著  
計算日期於萬壽前趕到熱河於隨班行禮後迅速歸里侍奉既  
得伸其就瞻之念兼可遂其奉養之私以示朕體卹至意將此諭  
令知之八月文植遵 旨來京 恩賜文植之母 御書扁額壽  
佛文綺貂皮等件十一月文植刊刻四庫全書總目工畢進呈  
御覽並請交武英殿照向辦官書之例刷印發坊領售得 旨俞  
允嘉慶三年在籍卒五年二月 諭曰原任戶部尙書曹文植原  
任左都御史胡高望俱於前歲先後溘逝其時正值 皇考聖體

遑豫朕心實深焦切未經加恩賜卹今思曹文植在南書房行走  
有年胡高望久直上書房又曾在南書房行走均屬勤慎身後未  
蒙恩卹殊堪軫念曹文植胡高望俱著加恩補行給予卹典該部  
察例具奏其原任內如有降革處分著俱准其開復以示優卹舊  
臣至意事下禮部題奏 賜祭葬如例諡文敏四月 諭曹文植  
之母年逾九旬著加恩賞給大緞二端卽交曹振鏞帶回是日又  
賜文植之母人蔭半斤子振鏞見官戶部尙書

右 國史館本傳

金士松

金士松江蘇吳江縣人由宛平縣附生中式乾隆二十一年順天舉人卽改歸原籍二十五年成進士 朝考第一名改庶吉士三十一年散館授編修三十三年四月大考二等擢侍讀二十四年充會試同考官旋入直懋勤殿 命寫經爲 孝聖憲皇后祝釐三十六年充福建正考官尋授廣東學政三十八年遷左庶子三十九年遷侍讀學士四十年正月入直南書房充日講起居注官十月充會試副考官四十一年正月轉侍讀學士二月擢少詹事六月遷詹事充文淵閣直閣事四十三年充四庫全書總閱官四十四年正月丁本生母憂四十五年服闋恭遇 高宗純皇帝南



巡迎 鑾道左郎奉 命還京旋授順天學政士松以舊曾寄籍  
辭 詔勿迴避是秋當更代 命仍畱任四十七年擢內閣學士  
四十八年三月遷禮部侍郎 命仍畱順天學政任四十九年調  
兵部右侍郎五十年正月士松年甫五十有七與千叟宴 特命  
賦詩並 賞賚同一品八月以病乞解職奉 旨金士松著解學  
政任回京調理其兵部侍郎不必開缺五十一年正月病痊閏七  
月調吏部右侍郎九月仍授順天學政五十二年轉吏部左侍郎  
五十四年充經筵講官五十五年以良鄉縣拔貢生閻廷樺 朝  
考詩文疵謬 命卽褫革并將士松議處尋部議革職 上寬免  
之五十六年充武英殿總裁奉 命校勘石經五十七年充浙江

正考官六十年充江西正考官六月遷都察院左都御史嘉慶元年充會試正考官六月遷禮部尙書旋充 玉牒館總裁二年調兵部尙書四年 賜紫禁城騎馬並 命回本衙門辦事不必在南書房行走五年正月扈 蹕謁 裕陵適士松於途次嬰病命先回京初九日卒於官遺疏入 諭曰金士松在內廷行走有年襄理部務勤慎供職今聞溘逝殊爲軫惜所有應得卹典該部察例具奏尋 賜祭葬如例諡文簡入祀賢良祠子芝原己亥舉人官內閣侍讀孫宗培以一品廕生見官刑部安徽司員外郎

右 國史館本傳



豐昇額

豐昇額滿洲鑲黃旗人姓鈕祜祿尙書公阿里衮之子乾隆二十五年由拜唐阿授三等侍衛三十四年襲一等公擢領侍衛內大臣三十五年六月管理三庫事務旋署兵部尙書七月授御前大臣兼鑲藍旗蒙古都統總管內務府大臣三十七年二月將軍溫福疏劾參贊五岱乖謬上命豐昇額偕額駙色布騰巴勒珠爾赴金川軍營詢問五岱旋發伊犁效力贖罪三月命豐昇額畱軍營授參贊大臣四月諭曰豐昇額奏事列名在阿桂前但阿桂歷練軍務豐昇額甫經學習仍著阿桂列名在前豐昇額列名在後豐昇額不可稍存意見致有掣肘阿桂亦不得推諉務須

和衷辦理期於軍務有益五月豐昇額以大礮擊傾東瑪賊寨翌日飭官兵進攻聞賊營槍聲不絕知賊尙眾佯退突令章京佛倫泰富爾賽偪賊寨賊驚懼侍衛伸達蘇以大礮斃數人賊少卻官兵力戰賊或墮崖死或燒斃餘皆遁遂克東瑪 上嘉之六月攻固卜濟山梁豐昇額偕舒常馬彪等率兵抵色爾渠令烏什哈達巴三泰等左右進攻舒常馬彪等分應豐昇額由中路進近賊卡賊盡竄毀其石卡次日復以大礮擊之烏什哈達等率兵潛下嚴搗豐昇額由山徑策應屢戰敗之盡獲其礮卡七月仍以礮擊賊礮令烏什哈達佛倫泰等設伏彰霽巴三泰等據西北峯斷別斯滿來援賊豐昇額等突入殲賊甚眾克色爾渠大礮及卡房百餘

十一月豐昇額與溫福克明郭宗沿途礮卡敗賊於公雅山十二月克嘉巴山焚念經樓進次布朗郭宗克底木達等寨擒僧格桑之父澤旺詳見溫福傳是月授豐昇額爲副將軍溫福等議分三路進溫福由功噶爾拉進攻噶爾薩爾阿桂由僧格宗經納圍納扎木至當噶爾拉同取噶拉依豐昇額由章谷吉地赴綽斯甲布與舒常合取勒烏圍疏入 上嘉之自是豐昇額遂駐兵宜喜三十八年四月晉太子少保六月木果木師潰七月奏據綽斯甲布土司來告賊謀斷宜喜糧臺見在實力防守智固山 諭曰豐昇額在宜喜軍營原屬三路並勦及聞溫福軍營失事諭令撤兵今阿桂旣退得地土氣復申各土司中聞阿桂旣出與豐昇額據爲

臣等謹將用兵情形  
一  
犄角亦斷不敢復萌動搖之心並可鎮撫綽斯甲布眾心豐昇額  
必當仍駐宜喜爲是其善體朕旨妥協行之十一月阿桂收復小  
金川豐昇額奉 命移兵丹壩三十九年二月晦夜半豐昇額自  
達爾扎克之北山澗越石躡雪以進黎明抵凱立葉山麓令侍衛  
那木扎等過嶺直入見大峯六俱有礮賊矚官兵將近槍石並發  
官兵直前衝擊又同侍衛彭霽明仁取第二峯瑪爾占伊達里第  
取第三峯令五岱於三峯下立營議取第四峯奏 聞 諭曰凱  
立葉一路旣難邁進原不應過於株守今畱五岱在凱立葉牽綴  
賊勢而豐昇額前赴阿桂軍營合力進攻兵勢更盛若果進至勒  
烏圍則凱立葉之賊自可不攻而潰十月 賜元狐帽貂馬褂是

月攻克凱立葉山梁十一月攻格魯克古了口大兵橫越山溝奪  
山梁五獲碉五十寨落三百遂通丹壩奏入 上深嘉悅四十年  
正月偕阿桂奏克康薩爾四月克榮噶爾木城及木思工噶克了  
口碉座進攻下巴木通碉柵盡克勒吉爾博山梁進據得式梯官  
寨 命優敘五月進攻遜克爾宗圍將合分三路並進賊不能支  
連取石碉十二賊奔箐盡殲之 諭曰遜克爾宗一帶攻取年餘  
尙未得手今豐昇額全行奪取實爲奮勉出眾豐昇額乃巴圖魯  
額亦都之孫其果毅公爵卽係額亦都傳襲前將軍兆惠因平定  
準噶爾回部曾於公爵上加封四字今豐昇額能繼其祖著於果  
毅字下再加繼勇二字以示優獎七月攻章噶豐昇額督官達色



仁和等左右分攻海蘭察攻其正面賊於礮外置壕三壕外立木  
柵官兵毀柵鋪壕乘之緣礮角而上從礮頂下壓賊盡竄克之並  
得其旁木城八月阿桂分兵四面攻勒烏圍豐昇額策應克勒烏  
圍官寨及轉經樓喇嘛寺捷 聞得 旨優敘十二月克格隆古  
科布曲山梁四十一年正月克瑪爾古當噶山梁遂進圍噶拉依  
賊巢奏入 諭曰副將軍豐昇額本襲公爵復加賞繼勇名號著  
再賞以一等子暫令伊弟布延達賴承襲俟豐昇額生子後仍令  
伊子承襲是月調戶部尚書 賞戴雙眼花翎二月金川平 賜  
緞四十端銀四千兩四月凱旋 上行郊勞禮 恩賜 御用鞍  
轡馬一匹 命圖像於紫光閣 御製贊曰宜喜弗動定見識機

後副西路親勵戎衣遜克爾宗督兵進取國之蓋臣再繼乃祖是月管崇文門稅務旋署左都御史兼署理藩院尙書十月授步軍統領兼管太常寺樂部四十二年四月調正白旗滿洲都統兼管禮部事務五月 諭曰尙書公豐昇額昨在金川奮勇著績克紹祖風且能勉承伊父阿里袞忠誠素志曾降旨於所襲果毅公爵加繼勇二字以示獎勵所有阿里袞原襲公號亦著加此二字以昭世臣濟美是年十月卒 諭曰尙書果毅繼勇公豐昇額秉性忠誠奉職勤恪昨以副將軍征剿金川殫力宣忱奮勇著績能承父志以紹祖風深可嘉尙是以降旨於伊所襲果毅公爵加繼勇之號以獎勳勞伊年富力强正堪任使乃於前月忽邁沈疴卽派

太醫院堂官診視頻加存問並賜人蔭以翼速痊遽聞溘逝深爲  
軫惻著加恩賞給陀羅經被派散秩大臣一員帶領侍衛十員往  
奠茶酒並著加恩晉贈太子太保復 諭免其代賠伊父未完銀  
二千七百餘兩 賜祭葬諡誠武繼子明安襲公爵見官乾清門  
頭等侍衛

右 國史館本傳

佛爾卿額

佛爾卿額圖伯特氏蒙古正白旗人祖領侍衛內大臣拉錫自有  
傳佛爾卿額於乾隆二十五年授鴻臚寺贊禮郎二十六年授藍  
翎侍衛二十九年升三等侍衛三十五年授公中佐領四十年升  
二等侍衛四十九年擢鴻臚寺卿五十四年元旦上御太和殿  
受賀行禮官有越至甬道者佛爾卿額未將排班贊禮人員查出  
交部嚴議尋議降二級上從寬畱任五十五年升頭等侍衛五  
十九年九月擢通政使司副使仍兼鴻臚寺行走十二月遷太僕  
寺卿嘉慶三年七月授鑲紅旗蒙古副都統兼上駟院卿九月擢  
內閣學士兼禮部侍郎四年授鑾儀衛掌衛事尋命往庫倫辦

事六年授理藩院右侍郎仍兼管鴻臚寺事務八年正月授察哈爾都統九年察哈爾部落孀婦察罕達里主使家奴殺斃都爾爾一家四命一案佛爾卿額由驛馳奏 上以其擅用驛遞飭之十年二月奏章口駐防官員兵丁向無官房卽於上堡圍城內給與官房居住後因城內商人漸多地方狹隘官房被商人租住官弁均於圍城外賃房居住請嗣後每年年終但將先後官員兵丁所駐三營以內官員房有無私行租典之處行報兵部其圍城內官房仍賃給商人以免紛更又奏口北道衙門內貯有歷年節省各驛餘費生息銀兩請撥一萬兩交口北道按月生息分給各驛以備公用均 從之六月 命馳赴山西查辦大同鎮總兵恩承阿

遲發兵餉一案恩承阿畏罪自盡奏入 諭曰佛爾卿額既查出  
恩承阿有遲放兵馬銀兩之事卽應奏請解任或派員畱心防範  
乃任其畏罪自盡辦理實屬疎忽著交部議處尋議降一級畱任  
十二年四月因病回京八月授正紅旗漢軍都統十四年 諭曰  
佛爾卿額年逾七十在乾清門行走多年前任察哈爾都統時聲  
名亦好著加恩在紫禁城內騎馬十五年二月管理蒙古唐古特  
託忒等學事務三月擢理藩院尙書十一月因正紅旗漢軍旗婦  
子女私雇於宗室瑞泰恆家使用滋事奉 旨該旗都統平日管  
轄不嚴佛爾卿額著交部議處尋議罰俸六箇月十七年卒孫崇  
慶見任兵部筆帖式崇貴二等侍衛崇福鑿儀衛雲麾使

國史館本傳

右 國史館本傳

扎郎阿

扎郎阿富察氏正紅旗滿洲人乾隆二十五年揀補鴻臚寺鳴贊  
二十九年遷太常寺讀祝官四十三年三月擢寺丞閏六月授少  
卿仍兼讀祝官九月因濫行奏請添設廚役降一級調用十月經  
禮部尙書兼管太常寺事務德保奏請仍畱讀祝官行走四十四  
年復授少卿四十六年二月兼公中佐領十一月因贊禮郎補缺  
與例不符降二級調用十二月復授少卿四十七年常雩大典  
上親詣行禮時禮器陳設不整備命交部嚴加議處部議革  
職上寬免之五十一年授內閣學士兼禮部侍郎五十三年七  
月授正白旗蒙古副都統五十四年三月授正黃旗護軍統領十



月調鑲白旗滿洲副都統五十六年因失察護軍海旺等夥竊內庫銀兩降一級調用仍畱內閣學士任嘉慶元年十二月 上御門扎郎阿讀本錯誤革職仍畱贊禮郎任四年正月授鑲紅旗漢軍副都統兼管太常寺事務四月授正藍旗護軍統領管理火器營事務五月調鑲藍旗滿洲副都統五年二月復授內閣學士兼禮部侍郎三月調鑲黃旗護軍統領閏四月奏請嗣後護軍參領護軍校等官缺出仍照舊例會同本翼四旗護軍統領揀選如有推故不到者該御史奏參御史如有不到者護軍統領奏參得旨允行八月調鑲黃旗滿洲副都統授禮部右侍郎九月 命兼管太常寺事務仍兼副都統並 賞戴花翎十二月偕太常寺卿

莫瞻棊奏請盛京 太廟添設 神龕寶座 諭曰盛京城內本  
未恭建 太廟乾隆四十三年因尊藏 冊 寶始行改建亦未  
供奉 神牌並無祭祀典禮原與 太廟規制不同見據晉昌等  
查明限於地基難以安設毋庸輕議更張六年正月管理樂部事  
務三月充經筵講官九月轉禮部左侍郎管理火藥局事務十二  
月奏恭遇 大祀請撥熟練校尉奉昇龍亭添設督率員役以昭  
誠敬 上是之如所請行七年七月調正黃旗護軍統領八月端  
門門樓存貯刀箭被竊扎郎阿奏拏獲賊犯請將守門章京等交  
部議處並不自請議罪 上責其非是交部議處尋以賊犯係扎  
郎阿所統護軍拏獲 上加恩改爲交部察議八年五月奏請

行在禁止扈從王公大臣等前一日先赴營次挑班上是之如所請行七月上巡幸木蘭管理園場護軍統領援舊檔咨行熱河副都統慶傑派兵百名歸併在京所派前鋒護軍等一體當差慶傑奏聞敕令該護軍統領等明白回奏奏入諭曰自乾隆十二年以來熱河官兵差使數次具奏更定是以數年來彼處官兵但只學圍並不歸併前鋒護軍等當差該護軍統領等並不查明率意行文又不具奏實屬錯誤扎郎阿著交部議處部議降一級准以加級抵銷尋因承辦奉安孝淑皇后事儀禮臣會議措詞謬誤命交部嚴加議處部議革職諭曰扎郎阿管理武職差使尙屬勤奮惟人近粗率不能諳悉部務著革去經筵講官

禮部左侍郎降補內閣學士仍帶革職畱任又經吏部奏參禮部  
開送主彙司員辦理不公奉 旨各該堂官著一併交部議處部  
議扎郎阿革任 上加恩改爲降三級畱任因子圖薩踢傷伊炳  
阿身死 上以扎郎阿雖未在京究因平日不能嚴行管束所致  
著交部議處部議革任 上改爲降二級畱任十月奉安 孝淑  
皇后禮成 上加恩改前措詞謬誤處分爲降二級畱任改開送  
司員不公處分爲降一級畱任尋署鑲白旗滿洲副都統十一月  
諭曰扎郎阿管理太常寺事務有年於一切典禮素爲諳悉本  
日恭祀 南郊唱贊趨承恪恭妥協因思扎郎阿之子圖薩日前  
踢傷伊炳阿斃命一案彼時扎郎阿扈蹕熱河並非知情故縱三

法司審明定擬絞監候覈其啟釁之由究屬誤傷尙可量予寬貸著加恩在刑部衙門令伊父扎郎阿眼同決責四十板卽行釋放交扎郎阿帶回國禁九年六月復授禮部右侍郎尋因步軍統領衙門拏獲創墳逆犯鑲白旗馬甲克升額 諭曰該旗都統章京等所司何事皆由平日不行盡心教導嚴密管束致出此不孝逆犯扎郎阿不必署理鑲白旗副都統仍交部議處七月有匿名封摺訐告鑲白旗挑甲不公及參領發米受錢等弊經刑部侍郎瑚素通阿奏參後告知扎郎阿扎郎阿告知貝勒蘇懿蘇懿告知參領德喜 上以扎郎阿透漏消息且曾管該旗事務並不查明奏參降爲贊禮郎十月 賞給二等侍衛 命爲古城領隊大臣十

年七月授太常寺卿十一年正月 賞戴花翎二月授內閣學士  
仍兼管太常寺事務尋授鑲藍旗蒙古副都統三月管理鴻臚寺  
事務四月授正白旗護軍統領調鑲藍旗滿洲副都統九月授兵  
部右侍郎仍兼管太常寺鴻臚寺事務十二月復充經筵講官十  
二年十一月 天壇齋宮薰炕失火延燒寢宮十間 諭曰朕向  
來詣宮齋宿不需熱炕屢向扎郎阿諄諭並因從前則例開載應  
用木柴太多減至三千斤令其恪遵諭旨倍加鄭重乃不將朕諭  
旨轉相告誡小心懷遵並不親往稽查其咎較重著交部嚴加議  
處又 諭曰壇內齋宮薰炕永遠停止則例內開銷木柴一併刪  
除部議扎郎阿革職 上改爲革職畱任 命拔去花翎遇祭祀

時仍准戴用並革去護軍統領十三年四月復 賞戴花翎五月  
授鑲白旗蒙古都統仍兼管太常寺鴻臚寺事務閏五月因 天  
壇神樂署旁隙地開設茶館及各項作坊 命將太常寺各堂官  
俱交部議處部議降一級畱任 上以扎郎阿係由本寺鳴贊讀  
祝洵升堂官於該管事務尤宜畱心著降二級畱任不准抵銷十  
二月 諭曰於一切祭祀禮儀扎郎阿敬謹熟悉平素差使亦屬  
勤奮且年逾七十著加恩賞給伊子圖薩護軍當差行走十四年  
元旦 上恭祭 堂子因鴻臚寺少卿兼鳴贊官巴甯阿贊禮遺  
漏巴甯阿禡職扎郎阿降二級畱任十一月 賜紫禁城騎馬十  
五年十一月 郊壇禮成 上以扎郎阿贊讀可嘉 命將伊子

學習行走讀祝官圖薩圖隆阿卽補讀祝官十六年二月 命查  
城內七倉四月因失察兵丁偷米部議降二級調用 上以蒙古  
馬甲竊米者較少改爲降二級畱任五月 上親詣 天神壇祈  
雨扎郎阿子圖薩充典儀誤贊送 神爲送燎 上以扎郎阿平  
素並不認真教子輒屢次妄譽此次復添充典儀實屬徇私不職  
著降爲贊禮郎部議圖薩斬決 上改爲斬監候秋後處決十月  
朔日時饗 太廟禮成扎郎阿克典儀 上嘉其唱贊聲音清亮  
節奏適宜 諭曰扎郎阿儀文嫻熟供職多年從無舛誤前因飾  
辭保奏伊子圖薩革退都統今伊差使勤勉著加恩賞二等侍衛  
仍兼太常寺贊禮郎圖薩著加恩釋放交扎郎阿領回拘禁十七



年正月 祈穀禮成 上以扎郎阿禮儀嫻熟授太常寺卿 賞  
戴花翎仍兼管太常寺事務四月 賞給副都統銜五月補鑲黃  
旗漢軍副都統九月授鑲白旗護軍統領十月因子圖隆阿題補  
贊禮郎扎郎阿聯名具奏並不迴避奉 旨申飭是年冬至南郊  
大祀禮成 上以扎郎阿所派典儀官善祿唱贊合宜其音節  
係扎郎阿教演素嫻著一體賞給扎郎阿大卷線縐一匹十八年  
四月因病請假 賞給都統銜六月卒 諭曰扎郎阿由贊禮游  
擢卿貳供職四十餘年嫻習禮儀昨因患病開缺時賞加都統銜  
令其安心調理茲聞溘逝殊爲憫惜著派明志前往奠醊由廣儲  
司賞給銀三百兩經理喪事所有應得卹典該部察例具奏其任

衛  
內一切處分悉予開復子圖隆阿見任太常寺贊理郎兼三等侍

右 國史館本傳



哈魯堪

哈魯堪巴雅拉氏正黃旗滿洲人由監生考取繙譯官乾隆二十五年補授工部筆帖式四十五年十一月授甘肅甯夏理事同知四十九年升東陵員外郎五十三年升泰陵禮部郎中五十八年授江南道御史嘉慶四年擢吏科給事中六年擢內閣侍讀學士十一年擢鴻臚寺卿十二年四月升通政司副使七月升太僕寺卿十三年五月遷大理寺卿閏五月以刑部會題河南商城縣民婦劉姜氏毆傷伊夫身死一案按律定擬斬決實可憐憫先具摺奏聞請旨諭曰本日大理寺卿哈魯堪等呈遞奏摺朕以該衙門職司會讞自必因外省案獄失平乃刑部會題河南

商城縣劉姜氏毆傷伊夫劉以舉身死一案其致豐緣由伊夫倡令賣奸不從並用木犁向毆該氏順勢奪犁回毆致斃見在按律定擬斬決實可憐憫但無夾簽聲敘之例奏聞請旨等語所奏甚屬無謂劉姜氏自知守節雖無致死其夫之心惟既已傷斃其夫倫紀攸關自應按律定擬該省具題到部刑部查照本例覈擬該省斬決辦理均屬允當卽該卿員等摺內亦稱刑部所擬其罰不浮於罪伊等皆係執法之員既知於法無枉何必又爲此奏朕於內外一切題奏本章無不親自披覽而於刑名事件尤必詳細審閱無論有無夾簽其情節悉在鑒察之內良以民命爲至重必須確覈案由方可定讞是以反覆推究不厭求詳見在凡立決本章

卽應行照擬辦理者朕於披覽發下該部命批本處次日覆奏然後照批施行蓋矜慎庶獄必當求其可生而於應行抵法之犯緣情定讞亦不能稍有曲貸以致枉法失平此案旣例不夾簽該法司衙門自當照例具題候朕覈辦乃今日遽爲此奏豈慮朕於題本時不及詳細覈看先以此題奏耶哈魯堪等著傳旨申飭原摺並擲還十五年擢盛京兵部侍郎十六年三月因興京界屬穆奇驛站去歲被水衝淹不堪復建借將軍觀明奏請於驛東路南高阜平地撥戶部官莊田地缺額請 敕交盛京戶部在於納糧地畝撥補尋經盛京戶部侍郎薩彬圖奏興京界屬舊設官莊二十座原係供應 永陵祭品及黑牛館餵養牛羊黑豆並莊丁等口

米等項是以領種地畝均與 陵寢就近原爲便於交納不致遲  
誤近年以來節次被水衝沙壓雖經撥補足額俱在外城遠地催  
交去年山水更大田地被衝尤多僅賸穆奇處地二百餘畝賴以  
交辦差徭所有該侍郎請占用官田之處似屬難行查該驛地基  
統計不過三四十畝今忽欲占莊地百畝焉知非驛丁覬覦膏腴  
爲私種計又查街南一帶傍山坡阜均係驛丁田地此處形勢高  
燥儘可建蓋驛房 上命工部尙書恭阿拉將軍觀明安速議奏  
閏三月恭阿拉等覆奏此處驛站係爲恭送 永陵祭品及各項  
差務而設勢難改建他處請於原躡官莊地內酌撥六十畝除那  
建驛廳及馬圈外餘地四十餘畝卽以補蓋眾丁房閒其官莊缺

額地畝請交盛京戶部於就近上則餘租地內照例撥補俾資接濟差徭如此可於驛站有益亦於官莊無礙見商之薩彬圖哈魯堪意見相同奏入 上命如所請行六月奏興京鳳凰廣甯等城因上年雨水過多見在穀價昂貴各驛站草豆採買維艱請照嘉慶十一年廣甯等城田畝遇水草豆價昂支借半年餵馬銀錢之例仍請支借半年在盛京戶部動用庫銀按驛站分給限六年完繳得 旨允行十二月因岫巖甯海等處糧穀歉收未經陳奏奉 旨交部議處部議降三級調用上加恩改爲降四級畱任十八年四月卒子寶崇阿見任刑部筆帖式

右 國史館本傳



國朝文獻備考卷之三十三

三

汪承需

汪承需安徽休甯人父由敦官吏部尙書協辦大學士乾隆二十五年奉 上諭汪承需賞給廕生著授爲額外主事十一月籤掣兵部車駕司學習旋在軍機章京上行走二十七年七月補戶部廣西司主事三十一年四月擢戶部江南司員外郎三十二年二月簡放坐糧廳三十三年十月記名以繁缺知府用十一月升刑部江西司郎中三十四年授山東武定府知府時倉場總督奏請以升銜暫畱坐糧廳任三十五年正月授貴州平越府知府呈請親老改補近省八月授福建邵武府知府嗣經軍機大臣轉奏伊母年近八旬懇請畱京供職 上加恩以戶部郎中用十月補廣

西司郎中三十六年九月 上命戶部侍郎桂林前往四川軍營  
辦事汪承需馳驛隨往三十七年八月以阿爾泰奏宋元俊會  
桂林乖張欺妄一案革職拏問 上命福隆安馳往勘問旋鞠實  
其發銀贖取兵丁係司員汪承需及知州曹焜等以巴底巴旺土  
兵尋覓綠營迷失之兵頗爲出力向糧員取銀備賞曾稟桂林乞  
發並非欲賞金川之人奏入 諭曰汪承需不過隨往辦事司員  
其與曹焜相商取銀備賞一節如果向金川贖取不特桂林罪無  
可寬卽汪承需亦當從重治罪今訊明實係備賞巴底巴旺之人  
且經宋元俊與汪騰龍屢次教令串供汪承需不肖扶同諉卸傾  
陷桂林尙屬具有本心著從寬免罪復還其郎中帶革職留任

在軍機章京上行走四十一年金川軍務告竣議敘軍功加一級  
是年十二月丁母憂回籍四十四年十二月服闋赴京四十五年  
四月奉 旨令先行食俸遇有郎中缺出卽行補授七月扈從熱  
河記名以三四品京堂用八月擢都察院左副都御史四十七年  
二月升授刑部右侍郎六月調工部右侍郎時甘肅參辦冒賑案  
議西監一款省費取巧著行禁革毋許應試及別途出身汪承霈  
奏稱人數甚多乞開以自新之路請令加足京監之費另易部照  
准其考試出身得 旨允行四十八年正月 上較閱射連發中  
的 賞戴花翎四十九年七月山海關副都統果星阿奏參臨榆  
縣凌世御於民占衙門官地袒護不辦各款 上命往查辦十二

月轉工部左侍郎五十年六月調戶部右侍郎管理錢法堂兼署  
兵部右侍郎五十二年十月武會試奉派知貢舉十一月漢川縣  
監生羅正榜控書吏張志忠侵賑一案 上命兵部尙書慶林偕  
汪承霈前往審訊旋鞫實奏 聞奉 硃批是不必欲速只要得  
眞五十四年二月偕兵部右侍郎伊齡阿奉派會試知貢舉八月  
復同派順天鄉試監臨以失察頂冒代倩等弊下部嚴議 諭曰  
伊齡阿汪承霈派辦鄉試監臨並會試知貢舉業已三次因伊二  
人在侍郎中尙能辦事乃伊二人一味邀眾舉子之與並未實力  
查察以致士子串通胥吏作奸犯法見於萬治庭等舞弊一案交  
部嚴加議處著先解任聽候部議尋議降二級調用五十五年五

月命署理通政使五十六年正月授順天府府尹十一月擢左都御史五十九年因戶部侍郎任內管理錢法堂失察所鑄錢文輪廓字畫模糊部議降三級調用上加恩改爲革職畱任嘉慶四年正月授刑部右侍郎十月調工部右侍郎十二月奉上諭汪承需之子汪本申係承需任副都御史所得之廕昨經帶領引見內用照例以七品小京官選補但念汪承需從前曾任侍郎見又擢用侍郎伊子汪本申加恩作爲一品廕生著以主事用五年正月轉補工部左侍郎二月擢都察院左都御史五月命在紫禁城騎馬六月補授兵部尙書兼管順天府府尹事務九月奏萬年吉地工程仍懇照向例加增銀兩上以前次奏請節省之

處殊屬冒昧草率下部議處尋議銷去尋常紀錄二次十一月兵部議奏京營左右翼總兵移駐各事宜因錯會移駐二字將所有分汛管轄及衙署關防養廉等項槩行議駁汪承霈初有異議後復隨同畫彙交部議處尋議銷去尋常紀錄一次六年正月奏稱近京地面民多土少私典旗產既干例禁而民置民業又無地可售欲求近京州縣民力寬裕惟有官田變價始能有益上令軍機大臣會同戶部議奏尋議以例禁久嚴未便遽行更張遂廢六月永定河水漲發居民多被淹沒上命汪承霈偕副都御史陳嗣龍劉濱順天府尹閻泰和同該城御史於戶工二部錢局內領出制錢二千串帶赴永定門右安門外一帶按名撫卹尋奏以

各村災民見俱搭蓋窩篷居住俱可給米造飯酌擬每口日給米  
三合三勺小口減半得 旨俞允七月又奏稱散賑約計日需米  
八十七八石原領米二千四百石不敷一月之用請再賞撥京倉  
稔米二百四十石得 旨俞允尋奉 上諭汪承霈等率同該城  
御史及承辦官員等實心經理五十餘日放散稽察俾災黎均霑  
恩惠所辦尙屬妥協均著交部議敘尋議加紀錄三次時大興縣  
所屬馬道村等處民人進城求賑已據順天府府尹衙門查係勘  
不成災例不應賑之區汪承霈奏請發銀一萬五千兩賞給求賑  
民人 諭曰勘不成災地方向只有蠲無賑章程本屬一定若遽  
將不應給賑之人例外加賞誠所謂惠而不知爲政焉得人人而



濟之儻各省紛紛效尤又將如何辦理朕非於賑貸稍有靳惜但國家惠下之舉自有等差若於例外曲爲施恩則例得邀恩者轉不免心生缺望汪承霈等所請實大不知事體矣十一月以辦理順天鄉會試供應於內城添設肉行經紀事交部議處七年六月上將幸木蘭汪承霈奏請停止行圍奉 旨申飭八月奉 旨調補都察院左都御史不必兼管順天府府尹事務八年七月署兵部尙書十二月以辦理 萬年吉地工程加二級准於前所降二級畱任之處抵銷九年九月以北城橫街地方賊夥捆縛事主一案未經奏 聞經副都御史陳嗣龍奏參 諭曰汪承霈上年奏請停止行圍不顧國家習勞肆武大典其儉安好逸之情已可

槩見朕是以將伊罷退尙書授爲左都御史臺垣職司言事遇有  
控案尤應據實奏明伸冤理枉以冀下情上達若總持風憲者遇  
事顛預消弭何以稱朝廷耳目之官諸臺臣復何所效法乎汪承  
需年就衰邁眼目昏花若自揣精力不勝卽應早爲引退乃經朕  
屢次詢問尙云勉力供職並無請告之意及辦理公事毫無振作  
見在北城捆縛事主一案著傳到汪承需及審辦此事之京畿道  
滿漢御史交軍機大臣將陳嗣龍所奏情節令其一登荅旋詢  
實奏 聞 諭曰汪承需性耽安逸已於前旨明白宣示至伊總  
持風憲於此案報到時意欲化有爲無以致屬員迎合其意改供  
蒙詳且伊年老衰邁眼目昏花實不勝臺長之任本應褫職姑念

伊係原任尙書汪由敦之子舊臣後裔著加恩以二品頂帶休致  
十年四月奏請回籍六月於中途卒 諭曰汪承需之父汪由敦  
前在內廷供職宣力有年汪承需由廕入官洊擢卿貳亦著勤勞  
因其年老目花諭令休致今聞溘逝殊堪憫惜著加恩照尙書例  
給子卹典子本申嘉慶元年廕生蒙 恩賞給主事十三年七月  
以辦理 萬年吉地工程草率各員分別治罪一案奉 旨汪承  
需見已病故卽將伊子汪本申所賞廕生著卽革去十四年九月  
恭獻 萬壽詩冊 恩賞七品京官

右 國史館本傳

胡高望

胡高望浙江仁和人乾隆十八年舉人十九年考授中書二十六年一甲二名進士授職編修二十八年散館一等三十二年四月御試翰林詹事諸臣 欽定二等二名擢翰林院侍讀旋奉

旨充日講起居注官十月遷左春坊左庶子三十三年奉 旨上書房行走三月充會試同考官是科禮部奏定於會試落卷內挑取中書學正分校各員例不得與暨榜發高望奉 旨仍入闈閱中書學正卷三十六年充山東鄉試正考官三十七年充會試同考官三十八年授翰林院侍讀學士三十九年奉 命提督湖北學政四十年授詹事府詹事是年十一月授內閣學士兼禮部侍

卽四十二年還京復命奉旨仍在上書房行走四十三年四月充殿試讀卷官六月命閱福建等省拔貢朝考卷九月充武會試正考官四十四年四月稽察中書科事務七月充山東鄉試正考官四十五年充會試副總裁官八月奉命提督江西學政還京復命仍在上書房行走四十九年充會試副總裁官是年五月江西學政李鏞具奏考試情形摺內查出弊竇甚多奉諭李鏞到任甫及半年考過五府而拏獲生童槍冒情弊前後已有十案豈此等情弊李鏞到任後始有耶前任學政胡高望在任三年按歷各府所奏摺內俱稱生童遵守場規尙無槍冒代倩情弊等語胡高望身爲學政乃竟視爲照例辦理之事全不畱心覺

察著明白回奏尋奏臣荷蒙 天恩畀以江西學政仰遵 聖訓  
整飭士習釐正文風履任之始徧行出示曉諭臚列招搖槍冒舊  
案俾知觸目警心至按試各府臣於點名時將年貌逐加覈對封  
門後終日在堂察視親至號舍挨查是以槍冒傳遞等弊不致肆  
行閒經覺察隨時懲辦就臣記憶所及其查出童生歐陽伸等十  
三案俱已分別辦理不敢稍事姑息但未將已辦各案一一陳奏  
請將臣交部議處嗣經部議照不實力奉行例降一級調用再照  
應奏不奏例降二級留任 旨免調用五十年二月 命往川陝  
祭告嶽瀆歷代帝王陵寢三月充文淵閣直閣事六月使還復  
命奏所經途次雨水田功 上嘉慰頒示 御製詩曰頒詔行慶

典扞誠告嶽瀆以至古帝陵差臣分水陸高望值西路秦省及巴蜀春去回以夏奏蜀甘雨足二麥既有收秋田可豐卜晉省途必經更子念所屬過以二月中實覺望澤篤歸途五月杪溽霖渥質之敦書言大吏實遲告飭諭疾施恩民幸免窘酷既入直隸境益北益佳淑高下黍與禾綠雲芄芄目額手爲民慶謙受勵虔肅五十一年充順天鄉試副考官五十二年充殿試讀卷官十月充總校三通四庫全書總裁官五十三年充江南鄉試正考官五十四年充江南鄉試正考官八月奉命提督江蘇學政五十五年七月授兵部右侍郎五十七年八月命仍留江蘇學政之任六十年九月調吏部右侍郎十月還京復命奉旨仍在上書

房行走嘉慶元年正月與千叟宴於皇極殿奉 旨在上書房行走旋充經筵講官四月充殿試讀卷官六月轉吏部左侍郎十月又充武殿試讀卷官二年八月授都察院左都御史三年二月卒五年二月 諭曰原任戶部尚書曹文植原任左都御史胡高望俱於前歲先後溘逝其時正值 皇考聖體違豫朕心竇深焦灼未經加恩賜卹今思曹文植在上書房行走有年胡高望久直上書房又曾在南書房行走均屬勤慎身後未蒙恩卹殊堪軫念曹文植胡高望俱著加恩補行給予卹典該部察例具奏其原任內如有降革處分俱准其開復以示優卹舊臣至意事下禮部題奏賜祭葬如例謚文恪六年七月奉 旨入祀鄉賢祠子祖福以



國史館本傳

正一品廕生授主事

右 國史館本傳

秦承恩

秦承恩江蘇江甯人乾隆二十六年進士改庶吉士二十八年授編修三十三年大考二等遷左贊善三十四年擢侍講三十五年充順天鄉試正考官三十六年京察一等授江西廣饒九南道四十五年調福建延建邵道四十六年二月升按察使十一月調陝西按察使四十八年三月擢四川布政使五月調湖南布政使五十年二月調陝西布政使五十四年正月調直隸布政使三月諭仍畱陝西布政使任六月因前在湖南布政使任內失察未陽縣生員賀世盛編造逆書部議降二級調用奉旨從寬畱任七月擢陝西巡撫九月奏興安府屬之安康縣地方遼闊請分隸

漢陰通判管轄裁漢中府沔縣貢河驛驛丞改爲漢陰巡檢下部  
議行五十六年三月奏陝甘局鑄錢文向係存貯局中近因收買  
小錢改鑄爲數更多若照舊貯局恐日久滋弊應請改歸藩庫收  
貯其搭放兵餉卽由司當堂給發得 旨嘉獎七月奏查明陝省  
鹽法並籌補永東倉鹽池額課報 聞五十七年二月京察屆期  
諭曰秦承恩宣力封疆克稱厥職著交部議敘五月奏請定太  
白山祀典得 旨允行八月因咸陽縣知縣張廷杰推升廣西慶  
遠府同知並未飭赴新任奏請留陝補用爲屬員規避邊缺部議  
降二級調用奉 旨改爲革職畱任九月奏陝省秋禾約收分數  
及糧價並不詳細查明十月覈奏收成分數單內未將災分輕重

分別賑濟之處聲明均奉 旨嚴行申飭五十八年七月奏將陝西延安漢中榆林鄜州綏德五府州屬之膚施等三十一廳州縣鹽庫正銀一併歸地丁攤徵 命軍機大臣及戶部會議准行八月入 覲 賞戴花翎五十九年四月因前任湖南布政使任內失察武陵縣貢生歐陽緯編造誕謬詩文部議革任 上免之八月拏獲邪教蕭貴等七十餘名並不由驛馳奏僅差人齎遞遲至二十餘日始行奏到 上以秦承恩不知緩急輕重交部嚴加議處尋議革任 上免之六十年二月奏拏獲河南竄入陝境盜犯十九名派員解省審辦得 旨嘉獎並賞給大小荷包是月京察屆期 上以秦承恩督緝盜犯認真妥辦交部議敘三月奏請封

國朝通志卷之九十一  
閉陝西略陽縣興隆灣銅礦 從之嘉慶元年三月湖北竹山竹  
谿縣境內各有匪徒滋擾承恩以該處距陝省興安府最近札令  
將弁馳赴竹山竹谿縣勦洗親往接壤要隘督同文武員弁堵截  
並飭將擒獲竹谿逆匪解至興安分別正法其誤習邪教者責令  
自新釋之並屬紳士團集鄉勇互相糾察奏入 諭曰秦承恩在  
興漢一帶分派員弁防守地方並鼓勵鄉勇截殺湖北竄匪地方  
甯謐所辦可嘉之至著交部議敘以示獎勵十月奏四川達州亭  
子鋪地方匪徒聚眾滋事達州與太平縣交界太平與陝西漢中  
興安二府屬毗連恐川省追捕緊急竄入陝境臣見飭該管府道  
會同興漢鎮督率弁兵嚴密防守一面親赴漢中彈壓堵禦如陝

省邊境照常安帖臣卽帶領興安府城守防兵徑往達州咨會侍郎英善兩面夾攻以期一鼓殲除 上嘉之並賞給大小荷包尋因達州匪徒欲赴陝省旬人入夥經先曾入教改悔投誠之程廷珍等報知指引官兵圍擊之殲斃一百名擒獲首犯甯學成奏入諭曰所辦甚好程廷珍前曾入教經秦承恩出示化導絜家投出嗣又經伊報信並指引官兵殲擒多賊可見愚民具有天良地方官若實力勸導自無難化莠爲良是月達州所屬之東鄉太平等處亦有匪聚眾承恩帶兵赴州駐守使達州之賊不得與太平匪徒聯結十一月因提督柯藩馳抵安康太平交界之黃柏棚地方搜捕川省逃匪承恩馳赴興安彈壓策應奏興安府屬地方澄

關跬步皆山而郡城爲川楚入陝門戶尤關緊要見在近城之牛  
蹠鋪古廟嶺等處亦有匪徒屯聚窺伺臣督率兵勇上緊搜捕一  
面札商總督宜縣將所調赴川兵丁帶至興安會同柯藩將境內  
之賊分路掃除卽由安康紫陽取道至太平會剿 諭曰興漢與  
太平毗連防有川省逸匪竄入秦承恩仍著暫畱該處督率堵拏  
並資彈壓不必遠赴達州爲是尋奏興安府屬各廳縣多與四川  
連界在府城南者爲牛蹠鋪古廟嶺兩處之賊以安嶺爲巢穴在  
府城北者爲將軍山皆逼近郡城賊匪屯聚窺伺將軍山與郡城  
相隔漢江可以據塹而守惟安嶺之賊憑高直下半年日可到不可  
不先爲撲滅隨派將弁分路齊進焚燬木城殲斃數千並逃竄之

賊剷除淨盡復分兵四路進攻將軍山斷賊汲道用礮轟開石牆  
乘勢直進殺賊數百生擒首犯馬得仕餘匪就縛者千餘疊奉  
優旨嘉獎並賞給瑪瑙盒大小荷包十二月汝河賊匪併入洞河  
五作雲賊巢力拒承恩督率兵勇由花黎岡進擊連撲三次適賊  
礮裂自行轟斃多人我兵乘勢撲進賊匪盡數殲斃會各路官兵  
進逼五作雲大寨截殺賊三千餘被焚及自戕者千餘殲斃首逆  
胡知和穆明萬李九萬生擒廖景華等三百餘名紫陽境內賊匪  
淨盡奏入 賞給金盒玉扳指大小荷包並交部議敘二年正月  
鞏安康縣之光頭山賊匪先派將弁於對面之朝坪左右合撲殲  
斃五百餘名奪獲賊卡復於光頭山左右擊賊寨後之界嶺用礮



轟擊四面攻撲殺賊二千餘斃賊總頭目王劉氏梟示並獲首犯  
劉文照彭儀萬石金順劉大富萬洪禮等正法男婦二百餘人均  
分別辦理安康境內賊匪淨盡奏入 上以光頭山賊匪全行剿  
滅陝境肅清所辦實屬可嘉 賞給金盒荷包雙喜如意仍交部  
從優議敘二月奏陝省與安境內被難民人業經派員查看先令  
搭棚棲身散給饘粥隨照災賑之例給予米糧入棉衣今陝境肅  
清應令復歸本業而該民人等籽種口糧牛具房屋蕩然無存情  
堪憫惻請再分別賑濟給予三月口糧被焚房屋給銀令自行葺  
造仍各借給籽種牛具俾資耕作得 旨允行三月楚省竄匪由  
河南盧氏闖入陝西商南縣境承恩馳赴商州一帶堵剿四月商

州山陽交界之西牛槽等處有匪徒聚集多人乘機竊發承恩帶兵往剿尋擊之於三條溝剿殺五百餘名生擒百七十名又偕西安將軍恆瑞追截餘匪偪入深溝夾擊之立斃六百餘名生擒賊目韓有成並夥匪八十五名西牛槽竄匪全數殲除旋因雒南石板溝地方有楚匪句結本處教匪起事承恩偕總兵富爾賽馳往勦捕奏入 諭曰雒南石板溝地方有匪徒滋事秦承恩已同富爾賽帶兵前往勦捕諒不難即時撲滅著秦承恩於勦竣後酌量情形若賊匪尙在陝西邊界一帶竄聚秦承恩自應帶兵幫同恆瑞等合力兜擊如賊匪已出陝境軍營帶兵之員甚多商雒興安一帶亦關緊要秦承恩卽當在陝省邊界駐劄防堵不必再向前

進以致不能兼顧五月 上以秦承恩於堵剿賊匪事宜奏報遲  
緩申飭之六月總統惠齡等奏黃龍鋪西竄之賊在紫陽縣之白  
馬石搶船渡江經官兵拏獲代賊雇船之錢正萬等解交秦承恩  
收審 諭曰錢正萬既爲賊匪雇船必有與賊通同情事該地方  
官漫無查察任令錢正萬爲賊雇船偷渡亦當一併嚴參著秦承  
恩卽徹底究明嚴行定罪覆奏尋奏漢江北岸船隻前已全數收  
歸南岸而紫陽白馬石等處居漢江上游水祇深三四尺各股賊  
匪俱係騎馬浮渡間有搶過船隻裝載老幼婦女其強壯之賊多  
係兩人挽手並涉 上以所奏實屬回護嚴飭之又奏籌辦川省  
糧運令西鄉附近州縣設法協濟 上是之閏六月奏訊明錢正

萬爲賊雇船及張三清爲賊渡送婦女老幼皆出於被僞被搶臣於楚匪闖入楚境不能迎截以致竄過漢江尙何敢諉過屬員爲自行解免地步請將臣交部嚴加議處 上以錢正萬等係無知小民見大夥賊匪猝至被其僞脅雇船其情尙屬可原至地方官有守土之責今旣防守疎虞其罪豈容解免秦承恩徇庇屬員未經參辦轉以不敢諉過爲詞自請處分了事實屬錯謬著先革去翎頂姑暫畱巡撫任以觀後效八月楚匪竄入白河縣石槽溝與房縣竹山續來之賊三千餘歸併屯聚經官兵由東追堵隨向西竄赴朱家河承恩督率鄉勇在安康接壤各要隘防堵奏入 上以見在陝省兵力無多雖有鄉勇一二萬人總須大員帶領官兵

在前衝擊方能得力 命恆瑞酌帶官兵馳赴白河洵陽一帶秦  
承恩帶領本地兵勇星赴該處與恆瑞併力迎擊一面扼其北竄  
漢江之路一面防護白河洵陽等縣治九月奏防堵東西兩路竄  
匪情形 上以辦理俱合機宜嘉之時東路賊匪西竄赤崖分兩  
股一由香鑪溝竄近安康界一由花園寺竄近平利界承恩帶領  
兵勇赴安康邊界設伏於賀家埡山梁衝擊賊營殲斃七百餘名  
又令調到肅州官兵馳赴平利兜圍截殺奏入得 旨嘉獎是月  
西路賊匪竄至安康輒坪與東路分股之賊合竄至平利太平河  
連線河一帶惠齡由西路追剿柯藩由東路截殺承恩督率兵勇  
策應旋因均州賊匪竄入洵陽之銅錢關神河口移駐金堂寺地

方禦之賊翻山西竄至爛泥灣分兩股一向平利南竄一向西緊  
偏郡城承恩偕惠齡合兵追截餘賊向平利界奔逸與南竄之賊  
合向白沙河一帶遁去奏入 諭曰秦承恩在興安一帶督率兵  
勇堵剿尙屬出力著加恩賞還翎頂十月首逆王廷詔高均德一  
股由安康輒坪佐林溝直撲興安府城承恩派員弁分路堵截並  
密札惠齡相機迎擊得 旨嘉獎並賞給嵌鑲寶石帶頭大小荷  
包十一月奏近省一帶兵備空虛商令總兵王文雄馳赴鎮安駐  
劄總兵愛星阿暫駐興安北面儻賊有北趨之勢臣卽與愛星阿  
馳赴鎮安會同文雄迎擊 上以賊匪俱向西南奔竄安能復折  
向北岸竄至東北鎮安地方所奏殊屬牽混申飭之三年正月

諭曰秦承恩見丁母憂例應離任守制但該撫見在興安一帶巡防軍務關係緊要且該撫在陝年久一切地方情形及軍需等件皆爲熟悉未便遽易生手仍著署理陝西巡撫在任守制尋奏高均德股匪竄至鎮安雲蓋寺一帶欲由山陽東竄商州直趨豫境臣與王文雄由藍田馳赴商州抄出賊前斷其竄路 諭曰自山陽以至商雒並無攔截之兵秦承恩等務當兼程趕赴商州迎堵二月高均德齊王氏兩股賊匪竄至漢陰之觀音河會合後股李全等又分竄城固南鄭逼近北棧及五郎一路擾及郿縣盩厔地方承恩偕王文雄帶兵馳剿擊之於焦家鎮殲賊五百餘名生擒三十餘名 上以承恩調度合宜 賞給金鑲松石盒白玉喜牌

大小荷包三月李全一股竄近長安地界承恩偕荊州將軍興肇提督柯藩王文雄分路進擊殲八百餘名餘匪分竄東入庫峪口內西至翔峪澧峪一帶又分數股承恩偕王文雄督率將弁堵住翔峪向內逼攻賊眾翻山回竄趕殺千餘名又經兵勇攻撲澧峪截殺五百餘名生擒二百三十名正法並被裹難民一千數百放歸復業復派精練鄉勇千餘隨興肇柯藩協勦庫峪之賊奏入諭曰被賊裹脅良民分別安撫使之陸續投出亦足以解散賊匪所辦尙是尋李全分股賊匪因官兵在東南兜勦伺隙翻山北竄欲勾合阮正通一股偷過嶺北又川省賊匪張漢潮及龍仁山之姪二股先後竄至西鄉之漁渡壩紫陽之毛壩關等處承恩偕王



文雄在大峪一帶堵剿奏入 上命秦承恩督飭陝省各員嚴密  
布置妥爲堵禦四月李全與阮正通合夥折回鎮安西竄漢陰石  
泉地方而高均德股匪竄入秦嶺老林折向東南奔逸承恩奏前  
此高均德股匪分竄渭南華州諸峪口欲出東北大路直趨豫境  
經臣督令王文雄等帶兵迎剿入山搜捕盡行殲除李全阮正通  
等正在漢陰石泉滋擾經宜縣與肇柯藩在彼圍剿若偪歸一處  
各路官兵會合定可一鼓殲除惟查鎮安西北可由五郎洋縣直  
趨鳳翔寶雞墊屋鄠縣儻賊匪被圍緊急不能南竄勢必翻山北  
出臣與王文雄見卽帶領官兵由東而西暫駐子午峪相機迎擊  
諭曰高均德一股賊匪業向鎮安西南一帶奔逸乃秦承恩復

追述從前情形尙稱賊匪欲出東北大路而於見在剿捕情形轉未聲敘明晰著傳旨嚴行申飭至該匪等折竄鎮安後被剿緊急難保不翻山北逸秦承恩王文雄見在帶兵駐劄子午峪務須相機迎擊尋奏阮正通等竄至城固之花家坪楊家莊等處恐潛出鳳翔寶雞一帶偷生割麥臣與王文雄卽由子午峪馳往郿縣探蹤截剿 上以所奏仍不過防堵情形其高均德李全張添倫合夥否歸併一處亦未聲敘明晰嚴飭之時高均德李全張添倫合夥阮正通由石泉洋縣西竄 上以秦承恩在子午峪迎擊爲日已久迄未將首逆拏獲庸懦無能又嚴飭之五月高均德等屢經官兵在陝截殺遂由鐵鎖關竄入川境 諭曰漢中西鄉一帶著責

成秦承恩嚴密防堵毋又任賊匪折回陝境六月奏臣與王文雄  
勦淨棧西竄匪前赴漢中適川匪一股竄至南鄭之牟家壩臣等  
卽督率兵勇星夜渡江馳勦並密派將弁分路截擊殲斃八百餘  
名生擒二十二名賊匪折回四川南江縣境見在陝境甯謐 諭  
日秦承恩奏截回川匪一招據稱陝省見已無賊但漢中一帶毗  
連川省秦承恩等總當實力嚴堵尋由鳳縣勦阮正學股匪於城  
固之二郎壩殲斃多名匪眾竄入南江縣境 諭日南沔一帶著  
貴成秦承恩等實力防堵毋使川匪復又折竄陝境八月川省徐  
添德冉文儔高均德樊人傑各股賊匪由儀隴逃向廣元一帶又  
南江大河口亦有賊匪屯紮切近陝省南鄭甯羌沔縣等處 諭

日陝省邊界前經降旨責成秦承恩等嚴密防守今竄逃至廣元南江一帶與南鄭甯羌沔縣接壤著秦承恩卽於南鄭緊要關隘深溝高壘嚴密堵禦設伏邀擊漢中一帶亦應列戍嚴防或設疑兵使之不能闌入七月賊匪李樹唐明等一萬數千眾由西鄉井泉子竄入頂甲山羅家溝一帶經總兵慶溥帶兵堵禦而首逆樊人傑龍紹周等由三花溝乘間竄入與各賊匪分爲數股將官兵圍繞承恩偕王文雄馳至策應賊由荒田嘴翻山東逸又另股賊匪張漢潮由通江老林竄至城固天明寺躡淺過江經守江鄉勇截住餘眾向北山一帶竄逸承恩挑帶兵勇馳回漢中由西江探蹤迎截並咨恆瑞分兵會剿奏入 上以併力殲擒毋得疏懈勛

之十一月另股賊匪竄入洋縣鐵冶河承恩由雷壩江口平定關抄至蓋屋二郛壩攔截之川省冉文儔一股又竄至通江小方山將近陝境承恩由五郛仍回漢中顧棧道門戶尋張漢潮由洵陽竄至楚北鄖西邊界經官兵折回鎮安又竄入豫境四年正月諭曰秦承恩在漢中一帶邊界堵禦並不能嚴密防範任賊往來奔竄卽如張漢潮一股賊匪係由漢中入陝復由陝至豫竟無兵勇阻截該撫有封疆之責咎實難辭著傳諭秦承恩務當督率兵勇實力防堵嗣後儻有賊匪闖入陝境惟秦承恩是問是月又諭秦承恩多病精神不能振作想伊才具本短又伊母病故心緒昏替陝西軍務緊要秦承恩不必署理巡撫著卽回籍守制二月

張漢潮在鳳陽縣屬之唐藏地方屯紮官兵四面圍剿其東面爲承恩所派之遊擊蘇維龍防堵失利賊匪竄逸 諭曰張漢潮屯聚唐藏地方時明亮興肇帶兵抄截南路吉蘭泰官信在西北二面圍逼其東路秦承恩派遊擊蘇維龍帶兵防堵是四面皆有官兵斷其去路正可於此地將漢潮擒獲乃蘇維龍一路失利賊首卽由東面突出失此機會殊爲可恨秦承恩自剿辦賊匪以來從未身親督率總係派人前往而所派者又多怯懦無能之員此次蘇維龍帶兵失利縱賊逃竄卽係秦承恩派委非人所致朕聞上年賊匪逼近西安時焚掠村莊百姓受害者不下十餘萬秦承恩以防守省會爲名並不出城殺賊且平日官聲亦屬平常若僅令

回籍守制無以示懲恆瑞著署陝甘總督卽著恆瑞將秦承恩革職解來京交軍機大臣會同刑部審訊四月 諭曰秦承恩昨經解到令軍機大臣嚴訊其緊閉西安城門不准難民進城一節據供伊與王文雄總在軍營並未在西安城內居住直至三月初一日賊匪竄入南山與肇柯藩王文雄帶兵往南剿賊秦承恩始於是日辰刻進城本爲安撫百姓非因避賊次日仍卽出城赴王文雄軍營前此關閉城門係陸有仁台斐音在彼秦承恩到時始行開城聽民出入至西安城壕向來無水近郊百姓多已避進城內竄無難民觸城投河之事秦承恩進城出城皆有日月可稽賊匪由塾屋向東合竄時距城較近係陸有仁台斐音在城內防守

將城門關閉亦有確切證見秦承恩果否於初一日進城初二日  
卽赴王文雄軍營無難一詢而得著恆瑞永保馬慧裕就近鞫問  
王文雄柯藩台斐音令其詳覈秦承恩供詞或虛或實逐一登答  
母得稍有瞻徇尋經先後覆奏五月 諭曰秦承恩自敎匪滋事  
以來漫無調度玩誤機宜以致賊匪日久未能撲滅業經革職擊  
問交刑部審訊今已訊明並據查詢覆奏雖無關閉城門安坐衙  
署致難民觸城投河之事但秦承恩身爲巡撫不能盡心辦賊玩  
誤稽延實有應得之罪著軍機會同刑部按律定擬具奏尋議奏  
承恩於畱壩一帶正資堵剿之時僅委遊擊蘇維龍帶兵前往伊  
轉在漢中觀望實屬玩誤稽延照臨敵逗遛觀望失誤軍機律擬



斬監候 諭曰秦承恩照玩誤軍機律定擬斬監候固屬按律辦理但念秦承恩本係書生未嫻軍旅前此因有人奏參秦承恩關閉城門安坐衙署不納難民以致數萬百姓觸城投河而死嗣陸有仁到京曾面加詢問據稱實無其事因降旨詢問恆瑞永保王文雄柯藩台斐音今據伊等先後奏到眾口一詞與秦承恩所供日月俱屬符合是則秦承恩之咎止於不能辦賊著加恩釋放令其回籍守制閉門思過服闋後另行簡用五年 諭曰秦承恩前已革職因伊母喪加恩令其回籍今已服闋豈可令其安居故里著發往伊犁效力贖罪七年二月期滿釋回到京 上念其平日辦理地方事件尙爲熟悉亦並無操守不潔之處 命以六部主

事用遇缺卽補七月 命充會典館纂修官八月奉 旨以六品頂帶補授通永道十一月 命以三品頂帶補授江西巡撫八年三月奏請將江西省帶徵漕糧分別起運酌留籌補倉穀節省經費 諭曰秦承恩係朕棄瑕錄用之人地方公事尤應實心經理乃於運京漕米並不籌辦妥協欲借以彌補倉厥殊爲取巧著傳旨申飭九月因前在陝西巡撫任內濫應軍需部議降五級調用奉 旨改爲革職卽任十一月奏廣昌邪匪賴達忠句結甯都州李步高石城縣廖幹周等聚眾滋事業經先時撲滅見將生擒各犯分別審辦 諭曰此案爲首之賴達忠李步高廖幹周等雖均經殲斃其夥黨生擒者諒必不少卽可追究該匪等滋事根由固

不可遇事搜求亦不可稍有疎縱是月又 諭曰秦承恩自本月初七日奏到廣昌等處邪匪滋事經官兵撲滅一案迄今半月有餘未據續有奏報之招殊不可解著傳旨申飭十二月以審明邪匪分別辦理地方當謐入奏 諭曰該撫於一月之內督率員弁兵勇將地方謀逆重案上緊拏獲不致釀成大事所辦尙爲妥速本應加恩賞還二品頂帶並交部議敘以獎其勞惟是該省遇有此等奸民在彼蠢動一經奏聞朕無不刻深懸念該撫前月初七日奏報大槩情形後半月以來驛遞杳然雖辦理完竣而奏報遲延其案內要犯徑該撫率同臬司審訊明確又未將各首匪供詞繕錄隨摺進呈謹稱條錄各供咨部亦屬草率覈其功過僅足相

抵是以此次未予恩施該撫惟當奮勉辦公另圖報稱以期仰邀  
渥賚九年二月 諭曰本年京察屆期江西巡撫秦承恩當該省  
匪徒廖幹周等滋擾時卽帶兵趕往督捕全數埽除特因其奏報  
遲延是以未卽加恩因念糾眾鉅案該撫能剋期辦竣其功足錄  
著賞給二品頂帶四月因袁州等幫重運糧船失風遲至一月之  
久具招陳奏奉 旨交部議處尋議革任 上寬免之十年授左  
都御史仍暫署江西巡撫十一年五月授工部尚書六月調刑部  
尚書九月署直隸總督十二年江西巡撫金光悌奏巡撫衙門有  
未結詞訟六百九十五起奉 旨秦承恩在該省巡撫任內最久  
著交部議處部議革任奉 旨改爲革職畱任十三年因刑部審

擬宗室敏學逞兇一案有心開脫部議革職奉 旨著加恩降爲  
編修在文穎館效力十四年三月擢司經局洗馬四月 諭曰秦  
承恩服官年久資格較深上年在刑部尙書任內審辦宗室敏學  
一案未免有所瞻顧尙非過之大者昨已加恩擢用洗馬聞其患  
病在寓尙難卽痊著加恩賞給三品卿銜俟病痊候補尋卒子耀  
曾兵部候補員外郎念曾工部候補主事

右 國史館本傳

國朝旨獻類徵初編卷九十六目錄

卿貳五十六

馮貴

吳玉綸

陸錫熊

馮應櫛

阮葵生

劉秉恬

瑪興阿

景安

徵瑞

塔琦

國朝旨獻類徵初編卷九十六目錄



國朝耆獻類徵初編卷九十六

通奉大夫前署江西巡撫江西布政使司布政使湘陰李桓輯

卿貳五十六

嵩貴

嵩貴石氏蒙古正黃旗人乾隆二十六年進士改翰林院庶吉士二十八年散館授編修三十年升侍講尋轉侍讀充河南鄉試正考官三十一年升右春坊右庶子三十二年四月充日講起居注官八月命提督河南學政三十三年仍留學政任三十六年三月奏言向來教職赴京會試揭曉後未經中式者子限五日赴部領照起程至回任日期仍未計程定限及逾限處分查各省州縣



佐雜官因公進京回任者按省分遠近俱有定限及逾限處分而  
教職赴京會試惟有揭曉後五日領照之限恐出京後或稽留親  
友任所或乘便回籍均不可知臣在河南學政任四載以來每遇  
會試未經中式各教官回任有遲至數月者率以途間患病爲詞  
其是否假託無從查驗請 敕部照州縣佐雜回任之例議定限  
期處分儻中途遇有事故並令該地方官出具印結下部議行九  
月任滿回京三十七年超擢詹事三十八年升內閣學士兼禮部  
侍郎銜三十九年四月充武英殿總裁官尋教習庶吉士八月充  
順天鄉試副考官十一月奏言鄉會試定有迴避之例所以杜夤  
緣而昭公正者立法至善但各項考試尚未盡一如考取中書助

教筆帖式教習恩監生繙譯生員及貢監生考職其閱卷官統由  
承辦衙門開列職名恭候 欽點閱卷官之子弟宗族媼親向不  
迴避殊不足以昭慎重請嗣後均照鄉會試例應迴避者槩令迴  
避至隨同閱卷之司員筆帖式亦一體辦理 上是之下部議行  
四十年正月署鑲藍旗蒙古副都統四月充殿試讀卷官五月以  
武英殿膳錄不敷繕寫書籍且六年方准報滿奏請增設膳錄照  
各館例五年報滿如所請行四十一年充經筵講官四十三年充  
會試副考官四十五年充順天鄉試副考官四十八年三月 上  
御門聽政嵩貴讀本錯誤 諭照全魁例黜革聽御前侍衛及乾  
清門侍衛差遣效力贖罪五十年二月授司經局洗馬十月復升

同治庚午... 卷之二  
二  
詹事府詹事五十二年 上以熱河文津閣所存四庫全書謄謄  
甚多 命隨扈諸臣再加校閱改正嵩貴與焉五十四年卒

右 國史館本傳

吳玉綸

吳玉綸河南光州人乾隆二十六年進士改翰林院庶吉士二十八年散館授檢討三十三年改貴州道監察御史七月疏言順天鄉試考官向來於十八房內擇一官階獨優者分易經第一房名曰領房如有兩人官階並優者又分詩經第一房名曰兩領房其餘各房拈鬮分經請嗣後鄉試房考無論官階大小悉令拈鬮分校以昭公慎又言各房落卷例應廣爲搜閱獨順天鄉試未盡舉行請 敕下順天考官除各房薦卷外將所餘之卷覈明確數送交考官以備搜擇得 旨下部議行三十四年 命偕阿揚阿前往江南會同督臣高晉查審李自臣控被安徽盱眙縣店戶徐乾

初等毆打並馬老坤控告縣官家人營丁毆死裴姓一家多命抄  
搶家私一案七月奏言六月分吏部籤掣婁縣知縣趙應鈞等三  
員於籤後俱具呈告病不無希冀卸六月引 見之班附七月驗  
放之例可以坐獲原掣美缺規避調用遠省請酌改驗放之例奉  
上諭所奏甚是此後若朕在京月選州縣有掣籤後告病者准  
附於下月引見如下次未病痊該衙門卽行開缺至遇朕巡幸之  
前兩月有託病不卽引見冀歸下月驗放者一經具呈告病卽扣  
除開缺將來另選得缺仍著該部於帶領時將該員原選缺分之  
遠近繁簡字樣一併注明候朕定奪十一月疏言邊省械鬪之案  
秋審入情實嚴聚眾也近年械鬪不獨較前稀少卽本年械鬪情

實各案其惡眾至多者如福建省之林獅計十人廣東省之蔡甯  
高計九人其少者如廣東省之蔡阿安僅四人李樾全僅三人此  
皆 聖天子整綱肅紀扶弱抑強故於沿江濱海之區收弼教明  
刑之效何以附近省分鬪毆各案動輒六七人至十三四人不  
兩造互毆幾至二十餘人較之邊省爲數轉多此在封疆大吏暨  
有司官固宜畱心整頓至遇事執法則不得不明設科條區多寡  
定緩實嚴爲懲創也臣更查鬪毆各條首嚴誅意無心傷人者緩  
之矜之有心殺人者情實之火器殺人者情同故殺俱情實之天  
下豈有糾約六七人至十數人而其心不欲傷人者乎豈有持刀  
挾杖而其勢能不傷人者乎如此而猶以傷由互毆殺出無心籠

統入緩未免情重法輕請嗣後聚眾九人以上殺人擬抵者照械鬪例秋審入情實奉 旨下部議奏遲兇聚鬪自當重懲但其毆至死各案情節萬變若限定九人之數將使人數止及五六人七八人而情罪較重者轉致有失重失輕之弊惟在秋讞時詳覈其理之曲直情之重輕期於無枉縱而昭平允未便懸定人數專立情實條例得 旨依議三十五年轉刑科給事中擢鴻臚寺少卿升太常寺卿三十八年授光祿寺卿九月 命稽查右翼覺羅學四十年疏言設立各學弓箭教習原爲演習騎射臣查右翼四旗覺羅學內鑲藍等三旗見空弓箭教習三缺應卽行充補外關後各學充補弓箭教習如何定限逾限如何處分請定例遵行奉

旨交宗人府議奏尋議教習缺出於原定二十日限內咨送充補限內咨送不到卽行奏參得 旨依議六月以 地壇神位擦汗議處奉 旨革職畱任四十五年擢左副都御史四十六年充會試副考官八月奏甘省報捐監生應查革補繳奉 諭曰王賈望私收折色一案已將伊等私收冒銷婪得贓私查抄入官亦足以抵該省浮開冒賑之數矣若又令各捐生紛紛補繳是轉開錙銖較利之端於國家政體甚有關係吳玉綸所奏不准行四十八年五月奏請定祈雨齋戒之例不准在私宅齋戒得 旨允行六月充浙江鄉試正考官八月提督福建學政五十二年二月擢兵部右侍郎四月署吏部左侍郎五十三年七月 諭曰阿桂奏外間



有謝墉抽身便討吳玉綸倒口卽吞之語吳玉綸在學政任內聲名狼籍何以復勝卿貳之任著降爲內閣學士五十四年二月京察屆期以聲名平常交部議處降三品京堂仍帶革職畱任以家人李朝聘倚勢強開溝道霸水害眾又於修築閘壩之時欺壓鄉民不出夫草經監生舒國秀等呈控梁冑堂奏入得旨降四品京堂革職之處仍註冊十月復以學政任內聲名不好降檢討仍在武英殿修書處效力行走五十六年廷試大考三等罰俸一年六十年二月命吳玉綸以原品休致嘉慶七年卒子鼎銘候補主事開輔浙江西安縣知縣葆晉江蘇通海道

右 國史館本傳

京師琉璃廠北巷古海王村也向爲王漁洋司寇故宅手植紫藤  
一株舊本久枯乾隆己丑香亭先生寓此次年抽蔓復花因繪古  
藤詩思圖自爲記一時名流題詠殆徧錢文端有臭味尊前輩風  
流此一鐙因君追往事其奈髮鬢髻之句蓋文端少時曾過漁洋  
此寓云圖中佳句不可勝舉而余最愛錢籀石侍郎畫人只畫袷  
衣寒畫花并畫雕欄曲二語能寫出紫藤風致

右聽松廬詩話張維屏撰

國朝通志卷之六十一

六

陸錫熊

陸錫熊江蘇上海人乾隆二十六年進士歸班銓選二十七年  
聖駕南巡 召試一等授內閣中書二十八年補缺三十年充山  
西鄉試副考官三十三年四月京察一等加一級六月充浙江鄉  
試副考官十二月擢宗人府理事三十五年充廣東鄉試正考官  
三十六年三月充會試同考官五月擢刑部員外郎是年恭遇  
覃恩加一級三十七年三月充會試同考官十月擢本部郎中會  
開四庫全書館 命司總纂三十八年八月 諭曰辦理四庫全  
書處將永樂大典內檢出各書陸續進呈朕親加批閱間予題評  
見其考訂分排俱有條理而撰述提要粲然可觀則成於陸錫熊

紀昀之手二人學問本優校書亦極勤勉紀昀曾任學士陸錫熊見任郎中均著授爲翰林院侍讀十二月補缺四十年二月擢右春坊右庶子旋授翰林院侍讀學士閏十月充日講起居注官四十一年充文淵閣直閣事是年恭遇 覃恩加一級四十二年四月京察屆期王大臣等驗看引 見奉 旨准其一等四十三年議敘四庫館纂辦諸臣奉 旨陸錫熊等雖已加恩擢用但纂辦各書均爲出力著賞給緞匹筆紙墨硯以示獎勵四十五年五月京察屆期王大臣等驗看引 見奉 旨准其一等 諭以應升之缺題奏六月授光祿寺卿八月 命稽察右翼覺羅學是年恭遇 覃恩加一級四十六年四月 諭曰四庫全書總目提要見

已告竣呈覽頗爲詳覈所有總纂官紀昀陸錫熊著交部從優議敘部議加一級紀錄三次四十七年五月轉大理寺卿七月撰四庫全書表文進呈得 旨獎賚十月因四庫館進呈原任檢討毛奇齡所撰詩說一書內有字句違礙總纂官未經檢改得 旨交部議處部議降調 諭從寬畱任四十八年十二月丁母憂五十年四庫全書告成議敘加一級紀錄二次五十一年六月服闋補光祿寺卿九月提督福建學政五十二年二月遷都察院左副都御史畱學政任三月四庫全書處呈續繕三分內有李清所撰諸史異同一書語多妄誕總纂官未經掣燬 命交部嚴加議處部議革職得 旨改爲革職畱任八年無過方准開復六月 諭曰

前因熱河文津閣所貯四庫全書朕偶加批閱其中錯謬甚多因派扈從之阿哥及軍機大臣等復加詳閱並令在京之阿哥及大學士九卿等將文淵文源二閣所貯書籍一體校閱今據和坤等閱看各處譌舛不一而足此內閣若璩尚書古文疏證一書有引李清錢謙益諸說未經刪削並黃廷堅詩集注有連篇累葉空白未填者實屬草率已極著將承辦之總校分校官交部議處見據紀昀奏請將尚書古文疏證內各條遵照刪改陸續賠寫並請將文源閣所貯明季國初史部集部及子部之小說雜記諸書自認通行校看凡有違礙卽行修改仍知會文淵文津二閣詳校官畫一辦理再行賠寫抽換務期完善等語從前辦理四庫全書係總

纂紀的陸錫熊專司其事朕因該員等纂輯訂正著有微勞不次超擢數年之間晉階卿貳乃所辦書籍竟如此荒謬舛錯如果從前繕寫時謄錄率意脫落遺漏自不難將已邀議敘見任民社各員斥革治罪但此等譎謬該謄錄等惟知照本繕寫例不考訂改正而纂校各員則係有專司考訂之責自必未經寓目該員所辦何事其咎實無可遁今紀昀自認通行覆閱明末各書復請將看出應換篇葉自行賠寫交部議處而陸錫熊則因見出學差轉得置身局外是使紀昀一人獨當其咎轉令見在派出之大小各員分任其勞不足以昭平允著將文淵文源文津三閣書籍所有應行換寫篇葉及裝訂等改各工價均令紀昀陸錫熊二人一體分



賠五十三年二月因上年福建甄別教職數目過少下部議處部  
議革任得旨寬免仍注冊五十五年正月任滿回京奏請前往  
盛京詳校文溯閣書籍九月奏所有書籍業經分閱各員全數校  
畢覆行撥發亦已竣事其中錯落偏謬各書隨時繕寫改正此外  
漏寫錯寫應行另繕之本俱即自行賠寫完妥報聞是年恭遇  
覃恩開復降革處分五十六年二月命稽察左翼宗學十二  
月奏全書卷帙繁富屢校即屢有改正文淵文源兩閣經紀昉等  
覆校中間缺落舛譌尙多所有文溯閣全書亦應一體覆加詳覈  
俾得益增完善一交新春臣即起程赴盛京覈辦報聞五十七  
年抵奉天省城旋卒

右 國史館本傳

洪惟我 國家重熙累洽蘭臺石室所儲光燭雲漢而 皇上稽  
古典學復開四庫全書之館以惠藝林先取翰林院所弄永樂大  
典錄其未經見者又求遺書於天下書至今倣劉向曾鞏之例作  
提要載於卷首而 特命陸君錫熊偕紀君昫任之兩君者攷字  
畫之譌誤卷帙之脫落與他本之互異篇第之倒置斷其是否不  
謬於聖人又博綜前代著錄諸家議論之不同以折衷於一是總  
撰人之生平撮全書之大槩凡十年書成論者謂陸君之功爲最  
多君諱錫熊字健男一字耳山乾隆二十四年己卯舉於鄉二十  
六年辛巳成進士二十七年春恭遇 南巡獻賦 行在 召試

入一等 賜內閣中書舍人旋充方略館纂修官時方奉 敕修  
通鑑綱目輯覽君編撰以進當 上意遂晉直軍機處三十三年  
十二月遷宗人府主事繼擢刑部員外郎晉郎中三十八年八月  
以所撰提要稱 旨改授翰林院侍讀四十年二月授右春坊右  
庶子未幾擢侍讀學士閏十月充日講起居注官又充文淵閣直  
閣事四十二年春 孝聖憲皇后寘天凡大祭殷奠上 尊諡典  
禮嚴重應奉文字大學士于文襄公屬君撰進皆被 旨嘉賞四  
十三年六月授光祿寺卿四十七年五月授大理寺卿五十一年  
十二月提督福建學政五十二年授都察院左副都御史仍留學  
政任以五十五年春任畢旋京初四庫全書之成也君任編輯不

任校勘而 上命分寫七分自大內文淵閣以外圖明園之文淵閣熱河避暑山莊之文津閣盛京之文溯閣各度一部又於揚州大觀堂鎮江金山杭州西湖皆建閣以度之而前校勘者不謹舛錯脫漏所在多有文溯閣書尤甚君以是書曠代盛典不可任其疵類乃請自往校之既而以 盡五十七年正月復往會山海關道中冰雪凍沍比至奉天病以寒卒預是書之役者眾矣君獨物其事而歿可悲也君以文章學業受 特達之知故自四庫全書通鑑綱目輯覽之外凡契丹國志勝朝殉節諸臣錄唐桂二王本末河源紀略歷代職官表攷奉 敕編輯見付武英殿刊刻者又二百餘卷每書成或降 旨褒美或交部議敘或 賜文綺筆

國朝書林傳天相 卷之二  
視之屬奏進表文多出君手 上閱而益善之三十九年奉 特  
旨召入 重華宮與南書房諸臣小宴聯句並 賜如意畫軸自  
餘 特賞 年賞 節賞書畫石刻等物不可勝紀奉使衡文更  
歲不絕充山西浙江鄉試副考官者各一充廣東鄉試正考官者  
一充會試同考官者二提督福建學政者一去取精審所得多知  
名士士論翕然歸之君冲和純粹其色温然其言呐然不出諸口  
而穎悟明敏讀書一過無不洞悉貫串少時以辭賦入中書中年  
在詞館賓朋酬贈使節登臨四方仰重其名率以絹素來請所作  
繁富闔溢篋笥顧不甚珍惜輒爲人取去自以蒙 上恩遇逾於  
常格不屑以詞臣自畫晚年益覃心經濟之學嘗取杜氏通典馬

氏通考合以 本朝會典如食貨農田鹽漕兵刑諸大政溯其因  
革審其利弊口講手畫侃侃然可以見諸施行而惜其年之不永  
是以訃至京師賢士大夫如紀君輩莫不爲之曾歎累息者君生  
於雍正十二年甲寅十二月初二日卒於乾隆五十七年壬子二月  
二十五日年五十有九世爲江蘇上海縣人諱鳴球者曾祖考也諱  
濬齡以選拔貢生官安徽石埭縣教諭者祖也諱秉笏乾隆辛酉  
科舉人者考也三代咸以君貴 封贈如其官配朱氏例封夫人  
先君卒以恭順能佐內政爲親黨所推子五慶循慶堯慶庚慶勤  
慶均女五人孫男三人惟松江陸氏世以文章著見君七世從祖  
文裕公深在明宏治嘉靖間以通人名德望重臺閣流傳翰墨迄

今人寶貴之君官職略與文裕等若其掌著作而被 恩遇有文  
裕所未逮者且四庫全書定於 御覽尊於冊府分布於海寓騰  
今邁古千載未有皆君審定而攷正之世之讀提要者見其學術  
之該博議論之純粹顯顯然如在目前所著寶奎堂文集篋墩詩  
集雖不盡傳可無憾焉已余與君居同郡先後同官內閣同直軍  
機處文酒之會靡不同者軒覽之修余先任其事尋以從獵木蘭  
而君繼之余嘗至上海過君素堂方池老屋不蔽風雨清修舊德  
久而彌著然則知君之深無逾於余者慶循等扶柩歸里將卜葬  
於某原奉狀請銘其何忍辭銘曰

魚圻之裔世以文名繫君繼之蔚其魁閎綜裁簡箝以蔽隆平入

典書局出主文衡拔諸髦俊用爲國楨七略七錄鉅編旣成正厥  
譌謬往來 神京風簷雪虐卒瘁於征吳淞遼水共此寰瀛雲車  
風馬其返邱塋文昌華蓋作作庚庚照於幽竈後昆之享

右墓誌銘王昶撰

耳山博聞強記資稟絕人二十七年 召試 賜內閣中書入直  
軍機初與子奉 收編通鑑輯覽頌之 命輯永樂大典復求天  
下遺書開四庫館以薈萃之校對數百人謄錄至千餘人歷十年  
始成而君與今大宗伯紀君曉嵐司其總每進一書倣劉向曾鞏  
例作提要冠諸簡首 上閱而輒善之 特旨由刑部郎中授翰  
林侍讀文字受 知駮駘嚮用典試者三督學政者一後因奉天



所儲四庫館書中多脫落舛誤奏請自往覆校比至而病歿時論  
無不痛惜平日進御之作工而不穠婉而能切同人推爲莫及  
至詩文隨手散佚歿後搜篋中得數百首皆應酬之作非其稱意  
者

右湖海詩傳張維屏錄

耳山先生生有萬夫之稟強識博聞嘗取杜氏通典馬氏通考合  
以本朝會典諸大政皆審其因革利弊口講手繕之其後有  
欽定皇朝通典通考諸書由先生發其端也

右市賸李元度撰

馮應榴

星寶英敏豁達有幹濟才既以江西布政使告歸益肆力於典籍  
尊人養吾侍御注李玉溪詩最爲精贍君師其意以蘇文忠公詩  
注疎舛尙多遂取王梅溪施輔之查初白諸本合鈔之以考其是  
非得失所採正史而外凡叢書脞說可證據者靡不蒐討

右湖海詩傳張維屏錄

星寶先生沈酣於東坡詩者有年又得宋槧五家注元槧百家注  
舊本參以施注殘本稽其同異而辨證之竊謂王本長於徵引故  
寶施本長於臧否人倫查本詳於攷證地里先生則彙三家之長  
而於古典之沿譌者正之唱酬之失攷者補之輿圖之名同實異

者覈之以及友朋商榷之言亦必標舉姓氏其虛懷集益又如此  
合注出而讀蘇詩者可以得所折衷矣

右潛研堂文集張維屏錄

按馮公浙江桐鄉人乾隆二十六年進士三十年

上南巡獻

詩賦卽用內閣中書官至鴻臚寺卿

阮葵生

阮公諱葵生字寶誠號唐山淮安山陽人先世自明初由清江以武功隸大河衛七世祖嘉林宰益陽舉循吏第一擢監察御史曾相許縣學生與同邑閻百詩應鴻詞徵祖應韶監生父學浩翰林檢討兩世皆以公 贈通政司參議公生之夕父夢客以寶石贈故小字寶石六歲就外傅不好弄七歲孝經周易諸經已成誦隨父入京師與弟芝生齊名有淮南二阮之目乾隆壬申舉於鄉偕弟就學於天台齊宗伯息園辛巳會試取中正榜授內閣中書充方略通鑑輯覽兩館纂修官軍機司員處行走緬甸不靖軍書旁午公入直甚勤秋扈 蹕木蘭會京師割鞞案起蔓延各省公虛

心推物日一具奏大端以爲本無其事妖言由是漸息三十六年  
補刑部主事時總理刑部者爲諸城劉文正公久於樞廷識公才  
告同列曰阮某選西曹總讞事有人矣明年兼雲南司總辦秋審  
三十九年鞫山東亂民王倫脅從至部者無枉縱升員外郎四十  
一年升郎中時有弟殺兄牛而兄故殺弟者議者以爲弟是罪人  
兄爲尊長公判曰弟殺兄牛木非盜賊兄刃弟頸實喪天良竟抵  
罪浙江捕盜船事有以內洋改外洋者大吏均擬絞公判曰法嚴  
首惡律重誅心干總據實報 聞其情輕都司代改招詳其情重  
槩擬絞不可且非稱與同罪律義干總改擬流又有兄被殺而父  
受賂私和弟首其事證父以賄擬徒公判曰爲兄洩憤手足之誼

雖全陷父充徒恩義所傷實重使依前擬不特父不能無憾於子子亦何能一息自安應改子首如父自首例令其弟代父充徒則無媿兄弟之義亦不賊父子之恩矣會有議復讐例宜刪除者軍機大臣集議公撰議彙曰查律載父母祖父母爲人所殺子孫不告官而擅殺行兇人者杖六十其卽時殺死者勿論少遲卽以擅殺論細繹律意登時殺死勿論者蓋子孫當場目擊怨憤不惟不暇告官並不及慮已擅殺故得勿論至少遲則仍是登場目擊怨憤故予以杖六十皆原其倉卒不告擅殺之罪也若旣逾時到官有司不爲昭雪或勢豪稽誅兇手詭脫子孫含憤操戈乘隙刺殺則所仇者實爲應抵之人其所復者亦有應得之罪但 國家明

罰敕法冤無不伸律文雖載引此者稀縱有一二藉口報仇者然  
國法已彰私仇卽泯假如其父之冤旣伸其子卽無仇可復所殺  
非應抵之人則於法無可寬之律擬以謀殺定入情實原爲罪所  
應得至於律文相沿已久自當仍舊以俟法外之仁庶幾情與律  
兩得其平矣卒如其議公之理刑允正類若此四十五年京察一  
等改監察御史部臣以刑名諳習請留部會有疾請假南歸四十  
七年冬入都先是部臣奏公名 上曰秋審近當促之來及至補  
監察御史十二月 特旨以四五品京堂用擢通政司參議五十  
年審釋監禁待質之犯 特命專其成四月超擢刑部右侍郎九  
月辦秋審平允復邀 褒獎五十二年扈從灤河覆校文津閣四

庫全書 命和詩三十餘首時臺灣逆首林爽文執至部公侍  
廷鞠晝夜無少間而校書和詩如常五十四年二月二十一日以  
疾卒年六十有三先是公父修淮安學廟畢設灑掃會諸生日聚  
一錢爲修廟資至公時錢有餘公爲置田名一錢莊立規條二十  
以期久遠在京師建淮安西館於橫街居鄉修勺湖草堂汎舟湖  
上歌誦先芬總漕楊清愨公改置麗正書院於城東屬公董其事  
院成出藏書數百種畀諸生讀焉公性孝友篤於宗族尤好獎掖  
後進與錢辛楣程魚門諸君交京邸設消寒吟秋兩會爲詩酒社  
平居廉介清潔門無雜賓退直後青鞵布韞如諸生時暇則讀書  
自娛古文章疏於宣公溫公韓范諸公外尤愛范忠宣胡文恭詩



賦出入漢魏六朝而以流麗爲主晚乃訂其詩文爲七錄齋集二十四卷茶餘客話三十卷阮氏筆訓族譜若干卷子鍾琦鍾璟孫以立以言

論曰公治刑以明察平允見稱於時然其神智所開乃自唐宋諸賢奏議而來故能持大體不爲苛細公卿之異於刀筆吏者在此

右傳阮元撰

吾山司寇撰茶餘客話三十卷戴菴塘爲選十二卷做畢昇活版印行菴塘謂其記前型搜逸事攷證典物多有未經人道者余謂卽擬諸漁洋池北偶談數種亦正不多讓

右松軒隨筆張維屏撰

刑部白雲亭地形最低夏秋雨後輒排几案作橋亭中水深至一  
二尺阮吾山司寇詩云十八曹司水際浮者今尙然也然相傳以  
沙擁翰林院水滄三法司爲吉兆不解何義

西域圖見錄乾隆四十二年滿洲七十一譔七十一嘗奉使西行  
故語多確鑿書中多垂誠不甚夸耀武功尤爲紀述佳手蓋阮吾  
山司寇蔡生實爲潤色云

右紀聞陳康祺撰

日本書紀卷之六十一

十一

劉秉恬

劉秉恬山西洪洞人乾隆二十一年舉人二十六年取中明通榜中書軍機處行走二十九年擢吏部主事三十年正月升員外郎九月升郎中三十二年授御史三十四年巡視南漕差竣巡視南城授吏科給事中三十四年大學士傅恆督師緬甸奏請秉恬隨赴軍營二月擢鴻臚寺少卿三十五年大兵凱旋五月擢都察院左副都御史六月擢刑部右侍郎七月調兵部左侍郎尋調倉場侍郎三十六年八月奏大通橋以下至通州石壩等處均未挑濬因而衝決隄岸闢座與其補苴於事後曷若綢繆於幾先得旨允行三十七年六月諭川省見在大兵分路進剿兩金川所有

軍營糧餉最關緊要南路見派阿爾泰在彼專管其西路著派侍郎劉秉恬專辦劉秉恬人頗明白奮勉此事尙所優爲著卽馳驛速赴川省不必來京請訓又諭曰劉秉恬見在出差往四川辦理西路軍營糧餉著給與欽差大臣關防七月諭曰因川省軍營糧運緊要特派侍郎劉秉恬前往西路鄂實前往南路分頭督率今思南路徑僻站長山巒陡險輓運較艱尤當設法趕運劉秉恬平日頗能辦事著調赴南路上緊籌辦秉恬以西路急需接濟奏請暫閔二三日料理完竣再赴南路奏入 硃批是極如此方是又奏南路糧運人俱畏其難臣亦非敢輕言其易然天下亦無必不可辦之事 硃批所見甚是勉爲之又奏糧運站夫回空之

日請仍給口糧得 旨允行十月大兵由甲爾木一路進攻小金川秉恬奏道險萬分惟羊隻可江涉山回招集蠻民販羊至營以六羊抵米一石得 旨嘉獎十二月奏見在官兵攻克僧格宗其地距達烏六十餘里臣親往查看酌定程途適中之地復於策爾丹色木安設一站以便轉運至策爾丹色木見有喇嘛寺一所卽將運到米石收貯寺內更得蔽風雨而資防衛再查僧格宗及附近之納圖納扎木等處軍糧乾隆十二三年係由西路餽送運價較省今由南路支應道遠站長俟攻克美諾之日將此一帶軍糧仍歸西路支放則輓運較易錢糧亦可節省奏入 上嘉之是月諭軍機大臣等據劉秉恬奏見在馳赴美諾就近督令糧員上緊

臣等三、其、才、能、  
三、  
趕運不敢稍存畛域之見等語所辦甚是深屬可嘉已於摺內批  
示矣劉秉恬自派赴南路辦糧以來一切俱能奮勉妥協軍儲源  
源接濟以利遶行且由達烏自赴美諾身親督率輓運不辭勞瘁  
實能與軍營大臣衝鋒陷陣者交濟奏功朕心深爲欣悅前此漢  
大臣中原有賞給花翎者劉秉恬此次如此認真任事宜從格外  
優獎著加恩賞戴花翎賞給大荷包一對小荷包二箇以示恩眷  
旋授四川總督 諭仍畱美諾等處董辦一切事務並就近督催  
糧運三十八年正月奏小金川全境蕩平見在分兵三路剋期申  
討金川糧運最關緊要臣供支當囑爾拉之外兼辦南路運往綽  
斯甲布軍糧不敢推諉貽誤此外吉地丹東一路見有官兵六千

臣於章谷存糧內督令源源運往足供接濟得旨嘉獎又諭  
曰劉秉恬見駐美諾辦理一切軍務董天弼又駐布朗郭宗經理  
降番諸事所有防範機宜乃伊一人專責著將美臥溝及曾頭溝  
兩路酌量形勢選派幹練備弁帶兵駐守以防賊眾滋事其地有  
類此要隘之處亦著一體妥辦或美諾兵數不敷派撥川省尙有  
可調之兵卽著劉秉恬等悉心經理總期於事有益不可惜費旋  
奏偕格宗降番一項俱一例辦理其不隨行者斷無取給內地之  
糧俾資養贍但旣宥以不死卽當令其自生查美諾爲小金川居  
中之地臣到彼將各寨逐一清釐並令乘此布種之時照常耕作  
其力不能者或聽其傭工或量予籽種則見在歸來者可保其無



他心其逃往金川者亦將聞風而至奏入 上嘉之二月 諭據  
劉秉恬奏稱溫福見在取道進攻昔嶺迅速移營但道路初開恐  
糧道稍有稽遲卽日馳赴木果木大營由功噶爾拉一帶地方沿  
途查辦將道路設法開修驛站安爲安設並催價在途米石速赴  
軍營適中之地帶兵駐防並令先往木果木及功噶爾拉兩處察  
看情形今尙未接奉前旨一聞溫福移營之信卽迅速前往與朕  
所降諭旨適合可嘉之至劉秉恬尙在軍機處行走有年久經歷  
練而又不冒稍存畏難之見不辭勞瘁動合機宜深得古大臣實  
心體國之道實能副朕委任深用嘉慰似此勤勞軍務卽與統兵  
督戰無異劉秉恬著交部照軍功議敘以示優獎又 諭曰據劉

秉恬奏綽斯布土司工噶羅爾布差頭人生根吉投稟劉秉恬以  
綽斯甲布力量較別土司不同而與金川親暱尤久見雖附列行  
間未見十分出力其意向冀大兵中輟既可全恭順之名復不失  
媯親之誼方以彌縫爲得計其懇求退回噶爾瑪六宗地方具稟  
已非一次而試開進剿金川之路皆人所共知該土司不過藉此  
以表其恭順因而試探軍情尤須直揭其隱私方足使番人知所  
儆勵隨於該頭人叩見時面爲嚴切曉示諭以大兵以次征剿務  
必掃盡蠻氛斷不中止不似從前提督辦法其六宗等處事平後  
自然從公割斷此時無暇辦及至爾土司自去年九月隨征金川  
至今並未搶得金川一處且容金川賊人在爾境內放夾壩不能

發兵搶擄殺賊所謂實心出力者在生根吉聞諭慙沮不能置對惟稱回告土司恪奉遵行并另寫檄諭嚴行詰駁發交該頭人齋回等語所辦甚合機宜閱其檄彙亦極詞嚴義正實爲可嘉三月奏臣赴木果木大營沿途查辦一切事宜行至崇德地方卽遇大雪次日抵功噶爾拉地氣極寒四山皆雪甫經設站人夫尙無棲止之處隨於附近站所飛調篋蓆搭蓋窩棚又湊集帳房各夫免露處之虞軍糧藉得轉輸迅速至簇拉角克西口係布朗郭宗運糧接濟要道西口至東口約六七十里多係土路尙易開修由溝口通至木波地方便合帛噶爾郭克礪及布朗郭宗大路今若將此路開通較爲平易再自功噶爾拉前至軍營路極陡滑各夫

負重維艱已經撥夫重修道路並將冰凌隨時斫鑿不致少誤糧運奏入報 聞又奏定嚴緝逃兵章程 諭曰劉秉恬所議甚當即照此辦理四月加太子太保六月底木達布朗郭宗兩處失守 諭曰此次賊番侵擾原屬猝不及防其疎忽尙不足爲劉秉恬責惟董天弼本屬軟弱無能之人前經切諭劉秉恬令其畱心查察乃董天弼擅離防守之地退居美諾劉秉恬豈無聞見因何不早奏參該督之咎實在於此劉秉恬著交部嚴加議處尋 諭曰劉秉恬革去總督著賞給按察使銜翎頂暫行照舊帶用仍令其實心辦事七月 諭劉秉恬著革職畱於軍營效力自備資斧贖罪又 諭曰劉秉恬前此督辦糧務尙屬奮勉妥協且在川年餘

道路情形已熟曾爲總督川省文武皆其屬員委以專辦自當聽其調度但伊係革職之員奏摺行文諸多未便著派按察使郝碩前往同劉秉恬督辦西路糧運務使軍糧源源接濟以裕軍儲三十一年奏川省軍糧均係米石至麪斤一項採辦較少而裹帶最爲便捷見在進剿金川約需十七八萬斤業已有盈無絀奏入上嘉之四十年五月奏口外雨頗多楸坻至日爾拉薩拉一帶最關緊要或有雨淋塌卸之處臣趕緊修整並順道前往大板昭軍營等處與督臣富勒渾悉心籌酌將北路軍食歸併西路遞運以省糜費奏入 上嘉之八月 諭曰劉秉恬前此獲罪原係總督任內之事伊自革職後駐劄楸坻總理糧運兩載以來尙能畱心

經理妥協盡力著加恩賞給兵部郎中賞戴花翎十月奏補職方  
司郎中仍帶欽差關防十二月補授吏部右侍郎四十一年調吏  
部左侍郎四十四年正月 諭曰劉秉恬之母年逾八旬見在息  
病頗重病中思念其子甚切劉秉恬承辦軍需奏銷業將完竣著  
馳驛迅速回京侍奉伊母聞子剋期回京自必心生欣喜病勢或  
可稍痊將此速行傳諭知之是月丁母艱十二月 諭畢沅見在  
丁母憂陝西巡撫員缺緊要卽著劉秉恬署理不必來京請訓伊  
曾任封疆且守制已屆一年見因一時不得其人暫令署理並非  
開在任守制之例也四十五年三月 諭劉秉恬見有面諭之事  
著卽馳驛前赴行在陛見其陝西巡撫印務著交布政使尙安護

理將此由六百里傳諭知之四月調署雲南巡撫奏云銅與鹽爲地方自然之利何以近年來滇省屢行竭蹶似轉爲地方之累必當求其受累之由斯可得去累之道 上是之四十六年八月署雲貴總督時安南國王以內地人民出邊居住咨請防禁秉恬照會國王稱內外界址天然判別無須復加中畫至內地百姓祇緣爾國需用內地貨物 天朝俯念藩封世守一視同仁特准開通關市爲爾國利賴否則內地之人焉有遠詣爾國貿易之理又爾國土民欠稅不完一節此非經徵頭目催辦不力卽係私收侵用之故內地民人不與往來貿易且並非在外墾田種地本無應納租賦焉有內地民人舊制土民欠稅之說但旣稱內地之民就寓

日眾更有動稱內地差委徵索租賦大爲民擾之事 天朝法紀森嚴斷不容若輩潛居境外滋生事端惟有責令爾國就近查出稟行送回內地以憑究治儻有聞風逃逸者仍卽查明各犯姓名籍貫補開咨報庶內地查拏易盡無從漏網隨具摺陳奏 諭曰據劉秉恬奏接據安南國王來咨酌擬照會文彙檄飭一摺所辦甚是已於摺內批示矣安南臣服本朝素稱恭順該國沿邊一帶隘口雖許內地民人往來貿易但其中難保無匪徒在彼滋事之處惟在該督撫隨時嚴飭沿邊鎮將及地方官畱心查察按驗查照籍貫毋許游民私越儻有不安本分之徒潛竄彼境滋事卽嚴拏究辦自可以綏屬國而靖邊隅劉秉恬所奏見在飛飭文武各



屬巡防偵探遇有並無牌照竄回游民卽行截擊解省嚴審所辦甚爲妥協至其所擬該國照會文彙措詞亦尙屬得體其中稍有字句應行刪節者已令軍機大臣酌改發回該督等卽遵照繕寫發往將此由五百里諭令知之九月 諭滇省額運京銅向來辦理遲延皆由該督撫等不能實心籌辦所致此次庚子正運加運八起京銅於七月內全數埽幫辦理甚爲妥速劉秉恬著交部議敘四十八年 諭此次壬寅正運加運八起京銅於本年三月全數埽幫爲期尤早劉秉恬著交部議敘五十年 諭劉秉恬奏查明滇省歷來文武官員有去思德政等碑一百餘座見在逐一撲毀辦理實屬可嘉劉秉恬著交部議敘五十一年正月 諭曰劉

秉恬身任巡撫其初到雲南聲名皆屬平常近聞伊能遵朕教誨  
痛自改悔無從前聲名平常之事數年來辦理鹽銅等事俱能迅  
速妥協劉秉恬應慎之在己持之以久庶不致負朕教誨成全諄  
諄告誡之至意閏七月調兵部侍郎五十二年正月調倉場侍郎  
十月 諭今歲係全漕年分各漕糧較往歲多至一倍有餘該倉  
場侍郎等辦理甚爲妥速蘇凌阿劉秉恬俱著交部議敘五十七  
年閏四月奏籌辦截漕事宜近日臨清一帶水勢漸消河面未能  
寬闊江西船體較大請將在前之南昌等七幫跟接赴通儘在後  
之廣信等六幫截留撥給得 旨嘉獎六月奏本江西南昌等  
五幫出臨清開後水淺起撥之費較多擬將袁州等三幫應交之

贈剝米一石二斗除免交二斗以抵直省撥價外其餘一石令該  
三幫彙交臨清州知州轉交江西前五幫總運通判以爲將來接  
濟前五幫各項之費得 旨所辦好有旨議敘五十八年 諭倉  
場侍郎等奏七月初五日已將全漕俱行起竣較之五十六年無  
閏之歲更早四日辦理尙爲妥速諾穆清劉秉恬及坐糧廳俱著  
加恩交部分別議敘以示獎勵嘉慶四年九月調兵部右侍郎五  
年正月調兵部左侍郎二月卒子寶篋原任安慶府知府寶篋廕  
生籤掣刑部主事捐升郎中寶書兵馬司副指揮候補通判寶籛  
兵部司務廳行走

右 國史館本傳

瑪興阿

瑪興阿滿洲鑲白旗人姓那拉乾隆二十六年由筆帖式授提督衙門主事二十九年十月擢員外郎三十二年十二月調戶部銀庫員外郎三十四年二月授都察院山東道監察御史三十五年七月擢□科給事中八月巡視東城十月巡視天津漕務三十六年正月擢都察院左副都御史九月命署刑部左侍郎俟巡漕務竣赴部辦事十二月補刑部左侍郎河南貢生張進孝赴京控本縣知縣吳居澳剋扣軍需各款命瑪興阿前往查審三十七年正月審明吳居澳違例刑移上官王氏一款屬實餘係誣告擬擬居澳職論進孝罪如例諭曰此案內知縣吳居澳以王氏控

告命案不實復在縣堂辱罵輒行梭指將該縣擬以革職未免過當有司用刑輕率雖有不合但民婦撒潑氣憤示懲情理本不甚重若緣此節卽子罷斥所屬民人將不知畏懼官長於吏治民風大有關係吳居澳不必革職著交部照例察議四月 命往葉爾羌辦事三十八年三月 諭曰禮部侍郎員缺著瑪興阿補授瑪興阿見在出差著索琳署理四十一年十一月 諭曰高樸係兵部侍郎兼署禮部侍郎今派往葉爾羌將瑪興阿換回瑪興阿到京後卽著以禮部侍郎兼署兵部侍郎十二月 命往和闐爲領隊大臣更換尙須時日所有禮部侍郎兵部侍郎原缺著景福阿肅兼署四十二年四月承襲佐領十二月以葉爾羌辦事侍郎高

樸勒索回眾金寶並私採玉石瑪興阿近在同城不行揭報部議  
降三級調用得 旨仍畱該處辦事四十四年正月調往喀什噶  
爾辦事二月授太僕寺卿十月擢內閣學士兼禮部侍郎十二月  
授正藍旗蒙古副都統四十五年三月擢兵部左侍郎四十七年  
九月調正藍旗漢軍副都統 上以兵部滿堂官乏人命瑪興阿  
回京十月充考試清字繙譯貼寫中書副考官旋奏試繙譯中書  
應照試繙譯生員例添派御史二員滿副都統二員稽查彈壓下  
部議行十一月因取中正紅旗繙譯中書卷內誤列入正白旗一  
卷部議降調得 旨寬免十二月承襲騎都尉四十八年二月調  
正黃旗滿洲副都統五十年正月入千叟宴五十二年二月調吏

部右侍郎五十三年七月轉左侍郎九月署禮部侍郎五十七年  
正月卒孫依成額襲世職

右 國史館本傳

景安

景安鈕祜祿氏滿洲鑲紅旗人乾隆二十七年由官學生考取內閣中書三十五年補官三十八年升侍讀三十九年調顏料庫員外郎四十二年調戶部員外郎四十五年京察一等四十七年遷郎中四十八年二月京察一等八月授山西河東道五十一年遷甘肅按察使五十二年調河南按察使五十三年遷布政使五十六年四月調山西布政使六月調甘肅布政使十一月廓爾喀侵擾後藏 命將軍福康安勦之 諭景安辦理西甯至藏臺站十二月 賞戴花翎五十七年經福康安奏畱西藏委赴察木多催趨軍需尋調往濟隴督運糧餉五十八年正月賊平以親老乞回



旗終養 上允之擢工部右侍郎兼正藍旗滿洲副都統六月轉左侍郎七月調倉場侍郎五十九年六月調戶部右侍郎仍暫留倉場任八月回京兼正黃旗滿洲副都統公中佐領十月兼管光祿寺及右翼官學事務六十年授河南巡撫嘉慶元年五月湖北教匪滋事賊鋒徧河南 命景安駐兵南陽防堵九月鍾祥逆匪姚之富等竄踞襄陽之雙溝西安將軍宗室恆瑞等帶兵追勦糧運不繼景安籌撥給軍 上嘉其不分畛域 賞加太子少保銜十二月賊匪窺鄧州時景安駐州南之魏家集兵僅四百賊眾六七千四面圍攻景安厲兵堅守以槍礮斃賊數十相持一晝夜得恆瑞等援兵圍始解 諭曰景安帶兵僅四百名被六七千賊眾

層層圍裹幸而景安持以鎮定不使賊匪知官兵虛實用能堅守  
遏賊甚屬可嘉著賞御用元狐冠一頂金盒一箇大小荷包以示  
優獎二年二月奏訪聞浙川內鄉有教首王佐臣等與楚匪句結  
謀應姚之富督兵親往搜捕殺賊千餘擒佐臣及賊目楊志才等  
復誅餘匪一百五十餘人 諭曰浙川內鄉教匪夥黨景安能畱  
心查察於逆匪未發之先豫行擒勦立就駢誅使湖北賊匪不能  
糾合滋擾厥功甚偉著賞戴雙眼花翎加封伯爵並賞寶石帶頭  
大小荷包以獎勳勞三月楚匪由信陽分竄確山羅山縣境景安  
派總兵王文雄往援羅山自詣確山迎勦敗賊於遂平驛又追之  
於舞陽時別股賊匪竄葉縣焚保安驛折回裕州參將德勝等被

圍於四里店景安馳往應援文雄自羅山亦以師至兩路奮擊解其圍賊越山狂竄景安追至南召之李青店偵知桐柏泌陽兩縣有賊侵擾與文雄馳回防禦敗賊於裕州古石灘追奔三十餘里上以其調度有方獎賚之尋擢湖廣總督四月自豫帶兵二千餘名行抵荆門州遇賊眾二萬餘鋒甚銳因先據白雲山立營設伏山溝賊恃眾來犯我兵四面轟擊守備張霞舉等奮力壓勦始潰敗復有股匪由山溝抄襲景安與藩司高杞分路迎截伏兵突出賊潰四散追擊二十餘里上以其設法布置能以少擊眾嘉之五月賊首張漢潮等於當陽積山寺負隅抗拒景安率馬隊擊之遁復邀嘉獎八月以湖北被擾難民及上年被旱州縣奏請

分別給賑得 旨允行四年正月 上以張漢潮日久未獲嚴飭  
統兵大員於是署陝甘總督恆瑞署陝西巡撫秦承恩奏賊匪張  
漢潮由南山竄至盤崖又西竄鳳縣分兵三路相機迎擊景安亦  
奏張漢潮股匪遁赴五郎洋縣一帶已派總兵王凱駐守鄖西以  
防折竄臣暫駐鄖陽適中之地以爲策應並據宜縣札會張漢潮  
在石泉地方經官兵衝殺截爲兩股前股赴畱壩鳳縣一帶明亮  
興肇至漢中截擊後股由漢陰安康折回鎮安境內止有總兵關  
騰帶兵勦捕又成尾追之勢臣卽馳赴鄖西邊境迎截 諭曰恆  
瑞秦承恩奏南北兩路賊匪情形仍屬敷衍空言景安所奏馳赴  
鄖西邊界迎勦竄匪全不切實張漢潮股匪前經竄入陝境五郎

洋縣一帶湖北鄖西邊界最關緊要乃景安遠駐鄖陽僅派令總兵王凱駐守鄖西殊屬畏怯退避見在張漢湖已竄畱壩一帶而後股賊匪復由安康折入鎮安與鄖西境壤緊接景安祇知關騰兵又成尾追之勢殊不思伊從前節次帶兵堵剿時惟事避賊而行賊至則移營他往賊去始遠躡賊蹤則并關騰尾追之不若矣卽如此時伊果早至鄖西賊至正可迎截何待聞信後始行前往乎況前往與否尙未可知著嚴行申飭三月 諭曰景安前在河南巡撫任內駐劄南陽一帶堵禦湖北教匪毫無布置一任闖入豫境又不敢迎頭截剿惟知遠避賊鋒尾隨採信粉飾奏報以圖塞責縱令賊匪由南陽一帶直出武關竄赴陝境其畏葸退縮於

帶兵諸臣中爲尤甚以致有迎送之號朕所深知近聞其辦理撫恤一事並不查明戶口按名散給每縣止發銀一千兩祇儘此數不准多開所辦尤爲乖謬地方大吏安集招徠自應查明各處戶口實數分別辦理若一槩定以成數則流離較多之處必至口食無資而未被賊擾之區亦得濫支官項無怪乎小民失所官吏冒銷也景安係和珅族孫平日趨奉阿附每於奏報之便附寄信件稟承指使以爲有所倚恃既不能實力辦賊又不能加意撫民此時湖北地方甚關緊要未便再任貽誤著來京候旨是月 上以景安平日操守尙屬謹飭 命以伯爵前赴川省更換明興接辦軍需先是景安以參將廣福玩視機務肆行咆哮奏請枷責示眾

俟軍務告竣發往伊犁充當苦差 命經略大臣勒保查訊尋訊  
明景安在湖廣總督任令廣福總理營務嗣駐竹谿每得軍報不  
審虛實輒發兵甫行又撤回廣福以調度乖方兵多私議屢諫不  
聽反冒之廣福亦抗詞相抵景安遂行誣劾 諭曰景安因廣福  
直言稟阻卽行詈罵已失待屬員之體又復奏參枷號并請事竣  
充發實屬任性妄爲然此猶過之小者景安大罪在前任河南巡  
撫時於賊匪由鍾祥竄至豫省縱令逃逸以致蔓延數省至今未  
能殄滅是其惟懼畏賊捏報邀功種種玩誤厥罪甚重著革去伯  
爵發往伊犁效力贖罪十二月 上召見領隊大臣惠齡據奏從  
前教匪在荆襄滋事屢經官兵剿辦僅餘三千餘人彼時景安任

河南巡撫在南陽一帶駐守不肖實力防範協同勦捕致賊匪闖入豫境到處焚掠景安相距數十里並不發一兵救援以致賊匪直從武關奔竄陝省人數又復眾多鴟張日甚景安惟於無賊處躲避又賊去已遠始行尾隨遙送合省官民無不恨其縱賊且笑其懦弱 諭曰若使景安能實力防堵協同領兵大員會合夾擊保障全豫早可勦辦淨盡何至延及此時尙未竣事是數年來賊匪蔓延數省糜費國帑八千餘萬焚燬民田廬舍不知凡幾赤子之橫遭鋒鏑者又不知凡幾實皆景安之畏葸無能養癰貽患所致卽辦理浙川一案亦係完顏岱等早經辦妥景安攘爲己功據以入奏得邀伯爵之封是景安既懼縱寇又復飾奏冒功其罪



實無可貸若僅子革職發往伊犁轉得在彼安坐置身事外何以爲封疆大臣縱賊殃民者戒著傳諭保甯卽將景安鎖拏迅卽押解來京交刑部另行審擬五年四月 諭曰教匪滋事起於湖北至二年竄入豫境其時景安係河南巡撫帶領兵勇甚多若能在豫省各要隘督率防禦則賊匪前有攔截亦不至肆行衝突乃豫省惟慶成王文雄張文奇曾與賊接仗亦未能將賊截回而景安則一味畏葸懦怯僅在南陽無賊地方駐守該處居民裹攜糧食迎犒官兵景安拒而不納因此大失人心甚至該省文員將糧餉軍火豫備齊全聽候景安調遣而景安不發一兵武員伏地跪求打仗景安亦安坐不顧通省文武員弁俱各心懷不平是以民間

遂稱景安爲迎送伯人人痛恨而賊匪轉利其在彼得以肆行奔竄賊至之處豫省並無官兵阻擋遂由羅山南召等處竄至盧氏從武關闖入陝境秦承恩又失於防堵任賊竄往興安越過漢江擾及川境適川匪王三槐徐添德等亦從此勾結蔓延迄今四載有餘未能戡事勞師糜餉荼毒生靈實景安首先縱賊所致前經降旨將景安拏交刑部治罪茲景安亦自知罪狀昭著無可置辯其所供從前湖北教匪北竄時同王文雄帶兵迎剿一節彼時景安並未趕上賊匪及賊已入陝王文雄帶兵進剿而盧氏境內尙有餘匪屯聚景安不會同慶成等勦辦乃轉向內鄉躲避迨賊匪全出豫境二十日後方到盧氏總在賊後逗遛從未與賊接仗

一次其惟怯避賊實百喙難辭至所供辦理浙川教匪係據完顏  
岱面稟該處有教匪潛匿伊親自帶兵前往查拏一節浙川教匪  
本係伏而未動自應密加防備斷無任意妄拏激之生變之理見  
今賊隊中裹脅之人方節次降旨令各軍營設法招撫豈有將祇  
係習教未經滋事者槩行殺戮乎況此案人犯已經完顏岱訊明  
辦理完結景安始行到彼輒敢張大其事誣稱帶兵一千餘名生  
擒首逆飾辭入奏致濫膺伯爵崇封其欺誑冒功之罪景安已自  
認不諱以上種種款蹟若不同鞠訊明正其罪何以爲封疆大  
臣貽誤國事者戒著交大學士九卿嚴訊定擬八月奏擬斬決  
上加恩改緩七年 諭曰景安前任河南巡撫不能堵禦賊匪致

令延及川陝其罪甚重業經問擬重辟念其平日居官廉潔從寬  
監禁茲軍務告蒞著加恩釋放發往熱河充當披甲八年八月以  
六部筆帖式補用九月 命往豫省河工交那彥寶等差遣委用  
十二月承挑引河工竣 賞加主事銜九年三月衡工合龍以六  
部員外郎用五年授直隸承德府知府九月超遷山西按察使十  
二月調直隸按察使十年擢陝西布政使旋調福建布政使十一  
年三月升江西巡撫五月調湖南巡撫十六年七月授內閣學士  
兼禮部侍郎銜十一月遷理藩院右侍郎兼鑲白旗漢軍副都統  
十七年五月調戶部左侍郎七月調刑部右侍郎十一月擢理藩  
院尙書兼正紅旗漢軍都統十八年九月充繙譯鄉試正考官十

一月調都察院左都御史十九年閏二月充國史館副總裁官二月擢禮部尙書四月充繙譯會試正考官九月調戶部尙書十二月賜紫禁城騎馬二十年命借倉場侍郎朱理前往甘肅查訊虧缺倉糧行抵涇州卽查知額徵短缺四千餘石又平涼固原隆德靜遠會甯各州縣皆有虧缺據實奏參二十一年正月訊明該省續虧百萬有奇命自總督以下各按銀數著追治罪尋酌擬追補章程五條奏入下軍機大臣議行十一月授內大臣二十三年充繙譯鄉試正考官二十四年仍賞加太子少保銜二十五年十月授領侍衛內大臣守護昌陵道光二年休致三年卒諭曰景安服官中外宣力有年因年老休致回京茲聞溘逝殊

堪珍惜著加恩賞給尙書銜所有應得卹典該部察例具奏尋  
賜祭葬子潤德兵部侍郎自有傳恩德官郎中緣事革職

右 國史館本傳

日本書紀卷之六十一 孝德天皇本紀第二十一 三十一

三十一

徵瑞

徵瑞富察氏內務府正白旗滿洲人乾隆二十七年由圓明園庫  
守授筆帖式三十二年授苑副三十四年升苑丞三十八年授內  
務府員外郎三十九年授佐領四十三年授杭州織造奏北新關  
舊例煙百斤稅銀四錢六分酒二百斤稅銀二分今部頒則例煙  
酒並百斤稅銀四錢均有窒礙請照舊例辦理 從之四十五年  
授准關監督四十七年二月授長蘆鹽政四十八年因歷年封船  
剝運漕糧奏請酌定章程剝船編列號次酌定數目均勻輪雇以  
免偏枯運糧赴通回空酌定期限以資輪剝雇價責令旗丁按照  
定價給發漕米過載剝船一體用斛以昭公平糧船遇有北上稍



遲不及赴通暫時截留北倉以速回空 上是之五十年九月奏  
商人呈請捐造剝船以濟鹽漕 上命妥議章程五十一年正月  
奏官造剝船熟籌船戶久遠之計請將剝價官爲墊發在應給旗  
丁項內扣還以免旗丁剋扣短欠船戶暗受折耗之累又每年九  
月漕竣至來年五月南漕方到此數月中應爲津貼守候之需  
上是之下部議行六月劾商人牛繩祖因捐輸川餉議敘知府遂  
具呈將引地交官以抵帑欠銀十六萬餘兩意在通綱代爲彌補  
居心巧詐應請革職監追 上嘉其公正如所請行九月調兩淮  
鹽政十月滁州生員駱愉臚列鹽務條款呈遞 上敕交徵瑞議  
奏尋奏查商人實無額外夾帶私銷但提引空至四年係前任鹽

政鹽道辦理不善請交部議處 從之五十二年二月奉 旨查  
辦硝磺虧缺並 命察看兩江總督李世傑辦事精神若何均經  
奏入 諭曰昨據徵瑞覆奏查辦硝磺一案祇調取江甯蘇州兩  
藩司案卷查閱並不親赴江甯會同李世傑辦理已傳旨嚴行申  
飭本日復據徵瑞奏到查辦情形一摺仍安坐揚州將該藩司送  
到案卷敷衍陳奏並未同李世傑面查又據另片將李世傑上年  
冬間病後情形聲敘覆奏更屬無謂著傳旨申飭尋赴江甯會同  
李世傑提齊案卷徹底清查實由採辦遲延請將歷任江甯蘇州  
各藩司交部嚴加議處得 旨允行四月呈進節貢雕漆鑲嵌花  
卉屏二對屏上皆嵌眞珠 諭曰壁屏不過預備令節陳設之用

何必過事奢華徵瑞將眞珠飾此無用之物取巧見長看來竟是坐享豐腴心思奢亂除壁屏擲還外仍傳旨嚴行申飭十二月奏請將淮南引鹽戊申綱額課分作十年帶完並將丁未綱奏銷展至次年五月造報經戶部議駁 諭曰徵瑞自到任後辦理諸務漸不如前豈可復任兩淮繁劇之任 命調補淮關監督五十四年閏五月因湖北漕船經臬司李天培洒帶桅木一千八百根上以經過淮宿各關時皆上稅否抑皆徇情放過著徵瑞據實覆奏六月奏江廣幫船從長江而下但祇稽查由船卸下之貨在船未卸者向例槩不查問實不知李天培洒帶桅木之事 上以徵瑞巧飾卸過交部嚴議部議革任得 旨寬免九月授蘇州織造

五十六年緣開銷動用浮濫內務府議革職得 旨賞給員外郎  
銜署理江甯織造五十八年正月授長蘆鹽政五月奏山東商運  
鹽船請暫借庫項給商購造 諭曰鹽運既有船隻民船卽不居  
奇運糧運貨尤覺省便於商民均屬有益所奏尙是時英吉利國  
遣使入貢 上命徵瑞照應貢使 賞戴花翎六月奏貢船行抵  
天津停泊安妥奉 旨給還徵瑞佐領頂帶並賞大小荷包七月  
貢使稟請定海停泊貢船內眾人不服水土欲先回本國徵瑞不  
令先回又貢使由京赴熱河 上命總管內務府大臣金簡伊齡  
阿偕徵瑞一同照料而徵瑞仍以單銜具奏均奉 旨申飭五十  
九年八月天津府屬被水以撫恤災黎疏消積水奏入 上以所

辦實屬妥協殊堪嘉獎著賞給奉宸苑卿銜並荷包等物十一月  
奏於天津關口另設收繳小錢局曉諭過往客商令其盡數繳出  
上命傳諭各關監督做照徵瑞辦法畱心查驗查收六十年四  
月復授蘇州織造十二月奉 旨來京嘉慶元年正月與 皇極  
殿千叟宴二月回任五月復授兩淮鹽政二年三月復調長蘆鹽  
政八月仍授兩淮鹽政四年徵瑞長隨高柏林以江陰縣廣福寺  
傾圮稟知徵瑞捐銀交地方官興修以致派累士民旋被匿名首  
告 上命兩江總督費瀆查奏得實時大學士和珅坐罪伏誅經  
定親王縣恩查徵瑞有餽送和珅銀兩之事九月 諭曰徵瑞應  
繳官項甚多乃日久延宕有意拖欠轉將銀二十萬兩致送和珅

及和珅未收又不將此銀繳還官項乃爲伊子捐納官職開設鋪面是其視應完之公帑若在可緩而惟以納賄權門爲急務見在徵瑞前來行在經朕面詢據稱銀二十萬兩因爲和珅妻故致送彼時和珅意存見少欲伊增至四十萬是以未收而從前曾送過和珅二十萬當經收受此外和珅交辦緞匹物件等項並奇巧之物不可勝計等語此事並非向伊究詰伊卽自行奏聞試問天下爲屬員者餽送上司有銀至數十萬者乎其意不過欲以此交結取悅冀圖和珅常爲庇護可久畱兩淮鹽政之任不復更換藉以便其私圖自肥囊橐若律以與受同科早應查抄正法且徵瑞在鹽政任內有令伊家人高柏林興修廟宇之事面託知府胡觀瀾

代爲照料興修而觀瀾以工程浩大輒令該縣派捐鄉鎮徵瑞身任鹽政乃聽伊家人慫恿自捐銀兩倡修寺廟卽因養廉豐厚積有贏餘亦應先繳官項何乃爲此求福無益之事以致州縣借端勸募不但累及殷實鋪戶並致編戶小民其力不能捐輸者亦抑令出錢施助多方擾累是又徵瑞之罪無可解免者特因和珅一案早經辨結槩免株連伊修廟一事亦訊無染指分肥情事姑免深究但徵瑞見在前來陛見若竟仍叨恩遇不加譴責則無識者妄疑徵瑞別有奏進消弭之事得邀寬宥見在整飭綱紀之時豈得置之不議俾此等卑污下賤之人仍忝列卿班耶徵瑞著革職押赴 萬年吉地欽工令其自念所得罪譴出貲自贖十一月復

授圓明園苑副六年升苑丞八年給郎中銜九年授奉宸苑卿十年  
賞戴花翎十四年三月授總管內務府大臣六月授鑲藍旗  
漢軍副都統十二月因失察廣儲司銀庫被書吏王書常等私雕  
假印捏款冒領帑銀部議降一級調用得旨改爲降二級畱任  
十六年奏請將索特那木多布齊開墾地租交廣儲司存貯上  
斥其紕謬太甚交部議處部議降二級調用諭曰徵瑞原派管  
公主家務其於額駙索特那木多布齊產業卽不應干涉自公主  
逝後從前陪嫁之產朕尙施恩賞給額駙乃伊轉欲將索特那木  
多布齊自有田租奏請入官朕曾有言利之臣斷不用之旨徵瑞  
竟敢嘗試希圖取巧見長寶屬卑鄙不知大體咎無可寬本應照



部議降調姑念年老昏瞶量予薄懲俾知儆懼徵瑞著拔去花翎革去副都統實降一級以三品頂帶仍留總管內務府大臣之任十七年元旦以瑞雪繽紛豐登預兆 上嘉惠廷臣賞還徵瑞二品頂帶七月復 賞戴花翎九月授正黃旗蒙古副都統十八年正月 諭曰徵瑞年已八旬著在紫禁城騎馬十二月授工部右侍郎兼管錢法堂事務十九年二月轉左侍郎十一月奏圍明園西北面圍牆見已加高其四面舊有圍牆應一體加高 上以徵瑞老邁糊塗革去侍郎副都統內務府大臣紫禁城騎馬拔去花翎以內務府大臣銜管理雍和宮造辦處三山事務二十年正月卒子明禧見任內務府郎中兼佐領明貴候選直隸州知州明魁

奉宸苑主事

右 國史館本傳

國朝事實錄

卷之二十一 卿貳五十六

三

日本書紀卷之八十一

三

塔琦

塔琦滿洲正紅旗人姓他塔喇氏由候補筆帖式於乾隆二十七年遵豫工例加捐主事二十九年補盛京工部主事三十二年調刑部主事三十六年六月擢本部員外郎三十九年以大學士舒赫德奏隨往山東辦事奮勉得旨議敘四十一年五月遷郎中四十二年京察一等簡放江西贛南道四十三年正月擢湖南按察使四十五年五月調補江蘇按察使四十六年仍調湖南按察使四十七年十月署刑部左侍郎十一月授鑲黃旗蒙古副都統兼公中佐領四十九年五月署正白旗漢軍副都統是月命往奉天審辦僧人珍貴控甯遠牧重徵事件奏審甯遠應徵銀米豆

石款項既已不一恐不免官吏影射之弊復領司員分赴各村徧  
訪農民盡得珍貴懷嫌捏控實跡請加等治罪從之旋授刑部  
右侍郎兼署兵部右侍郎五十年三月命往葉爾羌辦事是年  
五月調補鑲紅旗滿洲副都統五十四年因審辦和闐格綑額收  
受回子銀錢一案未能實力辦理革職仍畱葉爾羌效力五十六  
年賞四品銜往哈密辦事五十七年調往吐魯番辦事五十九  
年六月仍因和闐前案命革職發往伊犁效力贖罪嘉慶二年  
回京三年故

右 國史館本傳

國朝耆獻類徵初編卷九十七目錄

卿貳五十七

沈初

吳省欽 弟省蘭

宜縣 子瑚素通阿

福慶

廣音

阿精阿

德成

施朝幹

下  
頁  
大  
多  
イ  
ラ  
ズ  
ニ  
シ  
テ

國朝耆獻類徵初編卷九十七

通奉大夫前署江西巡撫江西布政使司布政使湘陰李桓輯  
卿貳五十七

沈初

沈初浙江平湖人乾隆二十七年 聖駕南巡 召試一等 賜  
舉人授內閣中書二十八年一甲三名進士授編修三十一年散  
館一等三十二年入直懋勤殿 命寫經爲 孝聖憲皇后祝釐  
旋充日講起居注官三十三年四月 御試翰詹等官 諭曰編  
修沈初學問優長因司內廷有承辦事件未得一體考試著加一  
級十二月擢侍講三十四年八月丁本生母憂三十五年十二月



服闋仍直懋勤殿 諭曰向來候補人員例不食俸至內廷行走  
之員雖未得缺應准支俸以資贍給候補侍讀沈初著加恩食俸  
三十六年六月入直上書房九月提督河南學政未赴任丁祖母  
承重憂三十九年服闋仍直南書房一體食俸旋擢右春坊右庶  
子仍充日講起居注官四十年正月遷侍講學士尋轉侍讀學士  
十二月擢詹事府少詹事四十一年正月擢詹事六月擢禮部右  
侍郎充四庫全書副總裁四十二年提督福建學政四十四年丁  
本生父憂四十五年服闋授兵部右侍郎仍直南書房四十六年  
充三通館副總裁三月充會試副考官六月以母疾篤請假回籍  
省視四十七年五月請終養 許之十月丁母憂五十年五月服

闕補兵部右侍郎仍直南書房八月提督順天學政五十一年九月調江蘇學政五十二年轉兵部左侍郎五十三年十二月奏曰臣試松江時已值納漕之期向有生監以醜米混交之弊臣出示禁約並開列人名交與各學教官嚴加管束旋聞有江陰生監在倉與書役爭鬧臣卽令教官到倉確查係生員楊大緒不肖將米篩颺所致臣卽取米細驗果係不純因令篩颺交納時有幫同爭鬧之監生吳柏生員吳昆臣卽斥革衣頂並出示各學生監毋或效尤自蹈覆轍以冀士風整飭知所懲儆報 聞五十四年還京仍直南書房充經筵講官署禮部左侍郎四月充殿試讀卷官七月調吏部右侍郎八月充 萬壽盛典總裁五十六年 命閱廷

試翰詹等官卷復 命續編石渠寶笈祕殿珠林二書十一月  
諭曰前蔣衡進手書十三經宜刻石列於太學用垂永久著沈初  
隨同校勘五十七年八月提督江西學政五十九年轉吏部左侍  
郎六十年六月江蘇拔貢程桂芳考不入等以初前任江蘇學政  
時遊才未精議降一級調用 詔改革職畱任是年十月還京仍  
直南書房十二月以初失察江西阜役之子焦模泰冒考罰學政  
養廉三年嘉慶元年正月與千叟宴於皇極殿二月充會試知貢  
舉四月充殿試讀卷官六月擢都察院左都御史十月 命在軍  
機處行走尋遷兵部尚書二月轉吏部尚書八月調戶部尚書仍  
兼吏部尚書三年正月京察以初勤慎稱職飭部甄敘尋議加一

級八月充順天鄉試正考官九月四川官軍生擒首逆王三槐奏捷上以初趨直軍機處下部優敘旋議軍功加三級四年正月詔以初年老退出軍機處尋命紫禁城騎馬復免直南書房二月充實錄館副總裁三月初一日卒遺疏聞諭曰戶部尚書沈初內廷行走有年襄辦部務供職勤慎今因病溘逝殊堪軫惜應得卹典該部察例具奏其任內降罰處分准其開復尋賜祭葬如例謚文恪入祀鄉賢祠子二長蘭生以正二品廕生見官戶部額外主事次蓮生由監生遵衡工例捐納鹽運使運判分發長蘆試用

右 國史館本傳

雲椒司農母陸太夫人遺腹生子三歲殤哭之慟以朱志其臂曰  
天不絕吾家若再生當以汝歸是月司農生於鳴珂里之族氏陸  
太夫人聞之心動索視之臂朱灼然遂請撫之五歲卽能辨四聲  
稍長研究諸經旁通子史通籍後 命直內廷賡歌矢音由侍講  
學士詹事游擢禮部兵部侍郎充會試副總裁官視學福建順天  
江蘇江西諸大省所拔皆績學士每奉 諭旨以好學政目之進  
左都御史尋授兵部尙書調吏部主順天鄉試遭遇之隆數十年  
如一日入貲 樞務精白一心不立異亦不苟同

右兩浙總督軒錄張維屏錄

上命內廷請臣舉翰林數人劉文正公于文襄公裴文達公王文

莊公聯名奏彭雲楣曹竹虛兩前輩董蔗林同年與余四人翼日  
命入直懋勤殿

右西清筆記符葆森錄



吳省欽 弟省翰

吳省欽江蘇南匯人乾隆二十二年 南巡 召試賜舉人授內閣中書二十八年成進士改庶吉士三十一年散館授編修三十年大考一等擢翰林院侍讀旋充貴州鄉試正考官三十四年充會試同考官三十五年充廣西鄉試正考官三十六年充會試同考官又充湖北鄉試正考官十一月充日講起居注官三十七年充會試同考官十二月提督四川學政三十九年九月值學政更換之期 上以吳省欽任事未滿三年無庸更換四十年擢右庶子四十四年遷侍講學士充浙江鄉試正考官四十五年提督湖北學政旋轉侍讀四十六年奏請將舊領湖廣學政關防換給



湖北學政關防以符名制四十九年擢光祿寺卿五十年二月命在上書房行走十一月遷順天府府尹十二月同兼管順天府尹尙書曹文植奏言順天府學樂舞生例由童生挑充尙未足額請准令生員兼充嗣由樂舞生入學者仍不間缺其有鄉試中式者再另選補下部議行五十一年六月奏言京城糧價漸增而米豆二價尤爲翔貴請將京員秋俸先支十分之六以冀民間流通諭曰京員秋俸向例以中秋前後起支今年遇閏又遲一月米石不能及早流通價值未免日漸昂貴自應設法調劑但該府尹所請先支十分之六則京員須作兩次支領多費腳價非所以示體恤所有八旗及在京文武俸米俱著移前於閏七月初一日一

體關支所稱黑豆一項每倉石例價八錢定於市價見昂時此次官豆酌量增作二兩四錢之處著交戶部將見在存倉豆石通盤查奏足敷官用之外所餘豆石卽照該府尹所定價值儘數照例官賣一面奏聞一面辦理仍行令盛京買補運京還倉並著步軍統領衙門會同順天府嚴加訪察務使米豆流通糧價平減而市會無所施其伎倆官民兩有裨益最爲妥善八月監臨順天鄉試五十二年十二月奏陳軍流子孫入軍籍應試之例未定年限且不論原籍有無可歸與配時之是否隨行請嗣後軍流子孫除係到配所生成丁在十三四歲以上者准作軍籍外其在本籍所生必須發配時本籍驗明實係隨行俟其隨配十年方准入軍籍仍

咨明本籍備案以杜捏冒詭詐之風 從之五十三年三月奏陳  
親試防弊事宜請將白摺試卷各放長三幅以便起草嗣後不  
得另紙起草以杜替潤之弊又請於士子官員考試之日 頒一  
內府圖書令監試王大臣於午未未初騰真之頃將卷面鈐一圖  
記以杜掣換之弊又以散館大考日例於西廂領 賞午飯出入  
往來員役雜選請停止酌散茶餌以歸簡便 諭曰吳省欽奏殿  
試朝考散館大考俱請給發內府圖章鈐記但內府所貯寶章乃  
御用之件卽係閒散圖篆亦不值於試卷紛紛鈐用已有旨令監  
試王大臣逐卷畫押以作標記矣所有條奏試卷添用彙紙停用  
恩賞午飯仍照所請行又奏請將江蘇安徽江西浙江廣東山西

六省丙午以前三科由俊秀貢監生中式舉人俱行覆試下部議  
行尋有 旨停止五十四年二月 諭曰舉人覆試必須於揭曉  
後舉行方可以鑒別優劣若將舊科舉人補行覆試則相隔日久  
舉業荒疎亦所難免且此等舉子皆係上數次會試落第之人其  
文藝平常可知如果舉業不進卽此次會試仍難入殼是以上年  
秋閒曾降旨將鄉試覆試之例停止惟於會試後舉行覆試吳省  
欽條奏於未經會試以前將上三科由俊秀中式者先加考試殊  
覺多此一舉所有此次覆試之舉人等均著准其會試五十六年  
擢禮部右侍郎卽兼順天學政五月調工部右侍郎五十七年充  
江西鄉試正考官五十八年充會試副總裁五月會試覆試停科

其多原卷復又磨勘四名吏部議處考官各按舉子停科名數罰俸至十餘年奉 旨嚴行申飭九月轉工部左侍郎五十九年充浙江鄉試正考官十一月 命署經筵講官六十年充浙江鄉試正考官八月復任順天學政嘉慶二年七月奏承德府平泉豐甯向各廩生三四名不等而灤平建昌赤峯朝陽四屬各僅一名設此人復有事故勢必仍用地鄰保結似非體制應請照新設府學准照州學額之例於原額十六名外再添十四名承德平泉豐甯文風較盛定六名灤平建昌赤峯朝陽各三名其增生亦請添足三十名尋部議承德平泉豐甯各四名餘俱照所請行八月補吏部右侍郎十二月轉吏部左侍郎三年三月遷都察院左都御史

四年正月奏請將賊首王三槐卽行正法又稱候補知府李基曉諳兵法有手車火雷列卦圖舉人王曇能作氣按掌辟易多人請加試看 諭曰吳省欽摺奏內請將監禁賊首王三槐卽行正法一條何待爾言前此未及辦理之故欲俟川北逆首羅其清解到一併交軍機大臣會同刑部審辦豈有將此等首逆重犯釋放令其招降同夥之理至所稱候補知府李基曉諳兵法有手車火雷列卦圖又舉人王曇能作氣按掌辟易多人請加試看等語殊屬大謬前此特頒諭旨廣開言路吳省欽爲風憲之長於和坤福長安二人無一言舉劾自係畏其聲勢及將和坤福長安革職鞫問後伊尙心存畏怯緘默不言茲見科道等紛紛密封陳奏伊任總

臣等謹將英名不第 卷之十一  
憲不能不一奏塞責所言竟屬荒謬試問伊所稱李基所著手車  
火雷列卦圖說較本朝訓練之九進連環孰爲得用其作氣按掌  
之語卽稗官野史所謂掌心雷者是也係屬邪教見當勦辦教匪  
之時正應將妖言左道痛絕根株方嚴禁之不暇豈可轉引而試  
驗吳省欽身爲臺長不知政體惑於邪言妄行瀆奏與學習邪教  
者何異耶吳省欽著交部嚴加議處議上 諭曰吏部議處左都  
御史吳省欽條奏摺內語多不經以伊平日學問而論尙不至如  
此迂誕蓋伊自揣係和珅私人且在學政任內聲名平常恐被人  
列款彈劾故爾避重就輕先爲此荒謬之奏藉得罷官回籍遂其  
田園之樂其居心取巧大率不出此但此係誅心之論吳省欽劣

蹟既未敗露朕亦不爲已甚姑免深究卽論其陳奏荒謬已難勝臺長之任吳省欽著照部議革職回籍八年六月故

右 國史館本傳

同年總憲吳君冲之之將卒也語其子曰吾與王君德甫生同鄉  
一 召試同爲中書出入同朝者四十餘年悉吾生平行事歿後必  
乞爲志墓之文既卒其子奉遺命書來乞銘嗚呼君小余五歲余  
弱冠後取友於同郡之士先交君及趙君升之張君策時既而又  
交君弟泉之及陸君健男相與劇切學問以文章爲己任其後六  
人者相繼通籍京師士大夫論松江人物者必舉此六人詩酒之  
會亦靡不從之而張君爲中書舍人早卒數年趙君殉難於金川



贈光祿寺卿又數年陸君以副都御史奉使歿於遼陽館舍惟  
余與君兄弟更踐中外今泉之以學士尙在京師而余與君皆久  
歸鄉里相距一舍有餘方幸扁舟過從踐東阡北陌之約且君精  
力尙強而乃遽以疾終嗚呼雖微君之末命余何忍不銘按君名  
省欽號白華沖之其字松江南匯人少英敏善屬文年十七爲諸  
生明年補廩乾隆二十二年 高宗純皇帝南巡獻賦 召試  
賜舉人授內閣中書二十八年成進士改庶吉士三十一年散館  
一等第二授編修三十三年大考翰詹一等第一擢侍讀尋充日  
講起居注官遷右庶子某年遷學士某年升光祿寺卿 命在上  
書房行走明年升順天府尹君以京兆治輦轂所轄二十七州縣

政事繁重恐在 內廷不能兼顧請辭書房之職 上是之又某  
年升禮部侍郎調工部又六年調吏部是年某月充經筵講官嘉  
慶二年升都察院左都御史後二年因保舉非人遂罷職君在翰  
林二十餘年以文學詞賦爲 聖主所知己丑辛卯壬辰充會試  
同考者三戊子充貴州正考官庚寅充廣西正考官辛卯充湖北  
正考官壬子充江西正考官己亥甲寅乙卯充浙江正副考官者  
三癸丑爲會試總裁丙午順天鄉試監臨乙卯充殿試闈卷官派  
教習庶吉士者三提督四川湖北直隸學政者四君歷主鄉會試  
所錄多知名士迄今侍從臺諫及躋通顯者甚眾任學政教士子  
以博文好學不惑於時尚士子亦多樂而從之作詩本杜韓蘇三

家古文本韓柳孫樵劉蛻及北宋諸名家刻琢凝鍊援引精密詩  
詞文共六十卷生平遇 國家大典禮所進詩文各冊如說雍說  
壽諸篇皆蒙 嘉獎畱貯 內府鈐以 御寶時人咸以爲榮  
今上登極舉行千叟宴典禮君年止六十有九未合例已奉 特  
旨令入宴 賜如意壽杖等凡十六種又每年春正 重華宮賦  
詩小宴惟大學士及內廷諸臣君亦皆參與至新刻石經勒成外  
廷二品皆不得與又蒙 特旨賞賜皆非常之典也其餘所 賜  
字畫古硯朝珠紗緞等不能勝計君歸後嘗摩挲 賜物至於泣  
下蓋追念 兩朝知遇之隆逾於常格故雖以殘年暮景尤感激  
而不能自己也君生於雍正七年某月某日卒於嘉慶八年八月

某日年七十五歲曾祖燧祖啟秀父成九皆積學有行誼累 贈  
工部侍郎曾祖妣某氏祖妣某氏妣某氏累 封贈夫人婁查氏  
封亦如之先卒弟卽泉之名省蘭前官工部侍郎今爲翰林院  
侍講學士長子敬樞例得二品廕生次子敬沐尙幼女一人孫一  
人樹榮卽於是年十月某日葬於婁縣白漾灘之原嗚呼自張趙  
陸三君之葬余皆志而銘其墓今余年八十矣追維生平笑言之  
雅顯顯然如在目中飾巾待盡猶執筆而敘君之生平以傳於後  
曹子恒云旣傷逝者行自念也斯尤可深悼也已銘曰  
白漾之水清而泚佳城鬱鬱封於是九原不作今已矣君子有穀  
貽孫子

右墓誌銘王昶撰

自華著撰精心果力不屑蹈襲前人衡文荆楚及西川遇山厲刻  
處以五七字寫之散體文於唐似孫樵劉蛻於宋似穆修柳開亦  
颯然自異

有湖海詩傳張維屏錄

秀水王雲仲輩負才任俠不喜繩檢客游京師名滿公卿閒值川  
楚教匪不靖其座主吳總憲省致鴛曇知兵能作掌心雷 睿皇  
帝斥其誕妄吳遂罷廢而曇亦連蹇終其身或曰省欽本和黨窺  
新致肅然和坤且敗自託於吟不解事冀以微咎去官也康祺謹  
按靈慶東華錄 仁宗諭旨亦謂吳省欽恐被人彈劾故避重就

輕

乾隆乙未 上稽古之暇垂問四川督臣成都府學禮殿畫像存  
 否奏言今成都府學宮禮殿已非舊畫亦早湮謹錄漢禮殿記元  
 費著禮殿聖賢圖考以 聞按禮殿不見正史宋祁董道謂文翁作  
 歐陽修席益呂陶謂高朕作觀初平五年殿柱記蓋禮殿實祀周  
 公孔子文翁立學時所建朕特增修之者也漢郡國有學自成都  
 始郡國學有廟亦自成都始宜 純皇帝睠念遺模幾餘垂詢語  
 詳吳省欽重修成都府學大成殿記 文翁名黨字仲翁見張崇文  
 歷代小志吳省欽錦江書院  
 講堂記  
 引之

右紀聞陳康祺撰

國朝耨獻類微初編 卷九十七 鄭真五十七

主

吳省蘭

吳省蘭江蘇南匯人乾隆二十八年由舉人考取咸安宮官學教習二十二年考補國子監學正三十六年升助教三十九年充四庫全書館分校官八月鄉試屆期省蘭未成進士例不開列 特命充順天鄉試同考官是年京察一等四十二年京察復列一等引 見均得 旨記名四十三年戊戌會試未中式 諭曰國子監助教吳省蘭學問尙優且在四庫館校刊羣書頗爲出力著加恩准與本科中式舉入一體殿試尋列二甲改翰林院庶吉士十四十五年四月散館授編修十二月充文淵閣校理四十八年充順天鄉試同考官以四庫館第一分書成交部議敘五十一年充浙

江鄉試正考官是年 大清一統志成 恩敘儘先升用五十三  
年四月擢右春坊右贊善五月 命提督湖北學政九月轉左春  
坊左贊善十二月擢右中允五十四年轉左中允差旋擢侍講五  
十五年充日講起居注官五十六年大考一等擢詹事府詹事  
命在南書房行走纂辦石渠寶笈時省蘭之兄省欽以工部侍郎  
督學順天因病奏請回京調理 上卽以省蘭代之五十七年二  
月劾奏督臣梁冑堂保薦教職並未會商輒行具題 上嚴飭梁  
冑堂並通諭各省督撫於保薦甄別地方官員有似此並不會商  
輒以一人專主卽會銜具題者必重治其罪八月各省更換學差  
屆期省蘭奉 旨留順天學政十月擢內閣學士兼禮部侍郎具



摺謝 恩 諭曰吳省蘭謝升授內閣學士恩摺內有宣批諾之  
謨一語其意以內閣學士職司批本故用批諾二字但史冊所載  
如後漢之南陽宗資主畫諾係太守不事事而言南齊江夏王蕭  
鋒學畫鳳尾諾係屬藩王典故均與批本無涉卽朕批閱奏摺用  
硃筆批寫覽字亦不得謂之批諾是諾字雖係用古此處殊欠切  
當朕從不以語言文字責人因該學政尙稱讀書人摺內用字未  
安降旨訓示伊亦不必稍存畏懼也十二月充文淵閣直閣事六  
十年回京仍入直南書房九月 命稽查中書科嘉慶元年四月  
充殿試讀卷官九月充會試副考官三年正月擢工部右侍郎  
命閱大考翰詹卷旋充浙江鄉試正考官復奉 命任浙江學政

四年正月調禮部右侍郎大學士和珅以罪伏誅 諭曰吳省蘭  
係和珅引用之人雖無人列款參劾但未便倖列卿貳著降爲編  
修撤去學政不必在南書房行走五月擢右中允復充日講起居  
注官尋奉 命提督湖南學政七月擢侍講十二月奏庶民伏闕  
上書類多希冀 恩榮未必實有忠愛迨奉 諭旨輝耀還家稱  
雄鄉里把持公務在所不免其甚者聚眾釀金代倩作橐其推一  
人來京爲嘗試之計 皇上以誠求而宵人以詐應將來遇地方  
正事深恐挾制窒礙乞防其漸 上是之旋舉發江蘇同知李焜  
開列胞姪等名寄稟請託事 諭曰李焜在蘇州總捕同知任內  
審理生員馬照等一案妄拏拖累眾怨沸騰降補知縣是本以陵

辱斯文獲罪今又欲使子姪濫廁士林以致敗露可見天理昭彰  
絲毫不爽著將李焜發往軍臺効力贖罪吳省蘭據實具奏甚屬  
公正著交部議敘六年奏苗疆永綏廳於乾隆二十五年設學今  
請照乾州鳳凰二廳一體選拔貢生一名又奏衡永寶辰沅郴靖  
等府州屬搖童向例另編字號每學各取三名查邵陽縣五屆無  
人應考而芷江縣搖童赴試者在二百人內外應將邵陽縣減額  
二名撥芷江縣定爲取進五名仍畱一名於邵陽爲將來取進之  
額若有遷易再爲因時制宜均下部臣並撫臣議行八年擢侍講  
學士九年二月 聖駕幸翰林院與分韻賦詩尋吏部以京察三  
四五品京堂官帶領引 見奉 旨吳省蘭年已就衰才力不及

著以原品休致十五年卒

右 國史館本傳

田中... 姓名... 不... 名... 一...

三

宜縣 子瑚素通阿

宜縣原名尙安鄂濟氏正白旗滿洲人由生員於乾隆二十八年考授兵部筆帖式洵升郎中四十三年授直隸口北道四十四年授直隸布政使四十五年十月護理陝西巡撫先是大學士雲貴總督李侍堯以貪縱營私逮問 上命各省督撫覈擬罪名時新授陝西巡撫雅德未到任尙安具摺議奏 上責其非是 諭曰此案係應雅德議覆何用該護撫急於具摺陳奏李侍堯雖負朕恩獲罪究屬朝廷大臣非兩司所能覈議尙安由部院司員不數年間用至藩司將來加恩遷擢正未可量伊祇當循分自勉豈可如此熱中欲速竟思躡遷督撫乎朕因尙安尙有出息是以諄切

訓諭俾知謹飭毋負成全之意四十六年甘肅循化廳屬撒拉爾  
回匪滋事 上命西安將軍伍爾泰勦之並諭尙安隨同辦理軍  
需糧餉尙安於未奉 諭旨之先卽自安西馳赴陝甘交界之長  
武縣督飭各州縣備辦官兵車馬復至涇州籌備軍需奏入 上  
以經理妥協嘉之交部議敘四十七年三月擢廣東巡撫四十九  
年正月丁母憂回旗三月因在廣東巡撫任內枉斷仁化縣監生  
譚體元控總商沈翼川勒派銀兩案擬譚體元以邊遠充軍部議  
承審官革職 上以尙安心存瞻徇蒙混定案其咎較重著照部  
議革職俟伊百日期滿後酌派前往新疆辦事效力贖罪閏三月  
賞給四品職銜授吐魯番領隊大臣四月甘肅鹽茶廳回匪滋

事踞石峯堡部尙書福康安檄尙安到陝駐守平涼八月軍務告竣抵吐魯番任事十一月奏闢展舊倉存貯糧食應運至吐魯番者腳費繁多請將糜穀糜米借給回民寬限三年交納吐魯番倉以省輓運而免朽壞下部議行五十二年十二月授烏魯木齊都統賞戴花翎五十三年三月奏烏魯木齊所屬迪化昌吉阜康綏來宜禾奇臺六州縣並濟水薩呼圖壁兩處歷年徵收屯兵民戶糧石及從前捐監收貯之糧存倉過久恐致霉變請分作三年出糶每年春季所糶卽責令州縣秋季買補還倉得旨允行四月奏烏魯木齊所屬納糧自乾隆五十二年將戶民額地外多墾餘地丈量增糧三分之一有餘民力未免拮据請將所增地糧酌



陝西通志卷之二十一  
減一半 上命軍機大臣議行五十九年奏請 陛見 命經過  
山西時查辦原任神池縣知縣趙留齡因癩證勒休在部蒙混呈  
控案六月訊明奏 聞又經過固關將關內關外被水情形並督  
令參將知縣等給銀撫恤運糧接濟事陳奏 諭曰所辦實屬可  
嘉著交部從優議敘並 賞大小荷包又 諭尙安著改名宜縣  
六十年五月授陝甘總督十二月西安府鋪戶收藏玉器事發  
諭宜縣不必來京陛見速行轉回將收藏玉器之鋪戶等嚴密搜  
查嘉慶元年正月奏起出大小玉器及瑠石各件係江蘇人戴傳  
經出口貿易乾隆六十年六月內戴傳經託大興縣民人陳茂興  
攜帶大小玉器五十二件來陝行抵嘉峪關被兵役查出經署蘭

州府知府應先烈查驗以作成玉器向不禁止放行 上以嘉峪  
關爲出入門戶既經兵役盤獲其爲私玉無疑何得以業經作成  
荒杯輒准放行 命宜縣向該署府嚴切訊明據實奏參二月奏  
將盤獲私販玉石案內之李元等擬絞監候 諭曰李元等如果  
私販玉石後又復營私納賄則其罪較重卽問擬縲首亦不爲過  
今該督查奏摺內未曾細問漫稱審蘭州府應先烈訊無故縱受  
賄情事則李元等止於私帶玉石何得遽擬絞監候宜縣著交部  
嚴加議處又 諭曰陳茂興私販玉石署蘭州府應先烈並不查  
究輒准放行顯有受賄私放情弊該督查自應向應先烈嚴切質訊  
跟究乃覆奏摺內輒據狡展之詞遽稱訊無受賄故縱情事冀圖

代爲卸罪是何意見宜縣著傳旨嚴行申飭應先烈卽著革職拏  
問交該督速行嚴訊確情據實明白回奏尋奏種種錯謬自請罰  
鍰 命將此案爲首之戴傳經等定擬發遣完案部議宜縣降二  
級調用 上改從寬畱任時湖北教匪滋事陝西巡撫秦承恩帶  
兵赴陝楚接壤要隘堵截宜縣自蘭州赴西安駐紮 命卽辦理  
糧餉策應彈壓等事三月以商州路通鄖陽隘口十餘處賊匪俱  
可竄入親赴商州防堵又以鄖西縣地方均有邪教聚眾令副將  
百祥帶兵剿捕尋派員勦淨泥河口王全禮等賊藪交部議敘又  
奏襄陽樊城爲南北咽喉派參將九十游擊常格隨同頭等侍衛  
明亮前往堵剿 上以籌辦甚合機宜嘉之五月奏查明王全禮

等滋事緣由復派員分赴鄖陽鄖西搜剿逸匪並盤獲房縣保康  
竄匪漢江以北之賊剿除淨盡地方甯謐並籌善後事宜以獎勵  
鄉勇令推義總俾有責成禁止擅殺誣害及撫恤難民 旌表節  
烈防範漢江北岸諸條款奏入 諭曰宜縣查明逆首王全禮等  
滋事緣由實力搜捕全行授首復派員弁於二鄖一帶搜剿擒殺  
漢江以北悉就肅清並將善後事宜詳悉籌辦實屬可嘉著加恩  
賞戴雙眼花翎並加太子太保銜六月以湖北當陽縣城被陷復  
派總兵觀祥領兵馳赴會剿 上復嘉之先後疊奉 恩賞玉扳  
指火鐮大小荷包二次七月飭屬查拏陝西白河縣傳習邪教之  
陳孝拒捕經差役格殺奏入 諭令訪緝潛匿餘匪務絕根株八

國朝平定卷之六 卷之十一  
月奏籌款調劑兵餉以邠州商州長武三營地居衝要田少山多  
購買一切糧價較他屬稍昂所給餉銀往往不敷請於產糧稍多  
之商州營每名月加折銀三錢產糧較少之邠長二營每名月加  
折銀四錢 上命軍機大臣會同該部議奏尋議以三營銀兩之  
增減總以糧價昂賤爲准本年糧價較昂應如所請其價平減之  
年仍照原定兵餉支給不得援以爲例時因甘省皋蘭等州縣被  
旱 命速回蘭州辦理賑撫借糶事宜十月四川達州亭子鋪及  
東鄉太平等處俱有賊匪滋擾宜縣統領官兵馳至興安由太平  
沿途勒捕至達州與四川總督英善會剿尋因川匪竄入陝省興  
安屬之安康平利紫陽等縣派肅州鎮總兵索費英阿由西鄉入

川進勦宜縣親率兵繼之十一月安康敎匪數千擾近興安府城  
宜縣馳抵興安會同秦承恩提督柯藩進勦是時府城以南牛蹠  
鋪古廟嶺兩處之賊王可秀成自智等以安嶺爲巢穴在府城北  
者馮得仕等屯聚將軍山而安嶺尤偏近郡城宜縣派游擊海洪  
阿等攻古廟嶺親率官兵督戰克之進偏安嶺大寨復克之斃賊  
數千生擒王可秀成自智及餘匪四百餘名尋攻將軍山賊巢斷  
其汲道用轟礮擊之斃賊首馮得祿趙可徵生擒馮得仕賊均就  
縛共一千八百二十名奏入疊奉 優旨嘉獎尋派將弁勦漢江  
北岸大小米溪之賊翁祿玉林開泰等盡殲之偕柯藩索賈英阿  
勦漢江南岸洞汝二河之賊汝河賊匪併入洞河五作雲合力抵

拒官兵分路攻之宜縣由洞河口進並飭將弁抄賊後夾擊之斃賊五百餘名會各路兵進徧五作雲大寨放入火箭焚其草房柯板屋延及水城乘城慌亂我軍擁上殲斃賊首何知和廖明萬李九萬並夥匪三千餘名被焚及自戕者千餘名紫陽境內肅清上以所辦實屬可嘉交部議敘二年正月派員分攻太平賊匪孫老五何如會等於通天觀高家寨南津關三處俱克之太平境內肅清時達州賊匪徐添德東鄉賊首王三槐冷天祿等攻陷東鄉屯聚張家觀又分夥聚清溪場金峩寺二處與張家觀為犄角而巴州賊首羅其清嘯聚方山坪通江賊首冉文儔竄至方山坪迤東之王家寨相為首尾翼乘間竄入張家觀合夥二月官兵攻王

家寨徐添德抽壯健賊匪往援宜縣料張家觀守寨賊不多派員分路取之親率將弁襲曾家山焚其寨柵張家觀守寨賊目趨救官兵奪取張家觀賊寨宜縣由曾家山乘勢收復東鄉餘匪歸入金峩寺清溪場兩處官兵分路進攻金峩寺賊匪分屯大團包冉家壩口二卡清溪場賊匪聚東岸設立木柵槍礮使官兵不能過渡又於金峩寺清溪場中間之姚家壩設立大卡連絡聲勢三月宜縣督催官兵一路趨冉家壩口防大團包賊下寨撲營一路由大團包山後奪據賊寨賊首徐添德等率眾回撲我兵連日鏖戰復分三路乘高壓下殲斃無算賊匪冷倖等又於漏月巖設伏突出官兵夾擊之復斃二百餘名又派員從上流乘棧令善泅者潛赴



東岸斬斷賊船纜索斫開木寨奪據賊卡並攻得姚家壩賊卡尋據碁盤石進據雞爪嶺四月分攻清溪場金峩寺賊寨俱克之徐添德等竄重石子分屯香鑪坪方山坪賊又與合夥撲大羅坪及鷹背黃頭卡均經宜縣派兵擊退而王家寨賊從後涌至官兵乘其巢穴已虛分路擊之燬其巢賊大潰逃回方山坪重石子香鑪坪賊亦分路來援經官兵擊敗之並乘雨奪獲茨茹梁富成寨賊卡賊匪欲撲羅江口窺伺達州宜縣派將弁邀擊之於楊柳坪賊首王三槐至雙廟場詭稱投降降另於山溝藏賊千餘接應宜縣等探訪得實先行設伏派兵分擊斃賊百餘生擒符日仁等十二名諭曰賊首王三槐假冒出降希圖撲卡劫犯狡詐已極幸宜縣

等窺破賊情先行備兵設伏乘機勦殺不致墮其奸計實屬可嘉  
五月攻克分水嶺火石嶺二處賊卡香鑪坪重石子賊匪夜半傾  
巢出分撲各卡官兵擊退之奪卡緊逼賊巢宜縣駐紮大成寨策  
應派兵截賊於花潭子抄擊王三槐股匪於毛坪王三槐中槍落  
馬易他騎逸時因楚省賊匪由漢江北岸竄近漢陰廳治署陝甘  
總督陸有仁督兵遲誤逮問 上命宜縣就近兼辦四川總督事  
務並 命一切軍務著宜縣總統尋督官兵攻克重石子香鑪坪  
賊寨徐添德等竄屯陳家壩六月進勦賊退屯精忠寺山包復進  
逼之賊又傾巢出官兵衝入賊分竄宜縣催趨兵勇追勦至磨子  
壩徐添德王三槐等向西逸復分兵追至徐家山進據小峩城山

賊乘霧雨潛竄 上以兵圍不固令賊竄逸飭之楚匪李全王廷  
詔姚之富三股入川與徐添德等合夥分屯土黃壩之五保頂經  
官兵進擊又分兩股一竄開縣之溫陽井一屯南天洞火燄壩白  
巖洞一帶官兵分路攻勦宜縣駐南壩場策應閏六月賊向雲安  
場逃逸宜縣奏賊竄東南官兵所至距原設糧臺稍遠請於新甯  
東鄉兩路添設臺站 從之南天洞竄匪折回分水嶺桃花坪踞  
大梁山巔宜縣飭弁兵分五路勦之並陳家山八角坪石巖壩另  
起賊匪殲除淨盡又勦開萬一帶賊匪及水田壩白巖山之賊賊  
竄屯燕子山時川楚竄匪踞七星壩馬鞍山圖占夔州而巫山奉  
節大甯俱有新起教匪 上命夔州一帶賊匪專交宜縣督同各

路官兵勦辦七月派兵堵截燕子山賊匪親率員弁駐新店子杜賊窺伺開縣之路奏見在軍營存兵無多請調省標及甘肅督提兩標肅州河州等鎮兵並撒拉爾回兵來營協勦如所請行賊竄大甯一帶宜縣派兵追勦偏白巖山親率鎮將馳至開縣東鄉交界之寶山關駐紮策應賊竄太平縣宜縣抽撥弁兵探蹤會勦諭曰邇來川楚各路賊匪奔竄官兵分投勦捕日久未能蕺事推求其故總由統兵大員漫無調度將官兵零星分撥處處堵截以致兵力分而見單正中賊計勦賊之法惟在整頓兵力擇要攻勦併力一處方可制勝著傳諭統兵大員務須探明首逆見在何路卽統領新兵向此一路併力圍拏俟肅清一路再移師一路以次

遞勦無難。遂漸蕩平。宜縣等毋得仍踵前習。致干咎戾。而負委任。八月賊分三路。徧太平縣城。經官兵擊退。竄石關子。絲蘿壩。石窩場。蘭草溝。油坪一帶。屯紮。宜縣派兵分布堵截。是時各路賊匪分青藍黃白等號。羅其清等稱巴州白號。冉文儔等稱通江藍號。屯踞方山坪。賊巢宜縣派員分攻多福山。蓋頂山。羶帽山。俱克之。進攻方山坪。復克之。賊竄通巴一路。上以首逆仍未就獲。嚴飭之。賊屯邱家堡。沙溪坳。東鄉白號王三槐。達州青號徐添德等在尖山坪。邀約合夥。宜縣派將分擊之。賊匪俱竄。岳家院合夥。上以宜縣不設法。繞出賊前。祇任尾追。復嚴飭之。九月派兵攻岳家院。賊潰。追擊之於韓家院。木通。挾賊趨東鄉。縣治復派兵擊走之。奏

見在各路勦捕教匪籍各州縣團練不敷但鄉勇等自衛村莊齊心協力若遠出數百里外其中勇往出力者固不乏人而畏縮不前者亦復不少此等鄉勇賞過則驕威過則散雖鹽糧等項與兵丁所費相同究非紀律之師可比刻下附近省分官兵四川陝西已調兵一二萬不等湖北等省無餘兵可調其於四川陝甘其添練備戰兵二萬名河北河南各添五千名分營操演 上允所請諭以四川賊首徐添德王三槐羅其清冉文儔責成宜縣時羅冉逆屯南背徐王逆竄青杠渡宜縣移駐白沙場派兵分擊清杠渡之賊躡水過河巴州被圍南背山之賊於觀音寺茶店雪花坪等處四出欲從儀隴南部分往保甯達州宜縣派兵分路防守進

勦巴州賊匪賊分股由息陽河擾至黑石灘其地逼近蓬州營山  
爲文報糧臺後路宜縣派兵迎剿保護運道親駐渠縣之靜邊寺  
策應十月奏川東川北一帶處處與楚陝兩省犬牙相錯是以邪  
匪滋事以來不獨本省匪徒乘機響應卽楚陝賊匪闖入句結者  
亦復不少此時川省攻剿機宜處處需人調度卽各路轉運軍火  
糧餉亦較他省繁劇臣蒙 恩兼辦川督事務深恐貽誤地方仰  
懇 天恩另簡大員料理地方事務俾得親臨前敵專心辦理軍  
務 上以湖廣總督勒保馳驛赴川總統軍務賊首王三槐等擾  
向迴龍場窺伺營山縣城宜縣派將弁痛剿之斃賊三千餘名賊  
退至劉家溝復分撲蓬州亦經官兵馳擊又斃一百餘名 諭曰

此次宜縣督兵痛勦攻撲營山蓬州賊匪雖未擒獲首惡猶能以少擊眾殲斃多賊尙屬可嘉賊撲儀隴縣治官兵馳至衝擊之賊潰向李家場一帶於掠宜縣督兵馳擊斃賊多名並預派將弁擊之於官渡口防護蠡蟲溪糧臺復親帶兵勇繞至文家梁駐紮防賊折竄達州並飭兵分路夾擊 諭曰宜縣一路兵力無多伊又年老多病且已派勒保前往接辦而宜縣仍能認真勦賊並不存觀望之見此次調度將弁以少擊眾縣治糧臺俱能固守所辦竄屬可嘉王三槐等經官兵截擊竄渠縣之望溪宜縣派兵由蠡蟲進勦羅其清冉文儔二逆股匪竄巴州之碾盤壩靈剛寺一帶上以宜縣連日截勦使首逆羅其清冉文儔不能與王三槐等竄



聚一處嘉之十一月派兵擊土三槐股匪於石埡口草壩場大梁  
城賊退趨鄰水官兵馳勦二十餘里賊竄板橋天華山一帶屯紮  
上以宜縣督率辦理妥協復嘉之尋派將弁由板橋進勦奪據  
天華山賊由九龍場分竄鄰水縣屬之樊家槽復有匪徒藉團練  
鄉勇爲名陰圖接應宜縣派員獲爲首之高洪儒等八名復勦分  
股賊匪於長壽縣屬之葛蘭橋賊又分股趨長壽縣焚掠並有折  
竄墊江梁山之勢宜縣飭將弁追勦堵截羅其清冉文儔股匪分  
竄一入儀隴縣境一至營山來定寺搶入場廟糧宜縣派兵擊退  
復攻之於靜邊寺山梁賊敗走十二月截擊王三槐徐添德分股  
賊匪於大竹縣境及墊江縣雞子觀賊匪時有撲達州之黃土場

卡隘趨州城宜縣由文家梁督率游擊薛大烈分路馳擊斃賊五六百名生擒張正邦等一百二十四名宜縣自入川以來疊奉恩賞王金盆玉喜字牌扳指帶版帶環大小荷包等件十有六次三年正月勒保調四川總督接任總統事宜縣仍回陝甘總督任上命速赴西安或在興安一帶擇扼要之處駐紮與秦承恩督率籌辦二月因襄陽白號高均德黃號齊王氏等先後偷渡漢江廣州將軍明亮褫職 命宜縣速赴明亮軍營將所帶官兵悉行統領督率德楞泰等實力查辦宜縣行至黃沙驛聞有川省賊匪竄入長寨馳往擊之殲戮殆盡時齊王氏姚之富經明亮 御前侍衛德楞泰殲斃而川省竄匪阮正通襄陽藍號張漢潮等先後

竄入陝境川省賊匪劉成棟與張漢潮合 命以阮正通張漢潮  
股匪賈成宜縣專辦三月張漢潮竄至王黑壩趨梅湖躡淺過江  
宜縣飭將弁截回又兜剿阮正通股匪於石泉賊竄城固四月襄  
陽白號高均德股匪與張添倫李全合夥折回漢陰阮正通股匪  
由城固折竄回川宜縣等奉 嚴旨申飭尋偕明亮擊高均德股  
匪於五郎之兩河口殲斃四百餘名五月陝省賊匪闖入甘境復  
奉 旨嚴飭高均德股匪經官兵勦殺折爲兩股後股北竄鳳縣  
境宜縣派員追擊賊分股竄出略陽 上以未擒首逆嚴飭之時  
通江賊匪竄近西鄉而川匪徐添德草永壽等竄至房縣與湖北  
竄匪合趨陝境宜縣派員防護西鄉親率將弁馳赴平利洵陽適

中之二郎鋪駐紮探蹤迎堵張添倫由略陽過烏龍河水漲淹斃  
六月劉成棟張漢潮股匪由竹溪竄入陝省平利縣 上命各省  
帶兵大員分定責成陝省令宜縣與額勒登保興肇爲一路專剿  
竄平利之劉成棟等一股尋率將弁赴白沙河抄截擊之於孟石  
嶺斃賊六百餘名生擒周正材等八十三名賊向四川太平縣境  
竄逸 上以宜縣不能將賊首擒獲又任竄入川境嚴飭之 諭  
平利一帶責成宜縣在彼防堵以遏賊匪折竄之路八月張漢潮  
股匪由回軍壩向東逸宜縣馳至石泉派兵堵剿川省徐添德冉  
文倚高均德等由儀隴竄廣元而南江大河口亦有賊匪屯紮切  
近陝省南鄭甯羌沔縣等屬 上命宜縣等於甯沔南鄭緊要關

監嚴密堵禦張漢潮股匪折入南江欲由陝回楚竄至梅湖南岸  
宜縣密派將弁從上流潛渡突擊之賊竄王黑壩宜縣馳回紫陽  
復派兵設伏擊之於納溪壩山後賊向老林西竄折回南江時冉  
文傳數股賊匪折回營山儀隴高均德尙屯廣元宜縣以張逆不  
能渡江北必思與高逆合夥由甯羌沔縣入陝隨飭將弁於甯沔  
一帶防堵嗣聞高均德復至南江之坪河令鎮將在西鄉之私渡  
河罐子山邊截勒親赴石泉洋縣一帶策應九月高均德竄四川  
閬中縣境張漢潮竄太平縣境 諭曰川省竄匪去陝已遠宜縣  
等處當督率將弁實力嚴防不得以賊折回稍有疎懈十月分飭  
將弁堵勒川省箕山竄匪張時青於甯羌境通江京匪阮正通於

城固境並擊襄陽黃號樊人傑太平黃號龍紹周兩股竄匪於西鄉賊退出境龔樊二逆因官兵勦川匪李樹唐明高萬等於頂山復乘間竄入與各股匪分數路圍繞官兵宜縣等親往策應時賊東竄十一月偕總兵慶溥馳勦川省各竄匪於紫陽邊隘擊大固賊匪李樹樊人傑元正濫等於二州城賊退向川省竄逸尋又折近安康平利境宜縣飭員弁各據險隘禦之後竄至紫陽連界之大耳壩游奕官兵分投抵禦宜縣仍駐石泉往來策應李樹等攻撲安康之南天門隘口宜縣督兵馳至派員分路衝下賊驚潰又有賊匪撲黃金溝卡隘派兵馳擊之賊西奔尋以張漢潮股匪竄至雒南盧氏一帶其地卽爲去歲賊匪由豫入陝之路復飭鎮將

由山陽商州迎勦十二月李樹樊人傑龍紹周唐明高萬各股賊匪屯紮紫溪河欲趨西鄉宜縣奏西鄉邊界延長道路紛歧我兵若分段防守則兵力不敷惟有於適中扼要之地分駐重兵相機迎勦四年正月 諭曰宜縣摺內既云兵力不敷何以又有重兵分駐措詞自相矛盾可乎伊等捏詞虛報並不親身督辦僅派鎮將等前往堵勦率照所稟隔數日奏報一次塞責伊等擁兵自衛安坐度歲甚至飲酒宴樂置軍事於不問此等積弊朕所深知豈能始終掩蓋且兵力不敷之故皆由伊等坐冒空糧虛糜廩給卽鄉勇亦恐有名無實不過爲濫銷軍需地步著傳旨嚴行申飭尋又 諭曰宜縣係陝甘總督封疆之任是其專責從前賊匪至境

任其越界奔竄往來自緣不能實力堵禦每奏稱漢江水淺竄賊得以偷渡皆係藉詞捏飾以掩其縱賊之咎嗣後著責成宜縣於陝省邊境一帶嚴密防堵毋許竄賊一名闖入尋奏川匪李樹等分夥竄入平利縣境派鎮將截擊賊竄川境臣由紫陽相機剿辦長嶺各股賊匪再張漢潮股匪折入五郅境內臣因堵剿平利賊匪不能兼顧見經副都統明亮荊州將軍興肇帶兵趕上正可併力截剿 諭曰宜縣奏堵剿賊匪情形皆不切要以各路將領多人並未能擒獲李樹樊人傑并分出爲首之夥賊亦未能弋獲並有以張漢潮委卸於明亮興肇之意宜縣又未身在行間僅據稟報之辭一奏塞責仍蹈素日積習朕向聞自宜縣帶兵剿賊以來



賊至則不敢向前賊去始移營前往因將軍機處鈔存伊節次奏摺詳加覈對皆於無賊處所駐劄畏蕙無能巧於退避實與朕所聞相符卽如本日奏到之摺旣稱張漢潮竄入五卽境內伊以堵勦平利賊匪不能兼顧爲詞其實平利一股賊匪又不見其親往勦辦僅委鎮將等帶兵堵勦俟賊竄回川境後宜縣始由紫陽趕赴長嶺此卽避賊之明證宜縣著傳旨嚴行申飭並著卽解任來京候旨尋奏帶領總兵慶溥參將韓家業由紫陽進勦西鄉賊匪聞賊匪屯紮王黑壩隨派慶溥等進勦臣與韓家業駐安子溝策應後路糧餉又有另股賊匪竄入紫陽關埡子城卽帶韓家業於漢玉城仙姑灘一帶分撥兵勇加意防守賊竄尙家壩復趨瓦房

店臣卽趕回紫陽調兵堵禦 諭曰朕素知宜縣自勦辦賊匪以來從未親身督率此次堵勦各股之賊仍係派人前往惟以策應後路糧餉及趕回紫陽調兵爲詞明係避賊而行仍蹈畏葸不前惡習應俟宜縣到京時逐一詢問再降諭旨 上命川省糧餉專交副都統銜福甯管理三月福甯奏川省軍興以來各路供支未能遵照定例覈實辦理其官兵夫騾價值鄉勇鹽糧等項宜縣統軍因追勦竄匪逐日移營一時權宜覈發所費尤爲不貲 諭曰此項軍需經費用銀七十餘萬兩皆由各路領兵大員任意濫用所致朕聞之至熟今福甯摺內稱宜縣一時權宜覈發所費不貲卽此二語已包括無數浮支濫用矣四月和碩成親王永理奏見

宜縣戴雙眼花翎可否仍令戴用得 旨令戴單眼花翎尋 命  
在散秩大臣上行走 諭曰宜縣自辦理川省軍務以來並不親  
率將弁認真勦賊惟事退縮畏葸致誤軍機重務是以降旨令其  
解任來京昨到京時伊並未專摺請罪及召見面詢軍營情形止  
稱兵少賊多於勦捕機宜地名遠近槩不能詳悉陳奏因詢以在  
大成寨蓋屋居住之事伊居然直認毫無知罪畏懼之意隨令軍  
機大臣將朕所批伊摺給予閱看乃多方辨飾惟以慚愧爲詞僅  
請革去太子太保銜仍不自伏愆尤實屬全無天良出於情理之  
外宜縣身任陝甘總督帶兵打仗是其專責雖經具奏老病情形  
亦不過虛詞搪塞爲諉卸地步試問伊屢次奏報打仗殺賊爲虛

耶否耶其昧良負恩實難辭咎究念伊老病免其治罪宜縣曾任  
烏魯木齊都統於新疆情形尙爲熟悉賞給三等侍衛銜自備資  
斧前往烏里雅蘇臺幫同縣佐辦事尋因湖北安襄鄖道胡齊倫  
侵餉事發呈出動用軍需底帳內有各路領兵大員得受餽送及  
濫提銀兩之事 上以宜縣前在川省辦理軍需經手日久豈有  
不濫行提用作爲餽送藉資結納之理且川省領兵大員在楚旣  
經得受餽送則於川省亦必藉端需索宜縣等如何侵用及致送  
何人之處不可不切實嚴究 命四川總督魁倫駐劄達州審辦  
十月魁倫奏詳覆軍需檔冊惟長夫長騾及雇募鄉勇兩項所費  
最大初因宜縣等統兵由陝入川各兵皆帶有長騾每日給發騾

價無長驟者給長夫川省接辦之初因軍需緊要一面照數給發  
一面移查陝省辦過成案旋據覆稱係權宜辦理並無成案可稽  
川省司道議定彙減章程宜縣以下數用批駁復議加增並未奏  
明又鄉勇一項先經宜縣奏明分別給予錢文嗣因買食維艱復  
經奏明支給口糧十二月 諭曰長驟鄉勇種種冒濫皆係宜縣  
任內之事總俟呈出底帳無難逐款跟究五年正月 諭曰各路  
賊匪肆擾鴟張至今未能撲滅皆由宜縣因循玩誤所致若追論  
其老師糜餉之罪即將伊家產查抄並將該省軍興動用之款罰  
令賠出亦屬罪所應得今因事屬已往姑不卽行究辦且宜縣上  
年來京本係犯罪之人經朕加恩賞給三等侍衛派往烏里雅蘇

臺參贊事務實屬格外寬典宜縣具有人心其辜恩負職之罪甯不自知著縣佐卽將此旨密諭宜縣令其捫心自問當如何捐資助餉庶可自贖見在辦理軍務善後一切正需經費宜縣應激發天良將認繳銀兩若干之處自行陳明二月定邊左副將軍縣佐奏宜縣請將住房及地畝變價措繳外尙有前在陝甘總督任內未支廉俸一萬三四千兩遣人補領全數交出 上以宜縣一味藉詞搪塞蒼猾已極可謂毫無人心復傳 諭縣佐切責之尋命革職發往伊犁效力贖罪三月縣佐奏宜縣自認前在軍營因循玩誤懇赴軍營自備資斧帶兵效力 諭曰宜縣因循玩誤此四字實爲罪案前將伊犁革職發往伊犁亦因貽誤軍務按律懲治

而宜縣在任尙未查出貪婪實跡並未因其認繳銀兩支吾搪塞故加之罪乃宜縣此時尙欲懇赴軍營自備資斧帶兵效力實屬無恥宜縣前此身爲總統畏葸昏庸毫無展布坐誤軍機今更加老病復赴軍營有何用處豈因勦捕賊匪功屆垂成尙思廁身其閒覩顏仰邀甄敘卽著前赴伊犁不得再有延緩尋請罰銀二萬兩以助軍餉 上予限一年完繳六年二月宜縣子盛京刑部侍郎瑚圖靈阿奏未完罰項恐逾期請將住房估計價值呈繳入官諭曰宜縣獲咎之由實以其遷延玩寇不加重辟從寬遠戍初非繳完罰項卽可加恩釋回今瑚圖靈阿呈出住房雖係代伊父精繳官項但伊見爲刑部侍郎在京當苦差房屋一併入官必致

棲身無所況宜縣之罪與伊何涉所有宜縣應繳銀兩著加恩再  
寬限一年其住房亦不必呈繳七年四月奉 旨宜縣年逾七旬  
精力就衰著加恩准其回旗九月呈請所欠官款尙有未完銀八  
百餘兩自伊犁釋回見患骸疾不能討 賞差使另措繳銀二千  
兩稍效涓埃 諭曰宜縣名下未完欠項自應按數完繳至伊既  
患骸疾不能當差惟應上緊調治俟全愈後再請差使何必復行  
措繳銀二千兩輕視朕躬太甚豈以呈繳銀兩遂可復職乎著傳  
旨嚴行申飭十二月川陝楚剿捕逆匪大功戡定 諭曰宜縣前  
在軍營督勦洞汝河等賊匪尙屬認真後因總統軍務安坐大成  
寨任賊匪往來奔竄革職發往伊犁念其年老釋放回京伊究曾



出兵著加恩以六部員外郎用九年 諭曰朕披閱勦平三省邪  
匪方略嘉慶二年九月閒宜縣曾奏及各州縣團練鄉勇非紀律  
之師可比賞過則驕威過則散等語實爲切中軍營之弊宜縣久  
任封疆見識尙爲老到茲念其年老曾經出兵著加恩以四品京  
堂補用十年九月授大理寺卿十一年五月以骸疾復發奏請開  
缺得 旨准其開缺在家調養俟病痊後再行賞給差使十七年  
十一月卒子瑚素通阿原名瑚圖靈阿官至刑部左侍郎別有傳  
札勒杭阿一品廕生見任戶部員外郎富珠隆阿甘肅階州直隸  
州知州烏什杭阿禮部筆帖式

右 國史館本傳

瑚素通阿

瑚素通阿原名瑚圖靈阿鄂濟氏正白旗滿洲人父陝甘總督宜  
縣自有傳瑚圖靈阿乾隆五十二年進士分刑部學習五十五年  
補主事五十七年三月選員外郎閏四月擢翰林院侍講五十八  
年轉侍讀嘉慶元年四月遷侍講學士九月擢詹事十一月遷通  
政使二年三月升左副都御史五月兼公中佐領四年三月擢盛  
京戶部侍郎五年二月調盛京刑部侍郎先是宜縣任陝甘總督  
時因督兵剿辦教匪貽誤遷延降三等侍衛派往烏里雅蘇臺參  
贊事務宜縣自陳認繳助餉銀兩三月瑚圖靈阿奏請扣俸代父  
宜縣歸官項 諭曰宜縣自請措交銀兩一節原因辦賊遲延糜

費國帑令其激發天良出貲助餉並非罰項與瑚圖靈阿本無干涉伊本刑部司員人尙可用擢至盛京侍郎惟當潔己辦公爲國宣力卽係幹父之蠱今請將廉俸全行坐扣何以辦公勢必有篋篋不飭之事若以伊父措交銀兩爲名藉端取巧需索屬員則瑚圖靈阿及伊父罪無可逭矣是月奏參將軍琳甯查辦番役雖經革退並未斥逐爲將來請復地步且該處番役查拏刨夫偷漏私濫得錢買放協領等亦有分肥情事琳甯受其蒙混又侍郎寶源於奉 旨交查事件慫恿琳甯以爲必不可行奏入 命尙書傅森會同將軍晉昌前往查辦得實 上令琳甯來京另候簡用寶源褫職尋 命瑚圖靈阿署理奉天府府丞兼學政事務是月

上以敎匪輾轉滋蔓將宜縣革職發往伊犁效力贖罪瑚圖靈阿  
又奏請代父宜縣前往軍營效力 諭曰宜縣貽誤軍務咎由自  
取與瑚圖靈阿究無干涉所請殊可不必瑚圖靈阿見任盛京刑  
部侍郎如果潔已奉公爲國宣力二三年後朕或逾格施恩令伊  
父宜縣回京亦未可定瑚圖靈阿惟當黽勉辦公不可再行瀆請  
十月調刑部右侍郎六年正月授正黃旗蒙古副都統二月 命  
同侍郎繼善往盛京查辦黑龍江將軍景燾剛復貪恣等款三月  
奏參齊齊哈爾副都統恆伯被控各款奉 旨解恆伯任質審均  
得實分別懲革四月調鑲紅旗滿洲副都統七月兼公中佐領九  
月署理藩院侍郎十月充右翼監督七年正月轉刑部左侍郎四

月管理光祿寺事務六月署吏部左侍郎八月 賞戴花翎八年  
五月復署理藩院侍郎七月署正黃旗護軍統領九月奉 旨改  
名瑚素通阿十一月調正黃旗滿洲副都統九年六月以失察吏  
部書吏舞弊 諭不必兼署吏部交都察院嚴加議處七月 命  
往河南光山縣審辦周繼祖控案旋因具奏匿名封摺預行拆看  
撤令回京 命軍機大臣傳詢據稱接到密封時先經拆看知係  
指告鑲白旗之事曾向扎郎阿告知 諭曰瑚素通阿接到匿名  
封摺卽不應預先拆看迨拆看後明知指控贓款重情猶復矢口  
妄談本應照漏洩常事例罷職不敘姑念本案由伊陳奏發覺且  
在刑部辦事有年著加恩降爲刑部筆帖式是年十月奉 旨瑚

素通阿善加恩在刑部主事上行走以觀後效十二月奉 上諭  
見在出有滿洲侍講一缺因思瑚素通阿本係進士出身其獲咎  
亦係語言不謹尙非有心洩漏前經賞給主事在刑部行走所有  
翰林院侍講員缺著加恩以瑚素通阿補授十年二月擢內閣學  
士五月兼公中佐領閏六月擢刑部右侍郎是月授正白旗漢軍  
副都統十一月以違例保畱司員部議鑄級得 旨改爲降二級  
從寬畱任十二月署兵部右侍郎十一年六月因審辦楊四用藥  
迷人之案得實奉 旨開復降二級畱任處分十月充會典館總  
校官十二月充經筵講官十二年三月署工部右侍郎四月轉刑  
部左侍郎 賞戴花翎十三年二月卒

右 國史館本傳

福慶

福慶鈕祜祿氏滿洲鑲黃旗人內大臣一等子額亦都裔孫乾隆二十八年考取筆帖式二十九年補理藩院筆帖式三十三年二月京察一等以理事同知通判用十月揀發直隸三十四年補張家口同知三十八年因事褫職三十九年五月賞筆帖式仍在理藩院行走六月丁父憂四十年十月補官十一月直隸總督周元理以福慶辦事熟諳請仍發直隸差委允之四十一年服闋四十二年補河閒府同知四十五年調天津府同知四十九年閏三月丁生母憂九月命仍在理藩院行走五十一年二月署主事八月服闋實授五十三年丁母憂五十四年五月遷員外郎九月仍發直隸差



委五十五年署永平府知府五十六年三月服闋實授四月擢甘肅安肅道五十七年大兵征廓爾喀以承辦軍需出力議敘五十九年調鎮迪道嘉慶二年調甘涼道四年正月擢安徽按察使九月以秋審失出部議降調 上改爲畱任六年正月遷布政使十月調江南布政使七年擢貴州巡撫十一年 諭曰福慶之女著指與三阿哥爲福晉十三年以庫銀遺失聽從藩司李長森捏報日期又率委貴陽府知府程卓樞查本屬虧空致盤驗不實及失察大定局錢被竊 命以三品京堂降補十四年三月授倉場侍郎五月調理藩院左侍郎先是福慶偕同官許兆椿密參通州中西二倉白米虧缺及已革倉書高添鳳把持舞弊至是 命福慶

借戶部左侍郎託津等盤驗屬實又經刑部究出高添鳳私出黑  
檔重領米石將歷任倉場侍郎分別議處 上以福慶到任未久  
畱心查弊原之六月調工部右侍郎兼鑲黃旗蒙古副都統十一  
月調正黃旗滿洲副都統十二月以失察書吏王書常私雕假印  
冒領內務府廣儲司及戶部三庫銀物降二級畱任是月轉左侍  
郎十五年二月兼公中佐領七月充崇文門副監督九月擢禮部  
尚書十六年正月遷正白旗蒙古都統四月調正黃旗漢軍都統  
十月 賜紫禁城騎馬十七年九月 命管理 雍和宮事務十  
月調兵部尚書十一月 賞戴花翎尋 命管理戶部三庫事務  
十八年正月授內大臣六月調鑲紅旗滿洲都統七月 上秋獮

木蘭 命留京辦事九月直隸教匪林清遣其黨入禁城謀逆伏  
誅福慶條陳五事一守門官兵不得以老弱充數尤嚴禁包班頂  
替之弊一各館供事出入禁城宜添設腰牌以便稽查一堆撥柵  
欄宜照向例派設步甲按時啟閉一嚴查庵觀寺院毋許容留姦  
宄一近畿各州縣令實力編查保甲得 旨允行十月以前在正  
黃旗漢軍都統任內失察都司曹綸與林清潛通逆謀褫職二十  
三年以刑部郎中起用二十四年卒子博克碩寬博多歡博克順  
和其寬博奇當阿博克碩寬太常寺贊禮郎博多歡廣東試用副  
將和其寬禮部員外郎博奇當阿試用游擊

右 國史館本傳

賡音

賡音原名永齡姜佳氏正黃旗滿洲人乾隆二十八年由親軍補授侍衛處筆帖式三十四年升主事三十八年升理藩院員外郎四十二年授陝西延安府知府四十四年擢甘肅甯夏道四十六年因捏結冒銷賑糧革職查抄二十七年 賞給主事銜赴恰克圖辦事五十三年回旗食親軍錢糧在額外主事上行走五十七年補刑部主事五十九年升員外郎六十年呈請改名賡音嘉慶四年正月隨刑部侍郎特克慎等赴三座塔審辦土默特旗台吉阿薩拉被誣謀死胞伯案特克慎照稅員西拉布原審擬阿薩拉凌遲賡音等以案情重大稟請再加研訊特克慎以眾犯既已承

認不必游移繕摺具奏賡音等亦呈報軍機大臣代奏 命喀爾喀親王固倫額駙拉旺多爾濟覆審得實 上以賡音等於特克慎固執已見之處並不依違迎合俾重案得以平反著交部議敘以應升之缺先行補用五月授湖廣道御史七月遷禮科給事中五年閏四月擢大理寺少卿六月遷光祿寺卿七月授內閣學士兼禮部侍郎十月授盛京刑部侍郎六年二月將定案監禁後始成雙瞽篤疾之紋犯援事發照老疾之律奏請減等收贖經刑部議駁 上以賡音並未詳覈律義輒因一時臆見奉行奏請殊屬錯誤著傳旨申飭尋因齊齊哈爾副都統恆伯奏參黑龍江將軍燦習剛愎貪縱各款 上命賡音偕侍郎瑚圖靈阿繼善前往黑

龍江嚴審四月審明定擬如律七年正月調刑部右侍郎兼鑲藍旗漢軍副都統八月調鑲白旗滿洲副都統九月兼公中佐領八年三月充繙譯會試副考官揭曉後奏向例繙譯鄉試五年一舉至會試則無定期計數科舉人足敷六十名方准舉行近年屢因人數不敷停止是以旗人因繙譯難於上進多就別途閒於會試則學業荒疎應試者甚屬寥寥請嗣後繙譯鄉會試俱定以三年舉行中式名額就入場人數多寡奏請 欽定下部議行六月奉命稽察寶坻等處駐防奏良鄉霸州東安采育固安寶坻六處駐防官員俸米每石支折色銀一兩與滄州保定雄縣駐防之支本色者有異請亦照保定之例一體改給本色下部議行七月借

光祿寺卿邵自昌馳赴湖南鞫零陵縣生員汪雲衢等控知縣勒  
派滋弊通道縣武生梁東泰誣控承審官押改定例勒結分學諸  
案均訊明定擬如律又 命查辦巡撫高杞違例調補縣令及遲  
誤兵米並未陽縣知縣熊維培承審命案顛倒出入詳參遲延案  
訊無舞弊營私狀惟辦理遲延請交部察議 上以所擬過輕改  
爲議處又因川陝楚軍務告蒞 命審案事竣告祭湖廣嶽瀆諸  
神時高杞來京候 旨新授巡撫阿林保未到任 命賡音暫署  
撫篆九年正月兵部以輪查各省營伍奏請 欽派大員 上命  
賡音就近查閱湖南湖北兩省營伍六月事竣回京七月轉刑部  
左侍郎閏六月調倉場侍郎十一年二月奏大通橋運京漕糧腳

價銀兩近年錢價昂貴車戶等經費不敷請調濟添補 從之五  
月授左都御史仍署倉場侍郎尋兼鑲白旗蒙古都統八月奏本  
裕倉滿監督堆齊久不到倉漢監督王之藩不早報明代爲隱飾  
請將王之藩解任歸案審訊並自請交部議處尋議罰俸米半年  
十月調正藍旗漢軍都統十二年四月奏各省來京控案如先未  
在本籍上司具訴及見審未結者請卽咨行本省辦理 上以所  
奏非是 諭曰各省民人來京控訴其案關重大者固應奏明辦  
理若未在本籍具訴遽行騁越來京者正可奏明覈辦治以越訴  
之罪至外省審辦未結之案或因案情屈抑來京控訴若不具奏  
審訊冤獄何由昭雪卽或逞刁挾嫌砌詞妄控亦可隨時懲辦以



杜訟端今賡音等槩請咨回原籍審辦自因近日各省控案繁多  
懼於逐件具奏豈大臣敬事之道著傳旨申飭六月賡音等於  
御用晚膳後陳奏尋常事件 上責其錯謬交部察議尋議降三  
級調用七月 諭曰賡音等貌似急公實則心存怠惰是日該衙  
門本在圍奏事伊等原欲將此事件一併陳奏特因早閒具奏不  
及又慮次日陳奏必須起早赴圍是以就近即在朝房內繕辦奏  
摺候至晚膳後呈遞既見其勤於辦公又得安心進城明晨可以  
高臥其巧爲偷安實難逃朕洞鑒然使所奏之事如果稍關緊要  
朕不過量加訓飭必不卽予處分今賡音所奏係訪獲緝拏鬪毆  
案犯可作耳目之人有何緊急立候施行乃紛然羣詣宮門非時

入奏殊屬有乖體制賡音自擢任左都御史後年老懶惰又不曉事何堪復任臺長賡音著退去左都御史伊於旗務尙爲諳悉著加恩畱正藍旗漢軍都統之任所有降三級調用處分著改爲降二級畱任尋因前在左都御史任內於濟南明恆文惠三人知其患病日久不奏請開缺 命交部議處部議降二級畱任十二年因前在倉場侍郎任內將本應運送京倉之米分貯通倉奏請京官俸米改歸通倉支放經軍機大臣議駁又不迅速轉運京倉以致冰凍不能舟運陸運又多折耗 上以其辦理不善交部議處尋議降一級畱任倉場書吏高添鳳串通斗級花戶舞弊虧米十數萬石歷任侍郎失於覺察 上命軍機大臣查明各員在任年

國朝者屬矣有考  
卷之十一  
月諸色弊竇起於何人任內開單進呈分別懲處 諭曰廣音在  
任亦久黑檔盜米之弊係起於伊任內其咎較重且年力已就衰  
老著降爲三品頂帶卽予休致二十年九月卒孫積爾杭阿見任  
河南河陝汝道噶爾桑阿候補中書

右 國史館本傳

阿精阿

阿精阿瓜爾佳氏滿洲正黃旗人由監生捐納筆帖式乾隆二十八年補都察院筆帖式三十六年京察一等四十年授奉天府理事通判四十二年調岫巖城理事通判四十六年升盛京工部員外郎五十年調刑部員外郎五十二年擢郎中五十三年八月以巴勒布寇衛藏濟隴聶拉木命往四川交總督李世傑委辦軍需十二月上以西藏軍務漸次完竣糧運一切均已停止阿精阿係刑部司員刑名諳習令回京供職五十四年京察一等署理佐領五十五年擢直隸按察使五十六年十一月參贊海蘭察副都統烏什哈達岱森保帶兵赴西藏勦廓爾喀上以經過各省

沿途需用車輛馬匹廩給等事直隸派阿精阿督率所屬往來照料五十八年擢陝西布政使五十九年八月擢刑部右侍郎尋以陝省緝獲邪教 命會同陝西巡撫秦承恩嚴訊十月又 命仍留西安將人犯全行起解後再來京供職是月授正白旗漢軍副都統十一月授河南巡撫時前撫穆和蘭以邪教要犯劉之協提至扶溝縣逃脫獲罪奪職 命阿精阿齋旨傳知行抵豫境奏緝獲教犯劉之協必須在於脫逃之處切實覓綫臣卽馳赴扶溝一帶設法查拏得 旨勉力妥實爲之六十年正月 命往扶溝西關南關密訪教犯劉之協蹤跡二月 命偕河東河道總督李奉翰會勘漳河尋奏言漳河向無官隄亦無民堰上年漳水漫溢改

由洹河入衛致三臺以下舊河淤淺南北兩岸居民彼此爭執臣等悉心相度若聽漳水由洹入衛恐洹河窄狹難容且日久渟淤必於運道有礙查舊河寬廣足資容納祇須將下游淤處疏濬深通卽可暢注並將三臺漫溢之處填築堅實水歸故道使兩岸居民各安生業見已分段監挑所需料物例應民修惟災區民力拮据臣阿精阿及該管道府公捐辦理得旨允行閏二月奏拏獲邪教案犯張百四等五犯得旨著傳諭阿精阿派員解京其劉之協脫逃何處仍畱心嚴緝五月諭曰目下辦理秋審事務正資熟手刑部尙書侍郎中除胡季堂外亦少諳習刑名之人前因查拏劉之協關係緊要是以將阿精阿補放河南巡撫今該犯日

久未獲是阿精阿在豫亦屬無益念其由刑部司員出身於刑名  
自爲練習阿精阿著署刑部右侍郎十月授左侍郎十一月授正  
藍旗滿洲副都統嘉慶元年兼署鑲白旗滿洲副都統二年兼署  
鑲藍旗滿洲副都統鑲紅旗護軍統領三年五月兼署正紅旗漢  
軍副都統八月卒子佛佑原任國子監筆帖式次佛安佛佑佛慶  
孫福珠洪阿福升福珠隆阿福成福珠洪阿見官江南提督福升  
見官雲麾使福珠隆阿候選通判福成見官山西蒲州協副將

右 國史館本傳

德成

德成瓜爾佳氏滿洲正黃旗人由監生捐納員外郎補盛京刑部員外郎年滿調工部旋升郎中乾隆二十八年授山西道監察御史仍兼辦工部事務是年冬巡視濟甯漕務奏濟甯運河一帶東西兩岸積水浸淹民田請加疏濬得旨允行二十九年二月轉戶科給事中巡視淮安漕務三十年因同司郎中忠德鑄造鑾儀衛金器不符解任質訊十一月事白補吏科給事中巡視通州漕運三十三年七月轉禮科掌印給事中十二月超擢內閣學士兼公中佐領先是兩江總督高晉奏修理宿遷縣城工完竣聲敘未晰上命德成前往查勘復命後簡補是職上諭軍機六



臣曰朕之所以加恩於德成者非僅爲熟悉工程蓋因近日派伊前往宿遷查勘城工查明無弊卽能據實覆奏不事苛求設遇有弊之事亦必能直陳無隱辦事認真尙屬可嘉故耳三十四年二月授工部右侍郎九月同大學士劉統勳查勘挑濬運河 命詳加履勘據實覈議務於河道運務均有裨益十月偕劉統勳奏言應將各湖水堰蓄水充裕闢壩以時啟閉每年各塘及長河內挑淤章程照舊舉行不致有礙漕運并繪圖貼說以進 上允其奏

三十五年正月 命赴山西審辦汾陽縣革監張英控告枉斷抗欠一案訊明虛誣擬坐如律閏五月永定河決奉 旨督辦事竣

回京三十六年七月又奉 命堵築永定河漫口九月兼管光祿

寺事務三十八年九月調工部左侍郎四十二年正月 諭曰德  
成和爾經額承辦九經三事殿易蓋黃瓦甚屬妥速著交部議敘  
見在 泰東陵工程緊要著德成和爾經額會同誠郡王劉浩迅  
速辦理三月奏請建造 泰東陵內務府營房分別緩急興工報  
可四十三年授正白旗滿洲副都統是年督辦盛京十八處城  
工四十四年十二月 賜花翎時大學士阿桂督辦河南王家莊  
引河漫口工程屢築屢開 上命德成赴工會同商辦旋以所奏  
未協奉 諭德成於河務竟未諳悉著卽回京不必仍留工次四  
十五年正月 諭曰此事袁守侗昨來京時屢經召令與軍機大  
臣並德成同見朕再三指示分晰是非袁守侗德成繪圖貼說進

呈今德成乃欲於屢經決裂處所作工鑲壩並欲將見辦垂成之  
工棄而不用是其執謬不通實出情理之外伊因阿桂素輕其人  
遂爾意成偏執甚至朕前奏對時尙復曉曉瀆辯朕於辦理此事  
毫無成見卽德成所擬兩條一是一非明白曉諭亦從未發聲徵  
色而德成轉肆行妄論毫無敬謹之意彼時朕設如阿桂性情早  
將伊革職且立置重典矣然德成人雖執謬究因公事起見與  
營私散法者不同因僅革去花翎以示懲儆俟引河工成後再降  
諭旨三月奉 旨吏部議處德成請照溺職例革職固伊罪所自  
取但其執謬之處究係因公著加恩改爲革職畱任四十六年會  
勘西安城垣營堡估計丈量四十七年查辦瀋陽工程四十八年

總司承辦辟雍圖式四十九年同尙書劉墉德保等鳩工庀材興  
建辟雍議敘有差三月同尙書劉墉等修葺明代陵寢及督修盧  
溝橋工程八月以改設製造庫匠役議論不能畫一議處五十一  
年奏言浙省學臣寶光請奏參嘉興海鹽平陽三縣倉庫虧缺已  
有三十餘萬兩之多通省虧缺自不止此與審辦此事之曹文植  
所奏迥不相同請將此案卽令寶光會同曹文植徹底清查  
上建之并將原摺發交曹文植等閱看七月 命總理工程處九  
月奉 旨稽查德州一帶漕米先是德成奏各幫漕船米不足額  
及是同大臣親往查驗並無情弊至五十二年七月漕船抵通德  
成分派司員前往監收呈奏米色不齊 上以德成欲實前言固

執紛擾交部議處十月 命查勘浙江海塘應修柴石工段五十三  
三年五月 命往估修臺灣城工德成相度郡垣舊址議改築土  
城工易而費省其舊城臺七座一例加高又添建四門券臺一座  
城樓八座卡房十六所兵房八所奉 旨如所議行是年川江水  
勢漲溢荊州萬城隍決由方城口衝入直注府城西北西門全城  
被浸 上軫念災區 命同大學士阿桂前往履勘奏明被水情  
形實因江心窖金洲漲溜沙偏水勢壅高下流疏洩不及所致卽  
將洲上蘆荻盡行剷伐犁去根株請於楊林洲建築碎石雞背壩  
後接築土隄其玉路口一處建築柴壩應鑲出水面攔住外水壩  
內築土補完隄工於方城口洪家灣萬城隍三處各築順水壩一

道以殺水勢并土黑廠接築越隄及沙市劉家港以下至塘樓橫隄加築土堰又於通隄俱加高培厚估計工料勒限次年完竣得旨允行五十四年正月京察議敘七月奉 命查勘嘉峪關邊牆情形以該處多係浮沙所有壕塹牆垣旋修旋圯惟於總要地方安設營卡移駐官兵卽可以杜哈密至肅州私越之路惟嘉峪爲西陲門戶有係觀瞻原設城樓狹小城臺閃裂應一律改建

上允其奏五十五年正月以奏駁河南考城縣城工一案議處奉旨德成獨出已見單銜具奏實屬任性乖張著降爲三品頂帶署工部侍郎仍帶革職畱任二月以奏駁書麟周家樓漫工多用銀兩一案奉 旨德成前已降爲三品頂帶著再降一級仍以四

品銜畱工部侍郎任十二月因前浮估甘肅皋蘭城工奉 旨德成著革去職任仍在工部侍郎上效力行走以觀後效五十六年十月以承修潼關城垣拘泥舊制添建水關泊岸堆撥經侍郎和琳查勘俱不應增修奏德成任意浮估虛糜帑項革職逮問五十七年三月蒙 恩省釋 諭曰前因德成勘估潼關工程經和琳前往查明卽將德成革職交刑部治罪嗣經刑部定擬斬候固屬罪所應得但念德成辦理此事祇係拘泥成見藉此興舉大工成其執拗之名尙無侵肥入己情弊且在工部辦事勤幹尙屬可原著加恩釋放至德成舊患目疾並請畱京王大臣察看是否尙能通明辨物或竟成盲瞽卽行據實覆奏嘉慶六年八月卒於家

子誠安見任盛京禮部侍郎

右 國史館本傳

乾隆五十三年臺匪林爽文平 純廟召見德少司空成以福康  
安視阿桂何如詢問少司空奏云阿桂能指揮海蘭察福康安則  
極力周旋之方得海蘭察之力以此不如阿桂 上云汝所言亦  
是但阿桂出師西域海蘭察係未弁夙感阿桂拂拭之恩故願效  
驅策海蘭察爲金川參贊福康安尙係領隊一旦驟臨其上不能  
不謙謙自下倚爲干城兩人境地不同福善周旋是以平賊 聖  
天子於臣僚分量洞若掌紋宜授鉞專征無不膚功迅奏也

右紀聞陳康祺撰



國朝文獻通考卷之九十一

四

施朝幹

施朝幹字培叔一字鐵如號小鐵江蘇儀徵縣人乾隆癸未進士官宗人府府丞著有六義齋集正聲集王昶云鐵如少以詩名王光祿鳴盛吳中十子之刻鐵如居其首住京師杜門卻掃忍飢誦經故其詩文蒼然而秀穆然而深秩然一規於正又錢大昕云余嘗歎今之詩家舍正始之音而遁於異趣非輕佻鄙俚以爲新則生澀堆垛以爲富不惟聲韻失調抑亦性情偏戾讀鐵如之作陶冶性靈謹守繩墨其氣格在高岑李王之閒而不肯效皮陸全蛻之體可謂介然自守不牽於流俗者矣

先生性廉介居京師做車贏馬罕接賓客乙卯典試山東撤闈後

視學湖北甫二載卒於任貧不能成喪督撫諸大吏賻助始克扶

櫬歸官御史當不下部議輒允行廣陵思古編

右正雅集符葆森錄按公尚著有一勺集

鐵如詩樸質清真生澀刻峭居官如其詩在京師老屋數椽寒澶冷炙夫婦相得怡然終不與熱官來往稍遷京卿督湖北學政荆襄潢池告警憂瘁而亡其門人伊太守湯安刻其詩

右湖海詩傳張維屏錄

國朝書獻類徵初編卷九十八目錄

卿貳五十八

崇祿

廣音布

阿永阿

劉躍雲

陸費墀

王懿修

子宗誠

尹壯圖

姜晟

傅森

鄧文泮

恒尋聖廟美作不和  
名力二二

國朝耆獻類徵初編卷九十八

通奉大夫前署江西巡撫江西布政使司布政使湘陰李桓輯  
卿貳五十八

崇祿

崇祿瓜爾佳氏滿洲鑲白旗人乾隆二十八年由監生充方略館  
譯漢官三十六年議敘補吏科筆帖式四十一年調顏料庫筆帖  
式四十四年調理藩院筆帖式四十五年遷通政司知事四十八  
年擢刑部主事五十年升員外郎五十四年升郎中五十七年正  
月京察一等二月兼公中佐領五十八年授陝西同州府知府六  
十年調鳳翔府嘉慶三年陝西教匪滋事巡撫秦承恩派往隴州

國朝通志卷之八十一  
募勇設卡四年借知州李承道協同新兵分段防禦六年擢甘肅  
安肅道八年升按察使十年升浙江布政使十二年護理巡撫十  
三年巡撫阮元清釐積案奏稱前任巡撫清安泰任內批發未結  
者三百二十有二藩司批准未結者八十有六 上以崇祿任藩  
司已久且曾兼護撫篆亦未提審速結下部議處尋議降二級調  
用 上改爲降三級畱任尋擢盛京刑部侍郎十五年協領扎布  
扎那管理漢局得賊畏罪自盡遺有冤狀捏告侍郎貴慶需索倉  
規經將軍富俊奏 聞 命崇祿會同戶部左侍郎英和候補四  
品京堂初彭齡訊明貴慶並無需索情弊惟到任後收受內倉監  
督等禮物屬實請下部嚴議 從之十六年三月擢都察院左都

御史閏三月授正白旗蒙古都統五月調刑部尙書 命偕順天  
府府尹初彭齡赴福建鞫在籍知府張祥雲占據民人李維祺墾  
熟沙洲率同族人張保來用鐵器傷斃李維祺佃戶李輝復賄買  
頂兇依律論絞十七年九月充會典館副總裁十月 賜紫禁城  
騎馬十八年正月管理右翼官學九月以在禁城搜捕賊匪 賞  
加二級十月調鑲藍旗漢軍都統十九年二月充崇文門監督閏  
二月調鑲藍旗滿洲都統六月充經筵講官二十年以刑部積壓  
本章部議草職 諭曰刑部爲刑名總匯尤當勤敏將事乃題本  
二十三件立決者多至二十二件人犯多至五十五名總緣平時  
積案旣多將屆封印紛紛趕辦遂至一時彙集且近日自請議處



之案不一而足崇祿係刑部司員出身常川在署辦事其咎較重  
著革去紫禁城騎馬降爲二品頂帶仍革職畱任二十一年三月  
刑部議覆直隸總督題本直敘穢語部議崇祿降一級調用上  
改爲畱任七月調鑲紅旗漢軍都統九月辦理本年秋審允當開  
復頭品頂帶仍 賜紫禁城騎馬十二月調正白旗蒙古都統二  
十四年正月調兵部尙書三月以前在刑部任內濫保劣員余繼  
生部議降二級調用 上加恩改爲降二級畱任六月調禮部尙  
書八月 遣官致祭 夕月壇執事各官禮節多有遺漏崇祿等  
僅將遲誤盟具司員奏參下部議處尋議崇祿本有革職畱任之  
案奏請革職 上以崇祿管理未久仍改爲革職畱任九月充滿

洲繙譯鄉試正考官旋以萬壽慶典期內忌辰服色未經聲請  
降左侍郎兼正黃旗蒙古副都統二十五年遷正白旗蒙古都統  
道光元年七月因病開缺八月卒諭曰都統崇祿服官中外管  
理部旗事務宣力有年茲聞溘逝殊爲軫惜所有應得卹典該部  
查例具奏尋賜祭葬子世英兵部郎中固英一品廕生

右 國史館本傳

匡耳言及不牙

三

賡音布

賡音布瓜爾佳氏滿洲鑲藍旗人由官學生考取庫使乾隆二十年補光祿寺庫使三十三年保畱本寺筆帖式四十二年升署正四十九年升禮部員外郎五十一年擢河南道監察御史五十五年轉掌廣東道監察御史五十六年轉掌河南道監察御史五十七年擢兵科給事中偕本科窩星額等奏參浙江平陽協右營都司高榮恩題補提標游擊赴部引 見逾限下部議處五十八年遷太僕寺少卿六十年升通政使司副使嘉慶三年升光祿寺卿四年授太常寺卿尋授通政使司通政使洵擢都察院左副都御史十二月奏各部院衙門向來保送御史多以年力就衰才具

平庸之員錄送於稽察差使等事難以勝任請嗣後擇其年富力  
勤者保送 上是之復以御史巡視東三省隨帶官員家人兵役  
人數眾多不免騷擾驛站州縣供給糜費過繁且東三省爲 聖  
朝發祥之地土沃民良技嫻俗厚該省之將軍府尹勤加教養風  
俗自能敦厚倉庫自必豐盈卽如盛京州縣錢糧年清年款兵丁  
馬步騎射俱有副都統城守尉等官不時操練是該御史不過虛  
應故事無益有損請永行停止 上飭軍機大臣會議尋議改派  
盛京侍郎查察五年正月奏五城竊盜案件均係坊官緝捕今竊  
案未獲者尙有八十餘案東城西城俱有獲犯惟中南北三城罕  
獲甚屬寥寥請明定巡城御史處分以嚴緝捕報 允旋奉 命

山東江南浙江香差以經過地方營房墩鋪多有傾頽守汛兵丁  
率多不足各驛馬匹不敷額數請令地方官修理買補入奏得  
旨飭行四月升盛京禮部侍郎二月卒長子法朗五乾隆五十年  
中式舉人次法復禮候補天文生三法克謹承襲八品廕生

右 國史館本傳



阿永阿

覺羅少司寇阿永阿以筆帖式起家任刑部侍郎性聰敏善詞曲嘗定秋審冊公揚筆曰此可謂筆尖兒立埽千人命也 納蘭皇后以病廢公欲力諫以有老親在堂難之其母識其意喟然曰汝爲 天家貴胄今欲進諫當宁乃以親老之故遂違汝忠盡之志耶可舍我以伸其志也公涕泣從命因置酒別母侃然上疏 純皇帝大怒曰阿某宗戚近臣乃敢蹈漢人惡習以博一己之名耶特召九卿諭之陳文恭曰此若於臣宅室中亦無可奈何事託冢宰庸曰 帝 后卽臣等之父母父母失和爲人子者何忍於其中辨是非也錢司寇汝誠曰阿永阿有母在堂盡忠不能盡孝也



上斥之曰錢陳羣老病居家汝爲獨子何不歸家盡孝也錢叩謝上乃成公於黑龍江命錢司寇歸終養焉踰年 后旣崩御史李玉明復上疏請行三年喪禮亦成伊犁二公先後卒於邊未果赦歸也

右錄宗室昭樾撰

按事在乾隆三十年

劉躍雲

劉躍雲江蘇武進人父大學士綸自有傳躍雲乾隆三十一年一甲三名進士授編修三十八年丁父憂四十年十月服闋供職四十一年九月擢右贊善十二月轉左贊善四十二年遷右中允四十二年轉左中允四十四年升右庶子四十五年七月轉左庶子八月授侍讀學士四十六年擢詹事府詹事四十九年提督江西學政尋擢內閣學士兼禮部侍郎五十二年正月充經筵講官二月授工部右侍郎十二月調禮部右侍郎五十三年七月轉左侍郎五十四年八月提督福建學政九月丁母憂五十七年二月諭曰劉躍雲見已服闋來京著署理禮部右侍郎八月實授尋轉

左侍郎五十九年四月因辦理祈雨事宜具奏遲誤又未赴宮門引咎 特旨罰俸一年六月充江西鄉試正考官六十年充會試副考官以所取中士覆試停科多至十名並將膚泛不當之卷拔置第一所擬策題又多差謬部議革職得 旨以四品京堂補用仍帶革職畱任尋補奉天府府丞嘉慶元年正月 恩詔開復革職畱任處分 命來京引見得 旨照舊供職四年授大理寺少卿五年正月復任禮部右侍郎六年正月轉左侍郎七月調工部左侍郎九年七月 上御門辦事躍雲誤班未到得 旨交都察院嚴議尋議罰俸二年 諭曰劉躍雲年力就衰起跪每多遲滯難勝侍郎之任著降補內閣學士其罰俸二年之處加恩改爲

罰俸六箇月十年二月授兵部右侍郎復因 御門進本失儀自  
請議處得 旨交部察議五月轉左侍郎六月 上以躍雲年老  
短視步履維艱 予原品休致十三年卒子逢嘉四品廕生

右 國史館本傳

公姓劉氏諱躍雲字服先號青垣明洪武中有名真者自鳳陽遷  
武進遂爲武進人曾祖演康熙癸酉舉人祖機諸生並以文定公  
貴 贈封光祿大夫考綸文淵閣大學士 贈太子太傅諡文定  
公其仲子也幼力學耐勞苦文定公官翰林未改襄素公在北地  
常以棉衣一襲禦冬乾隆丙子中順天舉人丙戌會試後已與大  
挑諸城劉文正公主其事謂同列曰此吾門生也才素長宜畱之

爲詞館用榜發果獲雋故事 廷試前十本例拆彌封進呈至是  
奉 旨朕於殿試亦宜暗中摸索以昭公正公名本第七改第三  
上喜曰此劉綸子文理固優不意朕竟得之文定公直 樞廷  
常居海澱家事一以委公日策騎往來或至不遑暇食庚寅典山  
東試文定公亦主試順天父子一時操文衡鄉黨以爲華癸巳二  
月文定公患頤癰方在告 命充日講起居注官 溫諭云使劉  
綸歡喜可望速痊也六月文定公薨於位服除仍供職翰林戊戌  
分校禮闈升右贊善轉左己亥主順天武鄉試遷侍讀庚子扈  
蹕南巡中途有欲以金爲饋避之使不得見曰吾父以廉介受  
主知不敢改家風也是歲歷遷左右庶子及侍讀學士癸卯授少

詹事甲辰授詹事 特旨充經筵講官三品官得此職者前惟故  
詹事張公鵬翀蓋異數也旋視江西學擢內閣學士兼禮部侍郎  
既之官公慎自持不與地方一事及滿囊橐蕭然江西爲之謠曰  
公相之家大臣之度秀才之母童生之父其得士心如此丁未擢  
工部右侍郎管理錢法堂事恆從部中攜簿籍歸終夜句稽不輟  
於三省河工尤加意焉故大學士和珅重公素望知 上意嚮用  
每於公所通殷勤而公絕跡不往會韓侍郎鏞由河帥服闋韓遂  
授工部而公調禮部禮部公款微不克自給事則頗簡公以爲樂  
曰邦土之掌事本未諳今轉得自由也已酉扈從熱河 命視福  
建學臣辭日 上曰福建人文漸起不比往昔閩汝所和詩甚佳

彭元瑞曾在朕前保汝學問且在江西聲名亦好故令汝同彭元  
瑞胡高望覆閱四分全書想汝必加倍認真也回京遽奉母許太  
夫人諱益形困乏是冬族弟種之自河南學政任滿覆命上  
問劉躍雲是汝兄耶彼甚苦朕令爲福建學政今復丁憂奈何汝  
可往看之卽此足徵公之清節上孚帝謂矣壬子起補原官再  
典山東鄉試所得多寒畯又多老諸生人呼戒尺榜謂寒士皆以  
教書爲活也甲寅主江西試乙卯充會試副總裁以新進士覆試  
多疵卷又殿試卷祇八本可進呈有旨命與諸總裁明白陳  
奏公奏自矢無弊惟學問荒疎不能認真校閱致負聖恩乞從  
重治罪降補奉天府丞奉天士子不知誦五經公招書院諸生

晨夕課試習爲之變已未 今上親政入 覲時 詢知所以降  
官曰此和珅與汝不合施其術耳調補大理寺卿旋授禮部侍郎  
凡陳奏部務輒蒙 嘉許然未嘗撫拾細故以見長謂我 朝法  
制詳備唯當率由舊章若輕議更張則利於此者恐或損於彼矣  
每遇 國家大典必參酌以求至當曹司因公錯誤得公指示多  
免譴責辛酉京師大水涉濟趨公寢受寒溼病由此基焉甲子調  
工部右侍郎兼署兵部左侍郎始買橫街屋以昌黎詩辛勤三十  
年以有此屋廬榜於室告其子曰吾他日罷官當售此爲南歸計  
也是歲 御門誤班降補閣學乙丑仍授兵部右侍郎轉左時足  
疾漸加兼患他證因奏乞假調理奉 旨以原官休致既歸無一



椽之居聞青浦某善醫遂僑寓吳門就診值家事拂逆病益劇馴至不起嗚呼當故輔枋國公卿輻輳其門至有稱門生屈膝者乃彼方引而近之此顧去之若浼非中有定識皜然不滓而能若是哉卒之 主鑿其介世仰其高亦可以無憾矣公詩宗香山眉山爲文好歸熙甫書不名一家而有天趣所著有貽拙齋詩文集若干卷生乾隆元年十二月二十二日卒嘉慶十三年十月初五日春秋七十有三配許夫人繼配張夫人子四逢嘉四品蔭生考授主簿逢慶山東試用府經歷逢春候選縣丞逢運兵馬司副指揮逢嘉逢春逢運俱前卒女三長適溧陽黃晉錫次字吳縣姜廷燦未嫁卒次適山西浮山張家本孫五承緒承綬承緯承綺承紱以

嘉慶二十二年四月丁丑葬於延政鄉史家邨之原余與公爲世  
姻在京師過從頗數自丙寅別吳門遂不復見而公之生平則固  
深悉也銘曰

峩峩相門爰作世臣允趾美兮射策上第躋於卿貳歷卅載兮眾  
所驚趨獨矢不渝大節砥兮史邨新阡堂斧翼然安厰止兮

右墓誌銘趙懷玉撰

國書刊行會  
新編

二

陸費墀

陸費墀浙江桐鄉人乾隆三十年南巡召試賜舉人授內閣中書三十一年進士改庶吉士三十四年散館授編修三十五年充順天鄉試同考官三十八年二月命儒臣校覈明代永樂大典詔求天下遺書開四庫全書館選翰林官專司纂輯以墀充總校官十月充日講起居注官三十九年諭曰編修陸費墀承辦四庫全書並薈要處繕錄之事一切綜覈稽查頗能實心勤勉且其學問亦優加恩以待讀升用四十年擢侍讀學士尋升少詹事四十一年充文淵閣直閣事四十三年以纂辦各書均能出力賞緞匹荷包筆墨紙硯等物四十五年武英殿遺失四庫全書

底本三十餘種經總裁吏部左侍郎王杰奏參 上以堦專司提  
調前後數年事出一手 命解任審訊嗣查明實因書卷浩繁收  
發不清所致別無情弊得 旨開復仍下部議處尋議降一級准  
其抵銷九月 上以歷代官制沿革不一有今古異名而職司無  
異或古有其官今無其官古無其官今有其官 命纂歷代職官  
表一書堦偕內閣學士紀昀光祿寺卿陸錫熊翰林院編修孫士  
毅等總其事四十七年七月擢內閣學士兼禮部侍郎銜十月以  
四庫全書內語有悖謬未經改正下部議處尋議降一級畱任四  
十八年以母年九十奏懇給假回籍省視 上允所請並 賜堦  
母 御書扁額四十九年正月擢禮部右侍郎二月 命充四庫

全書館副總裁官十一月充經筵講官五十年仍充文淵閣直閣  
事五十一年轉左侍郎尋丁母憂五十二年正月以續繕三分書  
內有悖妄不經之語墀在館時未經奏請銷燬下部嚴議部議革  
職 上改爲補官日革職畱任六月 上以四庫全書譌謬甚多  
命大學士九卿等覆加詳閱尋奏書中有違礙諸說未經刪削  
且有連篇累牘脫空無字者請將承辦各員懲處 諭曰辦理四  
庫全書係總纂紀昀陸錫熊總校陸費墀專司其事朕因該員等  
纂輯訂正著有微勞不次超擢晉階卿貳乃所辦書籍如此荒謬  
舛錯咎無可辭陸費墀本係武英殿提調復充總校所有四庫全  
書伊一人實始終其事而其洊升侍郎受恩尤重較之紀昀陸錫

熊其咎亦更重見在續辦三分書應發文瀾文匯文宗三閣陳設者所有面葉裝訂木匣刻字等項俱著陸費墀自出己資罰賠辦理以示懲儆而服眾心仍下部嚴議尋照部議革職五十五年九月卒十月諭曰陸費墀本係寒士家無擔石向在于敏中處藉館爲業諒不過千金產業耳今所辦三閣書匣等項及繳出罰銀一萬兩計其家資已不下二三萬若非從前在四庫館提調任內苞苴餽送何以有此多資見在陸費墀業已身故所有插架裝匣等事若令伊子接辦恐未能諳習且身後所遺家業想已無多亦難措辦此時三分書俱已校對完竣自應全行發往三處藏弄未便稽延著傳諭海凝全德卽做照前次發去裝潢書匣等式樣製

造專派妥商辦理並著海凝查明陸費墀原籍見有書房產業加  
恩酌畱一千兩之數爲伊家屬養贍如尙有餘資卽作爲三閣辦  
書之用子鑿福建建陽縣知縣元鑽直隸天津縣知縣孫琮湖南  
巡撫緣案革職

右 國史館本傳



國朝詩集卷之九

九

一

王懿修 子宗誠

王懿修安徽青陽人乾隆三十一年進士改庶吉士三十四年散館授職編修三十六年正月入直上書房六月充陝西鄉試副考官三十七年充會試同考官三十九年京察一等五月充廣東鄉試正考官尋提督廣西學政四十四年充順天鄉試同考官四十五年京察一等六月充江西鄉試正考官十一月升國子監司業四十六年二月擢翰林院侍講三月轉侍讀十二月遷侍講學士四十七年充日講起居注官四十八年五月充廣東鄉試正考官旋提督湖北學政四十九年轉侍讀學士五十三年遷詹事府少詹事五十四年因病告假回籍五十五年丁父憂尋丁母憂五十

七年服闋赴京候補旋以舊病復發請假嘉慶元年正月 高宗  
純皇帝舉行千叟宴懿修與焉並 賜御製詩刻玉杖文綺等件  
七年正月病痊二月補通政使司副使五月升光祿寺卿八月擢  
內閣學士兼禮部侍郎八年補禮部右侍郎十二月提督順天學  
政尋轉左侍郎十年五月擢都察院左都御史 命回京供職閏  
六月授禮部尚書十一年三月會議 皇子婚禮請將舊例執事  
酌量加增並請比照親王之例增設 皇子儀衛一分於成婚迎  
娶時陳設導引禮成後由鑾儀衛另庫收貯 上以所議大謬交  
部議處尋議罰俸一年十一月奉 命在紫禁城騎馬十二月充  
經筵講官十二年九月管理戶部三庫事務十月充上書房總師

傅 上以懿修在本部有應辦事務不能逐日到直 命於辦理部務餘暇遇便進內不必拘定日期時刻無庸登註門單所有上書房功課責令留心查察遇有應奏事件隨時奏聞如有怠惰曠誤者卽據實劾奏十三年四月充殿試讀卷官尋奏病後氣體虛弱請暫行開缺 諭曰王懿修前因感受暑證業經兩次給假並遣醫前往診視茲據稱患病已痊惟氣體尙形軟弱自須從容調攝伊所管禮部本簡著毋庸開缺亦不必畫彙辦事惟當安心靜養俾病體漸就強健再行奏請銷假九月病痊十四年正月恭遇五旬萬壽慶典 上以懿修在上書房行走有年加太子少保銜三月充會試正總裁官十五年以上書房師傅周系英果齊斯歡

秦承業二人同日俱未入直分別降調罰俸 諭曰王懿修係屬  
總師傅本應議處念其年力已邁著加恩寬免處分不必在上書  
房行走十六年充殿試讀卷官十八年 上以懿修年力衰頽命  
原品休致二十年二月懿修八十五生辰 特賚如意文綺筆墨等  
件命戶部右侍郎成格齋往懿修敬詣隆宗門叩謝適 上出御  
經筵解 御佩荷囊賜之二十一年卒 諭曰原品休致禮部尙  
書王懿修學問素優前在上書房授慶郡王永璘書行走有年持  
躬端謹嗣洊擢正卿壽逾八秩茲聞溘逝殊堪軫惜著派慶郡王  
永璘前往賜奠茶酒仍照尙書例賜卹所有應得卹典該部察例  
具奏尋 賜祭葬如例諡文僖子宗誠乾隆五十五年一甲三名

進士見官禮部侍郎孫元林二品廕生兵部候補主事

右 國史館本傳

王宗誠

道光八年平西域功成 皇帝臨午門受俘兵部尚書以組縛逆酋生獻闕下萬眾爭覩驚歎而青陽王公適掌兵部禮成得越等褒賞公供職益虔久不懈 上亦倚畀不輕改他職任兵部尚書凡十六年道光十七年正月薨於位 天子震悼 詔以清勤端謹克盡厥職褒之 賜祭葬如禮子元榜乃以公狀屬恩澤爲之銘用不敢辭公諱宗誠字中孚又字蓮府青陽王文僖公子也母阮太夫人以乾隆戊申年中順天鄉試舉人庚戌成進士 賜

及第第三人授編修歷任禮部侍郎署工部侍郎工部尚書終兵部尚書 誥授光祿大夫經筵講官 賜紫禁城騎馬當 純皇帝 睿皇帝時嘗屢爲雲南四川陝甘省鄉試主考官會試同考官及文武會試總裁於河南山東江西皆久任學政及 今上卽位時閱 殿試 朝考散館卷凡數科門下士旣多貴顯矣而公又少年早取科第文僖公官禮部侍郎公已爲侍講學士同扈蹕東巡 睿皇帝幸翰林院父子同席 賜宴和詩 純皇帝實錄成公以詹事爲纂修 賜宴禮部而文僖公官尚書爲主席後文僖公以年引退公又相繼入直上書房 奎章珍器 賞賜重疊其一家父子極文臣眷顧之厚蓋同時所無雖 睿皇帝亦嘉

歎其兩世知遇忠謹自將時發 天音而垂 清問也而公謙牧  
自處接同官及舊嫻疏友寒峻後輩皆自居敵以下不敢與鈞禮  
後進見公或避去不敢當公之謙挹自少至老未嘗一出言一舉  
足失先於人任學政優禮愛士然遇奸弊事必發抉不稍授顏面  
畱根蔓居京師其宅當冠蓋衝衢車轍皆過不畱無謁以私者其  
嚴介不苟如是而人皆習其和而忘其峻昔班固以道德之士皆  
出於史官知秉要執本清虛以自守卑弱以自持合於易之謙  
一謙而四益者此特公之跡耳恩澤自通籍時卽受知文僖公與  
公至款曲每以禮謁文僖公公必衣冠侍文僖公卽正容悟物之  
萬石君也而公則舉策數馬之太僕矣自其學以孝謹著世躋高



顯凡鄉里稱篤行者鮮不以名父子爲首稱焉其他嘉言善行施乎家及乎朋友故舊尤人所易知者不具載也公生於乾隆二十年四月二十六日薨於道光十七年正月十二日年七十有四配江夫人繼配翁夫人大興翁學士方綱女皆先公卒子元林廕戶部主事及三子元栻太學生四子元琛皆早卒今官刑部員外郎者爲次子元榜女三適上海趙榮貴州邱煌上元董斯廣以某年月日葬公於某鄉某原銘曰

九乳垂天作鎮青陽歸神於公父子正卿公逢福世粥粥日晦植棟如林不私一士高門峻城奸莫敢攀惟其和光不怨而慚用承天寵保世禔躬哀榮之典以奠幽宮

右墓誌銘程恩澤撰

明倫彙編家範典

二

日本書紀卷之六十一 孝德天皇本紀第十一 孝德天皇二十一年

三

尹壯圖

尹壯圖雲南蒙自人乾隆三十一年進士改庶吉士三十九年五月遷禮部郎中十一月授江南道御史四十二年轉京畿道御史四十四年十月擢光祿寺少卿十二月遷太僕寺少卿四十五年擢內閣學士兼禮部侍郎四十八年充順天鄉試副考官五十二年丁父憂五十五年服闋補授原職十一月奏言督撫自蹈愆尤聖恩不卽加之罷斥罰銀數萬兩充公因有督撫等自請認罰銀若干萬兩者在桀驁之督撫藉口以快其饕餮之私卽清廉自矢者不得不望屬員之仗助日後遇有虧空營私重案不容不曲爲庇護是罰銀雖嚴不惟無以動其愧懼之心且潛生其玩易之

念請永停罰銀之例如才具平常者或卽罷斥或用京職毋許再膺外任 諭曰尹壯圖奏請將罰銀之例永遠停止固屬不爲無見不知朕之督撫皆因一時無人往往棄瑕錄用量予從寬卽或議繳罰項皆畱爲地方工程公用亦以督撫等祿入豐腴而所獲之咎尙非法所難宥是以酌量議罰用示薄懲但督撫等或有昧良負恩之人以措辦官項爲辭需索屬員派令伙助而屬員亦藉此斂派以爲逢迎上司之地此等情弊不能保其必無尹壯圖旣爲此奏自必確有見聞今祇係空言並無左證著將所指督撫何人逢迎上司者何人藉端勒派致有虧空庫項者何人指實奏參朕必嚴加訊究重治其罪尹壯圖不得以風聞取譽也壯圖覆奏

各督撫聲名狼籍吏治廢弛臣經過地方體察官吏賢否商民半皆蹙額興歎各省風氣大抵皆然若勒派逢迎之人彼上司屬員授受時外間豈能得見請旨簡派滿洲大臣同臣往各省密查虧空諭曰尹壯圖覆奏朕披覽再三並未指實一人一事仍係撫拾浮詞空言支飾至所稱經過之直隸山東河南湖廣江西廣西貴州雲南等省商民蹙額興歎其意竟似居今之世民不堪命矣此係聞白何人於何處見此情狀又請簡派滿洲大臣同伊密往各省盤查虧空不但無此政體卽偶有虧缺之處一聞欽差信息早已設法彌縫尹壯圖亦知事有難行不過欲藉此奏見長或幸邀錄用此等居心豈能逃朕洞鑒著將所奏逐一指實覆奏不

國朝通志卷之九十一  
三  
可徒以空言無實自蹈欺罔之咎也尋壯圖覆奏自認措詞失當不能指出確據并請治罪上命戶部侍郎慶成帶同壯圖往山西盤查虧空諭曰尹壯圖逞臆妄言陳奏不實自問亦難解免今已令侍郎慶成帶伊前往所指書麟管轄之山西切實盤查若果有虧缺卽當嚴行究辦若毫無虧缺則是尹壯圖以捕風捉影之談爲沽譽邀名之舉不但誣地方官以貪污之罪並將天下億兆民人感戴真誠全爲泯沒試令尹壯圖清夜捫心亦何忍爲此耶著將尹壯圖莠言亂政之處通諭知之十二月慶成奏查明山西大同府及藩庫無虧復據壯圖奏親自盤查不能指出虧空確據請回京治罪上以壯圖陳奏不實切責之命慶成帶同壯

圖再赴直隸及山東江南逐加盤查慶成奏查正定府倉庫及直隸藩庫均無虧缺只在查過兩省其大小官吏並無賸民斂怨之處諭曰尹壯圖來往山西直隸卽日又須往山東江南等省所過地方甚多小民有無燧額之狀興嘆之語著尹壯圖於途中體察諮詢據實具奏五十六年正月慶成奏查山東省之蘭山縣及江南省之山陽倉庫存貯齊全仍帶同尹壯圖前往江蘇盤查並據壯圖奏經過各州縣地方百姓俱極安帖隨處體察毫無興歎情事諭曰尹壯圖前奏所言商民燧額興歎竟屬全無影響今已目擊商民樂業情形自不能復置一詞但伊從前所聞得自何人傳說著慶成卽向尹壯圖確切詢明令其指實具奏慶成奏傳



旨向尹壯圖確詢商民蹙頞與歎究係何處令其指實具奏二  
三人不可含糊支飾據尹壯圖覆稱回籍所過之處所見之人因  
不知其姓名並不記是何州縣地方不敢妄指只求治以虛誑之  
罪又據慶成奏江蘇藩庫完足卽日帶同尹壯圖起程回京候  
旨 諭曰尹壯圖節次覆奏總不能指實一人一事因令慶成帶  
赴山西直隸山東江南等省盤查倉庫俱無虧短是尹壯圖逞臆  
妄言竟敢以不能記憶虛詞有心欺罔其咎實無可寬宥尹壯圖  
著革職交與慶成押帶來京交刑部治罪尋 命大學士九卿會  
同審訊論罪如律奏入 諭曰尹壯圖俯首認罪將飾詞妄奏各  
實情逐一供吐大學士九卿照挾詐欺公妄生異議律問擬斬決

在諸臣以尹壯圖如此乖謬不敬自應按律問擬卽不立真典刑亦當遣發伊犁以示懲儆然朕孜孜求治兢惕爲懷從前彭元瑞呈進古稀頌贊揚鴻業因作古稀說有以頌爲規之語今尹壯圖逞臆妄言亦不妨以謗爲規不值遽加之重罪也尹壯圖著加恩免其治罪以內閣侍讀用仍帶革職畱任八年無過方准開復五月諭曰尹壯圖前經降旨以內閣侍讀用但念員缺甚少補授無期著加恩以禮部主事用嗣因母老奉命歸養嘉慶四年正月諭曰前任內閣學士尹壯圖曾以各省倉庫多有虧缺藉詞彌補料層剝削以致生民受困之處具摺陳奏其事雖查無實據而所奏實非無因似此敢言之臣急宜錄用尹壯圖前以禮部主

事請假回籍苦宮綱傳知尹壯圖令其卽行來京候 旨擢用並  
著准其馳驛四月壯圖抵京具呈以母老乞 恩歸養 諭曰前  
因內閣學士尹壯圖曾奏各直省倉庫虧缺經派令慶成帶同尹  
壯圖前赴各省盤查彼時各該督撫等冀圖蒙蔽多係設法那移  
彌縫掩飾遂致尹壯圖以陳奏不實降調回籍此皆朕所深知是  
以令其馳驛來京另候擢用今尹壯圖於本日來京具摺謝恩據  
軍機王大臣面奏尹壯圖見有老母年逾八十等語尹壯圖籍隸  
雲南距京較遠旣難迎養若由京供職則伊母子萬里睽違朕心  
實有所不忍尹壯圖從前尚屬敢言著賞給給事中銜仍令馳驛  
回籍侍母他年再來京供職是月壯圖奏請清查各省陋規 諭

曰陋規一項原不應公然以此名目達於朕前但州縣於通都大邑差務較繁頗資民力皆係積習相沿不能一時槩行革除今若遽行明示科條則地方州縣或因辦公竭蹶設法病民滋事巧取其弊轉較向來陋規爲甚至分別二千以上至於數萬者畱半辦公其餘分幫衝途苦缺定爲成式是明導以取財之方流弊有不可勝言者尹壯圖所奏實不可行前已令其回籍侍養著賞給伊母大緞二匹交尹壯圖帶回以示恩眷至尹壯圖見係給事中銜准其在籍奏事所有呈遞奏摺卽交雲南巡撫轉遞但須擇緊要事件據實入告不得因有奏事之責遂爾挾制地方想尹壯圖亦不肖出此也七月壯圖抵滇具摺謝恩五年奏請慎拔真才以

國朝三才類卷第... 卷之...  
儲實用一嚴保舉處分以專責成也伏讀 上諭命在京王大臣  
各舉所知密爲陳奏誠操迪知忱恂之要但不嚴定賞罰章程誠  
恐保舉大臣不加慎重日久弊生轉啟揣摩鑽營之漸請 敕下  
吏部嚴定保舉處分所保得人不惜進賢上賞如所保之人有犯  
貪酷敗檢諸罪保舉者亦酌其情法輕重示罰俾諸大臣知信賞  
必罰不敢不十分慎重矣一科場防杜關節宜操其要害也鄉會  
試爲士子進身之階始若黃綠詭遇其出身先已不正安望異日  
克爲良臣比年雖嚴定科條總不能操其要害如闈中有通關節  
者名曰亮卷房考於閱卷時先將佳文壓住而以庸淺之卷故爲  
陪襯主司綜理全局往往易受其愚設主司偶向其房搜閱落卷

伊等咸以主司房考俱係 欽點不受節制往往曉曉爭執是以  
搜卷之例扞格難行請 敕下主司命房考於頭場正卷薦畢各  
將落卷送主司搜閱儻得佳文卽發監試補印薦條如有爭執監  
試將兩造棄取之文進呈妍媸不難立辨矣請 敕下各省一體  
遵行一八旗人才宜廣爲鼓勵以儲實用也 國家任人圖政內  
而六部九卿外而督撫藩臬莫不滿漢兼用以成相維之勢而六  
部司員尤爲造就人才之藪乃漢司員分部及散館改部者將近  
百人而滿員寥寥無幾良由各部滿洲司員俱由本部筆帖式保  
題升用其中行走勤敏固不乏人但於彙案文義未能暢曉請  
敕下滿洲父兄嚴督子弟講習經書精通文理先於童試廣取生

員若干名鄉會試廣取舉人進士若干名庶分部學習不致乏人  
遇有郎中員外主事缺先儘科甲班挑補行之十年則八旗子弟  
明體達用之材當必較漢員爲更優矣 上命軍機大臣議奏尋  
覆奏尹壯圖嚴定保舉章程及八旗六部司員先儘科甲之處均  
毋庸議惟房考落卷送主考搜閱事近可行請嗣後每科房考落  
卷交監試御史存貯送主考搜閱俟 命下載入科場條例 諭  
曰此次密保人員其所保之人將來如有貪酷枉法情事經朕指  
出自應交部嚴議本有成例可循若果有出色人員建樹功績必  
將保舉人員重加優獎權衡出自朕裁其主考披閱落卷議令各  
房落卷由監試御史交准著禮部載入科場條例至滿洲素以騎

射清語爲重卽隨時訓諭亦恐未臻諳熟若保題各缺皆由科甲  
之人是令其專攻舉業更致拋荒本務轉非造就滿洲人才之意  
自應循照舊例毋庸另立科條六年雲南巡撫初彭齡陳請歸養  
尹壯圖奏初彭齡在滇清介率屬實惠在民能假以歲月則滇民  
元氣可望其復若令其恩恩去任殊失赤子之望又奏滿洲子弟  
宜於十五六歲以前專責以熟讀經書講明義理俟心性融澈精  
力完固後再責以騎射繙譯更易爲力 諭曰尹壯圖欲留初彭  
齡在滇勿令歸養試思尹壯圖亦因母老回籍侍養獨不念初彭  
齡雙親年邁而轉拂其孝養之忱乎又另摺奏滿洲子弟繙譯一  
道必先通曉漢文易於明透伊並不知清文義理爲此暫論況國



語本應不學而能而騎射亦須童年練習若如尹壯圖所言必俟  
十五六歲以後始行學習安能精熟尹壯圖令其在籍奏事原爲  
該地方官吏或有廢弛貪黷之事伊等密陳乃竟欲干涉朕  
用人大權並將從前具奏滿洲讀書應試曾經駁飭之事復行瀆  
陳更張本朝成法本應治以妄言之罪但朕正當求言之際從不  
旨以言罪人著伊桑阿將原摺擲還並傳旨嚴行申飭此後遇有  
地方不公不法事件仍准其具摺密陳八年閏二月奏言天下之  
大萬幾之繁皆係 皇上一人獨理而內外諸臣俱不過浮沈旅  
進旅退之中無一人能匡扶弼亮請於內之卿貳翰詹科道外之  
藩臬道府慎選二十人輪直 內廷將每日奏章 諭旨於進

呈後盡心檢校然後發鈔有疎忽偏倚之處許其就近詳辨可否  
諭曰尹壯圖所言皆迂闊紕謬斷不可行朕宵旰憂勤每日召  
見諸臣不獨內而卿貳外而督撫卽翰詹科道藩臬道府無不一  
體召對令伊等據實敷陳有所裨益若如尹壯圖所奏欲於內外  
諸臣中另選二十人輪直檢校奏章諭旨是直於軍機大臣之外  
添設一內軍機成何政體尹壯圖籍隸雲南近日如藩司陳孝昇  
道員薩榮安冒銷軍需款項劣蹟顯然伊近在本省豈無風聞今  
經署巡撫初彭齡參出究辦而伊竟無一言奏及著那彥寶傳到  
尹壯圖面加訊問因何不將陳孝昇等列款奏參之處據實明白  
登覆繕摺交那彥寶代行陳遞三月署雲南巡撫那彥寶奏傳

旨尚問書情節尹壯圖自認糊塗冒昧並據壯圖覆奏請交部議處諭曰尹壯圖前奏迂闊紕謬經朕逐一指實伊已自認糊塗冒昧至尹壯圖見在雲南省城課士於陳孝昇薩榮安各劣蹟豈無風聞今經詰問乃以不得確據爲詞亦屬強爲支飾但伊非見任官員所有自請交部議處之處姑加恩寬免著永保傳旨申飭嗣後遇有緊要事件仍准其具摺陳遞十三年閏五月卒十八年雲南巡撫孫玉庭奏請入祀鄉賢祠得旨俞允子佩珩見任戶部主事

古 國史館本傳

尹開學壯圖雲南蒙自人咸內茂進士久歷部曹始游至內閣學

士時和相專擅於內福文襄豪縱於外天下督撫習爲奢侈因之  
庫藏空虛民業凋敝公夙知其弊故上疏詳之 純皇帝爲之動  
色和相忌公所爲因奏卽 命公馳傳普查天下府庫虧空而令  
侍郎慶成監之慶固貪酷者每至省會初不急爲盤查而先遊宴  
終日惟公枯坐館舍舉動輒爲掣肘待其庫藏那移滿數然後啟  
庫樞對故初無虧絀者慶以公妄言劾之降爲主事公卽告終養  
歸當其草疏夜秉燭危坐竟夕鈔錄其弟英圖代爲之危屢闕其  
戶公笑曰汝照常困眠不必代兄憂慮區區頭早懸之都市矣汝  
代余養老親之天年可也其忠鯁也如此 今上卽位召之入都  
溫諭久之加給事中銜以其親老 命乘傳歸復與奏摺匣鑰令

其遇事條奏久之乃卒

右錄宗室昭棟撰

姜晟

姜晟江蘇元和人乾隆三十一年進士授刑部主事洵升郎中三十六年丁父憂服闋補貴州司郎中四十一年擢光祿寺少卿四十二年擢太僕寺少卿仍兼刑部行走四十四年授江西按察使四十五年擢刑部右侍郎四十七年轉左侍郎四十八年十一月奉命赴直隸會同總督劉峩鞫魏玉凱控南宮縣民李在仁傳習邪教案赴山東鞫王慎典控鄆城官役藉差濫派案並得實以聞嗣以審辦尙書額駙福隆安家人富禮善命案未能究出頂兇實情降三品頂帶革職兩任四十九年正月赴湖北鞫徐萬年控伊兄徐萬全被傷身死案得實九月以秋讞妥協 特旨復還

原品頂帶五十年二月赴江西鞫鉛山縣隸役冒考案並赴湖北  
鞫雲夢縣倉書苛徵勒派孝感縣客民江雲漢違例盜葬等案九  
月赴直隸永平鞫鄧甫清被責身死案旋以在刑部審訊海昇致  
死伊妻吳雅氏裝點自縊一案檢驗傷痕失實奉 旨降四品頂  
帶革職畱任五十一年秋讞覈議妥協奉 旨復還原品頂帶是  
年二月偕尙書曹文植赴浙江盤查倉庫虛實會勘海塘應否修  
築事宜並赴江南鞫盱眙縣書吏侵用籽種口糧案十二月赴山  
西代州鞫孟本城被誣殺人案雪其冤五十二年三月充會試副  
考官旋授湖北巡撫時臺灣勦辦逆匪偕總督舒常奏動支倉穀  
碾米十萬石由長江順流出口海運達閩以濟軍需 上嘉晟不

分畛域先事預籌交部議敘五十三年六月荆江水漲決隄府城  
被淹 上命大學士阿桂侍郎德成勘係江面窄金洲漲沙偪漚  
以致上游壅高所潰決晟到任一年未能體訪籌辦荆州被水時  
監犯不帶刑具致有隨水漂散者又以淮商鹽引在楚省積壓由  
地方官需索匪費未經查參奉 旨嚴議革去頂帶尋授刑部左  
侍郎十二月赴直隸鞫交河縣甲長劉東山誣報漏稅案 賞還  
原品頂帶五十四年充殿試讀卷官五十五年充會試知貢舉殿  
試讀卷官屢奉 命鞫直隸宣化縣鋪戶常懷恆竇坻縣民劉玉  
先控案五十六年四月授湖南巡撫時芷江縣境餉鞘被竊案懸  
未定晟抵任拏獲正犯唐占哇起出原贓奉 旨交部議敘旋以



錯擬夥犯唐開泰等罪名部議降二級調用奉 旨從寬改爲革職畱任五十七年二月奉 命赴雲南鞫民人邢耀空控謀占家產案並貴州民人楊秀錦控折色加徵案鞫實報 聞六十年正月楚苗石三保句合黔苗石柳鄧叛陷松桃永綏等廳晟檄提督劉君輔帶兵勦辦自駐辰州儲備軍械糧餉添設運道臺站派兵於保靖瀘溪等處要隘堵禦搜獲奸匪百戶楊國安楊清父子解京 上以晟籌辦軍務秩然有序鎮靜得宜交部議敘三月自辰州馳赴鎮筸稽查邊備撫恤難民 諭以辰州地方緊要仍令回辰州督率經理旋奉 旨賞戴花翎十月首逆吳半生就擒 恩予優敘嘉慶元年二月湖北枝江來鳳等縣邪匪滋事晟飛飭地

方文武先期團練堵截賊果有犯湖南龍山縣境者副將慶溥截殺千餘名偪回來鳳賊遂不敢復窺湖南五月逆苗石三保就擒石柳鄧尙踞平隴總統福康安和琳先後病卒晟卽馳赴軍營偕都統額勒登保護軍統領德楞泰督辦剿撫諸務時降苗人數眾多諭姜晟妥爲安置因奏言苗匪真心投順者固多而其中先經糾結抗拒及見官兵攻剿緊急自知無路求生始行乞命並願縛獻首賊希圖免罪邀賞將來剿捕事竣自應酌量移徙以杜萌孽復生見在剿捕緊急之時未便預行洩露致令先生疑慮上是之九月諭曰姜晟見在軍營幫同辦理著卽賞給總督銜以資彈壓晟偕額勒登保等四路合兵攻克黃土坡社神堂等處木

城石卡抵山家坳直逼平隴賊巢 上又命將軍明亮提督鄂輝  
馳往會剿連克嚴人坡養牛塘等險要賊卡十一月克平隴擒吳  
老華疊 賞玉韞荷囊煙壺等件有差十二月官兵殲斃石柳鄧  
於黃魚坡晟自軍營回長州籌辦善後事宜二年正月奏請安插  
降苗展賑復業民人清釐軍需並因貴州南籠狃苗滋事以楚省  
撤回官兵移黔協剿均得 旨俞允七月兼署湖廣總督九月官  
兵盡殲恩施利川等縣邪匪並擒獲習教匪徒郭貴山等八十餘  
名 優旨獎賞三年二月京察交部議敘八月監臨鄉試榜發訪  
聞榜首傅晉賢闕墨係彭玳原卷究出書吏勾串掉卷中式各情  
弊自請交部嚴議嗣奉 旨姜晟據實查辦其咎尚可稍寬著改

爲革職從寬兩任四年四月布政使鄭原璣加扣平餘事發晟奉  
命研究得實並自請交部嚴議部議降三級革任 諭曰姜晟  
平日居官聲名尙好且辦理軍務亦有勞績從寬免其革任七月  
永順被水晟馳往撫恤並奏請籌撤苗疆防兵及酌移兵糧更調  
營汛修建乾州鳳凰廳城垣 從之十月奉 命赴湖北審辦監  
利安陸兩縣控案會鎮鎮右營舊司坪曬金塘一帶有逆苗吳  
陳受率眾撲卡事 諭晟速赴鎮鎮辦務獲首犯正法嚴堵卡  
界勿使逸入內地亦不必深入苗境十一月晟偕提督王柄總兵  
富志那分派兵勇五股安設要隘互爲聲援飭鳳凰廳同知傅鼎  
以計擒斬吳陳受事定奏入 諭曰吳陳受糾合眾匪搶奪滋事

實屬不法經姜晟帶兵馳赴該處會同王柄等一面示以兵威一面傳集苗弁面加曉諭苗眾畏懼遞呈求赦該督等卽傳集眾苗將爲首糾眾攻卡之吳陳受一犯擒縛按律凌遲處死梟示餘匪釋令回寨辦理妥協實屬可嘉姜晟著加太子少保銜仍交部從優議敘五年正月擢湖廣總督十月調直隸總督仍畱楚督辦軍需清釐積案六年二月旋直隸任六月京師霍雨爲災永定河漫口四處盧溝橋東西隄岸衝塌姜晟奏報延緩奉 旨逮問 諭曰京城自六月朔日起大雨五日四夜水勢驟漲節經朕派令乾清門侍衛等馳赴城外查勘被水情形設法將各路軍報齎遞又命眾卿員分路查災眾臣均能奔走不辭勞瘁而自初一日至初

八日地方大吏尙無音信殊出情理之外及本日姜晟奏到一摺  
祇據河道稟報內稱本年永定河河流未斷汛前節次長水實爲  
嘉兆又稱大雨滂沛田禾尙無妨礙真如在夢中矣姜晟辜恩尸  
位昏愎錯亂此而不加懲辦何以整飭官聯姜晟著革職拏問解  
交軍機處會同刑部嚴審具奏經部議發往軍臺奉 旨改發永  
定河工次效力九月工竣 賞主事銜刑部行走七年五月 命  
以刑部員外郎用八月 賞四品頂帶授刑部右侍郎十月 命  
赴江西鞠巡撫張誠基冒功案卽署江西巡撫嗣以湖南軍需報  
銷事竣 賞還二品頂帶八年正月回京轉刑部左侍郎九年六  
月兼署戶部左侍郎七月調署戶部右侍郎九月 上以江南清

口淤淺有礙運道 命晟查勘晟馳詣清江浦會同總督陳大文  
河督吳璥徐端勘明河口受病之故由河身淤墊黃水增高清水  
不能暢注致形阻遏因啟放祥符五瑞等閘以減黃添築運口蓋  
壩以蓄清并刻期挑濬引河運道通暢十月擢刑部尙書 賜紫  
禁城騎馬十一月奏回空糧艘婦數渡黃卽赴江甯會鞫江西民  
人熊明中控朱暉光奪地釀命案因乞假回籍省墓 允之十年  
四月回京供職十一年四月以老疾乞假調養六月奏懇開缺  
諭曰姜晟風溼舊疾復發先後賞假調理尙未就痊茲奏請開缺  
情詞懇切因思刑部爲刑名總匯事務殷繁姜晟年逾八十卽調  
理就痊於綜覈獄訟精神亦難周到著調補工部尙書仍加恩

賞假數月在家安心醫治俟病愈再行供職八月復奏懇開缺  
諭曰姜晟數歷中外四十餘年茲因部務緊要未能刻期就愈懇  
請出於至誠著准其開缺仍令在京安心調治俟伊全愈再行賞  
給差使九月以直隸總督任內失察藩庫虛收銀兩部議革職奉  
旨姜晟僅止失察情節較輕著加恩俟病痊以四品京堂補用  
先賞給四品頂帶十二年六月陳情乞休奉 旨准其以原四品  
京堂休致回籍十五年四月卒子廷燦見任安徽候補通判廷輿  
河南試用通判

右 國史館本傳

公諱晟字光宇號杜蘼又號度香江蘇元和縣人以諸生中乾隆



己卯順天榜副貢壬午順天舉人丙戌進士授刑部主事游歷員外郎中太僕寺少卿 四按察使擢刑部侍郎外任湖北湖南巡撫兩湖直隸總督內擢刑部尙書調工部尙書以疾乞歸嘉慶十五年四月十六日卒於里第距生雍正八年正月五日享年八十有一按譜姜氏在元末有名義者始徙居山東萊陽縣公之五世祖瀉里明季以諸生殉難高祖採明禮科給事中言事謫宣州衛明亡偕弟垓流寓於吳所稱二姜先生者也其後遂爲吳人曾祖諱實節祖諱本仔吳縣學生父諱震金山衛學生湖北施南府通判三代皆以公貴 贈刑部侍郎公生而聰穎器宇闊達沈毅始仕刑部卽見重於諸城劉文正公毘陵錢文敏公其後受 高宗

純皇帝特達之知 今皇上老成之眷前後再由曹司長貳秋官  
掌律令凡數十年平亭庶獄輕重莫不悉當奉 命讞事直隸者  
九江南者三山東山西湖北雲南貴州四川皆二浙江江西河南  
盛京皆一疏雪冤滯四方服其公平而公亦嘗以歐陽子之文銘  
坐側治案牘無小大必盡心服念中夜不寐務得其情以明以慎  
又嘗奉命履勘南河濬治淤淺一充乾隆庚寅科順天鄉試同考  
官一爲丁未科會試總裁官得士多至通顯而公預以文字決之  
公之巡撫湖南也當乾隆六十年黔省松桃廳苗人與湖南永綏  
廳苗相煽爲亂大兵雲集攻剿連年公往來於長州鎮筸聞支應  
糧料先事籌畫動合機要 特旨加總督銜 賞戴花翎洎統兵

大帥相繼病逝公身赴軍營與諸將協謀進討攻克社神堂等處  
賊寨擣其巢穴大蒙 褒賚加太子少保奏凱後公任善後之責  
撫綏降苗安其反側永奠邊圉厥功懋焉初任湖北巡撫時以江  
水大至壞荊州隄罷官仍授刑部侍郎其總督直隸也當嘉慶六  
年盛夏大雨竟一月永定河漫溢公以未能宣防 廷議當重譴  
上寬公使效力工次復授刑部主事不一載補刑部右侍郎九  
年調署戶部左侍郎兼管錢法堂事其冬遂授刑部尙書 賜紫  
禁城騎馬蓋公感 兩朝知遇之恩誓一心力以圖報稱而 上  
知公在督撫中有守有爲故旋斥而旋起 恩眷不少衰焉嘉慶  
十一年公以老疾屢疏乞退 上不忍公遽去而又念公老不欲

以劇務勞公 特調工部尙書賞假治疾其秋復瀝情奏懇 上  
始允公開缺 命乾清門侍衛慶裕馳驛自熱河回京帶同醫官  
診視有俟伊病痊再行賞給差使之 諭比回籍後又有汝病大  
愈仍可來京之 諭 上之惓惓於公者皆人臣難得之數非公  
之恪誠孚契何以致此哉公將歸時會有失察直隸藩庫書吏一  
案部議褫職奉 旨以僅止失察情節較輕病痊以四品京堂官  
補用世猶望公復起而公堅執初請乞休以去進退裕如寵榮兼  
備於 國家爲勞臣爲蓋臣生平行事具載 國史謹就譜所載  
撮其大者志之弗能詳也銘曰

虞臯周蘇漢有于公爰在 聖朝惟公媿隆武鈐戢暴經術擇上

內外攸宜惟所任使年登既耄歸於其鄉歿而祀社史乘垂光嘉  
匹同穴土潔草香惟筮之吉世以允昌

右墓誌銘許宗彥撰

傅森

傅森鈕祜祿氏滿洲鑲黃旗人由監生於乾隆三十一年考取內閣中書三十五年補缺四十四年升內閣侍讀四十五年京察一等引見奉旨記名因親老呈請畱京旋命在奏事處行走四十七年兼公中佐領五十三年奏事八年期滿仍回內閣侍讀任五十四年升內閣侍讀學士九月擢內閣學士五十六年授盛京工部侍郎五十八年四月奏盛京工部所屬四品官一員承辦永陵工程物料並兼辦城內各衙署歲修甃瓦銀兩之事祇設有領催八名幫同催辦伏思永陵工程最關緊要四品官自應常川在陵敬謹經理永陵距省二百餘里儻遇同時興工勢

難兼顧若竟將城內歲修銀兩委之領催承管不足以昭慎重仰懇將四品官屬下領催裁汰一名改設外郎佐辦差務以專責成奏入奉 旨允行五十九年調盛京刑部侍郎嘉慶元年七月因秋審錯擬情實部議降一級調用奉 旨改爲降三級留任二年正月調兵部左侍郎三月授公中佐領旋授正黃旗滿洲副都統閏六月奉 旨在軍機處學習行走十月調戶部右侍郎尋 命兼管光祿寺事務三年二月以內閣學士那彥成入軍機行走命傅森回戶部辦事是年京察奉 上諭傅森准其加一級四年正月轉戶部左侍郎旋調刑部左侍郎二月調鑲黃旗滿洲副都統又調倉場侍郎三月奏以京通十五倉向例每年各倉以料道

一員稽察由都察院將科道各員帶領引見 欽派分倉往查  
一年期滿會同倉場衙門將各倉米石收放數目咨部彙覈具題  
後再行更換乾隆五十九年戶部改議由都察院自行掣籤科道  
按月一倉一員監放在輪放米石之科道不過催令依期放竣其  
每倉放米若干新陳存米若干及該倉是否遵照戶部指定廩坐  
開放之處槩不能稽覈而監督等因無定員巡視遂致通融私開  
廩坐出放米色不勻倉場侍郎在通州兌運南糧勢難按期赴各  
倉分查應請循照舊例簡放十五員分倉稽察其每季關領俸米  
甲米及發交五城出糶土米均令隨時監放至每年由通運京之  
新糧一併查覈各倉以免臨期那移偷漏得旨允行是月授都



國朝典章類行不詳  
察院左都御史五月授兵部尚書旋授鑲藍旗蒙古都統七月授  
總管內務府大臣八月調鑲紅旗漢軍都統十月復 命在軍機  
處行走 恩賜紫禁城騎馬授崇文門副監督五年二月奏請派  
員出洋嚴禁代巡以統巡一官乃總兵專責儻遇事故以副將代  
巡尙屬可行今或以參將遊擊代之且以千總代參遊以把總外  
委代都守甚至以巡哨兵丁代千總及遇失事參送職名又係代  
巡之員請嗣後以總兵爲總巡偶遇事故以副將代之其餘不准  
轉代至派員出洋亦以副參遊爲總巡以都司守備爲分巡均令  
親身出洋不准代替奉 上諭著通諭沿海省分各督撫嗣後不  
得濫行代替以杜借端規避之弊三月 命偕晉昌往盛京查辦

事件盛京將軍衙門私添番役索詐辦理裁革一案因言番役一項藉資緝捕請仍照舊額補二十名應用奉 旨著照所請於州縣保甲中擇其循謹畏法挑補二十名以資巡緝此外不得私有增添又奏提訊奉天府尹恩明家人烏春及太監馬德慶於盛京地方沿途需索使費一案請將烏春擬徒在犯事地方柳號一月示眾奉 上諭所辦尙是惟馬德慶與烏春厥罪維均何以不將伊一同柳號未免輕縱又奏審訊委員恆福等查勘牛莊葦塘捏指界址隨意繪圖呈覆一案分別酌定斷結恆福等請交部嚴加議處奉 旨此案張耀所控牛莊葦塘情節從前審辦各員因無四柱冊檔並不妥爲查辦以致日久不能斷結今經傅森晉昌等

將鹽廠界址逐加丈量繪圖呈覽酌定地方以免牽混卽著照所  
請辦理七月調鑲藍旗滿洲都統 賞戴花翎八月因葉縣擒獲  
首逆邪匪劉之協奉 旨加軍功一級紀錄三次九月管理戶部  
三庫事務十一月因奉 旨議奏京營總兵移駐事宜錯誤交部  
嚴加議處六年正月調戶部尙書旋患病 賞假調理二月卒奉  
上諭戶部尙書傅森在軍機處行走謹慎小心黽勉供職前月  
染患痰證賞假調治曾派乾清門侍衛軍機章京等帶同太醫屢  
往診視并賜內府丸藥方冀日就全愈今聞溘逝殊堪軫惜著派  
軍機章京玉甯前往賞給陀羅經被所有應得卹典該衙門察例  
具奏其任內降罰處分俱著加恩開復又 諭尙書傅森見在溘

逝遺子英林甫及五歲並無差使著賞給護軍錢糧傅森之姪福  
克精阿前任銀庫迴避調轉尙未得缺著仍作爲銀庫員外郎行  
走遇缺卽補

右 國史館本傳

四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

鄧文泮

鄧文泮號筆山湖南湘鄉人乾隆三十一年丙戌進士授檢討改御史有直聲庚寅典試四川門下士多致顯秩父崇鑄以迎養在京得與千叟宴晉鴻臚寺卿卒於官

右述聞謹瑤錄

A large rectangular table with 10 empty vertical columns and a thick black border. The table is oriented vertically on the page. The columns are of equal width and are completely empty. There is a small, dark, irregular mark on the right edge of the table, approximately halfway down.

146-552

國朝耆獻類徵初編卷九十九目錄

卿貳五十九

王汝璧

陳桂森

英善

阿必達

穆克登額

多永武

江蘭

廣泰

伍彌烏遜

陳嗣龍

劉湄

劉斌

伊朝棟

羅國俊

補錄

伊朝棟



阿含部經目録卷之九

國朝書獻類徵初編卷九十九

通奉大夫前署江西巡撫江西布政使司布政使湘陰李桓輯  
鄉貳五十九

王汝璧

王汝璧四川銅梁人乾隆三十一年成進士分吏部學習三十六  
年正月補主事十一月升員外郎三十八年截取記名以繁缺知  
府用四十年四月升禮部郎中經吏部奏畱八月補吏部郎中四  
十四年丁憂回籍四十七年服闋四十八年七月仍補吏部郎中  
八月授直隸順德府知府四十九年調保定府知府五十五年因  
承審直隸建昌縣盜犯馬十等行劫錢鋪一案經巡視西城御史

竊獲隨同行劫之王二入奏 諭將獲犯馬十解交軍機大臣嚴  
加審訊並以王汝璧於劫盜重情接到委牌案懸多時並不親提  
訊究其不是更大著歸案質訊旋經審明奉 旨革職發往軍臺  
效力尋蒙 恩准贖罪降補同知五十六年四月署宣化府同知  
五十八年三月授正定府知府九月升大名道嘉慶四年二月升  
山東按察使十月會同布政使全保奏參德平縣知縣葉芳浮收  
漕糧釀成重案請將葉芳革職並自請處分奉 旨交部議處  
諭曰此案重大應一面親往查拏一面迅速馳奏乃僅照尋常事  
件用三百里驛遞遞到尤屬不知輕重緩急全保王汝璧俱係朕  
甫經擢用之人於地方要件何得疏玩若此著傳旨嚴行申飭嗣

經部議降二級調用奉 旨准抵銷五年閏四月遷江蘇布政使  
六年三月護理江蘇巡撫十二月授安徽巡撫七年五月奏潁州  
府地處省北邊境附府之阜陽縣幅員遼闊與豫省固始息縣新  
蔡項城沈邱五縣毗連犬牙交錯兩省奸匪逃竄最易潛匿查該  
縣驛口橋集水陸交通路徑錯雜應添設督捕同知一員專司緝  
捕并應酌設營汛移撥弁兵以資巡緝下部議行八月湖廣總督  
吳熊光等奏楚省應需兵米請於安徽湊足十萬石解楚接濟  
上以本年安省有缺雨之處糧食未必充裕 諭汝璧酌量情形  
或稍減數萬石亦無不可總須市價民食不致妨礙方爲妥善尋  
奏楚省軍需重大自當如數派撥惟是水次各屬本年缺雨之處

較多其存倉穀石似應酌量畱貯以備碾糶見在各屬糧價稍增亦不便再行採買致妨民食查嘉慶二年安徽省曾經碾米六萬石運解湖北今請照案碾動六萬石分起趕運所有減存米四萬石卽存畱各該縣借糶之用 上嘉之如所請行十月奏太湖縣續報成災地畝懇請一體緩徵並將勘報遲延之府縣請 旨議處 諭曰向來各督撫查辦災賑事宜於業經奏報後遇有續行查出災區往往迴護屬員稟報遲延之咎遂將小民病苦置之不問今王汝璧將勘報遲延之府縣據實奏參所辦甚是太湖縣知縣高董業及安慶府知府樊晉均著交部議處十二月因宿州匪徒戕官滋事帶兵馳辦尋奏勦辦淨盡將本標後起兵三百名先

行撤回歸伍 上是之八年閏二月 上以汝璧年力就衰改授  
內閣學士十二日授禮部右侍郎旋授安徽巡撫九年六月具題  
買補倉穀本內字句疎率交部議處八月奏請清查安徽省倉庫分  
別追補定限四年全行完補得 旨允行旋經藩司邵洪奏請展  
限六年復 諭汝璧妥爲籌酌九月覆奏彌補章程以各屬情形  
每年覈其盈餘節省彌補前奏定限四年實屬有贏無絀無須再  
爲寬限 上是之十二月授兵部左侍郎十年調補刑部右侍郎  
十一月因病請開缺 恩准回籍調理十一年七月卒

右 國史館本傳

王汝璧字鎮之銅梁人乾隆丙戌進士由吏部郎歷官至安徽巡

擬刑部侍郎著有銅梁山人集先生爲中安公中丞恕少子甫晬而孤家中落薪米仰母十指天姿穎異癖於書史涉獵浩博弱冠贅於嘉興錢氏外舅文端公深加器許每覽其少作歎曰老夫當讓此子出一頭地又曰老夫少年竟未能至是敷歷中外四十餘年率能於其職莅官不求赫赫之功而所至條理精密培養元氣去後常見思六十後以目疾乞休逾年卒京邸詩宗韓孟沈雄恣肆格高韻遠得雅人深致卓然爲蜀大宗

右 國朝全蜀詩鈔小傳孫桐生撰

陳桂森

乾隆五十四年秋值各省學政更代之期時方有以賄聞者 皇上諭大臣擇端方修潔之士以充其選於是 命大理寺少卿陳公視學廣東其冬十二月抵任十郡之士聞公至羣相告語以爲今而後無學者不得倖進懷才者不致阨塞矣自大府以下亦聞風傾慕敬禮有加明年二月公病中丞郭公來問疾見練幃布被出語其屬曰清操如此疇能及之踰月而公卒赴至家其友邵齊熊聞而太息謂斯人也而竟止於此乎蓋非徒爲吾黨惜也實爲天下惜之公諱桂森字和叔號耕巖曾祖佑先公諱某祖嗣初公諱某父整庵先生諱昌期以名諸生跬步不苟爲鄉黨所推重公



少有令譽試輒高等己卯舉於鄉丙戌成進士入翰林公起自單  
寒崖岸自峻未嘗一干謁當路而獨膺主知自翰林改御史轉  
給事中擢光祿少卿歷太常少卿遷大理少卿一爲正考官三爲  
同考官兩爲學政巡城巡倉者一巡漕者再皆出自特達之知  
非由大臣論薦公之在翰林也遇大比之年四方士子雲集都下  
有謁公者憚公清正不敢有所言潛置二百金於座下客去乃見  
立追還之亦不言其人其不惡而嚴有如此其視學陝甘也不收  
供應凡一切所需悉發官價或慮公貧乏解囊持贈以餽贖爲名  
卻之不可試畢屬其僚友歸之其廉而不劇有如此者其在御史  
也念僧道一途易匿姦宄五代時有罪人遁入緇流後被獲而形

容已毀無從識別令服舊時衣冠然後結正其罪於是有審給度牒之奏其巡視倉漕也深惡官吏蠅營狗苟務爲欺妄羸縮祇算私齋之多寡出入不憑計帳之盈虛乃嚴飭儉從不得交通屏除陋規謝絕餽遺事訖無敢以甘言嘗試者於是有倉儲漕務之對其在光祿太常大理也莅事日淺未獲展布及爲廣東學使并未及按試假令公之沒稍緩須臾其所表見當何如耶譬猶權艤艘挂輕帆順流而涉江河之遠駕駟馬乘安車按轡而騁康莊之衝忽焉橋傾軸折日薄西山其命也夫其命也夫公生於雍正七年六月二十四日巳時卒於乾隆五十五年四月七日午時春秋六十有二歷官二十五年田無一區屋無一椽布衣蔬食處之怡然

三遇 覃恩曾祖父俱 贈通議大夫曾祖妣陸氏祖妣錢氏  
張氏俱 贈淑人妣周氏 封宜人 贈淑人夫人徐氏 封淑  
人子男二某某未及成人而沒乾隆五十七年某月日葬於虞山  
之北麓余幼從整庵先生學與公兄淑同研席公少余數歲不數  
見後與公在京師每論事得失余先發其端公輒如響斯應由是  
互相推服余歸田後公能實見之行事其曾中所欲發抒者正未  
艾也而今乃銘公墓豈不痛哉次兄桂林所爲狀甚備其庸行不  
具錄錄其當官行己之大者銘曰

庸庸者福公獨矯矯炎炎者升公獨悄悄位高守約勇大心小不  
阿於世而克自表人謂天道忌潔舍垢以公長者翻令無後子謂

不然此理可剖芝茁銅池不聞滋族麟遊郊藪不聞引犢將作不  
材永興澤微參軍貪暴梁公祠隕兩公之風千年不戾政事文章  
至今烜赫苟有不朽焉藉子傳公今已矣清德長延知其賢者存  
乎後賢

右墓誌銘邵齊熊撰

The image shows a table with 10 vertical columns. The rightmost column contains a header row with the following text: 日本書紀卷之六十五. The rest of the table is empty.

									日本書紀卷之六十五

英善

英善滿洲鑲黃旗人薩哈爾察氏乾隆三十一年由親軍補侍衛處筆帖式累遷刑部員外郎四十三年升郎中四十九年五月遷陝西道監察御史八月授甘肅蘭州道以親老仍留御史任五十年三月署鑲黃旗蒙古副都統十月擢直隸按察使五十一年二月擢湖南布政使九月調江蘇布政使五十二年八月丁母憂回旗九月署正白旗滿洲副都統十一月奉 上諭廣西布政使著英善署理俟服闋實授五十五年九月調四川布政使五十六年十月兼護四川總督事五十七年十一月以拏獲洪雅縣糾夥結盟逆犯得 旨嘉獎交部議敘五十八年三月擢貴州巡撫六十

年正月調湖北巡撫時以畱川會辦西藏軍需報銷均未赴任嘉慶元年六月調廣東巡撫仍畱川代辦總督事七月以拏獲匪徒劉俸祥等審擬定案遲緩 諭曰川省幅員遼闊五方雜處向多匪徒自應遇事嚴懲速辦劉俸祥等均係搶奪逞兇積匪猾賊何以積至四十五名始行分別發遣英善著傳旨申飭八月授刑部右侍郎九月達州亭子鋪教匪熊永霞等聚眾滋事英善聞報卽日帶省標兵五百名馳往勦捕並列狀 聞 上嘉之仍以所帶兵較少 命傳諭福甯觀成就近酌量情形與英善會商進勦嗣賊以官兵漸集屢被創分竄麻柳場屯聚英善於途次馳奏因請停調成都駐防兵丁得 旨賞給大小荷包用示嘉獎十月朔英

善馳抵達州遣兵分道擊捕敗賊甘草壩奪占木城一座追至亭子鋪用火彈燒其房屋擒殺百餘名獲賊渠張居式時東鄉縣屬之豐城場天星橋太平縣屬之清石溪俱有賊屯聚搶掠英善慮兵力單弱仍飛咨副都統勒禮善將前次密備之駐防官兵派赴軍營以資調遣 諭曰英善前曾奏及所帶兵勇足資剿捕請將滿兵停止今又飛咨檄調豈不耽延時日嗣後務宜畱心斟酌不可再涉大意十二日英善督參將佟貴等追賊風洞口兩面夾擊生擒百餘名殲斃夥匪遂克復麻柳場 諭曰英善督率將弁分投剿賊雖殺賊無多而麻柳場業經克復所辦尙合機宜二十日賊撲太平卡復遣兵擊卻之十一月偕勒禮善哈密辦事大臣佛



柱分勦袁家石壩賊眾乘雪凍攻克拆毀賊卡殺賊無算乘勝追擊並毀汪家山賊巢生擒賊首何三元尹和尚及餘匪九十餘名殲斃甚夥隨將堵擊得勝情形入奏得 旨所辦尚好英善等惟當倍加奮勉迅速成功復與勒禮善擊賊柏樹場等處連戰殺賊千餘名生擒百餘名奪獲糧食器械無算賊走大東林英善派兵截擊賊折回竄匿橫山子茅坪一帶搜出難民千餘人派員安撫事 聞 賞戴花翎暨喜字玉扳指大小荷包賊遁入橫山子內設重卡外掘深濠負嶠固守英善派總兵袁國璜何元卿分路冒雨霧進攻搶據山梁連焚賊卡賊分五路來撲國璜等分投抵敵英善隨後策應復殲斃二三百名賊恃險死拒相持三日國璜元

卿俱歿於陣英善仍督兵勇奮力衝擊賊始退隨以兵單賊眾請  
添兵助剿 諭曰英善奏攻克橫山子賊卡後賊以失去巢穴蔽  
障分作五路前來攻撲總兵袁國璜何元卿致被戕害實爲可惡  
宜縣卽迅速赴達州調度一切宜縣未到之前英善等當倍加鎮  
定不必冒險深入祇須四面圍剿勿使馳竄嗣茅坪張家觀賊眾  
乘大霧撲營英善督兵截擊賊遁歸所派遊擊謝開元亦攻克鞍  
子坪殺賊數百名其派往遷壩獅子山堵剿員弁亦均有斬獲奏  
入得 旨據英善奏到情形清石溪等五處及鞍子坪賊匪均經  
剿淨其張家觀一帶見已督兵趕緊兜剿看來英善等所辦尙能  
鎮定稍紓懸念十二月賊向普子嶺衝突英善派兵設伏令義首

誘致匪眾敗之遂乘勝追至馬鞍山燬其卡並線擒教首徐添富以聞 諭曰此次英善等奏攻克馬鞍山並傳教之徐添富擒獲實屬可嘉著賞給喜字玉扳指扳指套金銀八寶以迓春祺而徵吉兆英善等當速將茅坪張家觀賊匪辦淨移師太平上緊勦辦以靖地方時賊以攻撲冉家壩營卡屢爲官兵擊退遂於茅坪一帶虛作聲勢另率大股潛奪姚家壩隘口進攻東鄉縣治張家觀賊眾亦分四路助戰遂入東鄉縣佛柱陣亡事 聞奉 旨英善奏賊匪復犯東鄉官兵眾寡不敵致被搶占並戕文武各員竟不成事體英善等此時兵力既不敷調撥惟當加意固守不得冒昧輕進致有損失二年三月賊擾貫子山村落派協領蘇勒芳阿

設伏敗之復敗羅江口撲卡賊眾隨將周家河一帶道路疏通進擊磬市賊匪卻之二十四日匪眾四五百人分數路撲營英善派總兵艾如文等分投迎擊賊潰旋與勒禮善攻克張家觀賊巢追至大東林渡河淹斃賊匪多名生擒一百餘人遂借宜縣等收復東鄉縣治復派總兵朱射斗敗賊目王三槐於南壩場三月偕明亮等分兵攻克毋家埡口奪據大圍包要隘並派將弁冒雨夜渡清溪口搶據姚家壩要卡前後殲賊夥千餘名復偕明亮宜縣等督率將弁攻克棋盤石賊卡進圍雞爪嶺冒險仰攻復奪其寨乘勝追至蝙蝠洞殲賊千數百名奏人均得 旨獎賞四月明亮奏達州爲糧餉總彙運撥之所須得大員督率籌辦請令英善駐劄

達州督催分運英善旋以安設臺站及撫卹難民事宜入陳得  
旨允行五月奉 旨英善不必畱駐達州卽赴甘肅代辦總督事  
務閏六月抵甘肅接任九月帶兵赴漢中堵禦賊首王三槐等分  
擾通江巴州一帶英善由甯羌廣元前進迎頭截剿並派堵各隘  
口敗賊於圓場壩盤獲奸細訊悉賊蹤上 聞得 旨英善已帶  
兵前至廣元則漢中一帶棧道自己甯謚稍慰塵懷宜縣正迎頭  
堵截英善若緊躡賊蹤兩面夾擊自可一鼓成擒時匪眾竄集川  
北謀窺保甯順慶英善由廣元馳至保甯防禦遣兵援河州鎮總  
兵保興一路復於儀隴閬中各處偕總兵富爾賽朱射斗等夾擊  
屢有斬獲十二月賊偏蒼溪縣英善帶兵馳救分派設伏敗賊烽

煙樓戲擒五六百名賊遁奏入得 旨嘉賞嗣於柏溪溝等處派  
兵搜捕復擒斬數百名訊得賊首王廷詔商同竄掠情形 諭曰  
蒼溪閬中地方業經英善派兵搜剿淨盡務須扼要防守勿使賊  
匪乘閒闖入三年正月奉 上諭川省糧運不可無大員督辦著  
專交福甯英善悉心經理儻有遲延貽誤惟伊二人是問二月英  
善至達州分飭道員承勳石作瑞等辦運各軍營糧餉並酌定供  
支章程得 旨所辦尙好務須實力籌辦以期軍需無缺帑不虛  
糜十一月賊匪張映祥等竄至白塔山時英善以代辦四川鄉闈  
監臨駐省卽馳至順慶派兵防守並就近料理糧運四年正月調  
兵部侍郎旋奉 命赴西藏接辦駐藏大臣事務二月調吏部右

侍郎仍駐藏辦事十二月西藏哲孟雄頭人稟乞撥還廓爾喀侵地英善據舊案駁飭並以事聞諭曰哲孟雄頭人因英善等均係接任之員將廓爾喀久經侵占之地捏詞具稟希圖蒙混斷還地方經英善等查明舊案明白開導所辦甚是其所給哲孟雄檄文亦甚得體五年二月諭曰教匪滋事迄今四載有餘尙未蕩平朕心日深焦廬推其蔓延之故總由領兵大員及各督撫等未發天良既不能在本省將賊剿滅任其奔竄而鄰省又不能實力堵禦縱賊入境以致輾轉滋蔓荼毒生靈今當列其罪狀明白宣諭俾眾知之如四川賊匪其始不過王三槐徐添德二人在東鄉滋擾爲數無多彼時係英善勒禮善勦辦若卽能奮力攻擊原

不難立時撲滅乃亦因循遲緩致賊匪四出句結日聚日多辦理  
遲誤之罪亦無可辭英善著革去吏部侍郎加恩賞給四品頂帶  
仍在西藏辦事六年哲孟雄部落廓爾喀噶箕等構釁復欲乘間  
奪回侵地詭以與廓爾喀通好爲名稟請檄諭廓爾喀經英善等  
嚴切飭諭並將籌度檄諭情形入奏 上是之七年十二月授頭  
等侍衛八年十一月 上以英善等出差四年有餘 恩旨撤回  
九年七月擢刑部右侍郎正藍旗滿洲副都統十一月遷都察院  
左都御史正黃旗漢軍都統十一年四月以與福甯駐藏時於福  
甯那借庫項事未經阻止參劾交部嚴加議處五月奉 旨英善  
前在四川軍營於教匪起事之初辦理不善姑予薄懲降爲四品



頂帶派令赴藏嗣以其駐藏數年洊加升用擢至左都御史正黃旗漢軍都統本係加恩棄瑕錄用乃伊自任臺長以來旅進旅退從未陳奏一事朕時常召見面加詢問伊於內外政治亦毫無建白茲查出伊前駐藏時於同事官私那庫項徇隱不舉英善係年老蒼猶不肖實心任事之人著照部議降三級調用並革去花翎十一月補授太常寺卿十四年二月卒

右 國史館本傳

阿必達

阿必達原名阿彌達正白旗滿洲人大學士阿桂第三子乾隆三十三年十月由官學生授藍翎侍衛三十五年阿桂隨經略傅恆既還京 上命阿桂辦理撤兵事宜三月 上以阿桂辦理恩遠爲敵所輕革退阿彌達及阿桂長子三等侍衛阿迪斯官事詳阿桂傳三十六年五月阿桂以辦理軍務不善革職 諭曰阿桂辦理雲南軍務毫無端緒將伊治罪之處已另降諭旨矣若止罪坐一人不足蔽辜其子阿迪斯著發遣廣西右江鎮阿彌達著發遣廣東雷瓊鎮交該部於本日卽行發遣三十七年二月阿桂隨將軍溫福征金川屢克各險要 恩旨以阿桂爲參贊大臣阿彌達

及阿迪斯俱寬免回京三十八年十一月授三等侍衛在乾清門行走四十年八月阿桂以定西將軍克金川勒烏圍賊巢上命阿彌達齋紅寶石帽頂馳赴軍營宣賜四十一年正月擢二等侍衛四十七年二月奉 旨乾清門侍衛阿彌達著馳驛赴西甯祭告河神七月回京復 命 諭曰今年春閒豫省青龍岡漫口合龍未就遣大學士阿桂之子乾清門侍衛阿彌達前往青海務窮河源告祭河神事竣復命並據按定南針繪圖具說呈覽據奏星宿海西南有一河名阿勒坦郭勒蒙古語阿勒坦卽黃金郭勒卽河也此河實係黃河上源其水色黃迴旋三百餘里穿入星宿海自此合流至貴德堡水色全黃始名黃河又阿勒坦郭勒之西有

巨石高數丈名阿勒坦噶達素齊老蒙古語噶達素北極星也齊老石也其崖壁黃赤色壁上爲天池池中流泉噴涌醜爲百道皆作金色入阿勒坦郭勒則眞黃河之上源也其所奏河源頗爲明晰所有兩漢迄今自正史以及各家河源辨正諸書允宜通行校閱訂是正讞編輯河源紀略一書以昭傳信四十八年二月擢頭等侍衛兼尙茶正四月授上駟院卿四十九年三月授正藍旗滿洲副都統九月兼公中佐領五十年九月 諭曰前命館臣編輯河源紀略錄入四庫全書以昭傳信近偶閱河防述言一書卷首冠以河圖所載源流方向山川形勢與阿彌達所奏相符此圖爲張靄生所著其書則採述陳橫議河之說從來疑信參半歷數千

百年今始考詢明確而張靄生之圖在數十年前適與今圖略合著將河防述言一書錄入四庫全書附於靳輔治河奏續一書之後五十一年九月遷工部右侍郎五十四年三月奉 旨阿彌達改名阿必達五十六年正月 諭曰阿必達久病未痊工部侍郎卽著開缺仍畱副都統在御前侍衛上行走五月卒子那彥寶襲一等輕車都尉兼雲騎尉見官刑部左侍郎正藍旗滿洲副都統總管內務府大臣

右 國史館本傳

乾隆四十六年河決儀封之青龍岡河道總督等堵築不克蒞事天子命誠謀英勇阿公往督之又使君之子阿君具玉幣函

制詞用昭格於河神旣乃屢塞屢潰 天子曰嗟惟河孕毓萬有  
道路莫遠弗溯源而祀之奚以表誠恪迓靈祐復使君往君出西  
甯沿回部境踰星嶺海得真河源祈之而儀封決口尋就塞於是  
天子嘉君由上駟院卿副都統擢工部侍郎蓋駸駸嚮用矣踰  
三年而病病一年而歿世以此多惜之君章佳氏名阿彌達字某  
某祖諡文勤諱阿克敦父卽英勇公家世詳余撰文勤公行狀乾  
隆三十六年授藍翎侍衛旋因他事落職三十八年授拜唐阿復  
授藍翎侍衛在乾清門行走三十九年放三等侍衛四十一年放  
二等侍衛四十八年放頭等侍衛歷升以至今官君久典宿衛  
天子巡幸所至無弗從逮大獄視大臣疾必以使而進香泰山及

在熱河監視回人求雨以君誠懇故奉使獨多君生長貴族雅志  
節儉襍被如寒素謙退若不勝者精勤恭慎奉職歷二十年無懈  
適舉乾清門侍衛多勳戚子弟喜以衣服與馬誇炫暇則聲色飲  
博遊戲相徵逐而君沈靜恬雅寡言笑入直眾方誼啾拉雜輒以  
書史自隨蓋奉英勇公之訓亦生平誠懇自然也君求河源既抵  
星宿海未以爲是也見其西有水名阿勒坦郭勒色黃迴旋三百  
里入於星宿海自是合流至貴德堡始名黃河而阿勒坦郭勒又  
西石壁高數丈名阿勒坦噶達素齊老壁赤色上有池池中泉百  
道噴涌作金色入於阿勒坦郭勒乃眞河源蒙古謂阿勒坦黃金  
郭勒河也噶達素謂北極星齊老石也於是用定南針正其方位

具圖說歸報 天子命四庫館纂修河源紀略昭示來許蓋元都  
實未踰星宿海而西康熙中葉之使亦以回部未靖僅止於都實  
所至之地及是而列史之所謂河源者乃定且自告祭後十餘年  
河南無昏墊憂厥功爲鉅今者懸諸 宸翰載諸 國史視張騫  
都實有餘榮焉雖未中壽可無憾也已君生乾隆九年六月某日  
歿於五十六年五月某日配關氏 例封夫人子一那彥寶今官  
乾清門侍衛歿時以方向未利五十七年三月某日始克葬於某  
里之新阡求撰碑文用樹神道爰書其事迹且綴銘焉銘曰  
韋平家少執戟尋源往窮荒積源旣探薦玉帛援神契菱薪塞  
帝曰俞志篋冊生勞勩歿爲奕丕豐碑永嘉績



日本書紀卷之六十一

右神道碑銘王昶撰

二

穆克登額

穆克登額瓜爾佳氏滿洲鑲黃旗人乾隆三十三年由親軍授侍衛處筆帖式三十六年調吏部筆帖式三十七年充十五善射四十二年遷主事游升郎中五十年授福建道監察御史五十四年兼公中佐領 命巡視西城五十五年以緝獲逸盜下部議敘旋升工科給事中嘉慶元年轉吏科掌印給事中二年擢光祿寺少卿三年升太僕寺少卿四年四月轉通政使司副使七月遷光祿寺卿十一月升通政使司通政使五年擢盛京兵部侍郎兼奉天府府尹七年調盛京刑部侍郎解府尹任十三年正月調刑部右侍郎二月授鑲黃旗蒙古副都統五月調鑲藍旗滿洲副都統九

月雲南已革貢生任澍宇訐告地方官侵冒軍需各款 命偕刑部左侍郎章煦往按澍宇坐誣治罪如律十一月轉左侍郎十四年授總管內務府大臣十五年正月山西河東道劉大觀控前署巡撫初彭齡任性乖張諸款 命偕戶部侍郎托津往鞫得實彭齡大觀降革有差四月 命偕副都御史溫汝适往天津鞫福建流寓水手蘇花臉等朋淫聚賭並私藏軍械擾害地方案得實按問如律尋偕溫汝适奏請申明例禁凡商船防盜器械責成船戶收放汛弁稽察其卸貨之期退泊之所均嚴定章程以清姦宄下直隸總督議行五月 命赴山東按日照縣民馮愛爲妻弟厲志成率人毆斃獄訊未竟 上幸木蘭 召回京九月充滿洲緝譯

鄉試副考官十六年授直隸秦甯鎮總兵兼總管內務府大臣旋  
以內務府所遞月摺繕寫錯誤部議降三級調用上加恩改爲  
降四級畱任十七年以秦陵寶城牆身閒有膨裂偕承辦西  
陵事務員勒永琦等奏請修理十八年二月承修大臣禮部侍郎  
凱音布刑部侍郎哈豐阿回京浮報工程並面奏勘工時與穆克  
登額親至寶城上下詳勘奏稟亦經送閱及上降旨查詢穆  
克登額等以城上海漫飄塊閒有酥鹼凸起無多牆身並無另段  
膨裂凱音布等所奏無從得知回奏上恐其迴護不實下部嚴  
察解穆克登額任在彼候議旋經欽派大臣蘇楞額及秦甯鎮  
總兵那彥寶勘寶城身膨閃二段與穆克登額等原奏相同此外

臣等查前奏在案  
名  
尚  
有  
遺  
漏  
二  
處  
拘  
抵  
卽  
可  
完  
善  
並  
無  
通  
身  
彫  
裂  
情  
形  
凱  
音  
布  
哈  
豐  
阿  
張  
皇  
入  
奏  
應  
請  
下  
部  
嚴  
議  
凱  
音  
布  
等  
坐  
罪  
有  
差  
上  
以  
穆  
克  
登  
額  
曾  
於  
司  
員  
桂  
良  
處  
取  
摺  
稟  
觀  
看  
回  
奏  
並  
不  
據  
實  
聲  
敘  
轉  
稱  
不  
知  
殊  
屬  
隱  
飾  
仍  
交  
該  
衙  
門  
嚴  
議  
尋  
議  
降  
二  
級  
調  
用  
諭  
曰  
穆  
克  
登  
額  
於  
凱  
音  
布  
等  
欲  
上  
寶  
城  
不  
行  
阻  
止  
原  
報  
應  
修  
工  
段  
遺  
漏  
二  
處  
又  
於  
取  
閱  
凱  
音  
布  
等  
摺  
稟  
後  
誑  
言  
不  
知  
意  
存  
欺  
飾  
伊  
係  
因  
兼  
管  
內  
務  
府  
大  
臣  
獲  
咎  
著  
於  
內  
務  
府  
大  
臣  
內  
改  
爲  
降  
三  
級  
調  
用  
來  
京  
候  
補  
五  
月  
補  
光  
祿  
寺  
卿  
六  
月  
授  
正  
藍  
旗  
蒙  
古  
副  
都  
統  
旋  
授  
刑  
部  
右  
侍  
郎  
八  
月  
轉  
左  
侍  
郎  
九  
月  
調  
鑲  
白  
旗  
滿  
洲  
副  
都  
統  
十  
九  
年  
二  
月  
調  
工  
部  
右  
侍  
郎  
閏  
二  
月  
調  
禮  
部  
右  
侍  
郎  
四  
月  
充  
滿  
洲  
繙  
譯  
會  
試  
副  
考  
官  
尋  
轉

左侍郎十月復調工部右侍郎十一月轉左侍郎十二月遷禮部  
尚書旋兼鑲黃旗漢軍都統二十一年七月英吉利國遣使入貢  
命偕理藩院尚書和世泰迎赴通州演禮和世泰等並未教演  
卽於前一日率令來京時陰雨道途泥淖行竟夜始至貢使朝服  
俱遺於後及 召見來使以便服不敢瞻謁均以疾辭 上詰問  
和世泰復不以實對 上怒其失體誤事切責之下部嚴議尋議  
上 諭曰英吉利國貢使演禮一事特派和世泰穆克登額迎赴  
通州諭以七月初六日爲限限內演禮卽帶同來京儻限滿仍不  
如儀卽據實奏參候旨乃和世泰等於初五日含混具奏徑於初  
六日帶領來京朕召見和世泰等奏稱實未演禮明晨該貢使等

行禮必能如儀次日膳後朕傳旨升殿召覓來使和世秦等不將該貢使等行走竟夜朝服未到不敢瞻覲情由據實上聞連以失體之詞奏延時刻已近辰時不能成禮和世秦之罪最重穆克登額年老無能隨同錯誤著革去禮部尙書鑲黃旗漢軍都統降補鑲藍旗漢軍副都統八月復授秦甯鎮總兵兼總管內務府大臣二十二年復授禮部尙書二十三年八月以禮部頒行科場條例恭載 高宗純皇帝廟號字畫刊刻錯誤頒發後始行校出更正部議降四級調用 諭曰禮部於恭載 高宗純皇帝廟號致有譌誤非尋常疏忽可比惟 宗字譌作 祖字同爲尊崇隆號尙與字義舛謬者有閒穆克登額歷任年久辦事亦尙細心加恩改

爲畱任十月兼鑲黃旗蒙古都統十一月以失察 天壇望鏡杆  
木蛀損降二級畱任旋以議覆原任內閣學士錢樾入祀鄉賢祠  
不遵 旨覈定准駁推諉含混復降二級畱任十二月充經筵講  
官是月以年已衰老在禮部任內屢有錯誤 命調補都察院左  
都御史二十四年二月 上祭 社稷壇太常寺少卿善祿典儀  
誤贊望瘞爲望燎時穆克登額兼理太常寺事部議降一級調用  
旋補工部右侍郎兼鑲藍旗滿洲副都統八月授正白旗蒙古都  
統九月復授禮部尙書兼理樂部太常寺鴻臚寺事二十五年六  
月調正白旗漢軍都統七月調理藩院尙書八月 賜紫禁城騎  
馬十月調工部尙書道光元年三月 賞戴花翎四月 命偕大



學士戴均元往 東陵界內相度 萬年吉地七月 命總理工  
程處 諭嗣後毋庸每年奏請更換二年三月以失察工部司員  
承辦 壇 廟工程朋比受贓部議革職 上加恩改爲降四級  
畱任尋調禮部尙書兼管太常寺鴻臚寺事務十一月以太常寺  
呈進告祭 奉先殿禮節並未詳稽舊制又不申明請 旨妄將  
元年告祭作爲比照交部嚴議部議革職 上加恩令降補吏部  
左侍郎革退 紫禁城騎馬十二月調戶部左侍郎三年正月仍  
賜紫禁城騎馬四月復授禮部尙書兼管太常寺鴻臚寺事務  
八月 萬壽聖節 上幸萬壽山玉瀾堂 賜十五老臣宴穆克  
登額與馬繪圖紀事 御製詩有朝端大壽今居首靖共匪懈承

餘慶之句 諭曰禮部尙書穆克登額精力雖屬照常但年逾八旬嗣後御門辦事及本部值日或帶領引見之期自揣步履如常仍照舊來園如覺精神少差不必前來用示朕優養青年至意四年四月罷總理工程任十二月授鑲白旗漢軍都統六年以病奏請開缺 許之八月因 寶華峪地宮浸水究出開通土功時北面擴幫間有石母浸滴水珠用土攜護修砌石工取材既粗又未堅固如式速問原任大學士戴均元協辦大學士英和等 上以穆克登額帶同堪輿相度勘定福基乃拘泥規制點穴未臻全美照例罰賠銀三萬兩尋 命寬免二萬兩九年卒 諭曰原任禮部尙書穆克登額由吏部司員洊升尙書都統宣力有年克稱厥

職道光六年因病開缺調理茲聞溘逝殊堪軫惜著加恩照尙書  
例賜卹所有一切處分悉予開復應得卹典該衙門察例具奏尋

賜祭葬

右 國史館本傳 公充十五善射按國初定制選王公

人爲禁廷射者賞戴花翎凡皇上御射皆得侍側命射則遞射之名十五善射云

多永武

多永武薩克達氏滿洲鑲黃旗人乾隆三十三年由官學生授太常寺贊禮郎四十五年京察一等五十年擢工部主事五十一年擢太常寺少卿五十二年遷太常寺卿五十三年兼公中佐領五十四年擢內閣學士兼禮部侍郎五十五年兼鑲黃旗漢軍副都統尋賞戴花翎五十七年調鑲紅旗滿洲副都統五十八年擢禮部右侍郎五十九年四月諭曰昨因雨澤愆期盼望綦切降旨設壇祈禱禮部於次日尙未將一切應辦事宜具奏請旨該堂官實有應得之咎多永武著拔去花翎嘉慶二年調鑲白旗滿洲副都統四年五月復賞戴花翎六月署吏部左侍郎五年八月

調吏部右侍郎兼管太常寺事務十月奏太常寺典儀一缺請照各旗補放公中佐領之例將太常寺少卿哈甯阿同贊禮郎一併帶領引見諭曰此事多永武所奏非是各旗公中佐領出缺將見任各部侍郎副都統及本旗章京各員一體帶領引見俱係本旗人員並無堂司統屬今哈甯阿係太常寺少卿與多永武等均屬堂官該寺典儀官需人豈有堂官帶領堂官與本寺司員一同引見之理多永武殊屬錯誤著交都察院議處尋議降一級留任十一月冬至上親詣郊壇行禮多永武引禮舛錯經侍儀左都御史祿康奏參請交都察院議處得旨多永武平日於讀祝尙爲熟諳不必交議亦不應仍畱侍郎副都統之任並革去花

翎太常寺卿員缺卽以多永武降補遇有典儀執事時准戴花翎  
六年三月遷大理寺卿仍兼太常寺事務復因 太廟時享讀祝  
錯誤褫職在太常寺效力行走七年 上以多永武小心勤慎於  
一切典禮承辦有年較爲諳習賞給六品贊禮郎八年十一月擢  
鴻臚寺卿仍兼太常寺贊禮郎十二月升內閣學士兼禮部侍郎  
管理太常寺事務九年正月復 賞戴花翎八月兼正紅旗滿洲  
副都統十一月遷禮部右侍郎調正黃旗滿洲副都統十年四月  
諭曰見在管理鴻臚寺大員內並無由贊禮郎出身之員多永  
武著兼鴻臚寺事務閏六月調禮部左侍郎十月因病告假調理  
十一月卒子祥福見任內閣侍讀祥祿見任福建石馬鎮通判祥

國史館本傳

甯戶部員外郎

右 國史館本傳

江蘭

江蘭安徽歙縣人由貢生遵例報捐主事籤掣兵部學習行走乾隆三十三年補武選司主事三十五年洊升郎中三十七年俸滿截取奉 旨記名以繁缺知府用三十八年九月本部堂官以江蘭熟習部務請照升銜畱部奉 旨江蘭既係得力之員著加恩畱部遇有四五品京堂缺出補用十一月補鴻臚寺卿仍兼兵部行走四十一年二月兩金川全境蕩平 諭曰鴻臚寺卿江蘭在兵部行走兼管行在捷報頗屬奮勉著加恩賞戴花翎五月轉補大理寺少卿仍兼兵部行走七月奏州縣自理詞訟除責成道員按例稽查外應並飭該管知府直隸州實力查催依限完結如有



關提人犯踴看情形實不能扣限完結者卽由該管府州詳敘緣由加結申詳督撫儻州縣任意稽延而該管府州漫不查催卽令該巡道一併揭參照例分別加等議處 上躉之四十二年奏各省遇有人命重案俱將全案供招揭送大理寺察覆惟盛京向無隨本揭帖請亦照各省之例將供招一體揭送大理寺察覆得旨如所請行四十四年二月升太僕寺卿仍兼兵部行走十二月授河南布政使尋丁母憂服闋仍授河南布政使五十一年五月巡撫畢沅奏豫省連歲不登貧民地畝多爲山西富戶放債準折見飭屬曉諭令其原價取贖 上命畢沅率同江蘭詳查籌畫六月畢沅遷湖廣總督 上卽擢江蘭爲河南巡撫 諭曰江蘭上

年查辦災賑不辭勞瘁奮勉可嘉實係藩司中出色之員資俸亦深是以加恩擢用但豫省有令晉民聽贖地畝及一切修防等事不可不資熟手經理此時河南藩司仍著江蘭管理九月以伊陽縣戕官首犯秦國棟及大名首犯段文經日久未獲命交部嚴加議處並停其養廉尋因陝西奏報秦國棟被獲上以秦國棟罪大惡極令鄰省捕獲究係豫省緝捕不力降畢沅仍回河南巡撫任江蘭仍回河南布政使任十月上以江蘭局面究小諭畢沅據實陳奏沅奏江蘭本係中才辦理公事尙知勤奮其局量之小久在聖明洞鑒之中臣畱心察看雖急思報效而限於氣局且識見無定遇事每覺游移恐難膺繁鉅之任五十三年丁父

憂五十四年因藩司任內率行奏請改建考城城工復擅發銀兩  
交知縣承辦以致例外浮多十一月 命解去職銜交河南巡撫  
梁冑堂審訊定擬具奏尋經審擬革職奉 旨加恩降爲道員其  
賠移建城垣銀兩 特旨免賠江蘭又自請罰銀十萬兩奉 旨  
加恩寬免一半五十五年五月擢大理寺少卿九月授山東布政  
使五十六年護理巡撫五十七年兼署河東河道總督五十九年  
五月因護理巡撫任內所屬曹縣拏獲盜犯十年不辦監斃三名  
不行查出部議革任奉 旨降補山東按察使復護理巡撫以查  
辦災賑認真 賞加布政使銜尋調雲南按察使六十年從雲貴  
總督福康安勅辦松桃廳逆苗 諭曰江蘭曾任藩司前於山東

失察盜案久未完結尙爲公過見在隨同福康安辦理軍務不辭  
勞瘁實屬可嘉著加恩超補雲南巡撫以示嘉獎惟當倍加奮勉  
於銅務錢法認真整頓以副委任嘉慶元年十月普洱威遠邊界  
黑裸札那札杜札克帕等竄入猛撒江內之牛肩山搶掠滋事江  
蘭偕總兵帶兵剿捕攻破賊巢槍斃首逆札那裸匪畏懼乞降江  
蘭奏報邊境甯謐 上嘉之賞大小荷包札杜札克帕等尋逃回  
猛邦夷境糾眾自固土官周靖被戕 諭曰猛邦地方距威遠三  
百餘里若深入窮追未免徒費兵力江蘭向未嫻軍旅之事此時  
自不值再啟兵端著傳諭該撫等分派兵練於要隘處所嚴密防  
守俟楚北軍務完竣再行籌辦二年三月黔省南籠府狎苗竄聚

滇省平彝境內之阿以寨五月竄補董洒馬邑等處江蘭督兵攻  
圍擒斬苗目賀元達賀金崑等六月疊次勦賊於師宗邱北及黃  
泥河江底等處十二月粵苗賀成猿從交趾潛入雲南開化境與  
獯匪旺光念等糾眾滋擾江蘭督同總兵扎郎阿捕獲首從各犯  
審明正法先後奏入均報 聞四年五月因 陛見奏請畱京供  
職 命補兵部右侍郎九月轉左侍郎十月 命查辦長新店盜  
案十一月疏稱弭盜所以安民稽查必須嚴密臣前護山東巡撫  
時曾設鄰封會哨之法通飭各屬分段設立卡房兵鋪每卡每鋪  
添派兵役數名輪畱住宿或三日或五日令毗連之鄰邑鄰汛密  
約會哨一次其文員不拘正印佐雜武弁不拘將備千把等酌帶

兵役器械各到交界處所往來會哨遇有形跡可疑之人隨時隨地互相盤詰奸匪自難存畱其時東省行之頗爲有效見在直隸山東一帶仍請做照辦理其庵觀寺院及村莊鎮集各歇店有無窩匪匪類著僧道店戶按月出結並責令甲長鄰佑互相稽查將來別經發覺一併治罪再查州縣額設民壯三五十名不等原所以捍衛倉庫緝拏盜匪與別項衙役不同今各處俱有名無實應請責成巡道於各屬見在壯役中督率稽查有老弱疲病者革退另募健丁充補與兵一律差操如技藝可觀將該州縣詳請議敘廢弛者嚴揭查參如此分別勸懲地方庶資捍衛 諭曰江蘭奏嚴定巡緝章程一摺甚有所見摺內所稱設立卡堡鄰汛會哨嚴

查保甲挑選民壯各條著各督撫酌量辦理先是嘉慶元年六月  
江蘭任雲南巡撫時抱母恩耕二鹽井被水成災淹斃男婦三十  
餘名衝坍房屋一千四百間江蘭匿不陳奏並將撫恤銀兩不准  
開報井口淤塞竈戶停煎以致鹽課墮銷至是新任巡撫初彭齡  
奏參 上命協辦大學士書麟覆查諱災屬實交部嚴議部議革  
職五年正月 諭曰江蘭玩視民瘼飾辭諱匿百喙難辭照部議  
革職著卽回籍至抱母恩耕二井墮銷鹽課及賑恤銀共五萬餘  
兩皆係江蘭諱災所致著照數賠繳會雲南裸匪復叛前署總督  
富綱奏江蘭於剿捕時並未淨盡致又糾眾滋擾 上命書麟查  
明如江蘭有辦理草率之處卽據實奏參二月書麟奏嘉慶元年

黑裸滋事江蘭到威遠查辦官兵攻破賊巢將首犯札那槍斃正在籌辦搜撫事宜適總督勒保由湖南軍營前來尙在途中江蘭卽具奏完事起程回省以致札杜札克帕復糾眾劫掠戕害土官是江蘭聞勒保將到遽爾奏結顯有恐被勒保攘功之意草率之咎實所難辭奉 硃批所奏甚公江蘭已革職無庸議六年直隸水災江蘭呈請鹽政書魯代奏捐銀三萬兩助賑 諭曰江蘭深受國恩茲已革職回籍聞直隸被水捐資助賑亦屬分所宜然著加恩賞收八年閏二月初彭齡奏部駁嘉慶二年猥匪軍需案內浮銷銀二萬餘兩應令江蘭賠繳尋以賠項全數歸款江南總督陳大文奏入 諭曰江蘭前在巡撫任內匿災未報是以將伊革



臣等奉旨欽此  
職伊並無贓私款蹟自回籍以後將應賠銀兩全數歸款尙知急  
公著賞給七品小京官前赴南河交吳璫聽候差委九月奉 旨  
以河工同知補用江蘭懇辭同知升銜願畱南河當差經河臣吳  
璫代奏 諭曰江蘭本係揚州商人南河是其本省自應迴避今  
據懇辭河工同知著賞給五品頂帶暫畱河工及邳宿一帶催趨  
重運如果辦理妥協俟工竣後再加恩以員外郎補用十年十月  
命隨吏部侍郎戴均元馳驛查勘南河壩閘十一年二月呈請  
捐銀三萬兩以備疏濬南河之用十二月江南督臣鐵保等奏江  
蘭催趨重運回空跋涉江干不辭勞瘁並據呈請願在京職上效  
力 諭曰江蘭在南河效力尙屬奮勉著准其回京以郎中升補

十二年八月卒

右 國史館本傳

國朝首狀原改初編

卷九十九 雜錄五十九

无



廣泰

廣泰郭佳氏滿洲鑲藍旗人由繙譯生員考取內閣中書乾隆三十三年補官四十五年遷侍讀五十年升戶部緞匹庫員外郎五十一年授江西道監察御史兼公中佐領五十四年轉掌貴州道監察御史五十八年遷兵科給事中六十年轉刑科掌印給事中數年中疊奉巡城之命嘉慶三年丁母憂四年命巡視通州漕務差滿復命巡視南漕時前任漕運總督蔣兆奎因丁力疲乏屢請酌增運費命廣泰查覈以聞廣泰疏言旗丁業經津貼米石又准多帶土宜足敷用度見在淮安大河泗州等幫皆已完竣開行蔣兆奎未免輕聽衛弁之言藉詞瀆奏諭曰蔣兆奎於

運費一事並未詳悉查明惟以丁力疲乏爲詞曉曉置辨其爲聽  
信衛弁愚弄已屬顯然如果漕船因運費不敷難以挽運何以淮  
安等幫俱經受兌開行且糧艘遲誤係巡漕御史專責廣泰見任  
巡漕豈不自顧處分必不冒率爲此奏著將所奏發給蔣兆奎閱  
看五年服闋以江南綠營弁兵升拔千總把總向由本營將官遴  
選彙送各該鎮酌擬二三人轉送提督考驗再送總督拔補若總  
督遠隔他省或值巡閱外出亦須前往候驗輾轉跋涉動至二三  
千里一年所得俸餉不敷長途往返之用拖欠債負以致視爲畏  
途請嗣後千把缺出如係總督提督本標聽該總督提督自行考  
拔其鎮協各外營視總督提督駐劄遠近由各該鎮就近徑送一

處拔補仍照例咨部註冊以免繁瑣而歸簡易至外委及額外  
委職分愈小向由總兵考驗者居多嗣改歸總督提督拔補長途  
往返苦累尤甚並請嗣後缺出不必轉送總督各視提督總兵駐  
劄地方分別就近考拔 上是之下部議行是年差滿仍畱任六  
年三月以南糧首進幫船入山東界較遲在後者閒有脫幫 嚴  
飭之廣泰奏言南糧遲滯實緣邳宿運河淺阻見駐儀徵一帶往  
來督催 上以廣泰尙無不合之處 諭令上緊催趲六月因病  
乞假 召回京假滿遷大理寺少卿九月升太僕寺卿十一月授  
太常寺卿十二月擢內閣學士兼禮部侍郎銜七年四月兼正藍  
旗漢軍副都統六月擢右翼總兵七月廣泰自以總兵武職司員

呼應不靈懇提督宗室祿康代請 賞加兵部侍郎銜 上切責  
之下部嚴議奪職道光四年子穆彰阿官理藩院尙書 召對之  
次詢及廣泰近狀 特賜二品職銜五年卒子穆彰阿前官文華  
殿大學士緣事革職

右 國史館本傳

今上卽位首下求言之詔故一時言官皆有丰采指摘朝政改如  
轉圜雖其閒不無以妄言獲咎者然其補益良多矣故列名於後  
廣公泰滿洲人下 詔時泰同廣興首先應 詔劾和珅奸慝諸  
款卽時伏法人爭快之今任內閣學士蔣公攸銛漢軍人嘗劾外  
省貪吏宜降革者李奉翰景安秦承恩諸人因之先後獲罪外省

吏治爲之更張實自攸鈛發也副憲公瑚圖靈阿宜制府繇子也  
性豪邁不屑小節今上親政公首條關稅鹽務諸弊又請卻納  
貢獻停止捐納一時皆懷其丰采云馬公履泰仁和人今上親  
政履泰首論湖督景安畏縮偷安老師糜餉之罪安爲之罷職又  
論湖北教匪奸民宜除難民宜撫諸條上盡從之繼公善滿洲  
人雖爲和相所引無所依附時繙譯科場皆近臣子弟藉以進身  
頂冒傳遞之弊繁不勝言言官以其傷眾無敢言者僅括取文場  
弊聒瀆不休惟善首論繙譯諸弊場務始嚴公後遷太僕卿八旗  
士卒畜養馬匹多有冒領其餉飼者十不二三出牧時哨番使以  
金帛爲蒙古所哂善復犯眾怒言之其弊遂清滿人恨切骨至驗



馬日眾誤以戴蕨塘璐爲善毆之幾斃事 聞首謀者伏誅今遷  
盛京禮部侍郎張公鵬展廣西人任御史時頗敢言嘗陳奏出師  
入弊政皆中窾要刑部郎中金光悌素便佞專擅一時諸堂官多  
包庇之後遷光祿少卿猶戀戀其司職鵬展劾請離任其略云以  
天子之刑部而金光悌一人專擅二十餘年其餘司官皆出門  
下故使比昵爲姦無阻之者良可慨也 上遽允其請人爭快之  
和公靖額滿洲人以繙譯起家而素重文士滿洲學舉人舊例三  
科後始得揀選小京官人多缺少遂致壅塞非歷科三十餘年不  
能入仕反不若漢人大挑之捷徑靖額深憫之因陳請同漢人例  
一體選授縣令百年弊政一旦改之人爭頌其德云衛公謀濟源

人成辛巳進士年七十餘始爲諫官福文襄王康安雖屢立戰功  
然所歷封疆苞苴廣進歿後復膺重典未免濫觴 今上責那繹  
堂司空 諭旨有福康安歷任封圻蓋盪不飭之語因備論王貪  
婪諸狀不宜配享 太廟子孫享其非分之榮 上雖未允其請  
一時之公論與之周公枅甯夏人切論外省大吏多有參劾屬員  
初無劣跡恐惴惴無華之人不得上司之歡心以致被劾者眾請  
嗣後照大計例許其付咨引 見則其員之賢否自難逃 聖明  
洞鑒之中可使大吏專擅之習爲之稍減 上允其請庚申夏彭  
芸楣尙書入內落馬昏仆朱石君司農因以己輿載出故事 大  
內無 特旨不容車轎出入枅因劾之其略云朱珪無無君之心

而有無君之迹云云又溫藩司承惠冒以鄉勇功爲己功又依附  
罪撫秦承恩致使武關有失亦附劾之當時雖奉 嚴旨未數月  
石君與夫有闖 禁門毆傷守者 上切責之嘗曰周栻之言甚  
正殊堪嘉也沈公琨歸安人江蘇生員之獄巡撫宜興庇護屬員  
又信任管門家人致使苞苴日進特造嚴刑以訊告者有小夾棍  
頭腦箍諸名目又於 國喪中任意演劇無所忌憚琨皆一一陳  
之乃罷興職逾歲 上欲巡幸盛京琨復上疏阻之亦見稱一時  
云蕭公芝漢陽人久淹詞館及用御史年已七十餘上疏奏端正  
風俗反樸還淳以天道人心啓沃上 聞其文洋洋數千言皆有  
關於政治一時翕然稱之王公甯煒山東人嘗上疏言 上之用

人行政宜習其素不可因其有人保舉遽加升用如金光悌黎兆登等非不有人薦用然考覈其實殊有未稱者云云游公光繹福建人會上疏言今大臣未盡和衷武備未盡整飭願效魏元成十思疏以裨治化 上獎之後滿漢侍郎某某因公爭憤 上曰游光繹之言不爲無見殊屬可嘉後以劾黃公永沛罷職人爭惜之

右錄宗室昭槿撰

--	--	--	--	--	--	--	--	--	--

伍彌烏遜

伍彌烏遜正黃旗蒙古人伍彌氏大學士伍彌泰子由藍翎侍衛於乾隆三十三年授三等侍衛三十七年補公中佐領四十年緣事降藍翎侍衛四十六年仍授三等侍衛五十一年十一月補佐領十二月承襲其父三等誠毅伯五十三年三月擢正黃旗漢軍副都統五月授烏里雅蘇臺參贊大臣五十四年調科布多參贊大臣尋調蒙古副都統仍畱科布多參贊大臣任五十五年因失察鄂羅斯烏梁海等在內地游牧奉旨降一級畱任五十六年調鑲黃旗滿洲副都統五十八年二月授內閣學士兼禮部侍郎五月調塔爾巴哈臺參贊大臣六十年升兵部右侍郎仍畱塔爾

巴哈臺參贊任嘉慶元年四月奏請塔爾巴哈臺每年進貢馬匹由阿勒臺進京可省內地臺站傳送之勞奉 旨允准六月調兵部左侍郎仍畱塔爾巴哈臺參贊任九月因烏蘭扎舊屬厄魯特游牧之地厄魯特馬少遂爲土爾扈特親王策凌烏巴什所居厄魯特請復其舊策凌烏巴什欲據而有之餽銀四百兩馬九匹以請伍彌烏遜斥回策凌烏巴什又送馬九匹復求察罕鄂博北邊之地借與過夏伍彌烏遜受馬一匹許之經保甯奏參奉 上諭伍彌烏遜如此辦理實屬錯誤土爾扈特厄魯特原各有分得之地土爾扈特地方又復寬闊人數亦較少於厄魯特土爾扈特欲將厄魯特原分之地占據卽屬非是今又欲奪厄魯特等原分之

地伍彌烏遜查明斥駁不准土爾扈特占據卽策凌烏巴什希圖便宜行賄伍彌烏遜尤當以理訓飭全行駁回伍彌烏遜初將策凌烏巴什銀兩駁回伊等業經計窮次日又餽馬九匹懇請將察罕鄂博卡倫迤北五十餘處借給過夏伍彌烏遜又恐礙策凌烏巴什顏面收馬一匹卽照伊所請借給實屬怯懦糊塗已極況察罕鄂博卡倫迤北地方夏季放卡雖與哈薩克相去稍遠而冬季撤卡之時哈薩克皆入近邊一帶游牧土爾扈特等性好便宜伍彌烏遜夏季將此處借給至冬季伊等竟不甯移與哈薩克等雜處儻滋生事端伍彌烏遜又將如何辦事耶伍彌烏遜尙欲將此地可否永遠賞給策凌烏巴什游牧之處咨問尤屬糊說伊竟不



思哈薩克冬季仍遷入近邊乎看來伍彌烏遜竟不勝塔爾巴哈  
臺重任著嚴行申飭仍交部嚴議十二月 諭曰伍彌烏遜著照  
部議革職見在哈密辦事大臣佛住往達州軍營俟成功之日另  
行升用外此缺加恩賞給伍彌烏遜三等侍衛自備資斧前赴哈  
密協同僧保住辦事三年仍襲三等誠毅伯四年奉 上諭伍彌  
烏遜在新疆有年卽著伊回京五年到京因病乞休六年卒子拉  
錫格呈克承襲三等誠毅伯

右 國史館本傳

陳嗣龍

陳嗣龍浙江平湖人乾隆三十四年一甲三名進士授編修四十二年充江西鄉試副考官四十八年充湖北鄉試正考官五十一年充陝西鄉試副考官五十二年充右贊善遞遷侍讀五十四年充福建鄉試正考官五十六年大考二等擢侍讀學士十月以講官侍懋勤殿班奉 特旨記名以應升之缺題奏五十八年轉通政司副使旋授光祿寺卿六十年 命提督福建學政嘉慶二年遷太常寺卿三年二月轉宗人府府丞十一月授左副都御史四年充殿試讀卷官七月奏外省州縣辦案延擱藉端需索又復袒役病民株連搜剔至私設班房及自新所名目請 旨一體飭禁

從之十月充武會試副考官十二月奏東城育嬰堂給發官項  
支銷用度胥吏鄉耆多侵漁乾沒請令東城御史稽察庶公項皆  
歸實用得 旨允行五年充順天鄉試副考官六年六月永定河  
漫口京城附近被潦 上命嗣龍偕汪承霈等赴永定門右安門  
外一帶撫恤難民踰月期滿復奉 諭見在散賑地方照五城之  
例設廠煮賑一月交嗣龍等散放事竣得 旨議敘八年三月直  
隸總督顏檢奏江南民人龐大椿等呈稱在都察院呈遞策語並  
不代爲陳奏 上命軍機大臣傳詢嗣龍自認拘泥懇請交部察  
議 諭曰國家廣開言路原不妨詢及芻蕘其僅止摭拾浮詞希  
冀邀榮者於例本應飭禁但既有違例冒瀆之人亦應將原呈奏

明候旨似此壓擱不辦恐啟壅蔽之漸此非拘泥乃觀望耳著改爲交部議處七月奏言鄉會試見行事例有宜迴避而不迴避者姑夫內姪似與例應迴避之甥舅不甚懸殊較同宗無服者爲更親應一體迴避又向來順天鄉試與會試內外簾官其本家親戚俱令迴避惟場內辦理供給之員鄉試則順天府通判會試則治中獨無迴避之例頗聞向來傳遞之弊多由於此應請一體迴避奏入奉 諭照所請行並著纂入科場條例九月北城吏目冷皚因所轄地方有盜劫之案借都司佟國良赴嗣龍私宅懇求緩辦嗣龍以諱盜劄供奏參並面奏左都御史汪承霈副都御史舒聘均不勝臺長之任 上以陳嗣龍持正直陳本應予以甄敘但汪

承需性耽安逸已非一日舒聘與陳嗣龍同事有年行爲乖謬既  
經稔知均應早爲奏參經朕召對始行面陳且陳奏亦不甚明晰  
不必交部議敘十年十一月請 飭禁外省接收呈狀無代書不  
閱之陋習以達民隱 上是之十二月給事中汪鏞奏陳嗣龍於  
接見科道時殊失體制 諭曰副都御史爲臺垣表率平日語言  
舉動皆當敬慎自持陳嗣龍向來所爲議論語多失檢著傳旨申  
飭十二年六月以山東民婦盛姜氏控案應奏與左都御史熊枚  
爭辯未決卽奏參熊枚任性作威欺陵同列並稱平日居官聲名  
平常 欽派大臣傳詢嗣龍續參熊枚巧言支飾奏入 諭曰朕  
君臨天下卽治匹夫之罪亦必覈實定案況熊枚爲一品大員斷

無不加察實卽子穉黜之理因將陳嗣龍原摺用硃筆標出交慶桂等向伊詢問陳嗣龍於熊枚有何款蹟之處仍不能確指一事看來陳嗣龍信口擔摭語無倫次竟係近日熊枚左遷私心揣測謂朕意或有憎厭因而搜求其短連章劾奏殊不知朕於諸臣工權衡黜陟一秉至公豈因一言細故遽將熊枚罷斥乎陳嗣龍身任副都御史有年在言官中職分較崇乃於國計民生大政所關未有一言建白但以此等口舌細故之事再三陳奏實不稱臺長之任應卽予革職姑念其學問尙好居官並無別項劣款著加恩降爲翰林院編修在國史館纂修上行走十二年十月卒 諭曰陳嗣龍曾任副都御史緣事降爲編修今因病身故念其從前尙

無大咎謫官後在館行走勤勉著加恩追賞四品銜

右 國史館本傳

劉湄

劉湄山東清平人乾隆三十四年進士改翰林院庶吉士三十六年散館授編修四十二年充順天武鄉試副考官四十六年三月充會試同考官十月遷江西道監察御史四十九年轉掌廣西道監察御史五十年疏言四川等省承緝逃兵未獲各員見准捐復俾令及時自效但其中或有因急於仕進藉以捐復爲名暗滋那移科斂諸弊請 敕嚴定處分下部議行五十二年九月升工科給事中十月 命巡視南漕事務時浙江巡撫琅玕奏浙江糧艘歸次須在來年正月受兌開行但恐鎮江出口時已在江廣幫船之後或酌量截卸天津以冀及早回空歲內歸次 上令漕運總



督毓奇偕湄體察情形先事籌畫尋奏浙江回空幫船臣毓奇委  
員親押星速南下臣湄過江親督員弁晝夜籌催約計正月歸次  
二月兌糧按程計日仍可緊隨江南尾幫來淮毋庸豫籌北倉截  
卸得 旨嘉獎五十三年九月 命巡察天津倉漕事務先是山  
東巡漕御史和琳奏直隸運河向多古淺亟須勘治以利漕運  
上嚴諭總督劉峩剋期挑濬十月湄奏察勘南運河水與春夏迥  
異滄州以北河流深通向無古淺卽滄州以南經今夏挑完之後  
漳水漲發又值秋霖甚足至今長河中流水深七八尺至丈餘不  
等若此時於水中撈空轉爲工員藉端冒銷之地殊難稽覈請俟  
水落興工得 旨令劉峩測量具奏尋議緩挑如所請十二月轉

吏科掌印給事中五十四年疏陳旗丁餘米例由坐糧廳給子印  
票聽其於回空時沿途售賣以資轉運之費惟通州爲卸米地恐  
有影射透漏故售賣有禁乾隆二十三年 皇上體恤貧丁併准  
在通變價旗丁旣省領票之繁京畿民食亦有裨益歷年遵辦原  
未嘗禁其沿途售賣也乃吏胥假借爲奸反以沿途售賣爲違禁  
藉詞需索多出陋規致米價日昂臣仰體 皇仁廡念近畿民食  
及慎速消儲至意不敢拘泥領票致空船守候壅滯津關卽飭令  
酌量口糧餘聽在天津一帶售賣丁力可紓畿輔民食益臻饒裕  
上嘉之五十八年二月擢光祿寺少卿三月授鴻臚寺卿嘉慶  
三年轉大理寺少卿四年二月升太常寺卿三月轉大理寺卿五

年遷都察院左副都御史六年六月永定河水漲決 命偕兵部  
尙書汪承霈副都御史陳嗣龍順天府尹閻泰和撫恤被水災民  
七月以辦理妥協下部議敘七年二月 特旨加賑又 命偕副  
都統台費蔭監視四月卒九年山東巡撫鐵保奏請入祀鄉賢祠

右 國史館本傳

余曩誌李紫綬墓副都御史劉公見之以爲適如其人因以方坳  
堂墓誌見屬余撰成質公亦以爲適如其人嘉慶壬戌公以經理  
賑務積勞成疾卒於官其子廷枏體公之志以墓誌屬余余於公  
爲翰林前後輩同在書局者十載同官憲府者再知公最深又感  
公之能知余誼無可謝因約舉其生平而爲誌曰公世籍山東清

平清平風俗質樸入國朝以來一百四十餘年無登科者公獨發憤力學負笈求師遂以乾隆庚辰舉於鄉己丑成進士其早年之自命已不凡矣入翰林後不喜爲雕繪之文亦不喜爲奧僻之學循循規矩務持先正之法程以導引後進非所謂毅然自立不轉移於風氣者歟辛丑由編修改江西道御史甲辰轉掌廣西道丁未遷工科給事中戊申轉掌吏科平時渾厚和平不矜言氣節務露圭稜亦不以局外空談泛陳利病然遇職守所當言則侃侃然不肖遷就如巡視天津漕務時會有奏挑直隸山東河道者已得旨矣公以嚴冬興役爲病民擬請俟次年解凍再相度情形量爲疏濬同事者難之公曰脫以誤運罹譴吾獨當其咎不以累

君奏入果 兪允次年凍解糧艘進行無所滯始信公識力堅定  
非沾沾喜事者所及也又旗丁餘米例聽其沿途售賣以資轉運  
之費惟通州爲卸米地恐有影射透漏則售賣有禁戊寅 高宗  
純皇帝體恤貧丁並准其在通售賣遂歲歲沿以爲例原未嘗禁  
其沿途售賣也而吏胥假借爲奸反以沿途售賣爲違禁藉詞需  
索而私鬻實如故特多出陋規致米價日昂公奏請申明舊例弊  
乃少革青縣河工運料之筏觸山東濮州糧艘舟破米沈青縣官  
吏回護其詞報總督總督據以上 聞 高宗純皇帝慮糧艘米  
本不足故誣指官筏之觸溺特遣大臣勘視公具奏縷列情形援  
引證佐明爲實筏觸舟非舟觸筏旗丁得免罪舊制河岸不得繫

井乃蟻穴之潰也其距河遠者則無禁漕署胥役欲漁獵民財羣  
構巧詞挾以利善請稽覈私井公燭其奸榜示距河遠近之丈尺  
蠶役之技乃窮民以不擾公之一生惟此役得經理政事而半年  
之內所經理者俱不苟儻竟公之用所樹立不更可觀歟癸丑遷  
光祿寺少卿嘉慶戊午遷大理寺少卿己未遷太常寺卿皆閒曹  
也庚申遷都察院左副都御史始有事之可治時方有 詔求言  
公於是具陳山東徵漕浮收之弊 九重嘉納墨吏始聳然知斂  
戢國之本在民民之本在農蠹蝕以腹農者莫大於官吏之橫斂  
公此一奏可謂得安民治國之要矣辛酉六月癸卯水漲頗損壞  
山廬公奉 命監賑不避勞瘁不畏牧令丞倅之怨毒不邀蠹役

奸肖之感頌多所全活壬戌三月 特旨加賑又 命公往監公  
時已微疾猶努力經理至委頓猶不甯乞假病革時乃舉歸越一  
夕即卒貧民間之皆垂涕嗚呼公可謂志在民而不奉己矣抑余  
又聞之公舉於鄉出圖裕齋前輩之門裕齋歿後無子家徒四壁  
太夫人尚在堂公爲措置日用之費月有常數旬日一往存問亦  
有定期終太夫人之身君子以爲有古誼余謂舉主之名始於漢  
舉主之旨始於唐於生平知己皆尊以在三之列恆念念不忘報  
故其受 朝廷拔擢委任之恩亦念念不忘報其事雖不同其不  
負心則一也觀公不忘師恩可知公之必不忘 君恩倚注方深  
而公已景道桑榆黃泉盡志故所樹立僅如此余述其遺事亦僅

如此然質諸天下後世不能謂余之所誌不適如其人也歿而有  
知諒亦公所心許矣乎公諱湄字正林岸淮其別號也生於雍正  
壬子閏五月十八日卒於嘉慶壬戌四月十九日年七十有一元  
配任淑人繼配邢淑人俱先公卒再繼張孺人子一廷柎附貢生  
女三適某某孫一毓炯由三品廕生中式嘉慶戊午科舉人孫  
女四適某某曾孫三世鴻世麟世鳳銘曰  
不露其才而深識者推之不竟其志而深識者亦知之嗚呼斯人  
也竟止於斯

右墓誌銘紀昀撰



國語考原英有不考

卷之十一

四

劉斌

劉斌江西南豐人乾隆三十四年進士分發刑部學習四十二年補福建司主事四十四年七月充山西副考官十月升雲南司員外郎兼總辦秋審處四十五年京察一等八月奉命提督四川學政四十七年擢吏部驗封司郎中仍留學政任四十八年差竣旋京經大學士阿桂奏留刑部四十九年補陝西司郎中尋丁母憂服闋補雲南司郎中旋授甘肅甘州府知府五十八年計典卓異五十九年升浙江溫處兵備道嘉慶三年擢福建按察使四年七月陳請開洋商船照粵省例酌帶礮械以資禦盜奏入奉旨著交書麟汪志伊按照摺內所指情形是否可行詳悉定議具奏

商船攜帶礮械雖為禦盜匪起見但配給礮械必須官為辦理該商等向各衙門請領以及過關盤驗回棹日仍繳縣庫不無守候呈請之煩並恐不肖官吏從中需索畱難於商船多有不便且商船呈領礮械出洋後或有因資本折乏為盜匪所誘入夥豈非藉寇兵而齎盜糧或商船為盜匪所劫得有船照礮械即將盜船改充商船混入海口而照內所填有器械數目地方官亦無從辨其真偽轉恐稽察難週見在閩省盜風稍斂僅有盜首蔡牽尙未擒獲祇須嚴飭巡洋弁兵實力查拏無庸另議章程若商船准給礮械出洋實無指出前項情弊亦可照所奏辦理不必迎合拘泥惟期於事有實益尋依斌議行八月升浙江布政使未赴 諭曰昨

經降旨令阮元前赴浙江署理巡撫日內卽由京起程但見在該省正當收漕之際必須大員董率稽查劉斌曾任浙江道員於地方情形尙爲諳悉前已擢浙江藩司著卽馳赴新任接印辦事務須到在阮元之前不可稍遲其福建按察使印務卽著劉斌告知汪志伊揀員署理以便劉斌卽日起程毋因交代細事稽其赴任也五年浙之金衢嚴等處被水斌親詣勘災區分輕重以實具奏得旨蠲緩七年因病告假回籍九年九月授刑部右侍郎命迅速來京供職斌具摺謝恩力疾北上途次奉溫旨緩程十年正月到京召見垂詢病狀斌據實陳奏賞假半月二月以病劇奏請開缺奉諭劉斌著准其開缺在京調理俟病痊另候

簡用七月奏請回籍得旨允准十二月在籍卒子斯祐候補縣  
丞斯璋乾隆丙午科舉人直隸候補知縣斯崑嘉慶辛未科進士  
改庶吉士

右 國史館本傳

伊朝棟

今上親政之年以甯化伊秉綬知廣東惠州府秉綬御其父光祿卿公以往後三年其民陳亞本陳爛屐四作亂秉綬既擒亞本先事請誅爛屐四忤大府劾戍邊方是時粵兵之從賊者或爲僞前鋒僞三大王諸臣諱莫敢言光祿卿公自以嘗爲九卿義不得苟止具疏欲以聞大府并劾公褫職聽勘於是亂益劇大府倉猝自裁勘者奏公言皆實秉綬故無罪 上旣褒雪其事起秉綬知江南揚州府公復就養來江南以卒秉綬奉喪歸葬貽書芭孫屬文其神道之碑芭孫辱與秉綬交又素知公質行乃次公生平出處志節而爲之書曰公諱朝棟先名恆瓚字用侯伊氏唐未有諱顯

者自莘城遷閩世爲甯化人傳廿一世入我朝某以歲貢生官  
順昌縣訓導不污耿逆僞命是爲公曾祖以公贈奉政大夫祖  
某贈朝議大夫父某縣學生贈如公階妣王雷俱贈夫人  
公年十八入縣學明年食饒乾隆十八年充拔貢生又六年舉於  
鄉又十年以陳初哲榜進士入刑部補安徽司主事歷河南司員  
外郎湖廣司郎中遷浙江道監察御史掌其事轉戶科給事中海  
陸光祿寺少卿通政司參議鴻臚寺卿大理寺少卿最後爲光祿  
寺卿得疾海澱直廬請告凡十有五年以嘉慶十二年八月六日  
考終年七十九配羅氏封夫人子二長卽秉綬次秉徽監生孫  
四紹祖紹煊皆從九品紹曾紹錢孫女二公少湛靜魁奮好日讀

其大父所篋藏書敏於文家貧時出講授性耿介歲饑食粥或欲周之而勿能也故左副都御史雷公鉉家居一見以爲可與言學其鄉試見知故光祿卿嘉定王公鳴盛在刑部見知諸城劉文正公公自問雷公之學益究心儒先書言動有桀黷先後居喪一用朱子家禮茹蔬三年哀感行路同鄉蔡文恭公來弔退而歎曰鄉人不乏雅材至於居貧實樂居喪實憂吾見伊君矣方會試旁皇治裝適族子有以事繫縣者持百金詣公求一言公不可已而事聞於縣縣令雅重公意釋族子公亦竟不受金居卽舍二十年敝車羸馬盤桓人後獨坐曹無寒暑在人先政有得失昌言輩中言之不得必爭爭之司不勝則爭之堂終不勝歸而焚香讀書以平



其氣自主事遷御史皆用積資自給事中以至於爲卿皆特擢不由  
論薦公素寡言嘗謂爲儒自不妄言始尤善處貧嘗曰安貧樂道  
人所恆言道果奚在恬退則道有其象焉謙和則道有所焉斯  
固可樂耳益公所親受雷公以溯其鄉先生蔡文勤李文貞之流  
風而身踐之者如此著有南窗叢記並詩文集若干卷藏於家其  
立朝無援雖嘗被遇 高宗不居要路晚以秉綬官中事爲 國  
一奮天下覩公丰采及公卒而閩學之傳或幾乎息矣此於今世  
非一身一家之痛也秉綬服公之教又能承公志而大其施故具  
著所繇且爲銘曰

閩學自宋傳緒有從其在於近蔡公雷公公最晚出勵志禔躬載

出載處心亨道盡往蹇來譽契於 高宗嘉汝小心 召對從容  
公老江湖痛抱遺弓十旬素食慟此遭逢有孤其操有耿其衷養  
以靡悔亦克有終歸就考卜有碑斯穹子孫繩繩來者方隆顯銘  
詔後遺直是恫孰來下馬欽想餘風

右神道碑銘王芑孫撰

閩南爲儒者世服朱子緒言雖親受業陽明先生之門如薛行人  
中離於朱子不敢悖 本朝安溪李文貞公漳浦蔡文勤公益推  
而明之文勤授甯化副都御史雷公雷公授同縣光祿寺卿伊公  
其爲學以慎獨爲本其推行始於固窮成於成仁取義故其道近  
而難至其事質重而光明嘉慶十有九年公之子前揚州府知府

乘綬爲祠堂於學宮之里以祀公門塾堂室皆備誨日升主於室  
公之配羅夫人耐焉而寓書於陽湖憚敬請銘古者士大夫立家  
廟祀曾祖以下有功德則專立祠堂於禮甚宜其麗牲之石刻之  
銘亦應古義惟是敬以後學操簡畢與廟廷之事懼勿任爲罪於  
後世而乘綬請勿暇遂不敢辭公諱朝棟字用侯姓伊氏先世自  
河南遷福建之甯化縣世爲甯化人曾祖應聚官順昌學訓導  
贈儒林郎祖爲舉父經邦俱 贈中議大夫公縣學拔貢生乾隆  
二十四年鄉試中式三十四年會試中式 殿試賜進士出身歷  
官刑部安徽司主事河南司員外郎湖廣司郎中掌浙江道監察  
御史戶科給事中擢光祿寺少卿通政司參議鴻臚寺卿大理寺

少卿光祿寺卿積階中議大夫 加封資政大夫 予告後就子  
秉綬養於惠州及揚州卒年七十有九公久官刑曹持法平素不  
近要人故無推薦公者以小心供職受 知 高宗純皇帝不及  
三年卽拔置九列嘗 召見 諭曰福建理學之邦汝謹厚守繩  
尺朕所知也會得末疾未竟其用天下惜焉居家循循然造次必  
以禮文勤之從子文恭公新嘗曰居貧實樂居喪實憂吾於伊比  
部見之羅夫人同縣人有懿行例封淑人 加封夫人卒年八十  
一子二秉綬其長也次秉徽國子監生古者銘廟之辭多紀勳伐  
至北宋以後始有推本所學爲後世經程者今公之學既遠有統  
宗遇 聖天子激揚表暴之誠信不欺如右所紀敬雖淺瞽謹於

銘著古今爲儒之所以然秉綬謹下丹加額如碑法以告天下後世之有志於學者其辭曰

聖貫天地宙合百家蟲人萬千內外精粗如左右腓相互而前漢拾秦燼負器抱經壘高而堅性天之說波澀瀾渟纖流涓涓人心蓄靈有隙必通汙爲清言剖析精析微冲虛南華意同語元達摩乘之提第一機無聖廓然曹溪始大西江八十眩地薰天帝王民氓至智極愚頌身重淵韓公舉幡闢市之中一喙獨拳致彼飾詞淡泊儒門棄爲蹠筌北宋中葉大儒之生渾渾桓桓就彼所言推之吾書極天地先堯舜開明遞及子與旁薄縣延性天之說此挈其總彼掎其偏如失盜家復已劫資匡綏室田如逋訟人直已折辭

槩竄頑姦雖其所言有過不及軌轍無愆朱子歎歎江匯於海杓  
攜於躔入聖之要下學上達宣尼所傳存之存之隱微持之功該  
本原傳錄漸多遂涉支離溺於言詮陽明閭氣振臂一呼力破攀  
牽此如夏冬以反爲成六氣乃宣此如吸呼以斷爲續百骸以安  
上五千載下五千載抑高轉圓新故所代如南北陸如上下弦聖  
人無我賢者迭勝以扶其顛其中軒輊得失多寡尙可尋浴朱子  
之弊極於拘曲不溢他端陽明之弊顛倒狂聖反覆坤乾故爲儒  
者必始朱子勿怠而遷

右祠堂碑銘惲敬撰

日本銀行券  
五  
ニ  
ニ  
ニ

--	--	--	--	--	--	--	--	--	--

羅國俊

羅國俊字賓初湖南湘鄉人少穎異從伯兄國綱讀書九峯山故  
又號九峯博通經籍乾隆己卯舉人己丑進士入詞垣尙氣節恥  
奔競賦性剛決遇事無所依回充國史館纂修官以公慎稱時執  
政有欲改易起居注者上書爭之娓娓數百言同官服其切直庚  
子分校順天鄉試所拔多知名士平居接引後進傾襟推轂英俊  
樂遊其門歷春坊贊善中允升侍講侍讀學士 高宗純皇帝幸  
熱河 特旨召見許乘傳馳赴既至 賜對行殿詢及家世甚悉  
凡扈從廢吟之章操觚立就嘉慶二年由詹事府詹事擢內閣學  
士管理誥敕房事恭摺絲綸頻膺異數趨漏下直風度凜然一時



有名臣之目四年春辦事閣中忽暈仆良久乃甦猶力疾視事不  
少懈時屆會試 欽派爲稽查龍門大臣事竣遷禮部右侍郎轉  
左侍郎五月卒於官年六十有六平生篤於內行寬於待下身膺  
顯秩約束子弟最嚴無貴介陋習先是仲兄國興遊京師與千叟  
宴人以爲榮著有館閣存餘集見耆舊集有恭紀演連珠九首並  
序

右事略胡鈞撰

國朝耆獻類徵初編卷九十九補錄

卿貳五十九

伊朝棟

公諱朝棟字用侯汀州府甯化伊氏也當雍正乾隆之間甯化有雷副都御史鉉陰先生承方以朱子之學講於里中勸教學者公少以二人爲師友故其生平言語動作不苟而於取舍進退常有以自守也以拔貢生中乾隆二十四年己卯科鄉試己丑科成進士其閒嘗處極困將會試而無資邑令方重公有富子被逮請公一言解之而酬百金公執必不可旣成進士分試刑部補安徽司主事諸城劉文正公最賢公欲薦舉而文正歿其後歷員外郎郎

國朝書局影印 卷九十九  
中皆計俸需次而僅得之公治曹事甚勤恪不求人知獄有不平必與同僚上官力爭之人或說或不而公不爲易故自分發刑部二十年乃擢浙江道御史爲御史一年轉戶科給事中嘗奏對純皇帝知其賢於是五轉至光祿寺卿且將重用之而公遽病偏枯以乾隆五十七年去職年六十有五矣是時公長子秉綬以進士爲刑部主事於是 予告養病於京師又逾三年爲嘉慶元年扶掖以與公卿干叟之宴其後秉綬知惠州府公從至惠州當是時嶺南多奸民歸善博羅屢有爲逆者而提督標兵反與通謀大吏特諱言之也秉綬旣以先事請兵靖亂觸總督吉慶之怒劾戍矣而亂黨遂起公以謂子之屈可以不伸而嶺南官弁縱賊及兵

與賊通之患不可不詰身嘗爲侍臣不敢隱草疏將奏之會後總督倭什布至聞吏民所論皆同公言乃頗奏陳其當得罪者而秉綬因以得釋後爲揚州知府公從至揚州以嘉慶十二年八月六日卒於揚州官舍年七十九公事親孝居喪盡其哀相國蔡文恭公嘗曰居貧實樂居喪實憂者吾見伊君而已自少好讀書旣病去官作南窗叢記多發先儒疑義其爲詩尤有高韻逸氣曰賜硯齋集四卷夫人羅氏二子秉綬秉徽始公爲刑部主事簡爲刑部郎直四庫館與公未及相知後乃知公子秉綬公喪將歸葬乃先爲墓誌以授其子公家世俱詳簡所爲公祖 贈光祿誌中矣故不復出云銘曰

居約有恥既貴靡肆葆茲常度淵乎君子其道有承其學有嗣其  
歿無憾安宅桑梓

右墓誌銘姚爾撰

國朝耆獻類徵初編卷一百目錄

卿貳六十

蘇楞額

明興

馬慧裕

曹城

錢澧

和瑛

熊枚

宗室宜興

國朝官制類考卷一  
百一十一

國朝耆獻類徵初編卷一百

通奉大夫前署江西巡撫江西布政使司布政使湘陰李桓輯  
卿貳六十

蘇楞額

蘇楞額納喇氏內務府滿洲正白旗人乾隆三十四年三月由內  
務府筆帖式升主事十月選員外郎三十九年升郎中四十二年  
升驍騎參領五十五年授武備院卿五十六年調上駟院卿五十  
八年充粵海關監督時英吉利國遣使入貢有畱人在京總理西  
洋貿易之請 上降旨斥駁復慮其藉詞生事誑誘夷商 命蘇  
楞額偕兩廣總督長麟等向各夷商詳晰曉諭五十九年 召來



京未至 命署兩淮鹽政嘉慶元年正月以例外呈進貢物得旨嚴飭五月調浙江鹽政兼織造事務三年疏請仁和石堰等七場開墾蕩灘塗地共三十餘頃照例升科下部議行四年九月回京仍任上駟院卿十一月授內務府護軍統領管理圓明園在總理工程處行走旋調奉宸苑卿仍管圓明園事務六年二月授總管內務府大臣四月升工部右侍郎七年五月偕兵部尙書豐紳濟倫等議減各處兼攝司員 上以其所議偏私交部議處部議降二級調用 加恩改爲降三級畱任六月轉左侍郎九年監修裕陵 隆恩殿工竣 賞穿黃馬褂十一年正月調戶部右侍郎兼管錢法堂事務 一月署工部左侍郎七月以失察匠役潘玉

功段母交部議處議入 諭曰此等兇悖之徒何以挑在內廷應  
役蘇楞額管理造辦處失察之咎較重著照部議降二級留任十  
一月 賞紫禁城騎馬十三年 命承修 萬年吉地工程尋以  
蘇楞額等於原派承修大臣盛住侵吞加價及扣成銀兩徇隱不  
言部議革職 上加恩改爲畱任降三品頂帶十一月以內務府  
大臣侍郎廣興等於官例應支紬緞擅行剋減交部嚴議分別治  
罪蘇楞額應降調 加恩改爲降四級畱任再降四品頂帶十二  
月 賞還三品頂帶十四年三月兼正紅旗漢軍副都統 諭曰  
上年因蘇楞額管理吉地工程時不將盛住貪劣款蹟奏參降爲  
三品頂帶今思蘇楞額前此獲咎祇於不行舉劾盛住伊另有經

手工程並非與盛住同辦本年朕恭謁西陵親閱蘇楞額所辦工程均屬完整昨已補放副都統著加恩賞戴二品頂帶四月授工部右侍郎六月遷工部尙書十二月以工部書吏王書常用假印文領冒領庫銀事發革蘇楞額職十五年四月賞圖明園六品苑丞九月命巡視浙江鹽政賞內務府員外郎銜十六年調署兩淮鹽政十七年五月賞三品頂帶授總管內務府大臣十一月授正紅旗漢軍副都統十八年三月命修秦陵寶城工程賞戴花翎九月授戶部左侍郎十二月復賞紫禁城騎馬十九年正月奏近年黃河兩岸下至海口淤出新地甚廣約數百里又鱸魚港諸處淤地截長補短亦三十四萬頃若聽民墾種

必啟訟端請招民認買開墾升科又言向來外洋夷民准與粵東客商以貨物互相交易近年竟有夷商賄通洋行商人藉護回夷兵盤費爲名將內地銀兩絡繹偷運每年至百數十萬兩並將外洋低潮銀兩製造洋錢暢行無忌商賈貪易洋錢於貨物轉爲末務致關權盈餘銀兩漸形短絀宜亟加嚴禁俱下本省督撫議奏二月升工部尙書兼鑲黃旗蒙古都統七月 上謁 東陵 命偕甯京王大臣辦事八月 諭曰前據和碩公主呈繳海淀寓園一所當交內務府大臣將如何分給各該衙門暫作公所之處酌議具奏此事已將半年尙未見議上甚屬遲緩蘇楞額本係管理回明園事務漫不經心著交部議處部議革職 上加恩改爲甯

任二十年七月因召見時先已退直拔去花翎八月調鑲紅旗  
漢軍都統九月調正紅旗漢軍都統十月賞還花翎二十一年  
七月英吉利國遣使入貢命往天津會同長蘆鹽政廣惠照料  
奉諭該貢使到津後務令禮節演習嫻熟方可帶同來京並令  
該貢使於禮成後仍由天津登舟歸國蘇楞額等於筵宴貢使之  
次日卽帶起程又縱令貢船私自開行交部嚴議議上諭目前  
派蘇楞額會同廣惠照料英吉利國貢使彼時朕面諭蘇楞額以  
該貢使在天津筵宴如謝宴跪叩未能如儀次日卽帶領北上又  
諭該貢使回國時仍令由天津乘坐原船啟行蘇楞額等已遵旨  
曉諭而於原船並不派員護守致令私自放洋部議降五級調用

賈屬咎所應得姑念蘇楞額管項較多著革去工部尙書正紅旗漢軍都統管理造辦處拔去花翎加恩以三品頂帶降補工部左侍郎仍畱總管內務府大臣管理茶膳房圓明園事務革職畱任八年無過方准開復九月革退紫禁城騎馬二十二年正月賞還花翎七月復授工部尙書鑲黃旗漢軍都統八月充崇文門正監督十月上以蘇楞額年老加恩仍在紫禁城騎馬二十三年七月以工部續估東嶽廟工程浮開銀兩蘇楞額查出弊端上嘉其稽覈認真任勞任怨命開復任內所得處分以示獎勵二十五年正月諭曰蘇楞額將近入旬著於本管部旗及內務府值日之期照常進內其餘一應奏事引見之日俱毋庸進內十

月 諭曰本日派出守護 昌陵大臣內尚書景安蘇楞額並無  
過失因念伊二人俱年近八旬若仍令管理部務恐精神不能周  
到或致因公獲咎轉非保全之道伊二人俱受 皇考深恩俾得  
依倚 橋山藉伸忱悃想伊等自必知感也十一月 奉先殿供  
奉 孝淑睿皇后神龕有剝朽之處蘇楞額以派員承修未能敬  
慎部議降五級畱任道光二年三月 東陵總管內務府大臣阿  
克當阿奏 裕陵 隆恩殿暖閣內外柱有剝朽情形 諭曰  
陵寢工程最關緊要今甫屆二十年卽露剝朽情形自係當時辦  
理草率所有原修蘇楞額著交部嚴加議處先拔去花翎蘇楞額  
素諳工程何以閱時未久卽有剝朽膠裂處所蘇楞額卽行前赴

裕陵 隆恩殿詳勘俾知愧懼尋議上 諭曰蘇楞額辦理工  
程年久乃疎忽從事以致工料未能經久著照議革職卽在工次  
聽候所有 隆恩殿工程明年擇吉興修仍著敬謹妥辦其嘉慶  
八年以後重修案內動用錢糧物料統共計以十成著蘇楞額賠  
繳五成四年三月 裕陵 隆恩殿工程督辦完竣得 旨蘇楞  
額著賞給內務府員外郎准其回京七年卒子文光內務府郎中  
文喜內務府郎中

右 國史館本傳



國朝詩林卷之六

三

明興

明興富察氏鑲黃旗滿洲人乾隆三十四年由戶部八品筆帖式授直隸保定府理事同知調熱河同知四十年擢天津府知府四十二年十月擢天津道十一月以錦州協領富伸保等辦差科斂一案諭令明興體訪覆奏得實四十六年擢直隸布政使四十七年四月擢山東巡撫御史錢澧奏查山東虧缺上以明興係新任無所瞻顧諭將章邱東平益都興歷城一律親往盤驗至通省州縣著明興詳查妥辦予限彌補七月奏查通省虧缺約有二百餘萬得旨著照虧缺多寡員缺大小覈定期限統於一二年全數彌補以清帑項尋奏通省依限全完又以曹克濟甯各州

縣衛六月後連值大雨湖河漲溢地畝被淹遵 旨查勘奏請展  
賑 上獎其所辦均屬妥協五十一年閏七月以歷城監犯許四  
妮等九名同時越獄交部嚴議嗣以直隸大名劫獄戕官一案首  
犯段文經徐克展在逃未獲 諭曰明興等平日俱能辦事此案  
正犯竟不能弋獲將何顏見朕九月以司監斬犯段文經等二十  
名脫械越獄交部嚴議又以兩次越獄案犯及大名正犯日久未  
獲部議革職得 旨從寬畱任五十二年二月 諭曰山東連有  
越獄之案明興既不能先事防範臨時又不能妥速弋獲大名案  
內段文經雖在直隸滋事而入卦邪教多在單冠二縣明興疎縱  
之咎已無可辭及段文經逃至館陶又不能即時弋獲今日久未

獲該撫恐懼惶惑一籌莫展豈可復畱巡撫之任致滋貽誤著來  
京候旨尋以明興獲咎因辦理地方公事不能振作尙無大過補  
授刑部侍郎四月 命赴山東督濬河道五月奏會勘挑濬濟甯  
之揚家閘汶源各泉一律疏通得 旨好一切實力爲之正汝補  
過之慮也七月工竣授山西巡撫十一月以大同一帶歉收明興  
辦理賑卹事宜錯行銀米尋復飾詞迴護又以山東巡撫長麟拏  
獲窩棍糾竊訊出歷年積案明興前在山東有年不能飭屬查拏  
賊奉 嚴旨申飭五十三年七月授烏什辦事大臣五十四年二  
月 命署理阿克蘇領隊大臣事務 諭曰明興前在巡撫任內  
聲名甚屬平常並未將伊治罪令其前往烏什今又令其署理阿

克蘇事務新疆回地尤當潔己奉公儻仍向回眾需索必從重治  
罪六月調赴葉爾羌辦事十月授兵部侍郎五十七年五月調吏  
部侍郎九月調刑部侍郎十二月授喀什噶爾參贊大臣五十八  
年五月因辦理薩木薩克及霍罕地方外番之事與葉爾羌辦事  
大臣雅德意見不協奉旨離任仍交部嚴議六月授二等侍衛  
赴庫爾喀喇烏蘇辦事嘉慶元年十一月川陝教匪滋事明興奏  
山東爾羌赴商南一帶協剿論以明興雖未經軍旅而於交界  
幫同截擊亦屬有益旋以商嶺甯謐隨陝甘總督宜縣往達州會  
剿川匪二年二月賊首徐添德王三槐冷天祿等屯聚東鄉縣治  
接引巴州通江城窺伺太平經明興等帶兵進攻截賊句合之路

偵知徐添德遠救王家寨守營之賊不多乘虛痛勦燬奪賊寨遂復東鄉三月賊遁踞清溪場金峩寺將軍明亮等分飭明興以木筏冒雨渡河潛令善泅人赴東岸斷賊船纜索賊不及救我兵擁入清溪口盡奪賊卡四月賊潛撲清溪營擊卻之尋官兵攻破金峩寺明興邀擊之於陰洞殺賊三百餘獲大礮八軍器一百餘又率兵由鐵嶺埡攻取茨姑梁賊卡五月隨領侍衛內大臣德楞泰奪獲分水嶺火石嶺賊寨賊首王三槐分授北踏毛坪明興等敗之六月官兵痛殲賊眾於重石子香鑪坪陳家壩南天洞各處明興均以帶兵策應有功奏入疊奉 恩旨嘉獎 賞玉韉香囊荷包等有差七月宜縣奏大兵前赴夔州請令明興赴夔督辦糧餉

九月調赴湖北宜昌一路轉運軍需三年正月賊眾屯聚開縣境內明興隨總統勒保禦之於石壩山白沙河屢有斬獲三月官兵至土城埡賊分股撲營經明興等截殺又進兵正登寨先後斃賊無算五月王三槐等由渠縣分竄梁山墊江明興在梁墊交界截擊敗賊觀音巖又由鐵索橋追賊至青岡嶺山勢高峻督兵仰攻自辰至未斃賊七八百人卽古營山梁賊潛夜撲營明興右膀右股俱受矛傷仍指揮兵勇擊退賊眾奏入 上嘉其奮勉授頭等侍衛四年正月明興在達州養傷會成都副都統勒禮善帶滿洲兵駐達州防守病卒總督勒保奏令明興就近暫署勒禮善遺缺管帶原駐滿洲兵彈壓尋奉 命卽授明興成都副都統接辦川

省糧餉三月以辦理糧餉未善奉 旨撤回軍營十月明興養傷  
平復奏懇調省兵四百名帶領勦捕 諭經略額勒登保調明興  
赴營酌令搜捕以試其能到營後或報效或退縮據實具奏尋額  
勒登保覆奏明興年近六旬新受矛傷恐未能趕賊打仗查明興  
前在開縣設立營寨賊未敢侵若調至軍營該處又須遣人接辦  
請仍由明興在彼酌給兵丁禦小股賊匪 諭如所請行尋調正  
白旗漢軍副都統 命回京供職五年二月以副都統銜授吐魯  
番領隊大臣七年七月調庫爾喀喇烏蘇領隊大臣九月調喀喇  
沙爾辦事大臣十月奉 命回京署鑲藍旗漢軍副都統旋授正  
黃旗蒙古副都統八年五月調鑲藍旗漢軍副都統十月調正紅



旗滿洲副都統十一月署熱河副都統是月授理藩院右侍郎署  
鑲藍旗滿洲副都統九年六月署工部侍郎七月調理藩院左侍  
郎九月調工部右侍郎十二月調正白旗滿洲副都統十年十二  
月以喀喇沙爾婦員伊精額虧缺庫項一案訊據明興家人俱稱  
伊主收受盤費屬實奉 旨革職旋訊明興家人撞騙並未知情  
諭以頭等侍衛赴哈密辦事十一年二月以喀喇沙爾辦事大  
臣任內屬員有虧那情弊並未奏參降四等侍衛尋復以喀喇沙  
爾糧員擅動庫項明興到任盤查時伊精額將兵欠造冊呈堂明  
興不行查究轉將印冊點驗除致滋弊竇奉 旨革職旋 賞  
給七品筆帖式在刑部行走十二年二月以回疆弁兵越級戴用

頂帶奉 旨傳訊明興並不據實登答 諭曰回疆給發虛頂執  
照起自乾隆五十六年尙係因循陋習惟明興曾任大員飾詞卸  
過不可不加以懲處明興著革去筆帖式發往熱河充當馬甲八  
月仍奉 命以刑部筆帖式用九月卒子何倫貴州平遠協副將  
全倫江西南昌城守營副將貴倫廣西潯州府通判重倫戶部銀  
庫員外郎啟倫甯國營參將秀倫戶部員外郎

右 國史館本傳

										111
--	--	--	--	--	--	--	--	--	--	-----



遼山西布政使四年正月調陝西布政使二月護理巡撫時教匪滋事 命招撫被脅良民妥議章程具奏尋奏言自行投出者官給執照飭令回籍嚴禁挾仇訐告如人數眾多酌量分配閒日行走或能勸諭數十人及帶領一股來歸者並予優賚其產業被人侵占稟官追給至年老殘廢無家可歸者分撥附近各州縣支給孤貧口糧下軍機大臣議行四月御史李遠條奏省會首邑及府州縣丞倅等官題調缺出不准將不合例人員奏請升調其未經卓薦佐貳人員不准委署州縣部議已行慧裕奏見辦軍需地方需人孔亟與他省情形不同且佐貳中承辦軍需尤爲出力者亦當予以鼓勵所有川楚陝甘等省仍請量予變通俟軍務告竣再

遵新例辦理 允之五年二月調河南布政使四月因前在河南  
按察使任內將毆斃竊賊民人汪元誤擬絞候部議降三級調用  
上加恩改爲畱任七月寶豐郟縣匪徒聽從教首劉之協句結  
滋事慧裕帶兵往勦槍斃並施轟斃賊匪二百數十名餘匪退據  
翟家寨復督兵攻破寨門生擒偽元帥李岳偽總兵孫繼元及餘  
賊二百三十餘名殲斃六百七十餘名首逆劉之協旋於葉縣就  
獲 上以辦理迅速寶馬慧裕一人之功且設卡盤詰將首逆劉  
之協拏獲尤爲快事 賞慧裕騎都尉世職九月升湖南巡撫六  
年奏楚省應辦京局鑄錢黑鉛年久沙竭請暫歸黔省代辦 上  
以其藉詞推諉 嚴飭之七年四月調河南巡撫十月奏楚匪將

次蕩平應將防江鄉勇撤伍歸農但江岸空虛必須移兵易勇請  
令南陽鎮總兵田永桐移駐江岸撥兵二千名分別布置其應撤  
鄉勇酌量給銀遣歸原籍 允之八年七月奏豫省前經招募新  
兵七千四百名並將開封團練鄉勇一千一百餘名作爲撫標兵  
丁茲除節次挑補額缺並陸續褫革外尙存二千五百餘名見在  
三省肅清邊防江防全行撤退所有前項新兵若槩行裁汰不特  
訓練垂成棄之可惜且其中無恆業者居多亦須妥爲安頓請暫  
畱各原營隨同額兵一體當差遇有缺出逐漸挑補照舊支給餉  
銀 從之九月東河衛糧廳屬衡家樓河水漫溢以疏防下部議  
處尋議降調 諭曰馬慧裕兼管河務咎無可辭本應照部議實

降姑念趕辦堵築購料各事宜正需經理著加恩准其抵銷九年  
三月衡工合龍下部議敘四月奏武陟縣攔黃民埝向係民間修  
築見屆伏秋兩汛河勢北趨埝身未免單薄再沁河兩岸隄工亦  
須培築均請於藩庫內借款興修 上允之七月因奏報河工尋  
常事件誤用五百里急遞遞花翎九月因秋汛安瀾河工穩固  
賞還花翎十二月安徽亳州一帶匪徒滋事慧裕以歸德府屬毗  
連安省帶兵駐紮檄委知府富忠阿參將翼貴等帶領弁兵赴永  
城鹿邑等縣邊境防守 上嘉其辦理妥協十一年借河東河道  
總督吳璥奏河工歲料例價不敷請增幫價歲以三十萬兩爲額  
歸入地糧攤徵 諭曰睢工幫價銀兩本年甫經徵完衡工幫價



銀七百餘萬兩於明年始行啟徵今再加以歲料幫價是小民於常賦之外歲有攤徵永定爲額與加賦何異吳璫等率行奏請實屬謬誤著交部嚴加議處尋議降二級調用上改爲降三級畱任十二年因勒休知府熊之書來京呈遞奏章言詞誕妄命前任浙江巡撫阮元刑部侍郎廣興赴豫查辦先是之書官河南時染患瘋疾慧裕未經糾參僅請飭令回籍奉旨將之書勒休至是自請下部嚴議部議降調諭曰熊之書患病瘋顛馬慧裕若據實奏參明治其罪何致來京呈遞奏摺捏砌多款乃馬慧裕僅請飭令回籍且稱俟該員病痊起用爲劣員曲兩地步經朕特旨勒休該撫又不卽時勒令回籍馬慧裕辦事罷輒屢經降旨訓飭

並不加意振作巡撫職任封圻馬慧裕不能察吏焉能安民本應  
照部議降調姑念其操守廉潔官聲尙好著來京以內閣學士補  
用十三年正月授盛京刑部侍郎六月授河東河道總督十四年  
正月以餽送欽差刑部侍郎廣興程儀部議降四級調用上改  
爲革職畱任六月以山東民人張文興赴京控告平原縣知縣淨  
收漕糧致將伊叔張樹桂押斃 敕慧裕提訊仍照原審草率擬  
結部議革職 命降三品頂帶仍革職畱任七月調漕運總督九  
月復二品頂帶十二月因微山湖蓄水短絀致江南邳州一帶運  
河水淺回空糧船多有阻滯降三品京堂尋授盛京戶部侍郎兼  
管奉天府府尹事務十五年二月調工部右侍郎兼正紅旗漢軍

副都統六月遷工部尙書七月以修復雲梯關外海口 命慧裕  
赴南河督辦九月授湖廣總督仍畱南河督工十二月工竣 諭  
曰雲梯關外北岸馬港口於嘉慶十三年黃水旁溢海口淤塞經  
朕定議修復派馬慧裕前往督辦自九月開工將引河認真挑挖  
口門陸續進占茲於本月大溜東趨奔騰浩瀚順利非常隨將壩  
工堵閉合龍黃流全由正河歸海從此恬波順軌暢達尾閘此事  
係馬慧裕一手經理宣力可嘉著交部從優議敘並賞給御筆親  
書福字用錫春祺十六年正月以河復故道請增設淮海道一員  
督理海口 從之二月赴湖廣總督任七月南河蕭南廳屬李家  
樓漫口以慧裕所辦海口挑工於攔潮壩基未能起除淨盡致泥



以江陵縣知縣李若嶂捐升知府本任有承緝展參處分未經聲明卽代請加捐離任部臣如前議 上仍改爲畱任二十一年五月 召來京授都察院左都御史七月遷禮部尙書八月卒 諭曰禮部尙書馬慧裕久歷外任著有廉名在河南藩司任內拏獲首逆劉之協勦辦寶豐郟縣匪徒尤爲出力擢用督撫宣力有年昨授爲禮部尙書正資倚畀遽聞溘逝殊爲軫惜馬慧裕著加贈太子少保銜其騎都尉世職著伊子河洲承襲踰百日卽行帶領引見所有歷任攤捐未完銀六千二百餘兩俱著加恩寬免其靈柩到京之日准其入城治喪所有任內一切處分悉予開復照例給予應得卹典尋 賜祭葬 子諡清恪子瀛洲候選同知河洲

襲騎都尉官兵部郎中孫積慶山西大同鎮總兵

右 國史館本傳

--	--	--	--	--	--	--	--	--	--

曹城

曹城安徽歙縣人乾隆三十五年舉人三十六年進士改庶吉士三十七年散館授編修四十四年充順天鄉試同考官四十五年京察一等加一級五十年大考二等五十一年京察一等加一級充順天鄉試同考官五十二年擢詹事府右春坊右中允旋擢翰林院侍講五十五年轉侍讀尋充日講起居注官五十六年大考二等超擢侍讀學士五十七年擢詹事府少詹事五十八年命稽察右翼覺羅學六十年十月充武殿試讀卷官授山東學政擢詹事府詹事嘉慶二年擢內閣學士兼禮部侍郎四年正月授禮部右侍郎二月充會試知貢舉三月轉左侍郎旋調兵部右侍郎



五月轉左侍郎九月仍調禮部右侍郎充武會試校射官十月充武殿試讀卷官五年正月轉左侍郎兼署吏部右侍郎尋命在京二三品大員由進士出身者在內廷考試城與焉六月充浙江鄉試正考官九月命於差竣後便道巡視河工六年正月授順天學政七年十一月卒於任先是五年二月命城偕禮部左侍郎多永武同監修朝日壇牌樓嗣經兵部右侍郎那彥寶戶部右侍郎周興岱覈減分賠至九年多永武以城病故請將應賠之項於伊廉俸內扣繳諭曰此項工程覈減銀六千兩有零祇係作法不符並無別項情弊多永武曹城俱係承修大員本應一體分賠但念曹城身故所有應賠之項著加恩寬免多永武並著

寬免一千兩以示體卹子嘉綸正三品廕生先城卒城遵例請改  
以次子嘉銓承廕七年引見命以知縣用

右 國史館本傳



錢澧

南園先生既葬之三十有五年章告歸至滇其子嘉棗始以墓志銘請曰先大夫舊葬於清水河祖塋兆後過高受風不吉今欲與先妣秦淑人遷葬於新卜蓉峰山塋地尙未有銘敢以煩執事章維先生吾滇之望人也其清風亮節昭著於天下越今數十年海內賢士大夫猶籍籍稱道於弗衰矧屬同鄉末學又嘗於都城數見親領其言論丰采烏敢以不文辭謹按先生諱澧字東注號南園昆明縣人祖籍江甯世居花石橋明成化間有諱鑄者遊幕入滇會太監錢能來滇以同姓故欲引使附己公恥之逃匿迤西能去始還先有王指揮者遭能之禍幾不測深重公之氣節以女許

字遂家焉七傳至先生曾祖慎居公有品學能詩祖用章公慷慨  
有勇略父拙叟公貧而好施濟時值大水傾家活鄰里皆因先生  
貴 誥贈中議大夫母李太淑人生四子先生其孟也生而穎異  
舉止岸然不苟言笑稍長拙叟公謂之曰吾家世無達者自爾堂  
伯天開公歿後舉族無一青衿子孫幾不識祖宗名諱爾其勉之  
先生謹受教從塾師王素懷李榮之學無錢買書嘗於水德庵廢  
紙中得殘篇制藝攜歸熟讀文思大進遂補博士弟子員食廩餘  
肄業五華書院山長蘇侍御霖渤深器重之稱爲滇南翹楚試輒  
前茅巡撫劉藻徵詩首拔之曰此生獨往獨來將來必能大開風  
氣當道爭欲羅致門下先生拒不往乾隆戊子舉於鄉辛卯成進

士選庶吉士壬辰散館授職檢討充國史館纂修官乙未昆明大水壞民居無算先生廬舍爲烏有亟請假歸省修牆屋儲菽水會蘇侍御卒於彌渡徒步數百里哀毀盡弟子職旣葬畢卽由墓返明年入京供職庚子充廣西副考官門生來見者不受贄儀曰寒士至京會試資斧不易但願勉爲名臣循吏吾與有榮矣辛丑授江南道御史派查通倉值甘肅有冒賑折捐事獄已成誅竄幾及百人獨不及陝西巡撫畢沅先生奏言冒賑折捐固皆由王亶望欺法營私但查亶望爲藩司時畢沅曾兩署陝甘總督近在同城豈竟毫無聞見誠使早發其奸則播惡不至如此之甚卽陷於刑辟者亦不至如此之多臣不敢謂其利令智昏甘受所餌惟是瞻

徇回護不肯舉發甚非大臣居心之道章入 上是之奪畢沅爵  
三級先是臺諫自李漱芳左遷後無人敢言事先生甫入諫垣卽  
彈大僚一時有鳴鳳朝陽之譽居無何復劾山東巡撫國泰吏治  
廢弛借納貢名貪婪無饜官民患苦所屬州縣虧空纍纍請按問  
並請嗣後勿受貢物俾督撫無所藉口 上命軍機處傳訊對曰  
御史例得風聞言事臣有見聞不敢不告先生自知憚直恐有新  
疆之行急歸寓命僕治裝已而軍機處傳 旨命隨同大臣和珅  
劉墉諾穆清前往查訊當是時和珅當國國泰素奔走其門下人  
皆爲先生危及抵山東境和珅知已彌縫危言以動先生先生曰  
且到彼再看惟劉墉山東人深知其弊嘗與先生密商比到省盤

庫和珅言不用全數彈兌抽盤數十封紋銀無短和珅遽起回館  
先生請封庫次日徹底拆封則多係圓絲雜色銀蓋借諸商人鋪  
戶充數者詰問庫吏得其實出示召領曰遲來卽封貯入官矣於  
是商賈紛紛具領庫藏一空復改道易馬往盤他處皆有短絀案  
遂定奏入 上命將巡撫國泰藩司于易簡擊問交刑部治罪聞  
者駭然噫嘻危哉夫以赫赫元輔護庇之人素心不欲查辦之事  
又適當派充欽差之首而以一御史隨其後非有過人才智則能  
發而不能收鮮有不敗者尹楚珍先生之事其明徵也 先生名壯  
西江南等省虧空 上命會同大臣某往查皆已彌縫尹 圖奏參山  
奏皆虛革職擊問論斬 上赦之賞員外郎銜回籍養親 先生有  
定識有定力不因艱鉅而餒不以旁撓而懼卒能發奸摘伏黜貪



國朝通志卷之九十一  
三  
墨而傲官邪當是時先生之名滿天下封疆大吏莫不震讐檢束  
而不敢肆其幹濟爲何如哉然自是嫉者愈眾忌者愈深欲求先  
生瑕隙以中傷之而卒不可得亦可見先生平日律己之嚴待人  
之恕不予人以指摘之柄也 上以先生敢言擢通政司參議癸  
卯四月晉太常寺少卿六月轉通政司副使頻蒙 召對先生慎  
密外閒人無知者惟總管國子監事尙書劉墉諭諸生曰錢南園  
已將科場舞弊事面奏矣諸生慎自愛八月以本官兼湖南學政  
到任後按試各郡絕干謁不受棚規取士一秉至公諄諄訓以力  
學制行有引用錯誤及字跡舛譌者手自戒責士子莫不感服三  
年屆滿奉 旨畱任己酉當選貢之年所拔士皆有學有品若武

陵趙文恪公慎軫其首著者也丁母李太淑人憂時衡州試竣星  
夜抵長沙寓城外旅店委員齋印交巡撫各官方欲挽留回署助  
以聘儀先生稽顙致謝明日遂行所過楚黔境上官吏無知者續  
丁父拙叟公憂哀毀骨立大吏臨弔一往謝外絕跡不入公門營  
葬畢杜門課子弟讀書癸丑服除北上有同年友官當道爲之致  
館餽贖悉不受先是先生督學湖南時荊州水災城圯孝感縣有  
活埋人命之案上責以近在鄰省不行查奏革職畱任又湖南  
有匿喪應試及首違礙書籍二事時丁憂急歸移交巡撫浦霖查  
辦而浦霖遂以爲己所發也捏詞奏參部議革任上曰錢澧尙  
知持正加恩以主事用比選戶部江南司主事引見奉旨以

員外郎補用卽補戶部河南司員外郎復奉 旨補授湖廣道御史人皆謂 聖主之終眷直臣卜先生之將大用也時軍機大臣和珅與阿文成公等不和辦事不在一處先生慮開朋黨之萌上疏曰軍機大臣應同在公所辦事互商可否然後情可共見近惟阿桂入止軍機處餘或入止內右門內或南書房或造辦處一切各事畫橐司員既趨走多歧況內右門內切近 禁寢向來因有 養心殿帶領引 見之事 恩加大臣不令與百官露立是以設廬許得暫止若未辨色之先一大臣入止各司官亦隨入隨出爲日既久不能不與內監狎熟萬一有如從前高雲從者雖立正刑辟而所絀已多杜漸防微理宜及早至隆宗門外直廬則各色

應差皆得瞻聽於外大臣於中辦事亦屬非體請 敕諸大臣悉照舊章同止軍機處其圓明園辦事亦同一體 上覽奏切責諸大臣謂錢澧所奏甚是卽 命在軍機章京上行走阿文成公以下皆敬之稱爲南園先生惟和珅頻加究詰欲窮以難處之事卒不能屈轉資商推乙卯扈 蹕灤陽還九月十八日病卒距生於乾隆庚申年四月初一日享年五十有六中外識與不識莫不傷悼惜先生之未及大用也軍機處阿文成公以下爲文以祭稱其有守有爲以未竟其用爲恨先生性孝友爲諸生時奔走數十里外負米以養得官翰林喜曰吾今乃得祿養親矣與仲叔曲盡親愛季弟沈早逝無子恤其婦必使得所每遠出必屬仲叔善視生

次子嘉棠卽以嗣之得廉俸無毫釐自私自奉甚約不以貴賤易官翰林時非朝會赴公所不坐車蔬食大布晏如也人或勸之荅曰吾本寒士少年辛苦如在目前且爲官而惟車馬衣服是營又烏能廉聞者歎服見故人子弟侈肆者必切戒之遇人有婚喪急難事必捐資助雖典衣鬻物不惜蓋其天性然也視學湖南時所得京俸悉出以助修會館又與里人增設府縣兩學鄉會卷金王子昆明大水先生周覽六河源委切究利弊上六河說於大吏又倡眾捐資助工水患以除鄉人德之容貌莊嚴待人又極和平雅好崇獎士類凡以詩文就質者必面指其瑕而亟揚其善蔬食畱賓高談不倦士類無不心悅爲詩古文詞戛戛獨造卓然成家

惜彙多散失僅存文一卷詩二卷尤工書法楷做十三行靈飛經  
行宗坐位帖後肆力於家廟露筋祠碑人得其一紙珍如拱璧至  
今猶購求之嘉慶丁卯鄉人請崇祀鄉賢大吏題請奉旨允準  
先生元配秦淑人有賢德嘗割股醫翁乾隆甲辰二月十五日卒  
於湖南學署距生於丁卯年十一月初六日年三十有八先生手  
爲立傳側室兩孺人鞠氏生子四長嘉樞邑庠生後先生十二年  
卒次嘉棠嘉慶癸酉拔貢歷任元謀甯洱二縣教諭卒於官三嘉  
棗邑增生孝廉方正四嘉植早卒孫幾人皆嘉棗出銘曰  
太華昆湖坤輿磅礴篤生賢豪審審諤諤抗疏納忠聲震寥廓雖  
未盡用賢關已拓蒼蒼其松矯矯其鶴巖巖其山蕩蕩其壑載卜

牛眠元關局鑰勒銘山阿千秋於鏤

右墓誌銘程含章撰

侍御錢南園先生諱澧字東注先世江甯人遠祖鑄明成化間幕遊昆明遂家焉會太監錢能使滇以同姓故欲引使附己鑄逃居迤西能去始還父世俊家貧以治銀爲業先生少有大志舉止岸然少長從塾師遊聞古賢人傑士輒慨然欣慕旣補弟子員肄業五華書院荷澤劉中丞藻徵詩首拔之云此生獨往獨來必爲將來大開風氣而先後主講席如趙州蘇侍御霖渤福清張太史甄陶建水陳閣學世烈尤器之中乾隆戊子鄉舉辛卯成進士改庶吉士壬辰授檢討充國史館纂修官乙未昆明大水壞民居無算

先生亟歸省明年冬入京供職庚子充廣西副考官號得人辛丑冬晉御史 特派稽查通倉蓋自是不僅以文章報 國矣會甘肅有冒賑折捐事已獄成論報誅竄幾及百人制軍皆坐罪獨不及陝西巡撫畢沅先生上疏曰冒賑折捐之事固皆由王賈望觝法營私所致但查賈望爲藩司之日畢沅曾兩署陝甘督臣豈竟毫無聞見誠使早發其奸則播惡必不至如此之甚卽陷於刑辟者亦不至如此之眾是此案皆沅釀成之也臣不敢謂其利令智昏亦復少受所餌惟是瞻徇前政明知積弊已深特不肯發之自我甚非大臣居心之道章入 天子動容 諭部臣若果如錢澧奏朕亦不能爲畢沅寬議上如先生言 上奪沅職三級先是臺



諫自李淑芳左遷後無人敢言事至先生甫入諫垣輒彈大僚一時有鳴鳳朝陽之譽或且有以第問狐狸責善者先生曰吾非敢以言爲借資嘗試祇盡吾職知無不言言無不盡而已居無何復劾山東巡撫國泰驕縱無度借納貢名而爲貪婪官民皆患之無敢指目見在歷城益都數十州縣倉庫虧空纍纍請按問又力諫勿受貢辭頗蹇直 上命軍機處傳訊主使覆奏俟 命聞者咸爲先生危先生自知慙諫暫歸寓呼僕治裝或遠謫則卽出都門踰時軍機處傳 旨命偕大臣和珅劉墉諾穆清等往訊及抵山東界和珅偵知東省已爲彌縫計危言以動先生先生曰彼縱能彌縫一處不能彌縫處處旋與劉密商潛易馬馳往廉得實逮國

泰同藩司于易簡赴刑部治罪比還報 上猶問爾何以知之深也對曰御史風聞言事臣聞言山東事者不可枚舉想來不盡子虛且既有所聞不敢隱 上領之於是 上以先生敢言擢通政司參議癸卯四月晉太常寺少卿六月轉通政司副使頻蒙 召對有所見輒直陳於是大家宰劉墉宣言於國子監曰昨錢南園已將科場作弊事面奏矣諸生慎自愛而楊壽栢旣以章宗瀛南人冒北籍入詞垣昨己亥庚子順天鄉試兩蒙 欽點內簾同考試官皆遵例迴避南北皿北貝分閱中皿卷今癸卯宗瀛又得內簾不宜再派閱中皿卷疏上報 可上論快之則以先生爲之倡也當是時凡大臣簞篋不飭者莫不惴惴而竟有謂銀工子得志

敢狂肆乃爾更陰伺其家事所以中之微先生直誠上結主  
知誠未可以口舌爭矣是歲八月以本官兼湖南學政請訓得  
溫旨有老實正經之目抵楚後按試各郡絕干謁一秉至公有  
關學校事隨時具奏凡所甄拔士諄諄教以制行力學有不率者  
加以扑捩有錢來不要錢之語越三年期滿奉命畱任己酉丁  
母憂解任奔喪所過官吏無知者又丁父艱哀毀骨立營葬畢杜  
門課子弟不與外人往來癸丑七月服除次日卽北上先是先生  
視學時湖北荊州水災城圯孝感活埋人上責以近在鄰省不  
時查奏革職畱任而湖南有匿喪應試及首違礙書籍者會先生  
聞訃交撫臣浦霖查辦不及奏聞而撫臣遂以爲己所發也奏

參及先生部議甚嚴 上特敕部臣錢澧尙知持正加恩以主事  
用比選戶部江南司主事引 見復奉 特旨以員外郎卽用既  
補戶部河南司員外旋蒙擢任湖廣道御史是時軍機大臣多不  
於軍機處辦事與舊制不合先生懷遠慮恐開角立朋黨之萌疏  
論諸大臣應同在公所辦事然後情可共見近惟大學士阿桂每  
日入止軍機處餘或入止內右門內舊許大臣暫止之廬或南書  
房或造辦處一切咨事畫稟司員既趨走多歧況內右門內切近  
禁寢向來因有 養心殿帶領引 見等事 恩加大臣不令  
與百官露立是以設廬許得暫止不應於未辨色之先一大臣入  
止而隨從司員亦更入更出爲日既久不能不與內監等狎熟萬

一有如從前高雲從者雖立正刑辟而所絀已多杜漸防微自宜及早至隆宗門外直廬則各色應差皆得覘聽於外大臣於中辦事亦屬非體請 敕悉照舊規同止軍機處其圓明園辦事亦同一體 上得奏切責諸大臣謂錢澧所奏甚是卽 命在軍機處行走於是妒忌之口又有以取巧非笑先生者而舊湖南撫適撫閩仍陽爲修好先生直倣絕交書荅之識者臧其橐馬先生旣敢言語無戲謔又不肯附和人相國和珅陰忌之且直詰之咄咄逼人欲窮以難處之事卒不能屈轉資商推因主駁長蘆請加鹽價又數言滇省諸事廢弛錢法尤壞疏已草會督臣富綱調任入京上數以錢法壞切責且畱內用乃止自大學士阿英勇公以下

皆稱爲南園先生其見嚴憚如此乙卯夏扈 蹕灤陽九月還至  
十八日病卒於官年五十六先生性孝友自爲諸生奔走負米試  
高等則喜曰爲有所藉以養也季弟沈早世恤其婦必使得所雖  
遠遊必使仲叔善視之與仲叔曲盡親愛得廉俸無毫釐自私終  
其身如一日自奉甚約不以貴賤易在京師嘗攜一僕徒行蔬食  
大布晏如也篤於故舊遇其子弟禮遇不稍衰若見其尙華少實  
必戒之於戚友緩急極意周恤雖典衣鬻物不惜居湖南時所得  
京俸悉出以修日下會館又與里人增府縣兩庠鄉會試卷金王  
子昆明復大水當路議修濬先生周覽源委獻六河說且倡眾捐  
資助公帑河工以成鄉人德之然時已兩丁大事所積廉俸之餘

國朝書目 卷一百一十五  
手  
贍家猶不足實藉弟子束脩以自給也爲詩古文博奧精悍同輩  
並後生以詩文就正往往面規其失而私揚其善士論翕然宗之  
其卒也 朝野悼惜部臣援例飭驛護送歸里軍機大臣阿英勇  
公等爲文以祭稱其有爲有守以不能竟其用爲恨子四人後五  
年三逸紳士呈請以先生從祀鄉賢經雲貴總督大學士書麟批  
司道查議云錢故宦亮節清風到處口碑宜無愧於俎豆會書節  
相旋以軍務調任兩湖事不果行又八年嘉慶丁卯總督伯麟適  
兼署巡撫會同學使譚光祥體察輿情詢謀僚屬奏奉 恩旨準  
以先生從祀鄉賢

外史袁文揆曰觀南園先生生平志節卓卓誠不附中貴之鈿

子孫也抑余聞南園徵時每於廢紙中拾殘編誦讀不驚虛聲趨走達者之門二軼事殆合於古大臣建樹赫然當其平居未遇時卽有一二表異於眾者與然而薦紳先生鮮知之者及南園旣遇乃無不稱荷澤福清諸君子爲知人使先生終老不遇無所表見於世則彼數君子者亦將不得以知人稱矣悲夫

右別傳袁文揆撰

御史錢澧之劾巡撫國泰也大學士劉文清公及和珅奉高宗命往山東訊之國泰素與和珅善和珅亦欲陰爲之地而是時錢御史同訊方鞠獄曰國泰忽起立罵錢御史曰汝何物劾我劉公大怒曰御史奉詔治汝敢言欽使耶立命隸人批其頰國泰懼



而伏和珅遂不敢開釋獄上國泰誅死初錢御史將奏國泰事詣所善翰林邵晉涵曰家有事需錢十千子有錢可借乎邵曰錢可移用將何事也蓋告我錢御史日子勿問何事發欲用此錢當於吾子取之越三日而國泰事章矣時國泰聲勢方盛人皆爲御史危幸 高宗仁明御史得安全尋擢通政司而山左撫民者去一凶人萬姓頌歌焉邵翰林於是叩錢御史日子前告我需錢十千豈爲此事耶曰然吾劾國泰自度必受 嚴譴戍邊故預備資用耳邵曰若果有此行十千錢亦不濟事曰吾性喜食牛肉在道可不用儉從吾以五千錢市牛肉日啖此可以無飢其餘錢吾自負之得達於成所足矣私自防備如此蒙 上明鑒無所譴責錢

亦不必借矣錢御史秉質清剛能甘淡泊居官不飾輿馬市驪損  
一曰取其賈之廉也有邀之宴飲者嘉肴不敢恣啖或問之荅曰  
吾家常淡食恐美味適口後難安於儉殼耳蓋惟其能儉故能廉  
能廉故能直言不撓天下之士窮極嗜好者求其以道居官不亦  
難乎

右書事張士元撰

昆明錢先生諱澧字東注號南園由翰林轉御史歷官通政司副  
使降主事復授御史年十八游同邑王素懷先生之門素懷之教  
首嚴立品但有一介之荷輒屏之以爲非先生謹守其教曰古人  
立品從慎獨中始於人所共知而猶不檢獨中豈可復問人禽之

界混雖破萬卷徒以取罪聖賢而已生平正直之學端本於此是以居心至實植身至峻執事至敬與人至忠而兩入諫垣能言人之所不能言且言無不實皆關 國家大紀綱大法度於甘肅冒賑參畢沅之贍徇迴護山東虧空參國秦之廢弛貪婪均得 旨查辦奪級治罪有差後因軍機大臣和珅與阿文成公等不和辦事不在一處先生疏請復軍機處舊規曰臣伏覩我 朝設立軍機處向來大臣與其職者入皆萃止其中庸以集思廣益仰贊高深地一則勢無所分居同則情可共見卽各司咨事畫彙亦得有定所而無殊歧誠盡善不易之法也乃觀近日惟大學士阿桂一人每日入止軍機處大學士和珅或入止於內右門內舊許大

臣慙止之廬或入止於隆宗門外近造辦之廬大學士王杰則入止於南書房尙書董誥同之尙書福長安則止於造辦處每日僅蒙 召見時聯行而入退卽各還所處雖亦有時慙至軍機處而事過輒起一切咨事畫稟司員未免趨走多歧以我 皇上乾行之健離照之明大小臣工戴德懷刑決於肌髓決不致因此遂啟角立朋黨之萌然行之萬世而無弊實莫過於率由舊章蓋自世宗憲皇帝以來及 皇上御極之久軍機大臣萃止無渙未嘗纖芥有他由前可以律後不應聽其輕更況內右門之內切近禁寢向來因有 養心殿帶領引 見事須先一兩刻預備 恩加大臣不令與各官露立是以設廬許得慙止不應於未辨色之

先一大臣入止而隨從軍機司員亦更入更出爲日既久不能不與內監等狎熟萬一有無知如從前高雲從者雖立正刑辟而所絀已多杜漸宜早至南書房以備幾暇顧問俟軍機事件既畢之後入未爲遲何必於未辨色之先遽入致諸弗便若隆宗門外直廬及造辦處則各色應差皆得覘聽於外大臣於中辦事亦屬過褻敢請 敕諸大臣應仍照舊規同止軍機處庶匪懈之忱各申五夜協恭之雅共勵一堂其圓明園辦事亦同一體近日和珅福長安止於如意門外南順牆東向之廬王杰董誥止於南書房之處並請 敕改正謹奏由是有稽查軍機之 命先生督學湖南六年士之服其教者歷數十載如一日雖非身受拔植而彼稱此

頌不解其何以然蓋愛人之誠愈久愈見是以沒世不忘也其續  
刻湖南試牘序曰學問之道日新月異不漸進卽漸退謂止於斯  
而遂保不變自古未之有也如樹木然自萌芽而尋丈而參天蔽  
日有不過數十年極其量者有數百年而量始極者有稟受獨正  
至千年猶未極量如松柏者方未極量則日見增高繼長逮量之  
既極亦遂止不復進豈但不能復進亦且漸退而就萎落焉凡木  
大抵然也惟松柏之爲松柏其高亦有止時而獨有進機無退機  
不但不改色之青青其枝柯本根漸且進而比堅金石膏液之淪  
注精氣之旁魄且變而爲茯苓琥珀靈奇光怪裨益人世不一惟  
不止之效也使者始來受事視諸技藝固多可嘉然實能持之有

故言之成文根極一理厭服眾心殆不數數丙夜披閱爲之一一  
摘瑕發垢俾知自藥務期高視古人相與頡頏又拔其尤者刊刻  
傳之豈誠以諸生爲既能哉今日所造如是異日當有不止如是  
者庶幾高視古人真可以無愧色焉耳此甲辰歲試過半時事也  
已而畢歲試舉科試觀諸生之能者不過唯之與阿其不然者卽  
前蛟螭而後蝮蚓深爲諸生病尤自病區區德如越雞不能稍擴  
啄菹之力負 聖主委任糜厚祿而爲身家肥也未幾拜 命再  
任愧畏益甚凡有一藝一技者罔敢不竭盡所能相與砥礪日邁  
月征歲試且又過半無如諸生之故態仍且如昔何也其毋乃以  
是爲可止耳夫古人不作久矣誰復見其進焉而所流傳之業於

今炯炯與元精相貫發人神智挹取不窮是何爲者耶方鞭心策力之時所以求極其量者非猶夫人之所爲極量也向使亦若諸生不過至是而止幸者獵一甲乙之科旋踵已與塵埃共盡而不然者更無論矣凡木之止而不進退就萎落也螻蟻穴乎其中斧斤尋乎其外雖其閒頗有爲人所材不盡用供樵爨然朽腐摧折亦可以歲月爲期甚足懼也諸生止此不進幸猶腸肥腦滿若可恃無虞再歷數年再歷數十年頭童齒豁視荒聽耄當前所挾強半歸烏有在使者曾再膺重寄回萬萬無所逃罪而諸生有聰明才力不自振奮甘讓能於古人以辜大造賦畀之美與 聖朝作育之心者其罪又誰諉耶因再哀前後所錄課試諸藝之尤者付



之梓人志今日之成僅僅如是而已其將日新月盛如古人之爲松柏者耶其遂如凡木之退就萎落耶噫嘻惟日望之久矣是就試牘言之而學問之功夫又豈有異乎先生教人之意何其深歟先生筆法高勁直偪平原與酣每有萬里騰雲之思畫馬以贈所知流落人間至今重之如圭璧云

右學案唐鑑輯

錢公澧官御史疏劾山東巡撫國泰貪黷穢亂虧帑數十萬金國泰者大學士和珅私人也疏入高宗立召對公力陳東省虧空狀上曰當遣和珅往勘公意不謂然上察其辭色徐曰然則爾同去可也公拜命出不俟和珅先數日行微服止良鄉見幹

僕乘良馬過索夫役甚張跡之則和珅遣往山東齎信者也公詳審其貌未幾僕還道遇公叱止之搜其身得國泰私書具言借款填庫備查等事中多隱語立奏之和珅至見公衣敝贈輕裘請易峻卻之知不可私干又知謀已洩故治獄無敢傾陂比反 命上持示國泰私書曰朕早悉其詳無待覆奏也於是國泰遂伏法累遷通政司副使提督湖南學政和珅屢媒槩其短不得乃以湖北鹽政有失鐫公三秩尋遭艱歸服闋補主事 高宗知其直更擢爲御史 命直軍機處時和珅爲軍機大臣與阿文成等不和辦事不在一處公疏請仍照舊章 敕諸大臣同止軍機處 上遽之降 詔飭責由是有稽查軍機處之 命竟日危坐其間和

國朝通志卷之百一十五  
三  
珽益謙公而高宗知其賢不可譖則凡軍機勞苦事多委之家  
貧衣裘薄嘗夜入暮出積勞感疾以殞公督學湖南嚴厲不少假  
借卷必親閱每試士正襟坐聽事目炯炯終日不倦凡字畫破體  
省俗必譴責之然勤於訓士六年中未嘗褫一諸生士之服其教  
者歷數十年如一日雖非身受拔植者亦謳頌弗衰也在湖南時  
歲大旱陸撫軍耀以禱雨得熱疾卒代者至值生日將稱觴聞者  
請餽公曰前巡撫方以死勤事今遽舉觴稱慶耶命餽燭二挺藕  
數斤巡撫懼而止

右事略李元度撰

南園居臺諫慷慨敢言無所梗避嘗劾山東巡撫貪暴不法 敕

審得實正其誅眉稜聳峭同事畏之其實中懷樂善出於至誠清  
談終日必以世事爲心君督湖南學政予從雲南入都道出辰州  
時方扃門試士予僅賄一刺候之而君遣人固請少畱比日暮試  
畢卽至予寓中蟬聯絮語燭見跋乃去其飲人以和如此君歿後  
索其詩不得雲南門人袁子文揆以所選滇南詩略見示故鈔錄  
數首於此

右湖海詩傳張維屏錄

當乾隆之末和坤自張威福朝士有恥趨其下者已可貴矣若夫  
立論侃然能訟言其失於奏章者錢侍御一人而已

右惜抱軒文集張維屏錄

錢公澧任湖南學政文取清真雅正書法直偏魯公嘗大書用嚴  
二字於澧州試院見者肅然然在任及畱任凡六年未嘗褫一諸  
生衣頂人稱寬猛之濟

右述聞謠錄

和瑛

和瑛額勒德特氏蒙古鑲黃旗人乾隆三十六年進士以主事用分戶部洊升員外郎四十七年充張家口稅務監督四十九年充理藩院內館監督五十一年京察一等六月授安徽太平府知府十二月調潁州府五十二年擢廬鳳道五十三年遷四川按察使五十五年二月擢安徽布政使三月調四川布政使九月調陝西布政使五十八年 賞副都統銜 命赴西藏辦事尋授內閣學士兼禮部侍郎銜仍兼副都統嘉慶五年七月遷理藩院右侍郎十月兼正白旗蒙古副都統六年正月調工部右侍郎四月轉左侍郎兼正紅旗滿洲副都統七月調戶部左侍郎九月調倉場侍

郎十月授安徽巡撫十一月調山東巡撫七年四月金鄉縣生員  
李玉燦訐告阜役孫張敬禮冒考知縣汪廷楷置不究經學政劉  
鳳誥奏參 命和瑛提訊旋以委審官知府德生等徇情誣斷和  
瑛並不提鞫爲給事中汪鏞所劾七月 命鏞偕刑部左侍郎祖  
之望往按之 敕和瑛來京候旨八月祖之望等奏德生等濫刑  
枉斷屬實 諭曰和瑛身任巡撫於特旨交審事件並不親提研  
鞫一聽承審之員徧袒徇私任情誣枉以株累鄉民紳士酷暑濫  
刑實不料和瑛如此負恩著交部嚴加議處尋如部議革職先是  
上以直隸蝗災恐延及東省 諭和瑛查奏和瑛以濟甯等處  
聞有飛蝗不傷禾稼奏覆至是仍 命之望詳勘之望又查明濟

南等府屬五十餘州縣均被蝗災 諭曰封疆大吏於民瘼攸關  
竟敢視同膜外實屬辜恩溺職和瑛前於金鄉縣卓孫冒考一案  
並不遵旨提訊其咎止於袒庇至匿蝗不報其罪更重僅予罷斥  
不足蔽辜著發往烏魯木齊效力贖罪十一月 賞藍翎侍衛充  
葉爾羌幫辦大臣八年擢三等侍衛調喀什噶爾參贊大臣九年  
七月 賞三品頂帶授理藩院右侍郎九月轉左侍郎仍留喀什  
噶爾辦事十二月奏喀什噶爾英吉沙爾倉儲足支官兵口糧請  
將從前減運伊犁布匹改徵雜糧四千石減價出糶並請嗣後將  
此項糧石折收錢文以免運費如所請行十年十一月查參喀喇  
沙爾歷任辦事大臣私借庫項放給官兵商民及土爾扈特回子



降革治罪有差十二月兼正紅旗漢軍副都統十一年正月召  
回京調吏部右侍郎鑲藍旗滿洲副都統五月調倉場侍郎十月  
授烏魯木齊都統十三年五月因塔爾巴哈臺參贊大臣愛星阿  
商調瑪納斯兵四百名屯田輪班更換和瑛以瑪納斯官兵專事  
操防不諳耕作一經調換必致技藝生疎咨駁以聞上韙之  
十月 召回京十四年正月署陝甘總督五月實授六月以前在  
倉場侍郎任內失察倉書私出黑檔盜領米石降五品京堂十五  
年補大理寺少卿十六年三月擢盛京刑部侍郎十一月復州甯  
海岫巖等處被災 上以將軍觀明玩視民瘼褫其職調和瑛盛  
京將軍籌辦賑卹和瑛查劾邊門章京員外郎塔清阿等匿災不

報黜革有差十七年以宗室移居盛京奏請建房屋給地租又以發遣宗室養贍不敷請一律給賞 諭曰所奏大屬非是和瑛單開宗室恩福等八人皆係緣事獲罪發往盛京充當苦差及嚴加管束圈禁之人至見擬移往盛京之宗室各戶事同移徙駐防並非有罪發遣若如和瑛所奏先將犯事發往之恩福等賞給房屋地租則此後資遣之各閒散宗室竟與獲罪發遣之人毫無區別殊乖政體和瑛冒昧陳請太不曉事著傳旨申飭先是山海關副都統額勒金布緝獲匪犯王立安供與新民屯之張姓勾結滋事十九年正月和瑛誤擊屯民張建謨等刑求誤認械送京師經刑部雪其冤部議革職 上加恩改爲畱任二月調熱河都統屬

月 召回京遷禮部尙書兼鑲紅旗滿洲都統三月調兵部尙

四月以前在盛京將軍任內失察謫居盛京宗室裕瑞買有夫之

婦爲妾降盛京副都統五月遷熱河都統二十一年七月調回京

授工部尙書兼正黃旗漢軍都統九月充繙譯鄉試正考官 賞

紫禁城騎馬十二月甘肅西甯道陳啟文奏參西甯縣知縣楊毓

錦等虧缺倉庫總督先福徇隱不辦 命偕刑部左侍郎帥承瀛

往按之得實並究出先福收受饋遺均治罪如律二十二年六月

調兵部尙書加太子少保銜七月調禮部尙書兼鑲藍旗滿洲都

統十一月復調兵部尙書二十三年二月 命在軍機大臣上行

走三月 上謁 西陵 命畱京辦事五月充文穎館總裁官八

月充崇文門監督九月授正黃旗領侍衛內大臣閱兵大臣十月  
充上書房總譜達二十四年正月調刑部尙書罷軍機大臣任二  
十五年正月 諭曰尙書和瑛年已八旬著於本管部旗直日之  
期照常來園其餘加班奏事引見之日俱不必來園用示朕優養  
耆年至意三月 上謁 東陵 命畱京辦事以兵部遺失行在  
印 命同莊親王繇課等嚴行查究四月授內大臣充繙譯會試  
正考官尋以承審失印久無確供降二品頂帶褫花翎旋以訊明  
復原職及花翎道光元年卒 諭曰刑部尙書和瑛服官五十餘  
年撫綏圻內擢正卿總理部務老成勤慎宣力 三朝驟聞溘  
逝深爲軫惜著加恩晉贈太子太保其任內降罰處分悉予開復

所有應得卹典該衙門察例具奏尋 賜祭葬 予諡簡勤子慶  
清三等侍衛奎昌山東登萊青道壁昌內大臣孫恆福太常寺卿

右 國史館本傳

熊枚

熊枚江西鉛山人乾隆三十六年進士授刑部主事四十四年充順天鄉試同考官四十五年擢刑部員外郎四十六年揀發甘肅補平涼府知府四十七年丁母憂五十年服闋補河南汝甯府知府五十一年丁生母憂五十四年服闋補直隸順德府知府五十五年擢山東濟東泰武臨道五十八年擢江蘇按察使六十年擢雲南布政使嘉慶元年兩江總督蘇凌阿等以枚督辦劉河工未竣請暫畱蘇省二年二月調安徽布政使九月擢刑部右侍郎四年轉左侍郎六年六月直隸水災總督姜晟以報災延緩遽問命枚署總督事枚歷查九十餘州縣被水輕重情形撥銀急賑先

後報 聞時截留漕米六十萬石貯天津北倉故奏以漕米貯天津將來挽運各屬不惟虛糜腳價且使距天津較遠災民未能早行領食應請分貯沿河水次鄭家口泊頭等處 上從之七月疏陳賑務事宜一被災各屬除已經奏報外其續報災重者添銀急賑其災輕者令地方官酌爲撫卹並做保甲舊例資成地保造冊存記以省大賑時查造之繁兼杜愚民覬覦刁控之漸一合學貧生向無給賑之名而有資給口糧之例已飭司行學查覈資給銀兩以供餽粥併令各教官諭以生員例不給賑係 朝廷養其廉恥別於齊民之意一查被災定例於急賑撫卹之後災輕者統歸十一月大賑災重者先於八月內普賑一月此次直屬被災較早

災民較眾 國家經費有常應將災民若干需費若干應賑幾月  
通盤籌畫或照向例或不拘成例另行請 旨一救災有平糶之  
法已飭州縣禁止鋪戶囤積居奇並禁書役藉端滋擾至自行捐  
賑之戶少則酌賞多則咨部題請 獎勵不願捐施者各從其便  
一綠營兵向不給賑查衝途營兵差使較繁其住房坍塌未便聽  
其棲身無所應請給價修理其偏僻各營兵仍不准濫邀以昭限  
制一衙署令地方官自行捐修其監獄倉廩尤關緊要應卽查明  
確估動項興修兼可以工代賑奏入如所議行尋奉 命會同侍  
郎那彥寶等籌辦永定河工堵築事宜奏言各工所需料物由附  
近地方被淹百物昂貴例價不敷請照市價購買並請發帑銀一



百萬兩應用均得 旨允行新任總督陳大文將抵京 諭曰熊  
枚俟陳大文接印後不必畱工著卽周歷直隸辦賑各地方詳細  
查勘如果地方官有實心辦賑民情甯帖者卽將該州縣存記以  
備升調儻有將賑餼銀米侵牟人已卽當明正典刑或任聽吏胥  
中飽致小民不得實惠者亦應嚴參懲治此事專交熊枚查辦儻  
有徇隱咎無旁貸八月赴東安訊僧人演亮控教諭查賑需索又  
赴文安訊匿名帖控知縣減賑私徵均鞫得誣狀報 聞並奏請  
清查賑戶不得拘每戶大口不過五小口不過三之例下部議行  
九月 上以枚查辦災賑認真擢都察院左都御史枚巡閱數十  
州縣舉辦賑實心者五員劾辦理草率者四員分別以 聞十二

月諭曰有人在朕前奏稱熊枚自九十月後卽不免有騷擾驛站需索供應之事甚至騎馬多至百餘匹州縣中有馬匹短少往往以錢文折交等語朕卽於奏事摺內硃批密詢旋據熊枚覆奏陳辨甚力復密諭令陳大文督同臬司瞻柱據實查覆茲據陳大文覆奏熊枚經歷各站尖宿所需飯食俱自行發價隨帶司員及僕從人等騎馬不過三十餘匹係照常應付頗屬安靜不特臬司瞻柱體訪相同卽詰問熊枚所參各員僉稱委無需索情事所論猶爲公允是熊枚此次周查賑務實屬盡心妥協而沿途行走安靜尤可確信著加恩在紫禁城騎馬以示優獎七年充會試正考官四月未撤闈命署直隸總督奏言直省米麥高粱已議定減

價平糶見在糧價日增應按市價再爲遞減以益民食五月奏沿河應辦要工或因隄埝殘缺或因河渠淤塞應援照以工代賑之例動用銀米及時興修先後奏入均如所請行六月失察新城縣匿蝗不報奏請察議 上免之尋卸總督事赴河間景州霸州等處查勘蝗蝻情形據實入奏報 聞七月授刑部尙書九年仍調左都御史管理戶部三庫事務十年正月授工部尙書兼署刑部尙書二月審錢局監督五臨泰缺收銅斤案於司員辦理錯謬未經駁查交部嚴議尋議降三級調用 恩予革職畱任六月 命署直隸總督率同藩司襄行簡清查各屬虧項奏言初二兩次清查案內未完之項應按限監追如無力完繳再議攤賠三次清查

經濟司覆覈實虧銀一百八十六萬有奇其餘七十八萬餘兩多  
係捐雜各款應俟分清款目追賠至六年以後截至九年止冊結  
未齊亦俟覈明續虧銀數該員離任者卽提解來直押令完繳見  
任者卽奏請革職暫予畱任勒限嚴追儻逾限不清除將該員治  
罪外卽著各上司賠繳奏入得 旨允行旋赴永定河工防汛奏  
言查河水驟長北岸二工漫溢三十餘丈北岸下頭工隄埽衝刷  
九十餘丈見飭工員趕緊鑲埽裏頭應請於司庫正款內撥銀五  
萬兩備料興工 上以所請恐不敷用令造辦處撥銀十萬兩發  
往備用閏六月回工部尙書任十一年五月工部議外省販賣鐵  
斤漫無限制奏請官爲定額及 召對時枚以官爲查辦恐滋流

弊與摺內異詞 諭曰鐵斤爲民間日用所需多寡本難懸斷儻  
責各省酌定額數易啟胥吏勒捐之弊熊枚亦不爲無見但伊既  
見及此卽應向同官阻止乃先旣隨同畫奏直至召對之時忽異  
其詞實屬非是若各衙門已經畫奏之件俱不足爲憑焉用列銜  
畫諾爲耶熊枚年逾七十近覺重聽恐於辦理部務非宜著調補  
左都御史六月左副都御史陳嗣龍以山東民婦盛姜氏控案應  
奏枚恣未決嗣龍稱其模稜並劾枚平日居官聲名平常 上命  
大學士慶桂等查訊無據 諭曰朕君臨天下卽治匹夫之罪亦  
必覈實定案況熊枚爲一品大員斷無不加察實卽予褫黜之理  
因將陳嗣龍原摺用硃筆標出交慶桂等向伊詢問旋據陳嗣龍

繕片奏陳於熊枚有何款蹟之處仍不能確指一事竟係近日見熊枚左遷私心揣測謂朕意或有憎厭因而搜求其短連章劾奏殊不知朕於諸臣工權衡黜陟一秉大公豈因伊一言細過遽將熊枚罷斥乎熊枚身爲臺諫領袖遇有公事自應和衷商推乃因陳嗣龍有譏伊模稜之語輒於公署負氣爭辨亦屬不合著交部議處尋議降二級畱任九月直隸藩司書吏王麗南僞印虛收庫銀事覺以枚署總督時失察下部嚴議部議革職奉旨以四品京堂用十一月補順天府府丞十二年充順天鄉試提調官以所辦冊卷遲誤部議革任諭曰熊枚本係棄瑕錄用之人伊職司提調於文闈大典倍宜認真經理乃不能先事督催以致所辦試

卷遲延舛誤且年已衰老本應照部議革任但念伊曾任大員著  
加恩賞五品職銜休致十三年卒子墀見任掌湖廣道監察御史  
孫常鐔見任翰林院編修

右 國史館本傳

宗室宜興

宗室宜興鑲紅旗人乾隆三十六年由宗人府七品筆帖式升主事四十二年選理事官四十三年兼宗室佐領四十八年二月授太僕寺少卿尋擢內閣學士兼禮部侍郎銜四月兼鑲紅旗滿洲副都統五月充經筵講官七月授盛京禮部侍郎十月兼署兵部侍郎十二月 命管六邊事務五十二年調盛京戶部侍郎兼管奉天府府尹事務五十五年奏言盛京內倉每年運至牛莊黑豆需用車腳銀兩查牛莊及鄰近之遼陽蓋州熊岳三城均有赴內倉納糧地畝前項撥運豆石與其發價由內倉轉運牛莊而牛莊附近納戶復舍近赴遠完糧莫若以米易豆改遠就近以昭簡便



而省運費報 閏五十六年偕將軍嵩椿等奏詳查牛莊蓋州金州岫巖等海口二十一處流寓閩人除見願領票回籍外尚有千四百餘口雖散在城鄉編入甲社仍應於閩人中添派保長協同管轄令各地方官於年終將有無增減造報得 旨所定章程合宜爲之在人勉之五十七年調盛京刑部侍郎五十九年六月以審擬疊次行劫案內之王功等三犯先行正法梟示又摺內敘次前後錯雜 上申飭之十一月授刑部右侍郎六十年正月兼正紅旗漢軍副都統尋調鑲白旗滿洲副都統四月遷倉場侍郎是年 恩旨輪蠲各省漕糧而湖南鎮筸一帶勦辦苗匪軍書旁午宜興於五月奏請將明歲輪免之湖北湖南改爲本年俾民力充

裕一切趨事急公必尤踴躍九月復奏輪免之湖北湖南漕糧既改至第一年則第二年輪免者止河南之二十一萬八千餘石與第三年輪免之江蘇一百九十二萬九百餘石多寡懸殊擬將江蘇之松江常州鎮江太倉海州通州六府州額徵漕糧改爲明歲與河南同時蠲免其江甯蘇州揚州徐州淮安五府屬仍照原議於第三年輪免實於倉儲民生有裨得 旨允行十二月戶部議奏宜興咨稱通州中西二倉前定爲繁缺今每年放米四萬餘石非復繁劇之舊應改爲簡其海運北新倉監督擬改爲繁 從之嘉慶四年正月 命署山東巡撫二月授江蘇巡撫七月奏革除州縣收漕積弊及弁丁需索陋規通飭民戶一律揀選好米上倉

俾包戶無從挾制 諭曰此等積弊實爲漕務之害著通諭有漕  
各督撫實力革除妥爲經理旋經御史具章列款劾參上 命解  
任質審以岳起代之卽令岳起會同浙江巡撫王德秉公審辦獻  
定交軍機大臣覈議九月 諭曰宜興身任巡撫不能約束家人  
私受門包固有應得之咎但因見管門家人衣帽新鮮究出實情  
卽將門包禁革是雖失察於前尙能自行查辦若如此科罪則他  
人之不能覺察及知而不辦甚或通同染指者又將如何辦理至  
原參宜興妄自尊大沈湎於酒各款玉德等審無其事其辦理諸  
生一案業據奏參馬照等在馬頭誼鬧藐視官長宜興目擊無禮  
情形若不加以究治易長恃符滋事之風其因街道狹窄拆毀欄

檣祇係不諳事體覈其情節尙非不可寬恕宜興著免其杖徒賞給二等侍衛前往巴里坤作爲領隊大臣七年二月選科布多參贊大臣尋授正藍旗滿洲副都統八年九月調盛京副都統十一月奏辦理偷斫邊外木植委員四出計其應拏妄拏名數秉公詳覈分別功過據實具奏 上是之十一年十月以吉林與伯都訥地界相連奸民易侵占影射請交吉林伯都訥將軍副都統於封堆荒隔處加立封堆可絕爭端再封堆以南吉林境內私開地畝見已理清封堆以北伯都訥民地亦有私墾請交將軍會同伯都訥副都統沿界查勘以杜欺隱並派定界官旗員與吉林同知隨時查管以專責成其有無私墾及旗民越界潛居之處著該管官

年終查明會銜結報奏入得 旨允行十二月偕將軍富俊奏稱  
遵議營伍演習長矛查盛京八旗兵丁向習捕牲打獵以弓箭鳥  
槍爲務春秋二季進城操演畢仍遣歸農與他省營伍不同未便  
以素不諳練之長矛令其學習 命如所議行十二年七月擢都  
察院左都御史十月署刑部尙書十三年四月充宗室繙譯會試  
考官五月授步軍統領七月兼署工部尙書尋以失察宗室喜壽  
與民人鬪毆降四級畱任又失察宗室儀續等行止不檢降二級  
畱任十四年卒 諭曰步軍統領宜興溘逝著加恩照原銜賞給  
卹典其任內降革罰俸處分悉予開復子明續四等侍衛

右 國史館本傳

因朝考獻類徵初編卷一百一目錄

卿貳六十一

邵洪

景祿

永祚

常福

恭阿拉

錢懋

平恕

鐵保 弟玉保

陳大文

周廷棟

宋鎔



國朝耆獻類徵初編卷一百一

通奉大夫前署江西巡撫江西布政使司布政使湘陰李桓輯  
卿貳六十一

邵洪

邵洪浙江鄞縣人祖基官至江蘇巡撫自有傳乾隆三十年特旨恩賜洪舉人三十六年成進士分吏部學習四十四年補主事四十五年四月充湖南鄉試正考官十二月選員外郎四十六年提督河南學政四十七年七月奏歲科四五等生員鄉試應入場對讀如實係老病及武生全無文理者不便聽其濫充請照例罰贖四等罰銀三兩五等罰銀六兩解交藩司雇充對讀並請於臨



揚考選略錄字畫時兼取略曉文義者分別記名以便雇充對讀  
下部議行十二月丁母憂四十九年二月因河南學政任內失察  
登封縣生員李一等編造逆詞降二級調用四月捐復五十年服  
闋候補五十一年仍補吏部員外郎九月提督四川學政五十四  
年三月奏科試已竣嚴拏槍手情形 上嘉其認真六月推升吏  
部郎中仍留學政任五十五年任滿回京補刑部郎中五十七年  
授江西撫州府知府嘉慶元年調南昌府知府三年升湖南岳常  
澧道四年三月升江西按察使十一月遷布政使七年正月因餽  
贖江西正考官周興岱路費衣裘奉 旨交部議處尋議降三級  
調用 上改爲革職留任八年調安徽布政使九年因病請解任

得旨准其回籍調理俟病痊後來京另候簡用十一年病痊抵京四月授太僕寺卿七月授宗人府府丞九月擢左副都御史十二年三月高宗純皇帝實錄告成奉旨前次特派覆校之副都御史邵洪著加恩紀錄二次六月都察院將尋常陳奏事件於晚膳呈遞命軍機大臣傳訊旋經訊明係左都御史賡音主見上以邵洪隨同附和交部察議八月都察院奏江西僧人恢凡呈控伊弟尹悟被生員劉在中等毒斃一案牽涉洪任南昌府時曾勸令息訟具結情事洪未引嫌迴避聯銜同奏奉旨交部察議十三年授禮部右侍郎十六年七月因病開缺回籍十月卒子恒戶部候補員外郎

右 國史館本傳

景祿

景祿，滿克達氏，滿洲鑲黃旗人。乾隆三十六年，由刑部筆帖式升主事。四十年，遷員外郎。四十二年，遷郎中。四十五年，京察一等，擢廣東按察使。四十六年，遷直隸布政使。四十九年，擢刑部右侍郎。五十年，員外郎海昇毆斃其妻吳雅氏，刑部以自縊定獄。上派景祿會同左都御史紀昀、本部侍郎杜玉林覆檢，仍依原奏擬結。嗣又命戶部右侍郎曹文植總管內務府大臣伊齡阿研鞫得實。諭曰：景祿由司員擢至侍郎，非不諳刑名者可比。乃於特派事件不知秉公辦理，瞻徇迴護，著革職發往伊犁效力贖罪。五十二年，賞藍翎侍衛，仍畱伊犁效力。五十四年，授伊犁同知。六十年，

遷員外郎三年調戶部銀庫員外郎四年以撥四川軍餉領兵大臣奏報銀數短絀褫景祿職 命肅親王永錫會同刑部訊無剋扣免其治罪五年二月 諭曰上年部發銀兩景祿辦理不善原難辭咎但念係滿洲世僕年力強壯既訊無情弊未便令其廢棄著加恩賞給七品筆帖式在原衙門行走三月補刑部筆帖式八月遷主事六年因妾曹氏毆斃婢女詭稱自縊褫職逮問嗣經軍機大臣訊明景祿失察例止罰俸請復其官 上不許降爲刑部筆帖式十二年 賞三等侍衛充哈密幫辦大臣十三年六月召回京擢理藩院右侍郎七月兼正白旗蒙古副都統十一月復

調刑部右侍郎十四年調正白旗滿洲副都統十六年轉左侍郎  
十八年以查勘 泰陵工程奏報不符降二級調用十九年閏二  
月補太常寺卿六月調通政使九月轉左副都御史十二月遷工  
部左侍郎兼鑲紅旗蒙古副都統二十一年調鑲藍旗滿洲副都  
統是年遷左都御史二十二年以奸商運米出城請將巡城御史  
伊縣泰蕭鎮交部議處嗣訊明伊縣泰等婪索得贓 上以景祿  
等未經嚴參又不自請處分下部議處部議降調 加恩改爲畱  
任二十三年京察屆期先以給事中色成額有疾列入六法復與  
同官公議改列三等給事中李振祐劾之下部嚴議降一級調用  
命以副都統候補署鑲紅旗蒙古副都統二十四年以年老休

致道光元年卒子薩興阿戶部郎中

右 國史館本傳

永祚

永祚郭絡羅氏滿洲鑲白旗人由官學生考取繙譯筆帖式乾隆三十六年補工部筆帖式四十七年授直隸井陘縣知縣四十九年調遷安縣因承審遲延降調五十年捐復原官五十四年補奉天府鐵嶺縣知縣五十六年調承德縣五十八年擢義州知州五十九年因親老改補京職八月選授太僕寺主事引見以員外郎升用九月奏留工部六十年補員外郎嘉慶四年九月裕陵奉安禮成命以應升之缺先行升用旋擢郎中六年京察一等三月授福建道監察御史四月奏請將盛京牛馬稅差照京城左右翼稅務之例每年輪派五部侍郎一員兼管無庸由京另派司



員監督又請將奉天府府丞一缺照各省學政例每屆三年更換  
一次俱得 旨允行九月遷禮科給事中七年轉掌印給事中八  
年奏請於伊犁地方設立學舍經大學士會同禮部議駁 諭曰  
伊犁地處極邊多係索倫錫伯察哈爾額魯特遊牧之地迥非烏  
魯木齊建立府廳州縣設有學額者可比該處毗連外域自當以  
矧習武備爲重若令其誦讀漢文勢必荒疎藝勇風氣日趨於弱  
於邊防大有關礙此事如係漢員陳奏或尙云未能深悉邊地情  
形永祥身係滿洲乃以斷不可行之事摭拾陳請太屬不曉事體  
著傳旨申飭十年六月奏漢御史缺出請將曾經記名之翰林部  
屬輪班帶領 從之七月因 聖駕將詣盛京恭謁 祖陵疏言

廣東福建兩省洋盜被勦窮蹙恐竄至奉天錦州等處由海口登岸潛入大營肆竊請令協領等親赴各海口嚴密巡防將海船商販舵丁查對號簿並取具兌卸鋪號甘結 諭曰閩粵洋匪不過在外海劫掠商船從未有上岸滋擾之事日前據王德奏稱匪船皆畏懼竄匿是方逃命之不暇何敢公然登岸且秋令已深西北風漸作匪船焉能遠竄至奉省錦州該給事中於海洋道路情形全未明曉矢口妄談紕謬已極若如所奏辦理勢必紛紛滋擾是以謁 陵省方大典轉爲累商病民之事尙復成何政體永祚所見不獨愚昧且其說傳播徒滋搖惑永祚著交部議處尋議降一級調用 恩准抵銷十三年擢鴻臚寺卿十四年元旦 上詣

堂子行禮以鳴贊官贊禮遺漏各堂官下部議處永祚降二級畱  
任不准抵銷十七年遷大理寺少卿十九年九月遷太常寺卿十  
一月遷通政使十二月授左副都御史二十年八月擢盛京刑部  
侍郎十一月以審擬宗室奕讓酌酒率請移住吉林隨同將軍晉  
昌等具奏下部察議得 旨降三級畱任二十一年 命赴錦州  
府偕副都統文孚鞠案時查驗添建獄房輒將獄囚感激之詞附  
片入奏 上飭其乖謬下部議革職二十二年 命以六部主事  
用二十五年授副都統守護 昌陵道光元年卒子岱慶禮部筆  
帖式

常福

常福汪氏內務府漢軍正白旗人乾隆三十六年由監生考取內務府筆帖式四十三年遷主事四十四年遷員外郎四十八年兼公中佐領五十六年遷郎中五十七年兼驍騎參領嘉慶元年遷上駟院卿管理造辦處二年充粵海關監督四年差滿回京調武著院卿五年仍調上駟院卿管理造辦處六年 賞戴花翎八年管理圓明園事務仍調武備院卿九年擢總管內務府大臣十年以失察蘇州織造那蘇圖私德內府銀並受請託罷總管內務府大臣 賞三品卿銜仍管理圓明園事務十一年正月復授總管內務府大臣八月兼鑲白旗漢軍副都統十三年五月 上以各

部院衙門端陽節均未奏事 召見總管內務府大臣 嚴旨詰問常福隨文幹奏辨文幹因蘇楞額叩首引罪退後面斥之常福徇隱未奏部議降調 上加恩改爲畱任旋授工部右侍郎調正黃旗滿洲副都統六月因已故副都統盛住侵蝕 萬年吉地工銀未經查參褫花翎降三品銜仍降四級畱任十一月以任聽總管內務府大臣廣興剋減 宮中例用紬緞降四品頂帶十二月賞三品頂帶十四年三月復二品頂帶四月授鑲藍旗蒙古副都統六月管理咸安宮官學九月 賞還花翎十月調鑲紅旗滿洲副都統十二月失察工部書吏王書常私雕假印冒領內務府庫銀降三品頂帶褫花翎仍革職畱任八年無過方准開復十五

年六月復授工部右侍郎九月轉左侍郎十七年復賞還花翎  
十九年二月調兵部右侍郎三月調戶部右侍郎十月以病奏請  
開缺先是正黃旗滿洲領催春慶投遞匿名揭帖控總管內務府  
大臣蘇楞額莊親王繇課以聞至是諭曰常福前於繇課具  
奏匿名許控蘇楞額時曾奏稱應將原摺燒燬不必具奏殊不思  
呈詞封面有毀譽王大臣之言其險惡可恨尤出情理之外此而  
不查拏懲辦奸徒何所做懼常福欲甘心忍受置之不辨豈非唾  
而自乾看來常福於經管各事未必能自信妥協畏人多言是以  
急急求退常福因循疲玩不勝卿貳之任著將侍郎副都統卽予  
開缺仍留總管內務府大臣二十年復授兵部右侍郎兼鑲紅旗

滿洲副都統二十二年轉左侍郎二十三年 賜紫禁城騎馬二  
十五年三月 上謁 陵以兵部遺失行在印降四品頂帶尋以  
失察當月司員曠誤夜班不自行收管印鑰及隸役私開門徑於  
庫後牆垣部議革職 上寬之 命以四品京堂候補五月補太  
僕寺少卿九月 賞三品頂帶復授總管內務府大臣十月兼鑲  
紅旗漢軍副都統道光元年管理總辦工程處二年閏三月遷兵  
部左侍郎十月以病解任三年卒子阿勒精阿上駟院卿阿爾邦  
阿工部右侍郎總管內務府大臣阿揚阿長蘆鹽政

右 國史館本傳

恭阿拉

恭阿拉原名恭照鈕祜祿氏鑲黃旗滿洲人五世祖巴圖魯一等  
宏毅公額亦都自有傳恭阿拉於乾隆三十六年由閒散承襲勳  
舊佐領四十五年補印務章京四十八年授副參領五十四年擢  
參領管理舊營房營總嘉慶四年正月授正黃旗蒙古副都統兼  
管右翼稅務二月調鑲紅旗滿洲副都統 賞戴花翎四月 諭  
日前奉 皇考敕旨孝淑皇后二十七月後 命立皇貴妃爲皇  
后今已屆期應卽欽遵 敕旨正位中宮皇后之父恭阿拉著照  
例封爲一等侯六月授步軍營左翼總兵官六年三月調鑲藍旗  
漢軍副都統時步軍統領明安右翼總兵官國霖私用步甲並分



得摺雪 賞銀惟恭阿拉名下查無跟隨步甲得銀之事 上嘉  
其尙知守法 諭將明安國霖交部分別察議尋偕明安等奏查  
從前歷任步軍統領原有跟役三班每班二十名占兵六十名經  
定親王縣恩奉 旨裁汰及布彥達賚面奏添設照前酌減每班  
十一名共三十三名今臣等公同酌議步軍統領每日查街查夜  
及叫堆攬柵欄等事需用步甲十一名兩翼總兵官每日需用步  
甲七名逢該兵丁下班之期仍令回旗當差不得仍前作爲三班  
占役至司員筆帖式雖亦有前項責任其每日查街查夜之差卽  
由臣衙門當差步甲內酌撥二三名輪流聽事該員等所用兵丁  
全令撥出當差以歸覈實得 旨允行是月恭阿拉之父原任筆

帖式恭保病故奉 旨照公爵分例給與卹典 賜諡恪慎九月  
調正紅旗滿洲副都統十一月因朝陽門外放米擠斃人口部議  
降三級調用除職任降調外應照例折罰世職半俸九年 上改  
爲革職從寬畱任免其折罰世職半俸七年正月步軍統領明安  
於番役圖詐官員鬪鴉案聽情受賄恭阿拉未能查出實情交部  
嚴加議處部議降三級調用 諭曰恭阿拉於番役在外訛索未  
能查出實情本應照部議降調但此案番役初稟並未提及官員  
賭鬪明安聽情受賄各情咎尙可原恭阿拉著加恩改爲革職畱  
任並令不必兼管副都統六月解左翼總兵事擢正黃旗漢軍都  
統 命在紫禁城騎馬十月授左都御史八年正月 上恭謁

東陵 命管理行在步軍統領事務十月 命兼攝京營左翼總  
兵官九年六月調正藍旗滿洲都統十一月擢禮部尙書十年閏  
六月充會典館副總裁官十月授內大臣十一年十一月 命管  
理三庫事務 玉牒館總裁官十二年八月授崇文門正監督九  
月 命護送 高宗純皇帝實錄往盛京尊藏十月禮成交部議  
敘 賞加太子少保銜十四年十二月調鑲藍旗漢軍都統十五  
年九月調工部尙書十六年二月 命承修 福陵石牌樓石獅  
子工程兼查驗盛京城工先是興京界所屬穆奇驛站被水衝淹  
房基不堪復建將軍觀明與侍郎薩彬圖先後奏到情形不符  
上命恭阿拉等將應否酌撥官地另建之處妥議具奏尋借觀明

奏此處驛站係爲恭送 永陵祭品及各項差務而設勢難改建  
他處請於原驪官莊地畝內酌撥六十畝除那建驛廳及馬圈外  
餘地四十餘畝卽以補葺眾丁房間其官莊額設地畝請交盛京  
戶部於就近上則餘租地內照例撥補俾資接濟差徭如此可於  
驛站有益亦於官莊無礙得 旨允行六月調兵部尙書經筵講  
官兼管戶部三庫事旋因失察轎夫聚賭部議降一級調用 上  
改爲降一級畱任十七年十月調禮部尙書十二月因病奏請開  
缺 諭曰恭阿拉於嘉慶四年已封侯爵近年以來交派事件並  
無貽誤見在患病不能當差著准其開缺俾得安心調養並著加  
恩賞給三等公爵是月卒 諭曰恭阿拉老成謹厚奉職恪勤自

簡任管理部旗十餘年來並無過失伊年甫六旬本年六月值伊  
生辰優加錫賚方冀精力健強長資委任遽因痺病未痊昨已加  
恩晉封三等公爵茲聞溘逝深爲悼惜除齋賜陀羅經被外著加  
恩晉贈太子太保賞給三等公爵卹典該部察例具奏所有任內  
一切處分悉予開復並賞廣儲司庫銀一千兩經理喪事派三阿  
哥卽日前往奠醊俟伊出殯之期仍派三阿哥前往祖奠目送  
賜謚勤懇子和世泰襲三等公見任總管內務府大臣吉倫泰出  
嗣恭阿拉之胞弟追封鴻臚寺少卿明善爲後見任乾清門頭等  
侍衛

右 國史館本傳

錢樾

錢樾浙江嘉善人乾隆三十七年進士改庶吉士四十三年散館授編修四十五年充陝西鄉試正考官四十八年提督四川學政五十三年上書房行走五十四年三月以曠直部議革職 上改爲革職畱任八年無過方准開復尋改四年開復給半俸六月充江西鄉試副考官六十年二月京察一等擢右贊善六月充江西鄉試副考官九月轉左嘉慶元年二月提督廣西學政洊升左庶子二年遷侍講學士三年五月轉侍讀學士十二月遷少詹事四年正月差旋仍在上書房行走二月遷詹事尋授內閣學士三月升禮部右侍郎五月轉左侍郎七月提督江蘇學政先是吳縣知

縣甄輔廷以錢債細事擅責生員吳三新諸生不服誼訴同知李焜用刑酷訊波累無辜學政平恕曲徇所請斥革生員二十五人  
上聞之解平恕任 命樾馳赴蘇州先復諸生衣頂樾將首先  
滋事之馬照等三人並予開復 上飭之下部議處五年調吏部  
右侍郎六年轉左侍郎回京調戶部右侍郎兼管錢法堂事務仍  
兼署吏部左侍郎八年調吏部右侍郎九年失察書吏舞弊將告  
病治中趙曰濂虛選運同 命革去左侍郎交都察院議處旋降  
補內閣學士越數日樾復陳奏趙曰濂告病因科鈔尙未到部不  
會開缺其虛選運同本循照舊例辦理至書吏撞騙係經承轉雇  
之橐工貼寫堂司各官均不知其名 上以其曉曉置辯強詞奪

理下都察院嚴議革職。上念懋向在內廷行走有年尙屬勤慎加恩賞給編修。十年四月擢鴻臚寺少卿。六月提督山東學政。十二年回京遷大理寺少卿。命仍在上書房行走。十三年補內閣學士。丁母憂歸。服闋因疾陳請給假。命俟病痊時來京。另候擢用。十九年入覲。具陳病體不能供職狀。諭令回里養病。二十一年六月卒於家。二十三年十一月江西浙江兩省督撫先後奏請以原任侍郎萬承風內閣學士錢懋入祀鄉賢祠。諭曰伊二人平日居官不過循分供職並無傑出謀猷。祇以官登卿貳本籍紳士私相稱譽。遂得崇奉鄉祠。豈合古人表里旌閭之義。除已往毋庸追論外。嗣後各省督撫遇有呈請入祀名宦鄉賢者務覈明其



人生前居官政績確有裨於國計民生臚舉事實方准具題禮部  
秉公覆覈再行具奏請旨遵行如僅以人品端方學問優長空言  
譽美並無實蹟者該部卽行議駁以昭慎重時萬承風先經禮部  
議准入祠奏奉 俞允錢樾正在覈議尙未具奏部臣因請 欽  
定遵行 上以該部堂官取巧推諉嚴飭之仍令覈實定議尋議  
錢樾並無實在事蹟有裨國計民生未便以鄉曲私譽遽准入祠  
奏入奉 旨依議子焯東河候補同知熙東河候補遊判孫埴四  
川候補鹽場大使

右 國史館本傳

今上御極之四年 詔卻四方貢獻宵旰勵翼宮府肅然少宗伯

錢公方奉 命督學江蘇渡河至袁浦登舟顧見巨艦連檣揭旗  
梳標書 內廷南府公上疏劾官吏詭託以累 聖明 上嘉歎  
飭諸關津禁絕嚴罪所司先是吳縣令甄輔廷治諸生糾控獄罹  
褫革者二十五人鍛鍊無辜眾情洶懼 詔疆吏會讞 命公詣  
吳閫復諸生名三吳之人懽然曰 天子遣賢學臣至矣獄尋雪  
所全多一時知名士公曩主試陝西江西又爲四川廣西學政所  
至扶善遏過宣 天子德意敷繹懇至椎魯之俗廓遠之區林蠻  
峒蛋叢篁深箐之人莫不歡欣感激烝烝向善旣 召入上書房  
隆以師傅方主試江西時 天子在藩邸製詩寵行至以冰心玉  
衡相推重公益奮激思有建樹以補於時至是踰鍾阜職北固下

吳趨觀廣陵檝江沂淮東至於海搜奇簡僑扶樹教道以所歷覽  
得治民要最山川利病僚吏賢否默識不遺徐州壩工火瓜儀鹽  
梟盤據爲閭閻害有 旨命公密訪二事以聞公遂言目前要計  
不在邵壩在保高堰防大汛霜降後鳩工庀材疏濬正河墾築隄  
防先務所急比年以來河流旁溢下游淤墊爲患彼此兼顧日不  
暇給自邵壩至徐城正河沙懸百六七十里自豫東界至桃宿以  
上河高隄淺水緩沙停所在防潰輕則泛溢節省補苴水不順軌  
東堵西決帑金虛擲民受其殃復煩賑恤費逾倍蓰請 飭大吏  
審全河形勢疏濬爲先次議防葺畚揭芻蕘無有不備毋俟患至  
束手坐失事機遷就苟簡以貽厥悔經費覈實所省實多又言官

鹽私鹽貴賤殊輕重亦異民利食私私販遂夥大創之後巨梟  
戢跡利在爲藪恐復萌芽官私毋懸本澄末治私梟爲患冀可永  
弭疏入俱報 可公在江蘇三年河漕諸大政洞然豁達及人領  
度支迺奏請申折色禁令以肅漕政復調銓部多所建白以推順  
天府治中失察書吏舞文左遷內閣學士復指陳銓政宜明舊章  
上以公不當申辨法當滿級仍予編修尋以鴻臚少卿督學出  
東其勤職一如在江蘇時又洊擢至內閣學士奉繼母吳太夫人  
喪旋里服闋患肝病咯血越六載以嘉慶二十年六月初九日卒  
於家公名樾字撫棠又字黼堂浙江嘉善人錢武肅王裔孫始居  
婁墳村繼遷城中錢家衛世爲甲族曾祖永均祖商佐父潮皆名

諸生以公貴均 贈榮祿大夫禮部左侍郎公生時啟口知笑贈  
公奇之遂命名爲奇少時器宇端重讀書過目輒成誦喜作擘窠  
大字贈公應京兆試客游保定母夫人毛氏卒公年甫七歲哀毀  
如成人嗣從贈公北游以清苑籍應試補博士弟子員庚寅舉京  
兆試壬辰成進士改庶吉士公歷官清要敬慎持身始終一軌  
內廷與茶宴恭和 天章援筆立就以文翰之司受 兩朝知遇  
侍學帷幄游登卿貳正色立朝獻可替否不形喜愠同符古人屢  
荷 頒賜上方珍品有傳研之堂懷袞之樓及書畫貂裘文綺之  
屬家居杜門養疴猶蒙 溫諭問疾無虛歲甲戌力疾詣 闕還  
至德州遇盜馳 諭慰勞凡茲寵眷悉逾常等公生平無疾言違

色持身介而和退食里居以鑒賞圖史自娛未嘗敢有以公私干  
謁者於考友尤篤初贈公之家保定也生公弟枚吳夫人出贈公  
卒枚年十四後亦舉京兆試充覺羅官學教習任四川縣令講學  
服官悉稟公訓垂三十年公歷奉衡校所取士皆以敦本立品爲  
重海內稱得人宗昉以辛酉中拔萃科爲公所器識斯以遠大引  
而置之幕中故於公之論國是敘官方舉賢退不肖靡密贖敷陳  
亦得與聞其略而公初未嘗言於人人也公配丁氏夫人夫人先  
卒子三人焯官下南河同知熙官衛糧通判焯山東縣丞先公卒  
男孫六人墳圻坊垓墳女孫十人公之入 觀也寓居京師宣  
武坊南之園通觀宗昉役黔南不得奉杖履乙亥公赴至京乃就

觀設位而哭門弟子會哭者數十人皆慟不能起丙子宗昉奉  
命視學來浙公子焯熙以從公之久知公之詳未有如宗昉者迎  
伏道左泣而請曰先府君疾革時自營丙舍宗紫陽分葬之說卜  
藏於城東六甲九南區之袁家濱今葬有日矣請以銘屬君宗昉  
不敢辭也銘曰

魏塘之水有瀾其波篤生寶臣天衢揚和軒車採詩東西江海披  
沙簸糠掌握珠璣稜稜貞風符古諍臣得失利害無知不聞民病  
在支公眉則顰磨丹尙白蕭然素風散金指因六媼是隆族有露  
樨廿一檄封晨起危坐泰定高朗遂乘箕馭浩然長往梁木摧矣  
越山頽矣哲人萎矣吁其悲矣

右墓誌銘李宗昉撰

公錢氏諱樾字撫棠一字黼堂先世自武肅王岷興吳越傳二十  
五世遷嘉善之錢家衡又五傳爲康熙庚戌進士承德縣知縣霞  
霞生稟貞生永均永均生歲貢生商佐商佐生邑庠生潮卽公考  
也三世皆以公貴 贈榮祿大夫妣皆 贈一品夫人公舉乾隆  
庚寅順天鄉試壬辰成進士改庶吉士授編修歷坊局累遷吏部  
左侍郎坐失察銓吏再降官編修晉鴻臚寺大理寺少卿內閣學  
士兼禮部侍郎以憂去職服除疾作遂不赴補嘗充陝甘正考官  
再充江西副考官督四川廣西江蘇山東四省學政在翰林爲本  
衙門撰文凡殿館祕閣編纂之役靡不與直上書房知起居注侍



講筵凡 廷試衡文之典又靡不與初典試江西 仁廟方在  
藩邸以詩寵其行先後傑直二十年歲時應制及恭和 御製詩  
上未嘗不稱善也公雖用文學起家然特裕經世略有古大臣  
風槩蘇州有獄連諸生上情詭脆懼羅織公奉 命會鞠坐者僅  
三人輿過太和見行船有大書 內廷南府者抗疏劾奸吏詭託  
累 聖明 上嘉公直可大用以南河邵壩決口瓜儀私梟兩事  
屬密訪公指陳利害本末甚悉歲辛酉畿輔大水疏請以工代賑  
又請禁南漕折色諸弊皆見施行比告歸入謝猶以江北饑民渡  
江強勾慮爲遁逃較而江南番錢盛行米價貴宜嚴關海之防再  
三爲 上言之益其學問根柢貫串明於古今治忽鋒重所歷半

天下又盡悉其民生利病及所當設施期知無不言以上荅 兩  
朝知遇世所傳章奏舉關大計至其造 膝密陳其退焚諫草者  
人蓋莫得而知也性孝友事榮祿公養志無方妣毛夫人早世奉  
繼妣吳如所自生居喪毀瘠一切比附於禮愛異母弟枚教之舉  
京兆爲蜀茂宰生平沖退和易夷險一致而風裁峻整人莫敢干  
以私及其瞻親族接引後進則常如不及林清之變趨問 安闕  
廷歸途遇盜 上馳諭慰問方期公再來且大用而公遽以疾終  
矣年七十有三葬城東九南區姜家濱配丁夫人先公卒別葬子  
焯山東泉河通判熙山東糧河通判煇翰林院待詔煇早卒焯後  
公十三年卒公弟枚爲升戊午同年生又其子熙夙交也熙請

爲公墓碑之文不敢辭銘曰

於維錢氏寶祖高陽閒生名世篤於魏塘維公踔發輝映嚴廊森  
森齋嶽煜煜文昌天上嚮雲人閒威鳳連燭三清星軺七控泰遠  
邠國巴渝爽洞化沛菁莪匠成梁棟回翔 禁籞劫誌台司漢賈  
唐陸趨舉步夔曲江一鑑元成十思凡裨 君國知靡不爲寰海  
傾風 九重前席咨汝老成用康庶績納牖情殷縣車景徧祖帳  
青門國人歎息傳研有堂 錫衮有樓感仰 宸翰優游故邱乃  
治闡壙乃植松楸料簡書畫如將遠遊冊載宣猷一朝揮手 帝  
念典型士懷山斗誰煥崇祠薦蘋酌卣蘊澤流膏庶昌厥後

右神道碑銘張井撰

侍郎錢樾直上書房適某皇子叱辱詣達麟甯過當麟已拜參  
知侍郎以皇子不應凌虐大臣正詞規勸皇子亟謝過後侍  
郎視學江蘇途次遇學藝處眷船烜赫逾分嘗附摺陳奏絕無瞻  
顧

右紀聞陳康祺撰

皇朝書目考卷之九

三

平恕

平恕浙江山陰人乾隆三十七年二甲一名進士改翰林院庶吉士四十年授編修四十三年二月以四庫館纂修行走勤慎奉

旨著以應升之缺列名在前升用 賞緞匹荷包筆墨紙硯有差

四十五年充會試同考官四十六年升翰林院侍講復充會試同考官四十七年升右庶子四十八年轉左庶子提督廣東學政四十九年擢翰林院侍講學士五十一年學政任滿回京五十二年充日講起居注官轉翰林院侍讀學士五十三年充廣西鄉試正考官五十四年充武會試副總裁順天武鄉試正考官五十五年擢詹事府少詹事復充武會試副總裁丁母憂回籍繼丁父憂服

闕赴京嘉慶二年晉詹事府詹事三年擢內閣學士兼禮部侍郎  
充江南鄉試正考官旋提督江蘇學政四年六月奏言據吳縣甄  
輔廷稟生員吳三新被控負欠不還恃矜唐突酌予責懲臣按試  
松江事竣道經省城有吳縣生員馬照糾眾二十三人控稱在學  
各生均受凌辱心懷不平誼鬧無禮馬照應革去衣頂依生員糾  
眾扛幫聚至十人以上發遣例擬遣袁仁虎王元辰輾轉糾人唆  
使上控及聽從扛幫之朱先勳等均屬不安本分分別杖徒黜革  
奏入 諭曰馬照等心懷不甘率眾誼鬧皆由該縣處置乖謬所  
致著將甄輔廷革職平恕解任質審定交部議議上 諭曰其過  
止於平日不能教導而於詳革時人數較多未經查察以致傳提

訊問波及無辜然罪亦不致罷斥著來京以侍講學士降補十月復授詹事府少詹事五年正月署國子監祭酒充文淵閣直閣事三月復授內閣學士兼禮部侍郎六月升兵部侍郎仍兼祭酒六年正月署吏部右侍郎三月充會試副總裁七月復任江蘇學政時御史王蘇奏平恕不應復任江蘇諭曰業經議結之案仍列彈章既無別項劣蹟江蘇學政仍著平恕去御史王蘇著交部議處七年正月調補戶部右侍郎七月轉左侍郎仍留學政之任九年正月在任卒子守緒長蘆候補鹽運司經歷

右 國史館本傳



國朝詩林卷之二十一

三

鐵保 弟玉保

鐵保棟鄂氏滿洲正黃旗人乾隆三十七年進士授主事籤分吏部四十年五月補官十二月襲恩騎尉世職四十二年遷員外郎四十三年三月遷郎中十一月兼內務府六庫郎中四十四年調戶部顏料庫郎中仍兼吏部行走四十五年十月擢詹事府少詹事仍兼吏部行走十二月因辦理知州彭日龍捐復錯誤降三級調用四十七年補戶部員外郎五十年二月遷吏部郎中三月擢翰林院侍講學士仍兼吏部行走五十二年充日講起居注官五十三年三月轉侍讀學士十二月升內閣學士兼禮部侍郎銜五十四年正月遷禮部右侍郎二月兼鑲紅旗蒙古副都統稽察會

同四譯館並管理咸安宮官學事務三月充會試副考官十月調  
鑲黃旗蒙古副都統兼公中佐領十二月充經筵講官五十五年  
正月 上元旦視朝前引失儀部議降三級調用 上改爲革職  
畱任三月充會試知貢舉五十六年十一月丁母憂十二月轉左  
侍郎五十七年五月校射中布靶 賞戴花翎六月充江南鄉試  
正考官五十八年三月充會試副考官尋調鑲黃旗漢軍副都統  
五月調正白旗蒙古副都統五十九年二月服闋四月畿內旱  
上禱雨禮部於應辦事宜陳奏遲延部議革職 上加恩改爲畱  
任以議上未赴 宮門候 旨 嚴飭之並褫花翎七月充山東  
鄉試正考官六十年三月充會試知貢舉四月充殿試讀卷官嘉

慶元年充會試知貢舉二年五月 命督理 萬年吉地工程八月充緡譯鄉試正考官三年八月充順天鄉試副考官旋調吏部右侍郎十二月調正白旗滿洲副都統四年正月轉左侍郎 命教習庶吉士二月以司員於陳奏事件未經回明面斥之復加參劾 上責其過當 命以內閣學士降補仍兼副都統尋遷盛京兵部侍郎五月調盛京刑部侍郎兼管奉天府尹事九月調吏部右侍郎兼正紅旗漢軍副都統十一月調正藍旗滿洲副都統十二月授漕運總督五年正月請將向例隨漕項下應給州縣銀米改撥旗丁並將旗丁應得行月米石改給折色應領運費令糧道親身監放 從之十一月 詔於明年 駕詣盛京恭謁 祖

陵鐵保疏陳三款一裁革將軍府丞等餽送扈從官員土儀一  
御道祇就舊址鑲墊平坦毋庸另闢新道一扈從官員不得指稱  
官差妄擊車馬 上嘉之如所議行六年二月京察以漕政肅清  
交部議敘七年調廣東巡撫八年正月調山東巡撫二月入 覲  
賞還花翎六月以違例保升人員且摺內措詞失當 嚴飭之  
並交部議處尋議降調 上改爲革職畱任九月東河衡家樓漫  
口下游穿山東張秋運道 命鐵保設法輓渡回空糧船豫籌明  
年運道十一月以前承辦 萬年吉地工程鞏固下部議敘九年  
三月南糧首進幫船全過張秋加太子少保銜五月以運河水勢  
淤淺糧船行走遲滯部議革職 上加恩改爲畱任八月清查山

東虧空密疏請將離任人員限滿未完者徑行提省押追毋庸報部並分咨各旗籍查抄家產估變解東歸款 諭曰所奏大謬離任人員多有見官他省卽告病丁憂者亦係職官尙有旗員在京當差者焉有不行奏明遽爾提往押追之理至分咨各旗籍查封家產尤無此辦法查抄家產原因官犯有貪劣款蹟參革後查抄示懲若未經奏參奉旨遽行知照查抄是該旗籍竟聽各督撫指示遵辦有如是專擅之督撫乎鐵保此奏實屬糊塗本應交部議處姑念係審辦事件尙未舉行著傳旨嚴行申飭十年正月擢兩江總督九月南河秋汛安瀾下部議敘十月捕獲洋匪蔡廷秀等多名 于軍功議敘先是安徽武舉張大有以姑姦毒斃其族姪

倫前任總督陳大文坐罪於大有亡父體文十一年 命鐵保獲  
按之鐵保委臬司遇昌蘇州府知府周鏜等提訊鏜等聽受賄屬  
以張倫等猝中蛇毒定獄鐵保以平反有功請將承審各員議敘  
十二年四月經安徽巡撫初彭齡勘問得實真大有於法 諭曰  
鐵保於特旨交審之案並不親提嚴訊率據承審屬員照擬定案  
復失察周鏜等徇情蒙混之弊轉以平反得實代請議敘實屬錯  
謬鐵保著革退宮保銜拔去花翎仍交部嚴加議處尋議革職  
命降爲二品頂帶革職畱任十月以秋汛安瀾復頭品頂帶及花  
翎十三年二月奏八旗官兵應領米石請酌給二成折色經戶部  
入旗滿洲都統倉場侍郎議駁 諭曰京師五方輻輳商民雲集

本處產糧既少又無別項販運糧石專賴官員兵丁等所餘之米  
通流糶糴藉資糊口是以自王公以及官兵等應領米糧定額俱  
酌量從寬並非計口授食卽如親王每歲領米萬石甚屬寬裕豈  
爲其一身計乎若如該督所奏不惟於八旗生計恐致拮据卽以  
每歲少放米五十餘萬石計算於商民口食之需亦多未便鐵保  
曾經管理旗務並不通盤籌畫實屬妄改舊章冒昧不合著傳旨  
申飭仍交部議處尋議革職 上加恩改爲畱任三月請改建王  
營減壩並培築高堰山盱隄後土坡及沿河兩岸大隄 命協辦  
大學士尙書長麟戴衢亨往勘如所議行六月以漕船渡黃迅速  
下部議敘旋以七里溝運河漫溢降二品頂帶褫花翎九月初汛



安瀾復頭品頂帶嗣因淮安三鋪地方運河緯隄坐墊部議降調  
上加恩改爲畱任十二月請修復雲梯關外海口 允之十四  
年正月以運河荷花塘決口合而復潰再降三級畱任七月以上  
年淮安等府水災山陽縣知縣王伸漢浮冒賑銀懼查賑委員試  
用知縣李毓昌舉發醜殺之至是事覺 諭曰鐵保前在司員及  
侍郎任內屢獲愆尤棄瑕錄用自補放兩江總督以後不能敬慎  
辦公一味偏聽人言固執已見辦河工則河工日見敝壞講吏治  
則吏治日見廢弛甚至有不肖劣員藐視法紀逞其貪戾殘忍全  
無忌憚致釀成如此奇案而彼猶夢夢不知可謂無用廢物不但  
不勝封疆重任亦何堪忝列朝紳鐵保著革職發往烏魯木齊效

力贖罪十五年六月 賞三等待衛充葉爾羌辦事大臣七月授翰林院侍講學士仍畱辦事大臣任旋調喀什噶爾參贊大臣十六年八月以阿奇木伯克玉努斯稟稱回民毛拉素皮等與叛裔玉素普私通書信釀金助之捕獲寘於法 賞副都統銜九月授浙江巡撫旋改授吏部左侍郎十一月兼鑲藍旗漢軍副都統十七年擢禮部尚書鑲白旗漢軍都統尋管理武英殿 御書處十八年八月充崇文門監督九月調吏部尚書十二月充經筵講官十九年二月伊犁將軍松筠奏參鐵保前在喀什噶爾辦理回眾資助叛裔玉素普一案係玉努斯捏造情節刑偏誣認鐵保爲其蒙蔽枉殺邀功 諭曰鐵保前在兩江總督任內於王仲漢謀毒

李毓昌一案毫無覺察將伊褫革發遣旋又棄瑕錄用洵升吏部  
尚書乃前於玉努斯編造謠言刑求無辜不加詳勘致成冤獄枉  
殺四命其咎甚重不能屢恕著革職發往吉林交該將軍富俊等  
派撥當差二十三年釋回授司經局洗馬道光元年以老病乞休  
賞三品卿銜四年卒子瑞元二品廕生湖北按察使

右 國史館本傳

公棟鄂氏諱鐵保字治亭一字梅庵世爲滿洲人曾祖寶柱祖富  
起臣父誠泰官至秦甯鎮總兵官自曾祖下俱 贈光祿大夫曾  
祖妣馬佳氏祖妣劉氏妣輝赫氏俱 贈一品夫人公年十九舉  
乾隆庚寅順天鄉試二十一歲成進士授吏部文選司主事累遷

至翰林院侍講學士仍兼部事大學士阿文成公器之舉爲副都  
統 純廟素稔公名謂副都統尙未足盡其才迺 召試五言詩  
稱 旨越三日又集諸儒臣同試之擢第一遂改授內閣學士時  
乾隆五十三年十二月公之受 知自是始旋遷禮部侍郎嘉慶  
元年恭值 大廷 授 受式贊 上儀三年調吏部右侍郎自  
改授內閣學士至是凡九年知貢舉者三總裁會試者二主考順  
天江南山東鄉試者各一得人稱盛四年轉左侍郎時 仁宗睿  
皇帝親政命公留守陪都督理九邊門出爲漕運總督八年巡撫  
山東加太子少保十年總督兩江所莅之區凡治吏治兵治河及  
學校財賦刑獄諸大端靡不竭力措置各有法度可循以詔來者

其與人也開誠布公不設城府與屬吏接款款如一家務使上下之閒情意通徹而公私之界截然不淆雖有時爲屬吏所累而不以易其愛才之念卽遇嚚悍之俗而終不忍行操切之政蓋其得於天者厚而其居心也恕欲使吏民皆化於祥風和氣中也素性儉約私居飲食被服及家人子女衣著與寒素無異蓋行其所安而無所矯異如此尋以失察山陽賑案成烏魯木齊踰年起爲喀什噶爾參贊大臣公居輪臺八月無遷謫意惟聞近日江南河漕諸政有未盡善輒日夜焦思自念身在謫籍雖有所見無從上達一經嚮用卽上書千百言論列利弊不避越職之嫌不畏在廷之謗蓋其忠愛之忱不以不在其位忘也十六年起禮部尙書轉吏

部尙書復以回疆疑獄戍吉林尋起爲司經局洗馬道光元年引疾賜三品卿銜致仕公旣以治行報國舟車案牘靡有暇晷而又以其餘力著爲文章嘗表進所輯八旗詩百三十四卷賜名熙朝雅頌集晚歲家居頤和多暇自編年譜二卷復第其所著爲文鈔六卷詩鈔八卷詩餘一卷尤工書法所刻惟清齋帖藝林寶之四年正月初三日卒於家年七十三公少孤事太夫人色養盡孝與弟聞峰侍郎友愛甚篤娶夫人甯古塔氏賢達知大體子二人瑞元廕生道光辛巳舉人刑部員外郎瑞恩國學生女子十人俱適名族五年某月某日將葬公於八寶莊之原夫人遵公遺命以側室馬宜人附於其旁宜人温恭勤慎事公數十年先公二

十四年卒瑞元宜人出也銘曰

太上立德次功與言程才殊致考道同原觥觥我公克茂克醇上  
善若水與物爲春循規神禪領篤厚初酌謨觴爰探岫嶺萬物  
芟蘭六經發蔀著爲元文鉤丁貫酉升華九列發策五科凝熙庶  
績惟勤惟和東南秉鉞西北止戈以藩以翰播爲賡歌維功與言  
歸於令德騶虞仁厚羔羊正直身成邊圉心馳京闕抱此丹心迄  
於黃髮引禮致仕返樸歸眞蒔花揮翰脫略公卿惟茲醇德以啟  
後人千秋萬世眡此貞珉

右墓誌銘汪廷珍撰

兩漢以下惟宋室最爲悠久雖屢遭變遷其業猶存卽亡國後其

後裔亦未有遭酷毒者按野史謂元順帝爲天水苗裔事雖暗昧未必無因也近日董鄂治亭制府考其宗譜乃知其先爲宋英宗越王之裔後爲金人所遷處居董鄂以地爲氏數百年之後尙有巍然興者何盛德之至也

余束髮與治亭尙書交已二十餘年喜其詩才俊逸議論今古是非侃侃正論以爲有古大臣風範後聞其歷任督撫以傲戾稱又袒庇科目頗蹈明人惡習每詫其言行不符嗣聞人言當癸酉秋林清之變時公獨召對盡述闕宦不軌之謀又發十七日夜之事故上從其言搜捕逆黨頗急太監楊進忠造刀謀逆又爲其門生御史陸泌曹恩繹所發致闕宦恨之切齒造諸蜚語上聞



遂有西域之謫重遭重譴公嘗選八旗諸耆舊詩數十卷頗爲繁  
富任齊撫時進呈 上御製序以寵之 賜名熙朝雅頌集頒行  
天下

右錄宗室昭槤撰

歷城大明湖對聯甚多無一佳者惟鐵冶亭中丞四面荷花三面  
柳一城山色半城湖一聯最佳

右藥欄詩話嚴廷中撰

冶亭先生官漕督時余以公車道出淮上晉謁方病癱召入內詢  
及座師李小松王鹿圃兩先生則皆出門下喜甚贈以詩一冊字  
一幅先是公得歐陽公南唐官硯屬吳山尊徵余詩至是受知因

作七古書後有此詩此硯今無多生不逢公當奈何之句賓谷謂  
兀傲有奇氣非鐵公不能當也

右石溪舫詩話吳嵩梁撰

尙書與百菊溪制府法時帆學士 天子稱三才子生平敬賢禮  
士人倫冰鑒真鄂文端後一人

右羣雅集王豫撰

梅庵宮保手輯八旗詩上溯崇德至乾隆六十年得詩甚夥 詔  
嘉美命名熙朝雅頌集百菊溪節相謂其詩如王子晉向月吹鳳  
笙隨風抑揚聲在雲外至若氣魄闊深如河流之發源於天江漢  
之朝宗於海豈淺學所能

右寄心庵詩話符葆森撰

治亭少入詞垣偕其弟閻峯並以詩名而治亭尤工書法北人論書者以劉相國石庵翁鴻臚覃溪及君爲鼎足嘗選集 國初以來滿洲人詩爲 熙朝雅頌蓋百餘年來名人傑作搜採無遺尤足爲 盛朝掌故也

右湖海詩傳張維屏錄

嘉慶十八年鐵冶亭尙書保王文僖公懿修爲大宗伯秀楚翹莖胡西庚長齡英相國和汪文端公廷珍爲少宗伯鐵出王門胡汪英秀前後均出鐵門時有春官六座六師生之語

右紀聞陳康祺撰

玉保

玉保滿洲正黃旗人棟鄂氏乾隆四十六年進士改庶吉士四十四年散館授檢討十一月遷侍講五十年二月大考二等特擢翰林院侍講學士充日講起居注官三月轉侍讀學士五十二年充會試同考官五十四年二月京察一等記名以親老懇請畱京四月升內閣學士兼禮部侍郎五十五年十二月充文淵閣直閣事旋授鑲白旗蒙古副都統五十六年二月奉命脩詹事吳省蘭少詹事阮元入直南書房是年同大學士王杰等續輯祕殿珠林石渠寶笈自乙丑至癸丑四十八年中所奉御筆及臣工所進書畫舊輯其目前集未錄之三朝宸翰石刻敬錄各類卷首

書成 上製文序之九月授盛京兵部侍郎五十七年八月擢兵部右侍郎仍在南書房行走九月兼鑲藍旗蒙古副都統五十八年三月調正紅旗滿洲副都統六月轉兵部左侍郎五十九年甲寅 恩科充順天鄉試副考官六十年復充順天鄉試副考官嘉慶元年四月閱會試中式覆試卷旋充殿試讀卷官五月調吏部右侍郎二年正月以原銜充經筵講官八月轉吏部左侍郎十月以閱考試卷所取第一名題字譌錯未經閱出偕尙書紀昀侍郎周興岱各請罰俸三年奉 旨寬免三年二月 命閱大考翰詹卷六月因病請假七月 特諭畱京辦事王大臣選精明御醫派太醫院堂官帶同診視八月卒子瑞林二品廕生陝西試用知州

瑞英候補內閣中書

右 國史館本傳

目録  
三十一

三

陳大文

陳大文河南杞縣籍浙江會稽人乾隆三十七年進士以主事用分吏部四十三年補主事四十五年充廣東鄉試副考官四十六年洊升郎中四十八年授廣西南甯府知府五十年升雲南迤東道五十一年擢貴州按察使五十四年調安徽按察使五十五年遷江甯布政使五十六年丁父憂五十九年服闋補廣東布政使嘉慶元年經兩廣總督朱珪保奏大文操守廉潔倉庫謹慎化其偏僻之性可以倚用 諭曰陳大文操守既優可資整飭且人才難得朱珪惟當加以勸迪化其偏執俾成可用之才二年四月擢廣東巡撫六月香山新安二縣盜船行劫時提督孫全謀遠赴西



路捕盜未及會議大文卽與運司常齡調集商船以赴場運鹽爲  
名派委員弁帶領鄉勇出洋擊沈盜船六隻斬獲首夥各犯二百  
餘名奏入得 旨賞戴花翎弁 賞大小荷包十二月以署高要  
縣知縣裴盛清於誣告搶劫之案偏聽誤拘拖斃六命又茂名縣  
知縣漆浥美於府書勒索牛稅毆斃人命諱匿押和列案奏參  
諭曰陳大文自簡擢巡撫以來緝捕畱心粵東洋面漸就甯謐今  
又能將地方案件嚴行奏參諸事認真可嘉著交部議敘三年奏  
鼓鑄錢文向以粵鹽易換滇銅今查瓊州府昌化縣黎地揀挖石  
綠顏料餘贖砂石可以煎鍊銅斤較滇省腳價稍省而銅色高至  
一成以上請試酌劑鼓鑄其滇銅暫停交運如將來石綠銅出產

短縮仍照舊委運演銅報 聞五月兼署兩廣總督四年正月調  
山東巡撫六月劾單縣知縣楊元泗以上年衙署被水寄居城外  
自夏迄冬並未赴城設法保護且城垣官舍久被水浸相繼傾圮  
絕不稟報一切詞訟因循延緩奏請革職又奏查勘曹濟等屬災  
賑情形應辦善後事宜四條一積水未消民食維艱應量給展賑  
一縣城久淹難資捍衛應興工疏築一被水十州縣二衛應徵錢  
漕俟秋後查明分別辦理一應辦工程水利於秋稼場後勘估舉  
行以工代賑得 旨如所請行又奏蒞澤令程良傅有未完經徵  
錢糧例干參革而士民呈求畱任輿情實屬愛戴懇 恩令其回  
任 從之十月奏濱海居民向立門牌派員查驗日久視爲具文

應再申明定例切實稽查有匪必懲毋使有名無實 上是之十  
一月以失察德平縣知縣葉芳浮收漕糧致奸民戕官劫獄部議  
革任 上以陳大文調任山東未久且辦事認真改爲革職畱任  
十二月以東省漕幫旗丁陋規積弊開單陳奏得 旨查禁五年  
丁母憂先是大文銳欲清釐漕弊查察浮收如有百姓告發卽將  
州縣參革審辦 諭曰陳大文在山東巡撫任內管轄屬員意存  
苛刻朕聞上年收漕時先出示招告百姓乍投片紙州縣已列彈  
章及審係虛誣又因參辦在前迴護原奏不冝開復並聞該省未  
經參革先行摘印者見尙有七八員拘畱在省民不畏官刁風日  
長著布政使全保查明拘畱人員有應行參劾者卽速奏辦如無

劣跡者飭令回任六年六月京師大雨永定河北岸決口成災總督姜晟以奏報遲延逮問 諭曰直隸總督一時簡用乏人因思陳大文在籍守制將屆期滿直隸總督員缺著陳大文署理卽馳驛來京請訓此實因直隸地方正資整頓需人孔亟並非開奪情之舉也八月奏辦大賑須提早一月以救災黎并條陳放賑章程得 旨俞允十月偕兵部侍郎邵彥寶武備院卿巴甯阿會奏永定河北岸上頭工合龍全河水勢復歸故道 上以大文督催認真交部議敘十一月劾藁城縣知縣路元錫開賑遲緩大城縣知縣錢桂查災延玩 諭令革職審辦如律七年四月因病籲請來京供職 許之八年三月署吏部右侍郎四月署工部尙書六月

援兩江總督十月劾臬司珠隆阿任性喜事查拏株累士民多怨  
上命安徽巡撫阿林保查奏尋奏珠隆阿辦理過嚴尙無營私  
情弊 諭曰珠隆阿於外任殊不相宜著來京以五品京堂用時  
江西樂平縣民朱夢文以知縣李德樹署縣曹淵勒折重徵各款  
赴京呈控 命交大文嚴審定擬大文鞠實覆奏請將府縣各官  
革職究治 諭曰外省京控案件往往發交該省督撫提究率以  
審明實係誣控重事不實轉坐原告罪名陳大文自任兩江總督  
以來前於昭文縣民人吳道昌控該縣浮收漕糧一案審出實情  
將該令劉嘉穀革職此次朱夢文控案復訊出漕書改串舞弊書  
役包攬勒折浮收委審之知府有瞻徇蒙混徇勒招供等情并請

提訊是該督於辦理發審事件均能秉公持正不存徇庇屬員之見一經鞠實立請平反使小民含冤得白奸胥猾吏不致倖逃法網實屬可嘉嗣後各督撫等當力改袒護積習共發天良於民人控訴事件一秉大公虛衷審辦務得實情以申民隱而肅吏治九年正月因洋盜劫擄吳淞口內洋商船奏參疎防武職各員並自請議處 上寬之是年秋汛後洪澤湖水盛漲大文偕河督吳璣啟放信義等壩又被風掣開仁智兩壩致清水減洩太多漕船阻滯因議開李工口門掣減黃水以期船行通順又不卽時奏報 上以大文因循怠玩 嚴飭之十年正月查獲狂悖大逆之董霖搜出逆詞由驛馳奏 上派侍郎貢楚克扎布馳往江甯會同大

文審辦嗣審明董霖不法情節按律嚴辦是月授都察院左都御史旋擢兵部尚書三月因回京途次患病請假調理 上命乾清門侍衛慶惠帶同醫官往視五月以病勢未能速愈 賞尚書銜回籍十一月因前在直隸總督任內失察官吏勾通侵那之案部議革職奉 旨病痊後以四品京堂用二十年卒子慶儀六品廕生候選通判慶偕道光十五年進士刑部主事見官山東巡撫

右 國史館本傳

周廷棟

周廷棟初名元良順天大興人由乾隆三十七年進士以刑部主事用四十六年補奉天司主事四十八年升廣西司員外郎五十年升浙江司郎中兼總辦秋審五十一年改福建道監察御史五十二年轉掌雲南道監察御史五十八年升兵科給事中五十九年轉刑科給事中嘉慶四年疏請停大員罰繳養廉之例以肅官方而杜科派得旨下部議行六年命巡視天津漕務七年擢光祿寺少卿軍機大臣傳旨元良名未協著自行酌改尋更名廷棟補通政司副使八年三月升太僕寺卿七月命同署侍郎那彥成赴永平讞樂亭民人韓義琦控命案及宗室西靈額控爭



地畝案得實奏 聞九年授大理寺卿八月升左副都御史提督  
四川學政時川省軍務告竣閭閻復業廷棟奏言體察時宜亟須  
整頓四事一裁汰冗役以省擾害一清理詞訟以免拖累一嚴治  
奸匪以安良善一舉劾州縣以示激揚從前軍務旁午不得不多  
設差役地方控案勢難依限完結義民鄉勇踴躍從公者固多其  
中劣監豪矜把持衙門者亦不少州縣賢否亦未暇詳細甄別均  
宜逐一清釐以符政體 上建之十年擢刑部右侍郎十一年轉  
左侍郎六月以研鞫迷拐案稱 旨恩加紀錄三次十二年正月  
授都察院左都御史二月 命同侍郎廣興馳往河南查辦糧道  
孫長庚被控貪私款蹟及嵩縣令王光治被控虧欠社倉浮收錢

糧二案並赴山東獄經步軍統領及都察院奏東省民人京控  
共十餘案先後咨交廷棟等鞫實問擬如律報 聞又李臨控李  
瀚霸產不分居喪聽戲一案廷棟等訊臨瀚之祖已經析產本無  
不均李臨以見任通判捏病開缺覲產結訟李瀚以六品職銜制  
中觀劇均請革職解交刑部質訊以免再滋訟端 諭曰此案既  
經周廷棟等提訊明確各予褫革均屬情真罪當不必解交刑部  
以省拖累九月事竣回京十月疏言健訟積弊請詳覈情詞除實  
係冤抑難伸及官吏欺法有據者方准奏 聞外餘咨回本省審  
辦按期行催開單彙奏其有主使挑唆及挺身包攬挾嫌誣陷逞  
刁翻控等情通飭禁止以杜訟風又言大宛兩縣童試冒考甚多

請查辦以肅學政並照例清查冒籍諸生已中鄉會試及見任職  
官勒限改歸原籍均得 旨允行十三年十二月廣興以奉差劣  
蹟逮問 諭曰周廷棟與廣興同赴東省審案閱時半年之久於  
伊需索受贓各款竟毫無聞見近日屢經召見垂詢周廷棟不但  
力言其並無騷擾營私情事並以廣興辦事才具明敏竟似外間  
物議冒加以不韙之名若謂伊實未聞知則係形同木偶儻竟知  
而不言其係有心徇飾且伊在東省供應亦需日費十餘兩咎有  
應得周廷棟著交部嚴加議處議上 諭曰朝廷風憲大臣專司  
糾劾遇有營私散法本應隨時奏參方爲盡職前此周廷棟與廣  
興同赴山東審案於廣興需索騷擾之處自必確有見聞乃復佯

後竟無一字提及近因廣興緣事革職仍不直陳並以廣興才具明敏支吾掩飾昨據吉倫查訪具奏有周全天下事廣聚世閒財之謠周廷棟雖未隨同婪索而其庸懦無能卽此可見復令軍機大臣傳詢伊亦稱曾聞此語並廣興挑斥供應乞池唱曲等事伊亦有所知何以經朕詢問尙不據實奏聞是其瞻徇友誼而事上轉不以誠周廷棟總司風紀尤不應出此部議降四級調用固屬照例辦理但周廷棟人本平庸年亦衰邁且又扶同隱飾豈可再邀錄用周廷棟著賞給五品頂帶卽予休致十四年正月諭曰據山東查明覆奏廣興審辦李瀚一案得銀至數萬兩之多廷棟於廣興所得贓款竟無見聞該省供應廣興極其繁華周廷棟照

常預備伊卽不加挑斥甯不疑及廣興之任性作威爲婪索地  
且於朕詢問時猶以廣興尙屬敢言廣興盜弄威福恣其慾壑奇  
貪奇酷品行卑污獲罪在此朕豈因廣興敢言加之罪戾乎是其  
庸懦無能奏對又復顛倒失實本應發往新疆姑念其年已衰邁  
免其遠戍但周廷棟如此辜恩亦何顏再膺章服之榮著革去五  
品頂帶永不敘用十五年二月故

右 國史館本傳

宋銘

宋銘江蘇長洲人乾隆三十七年進士授內閣中書四十五年充江西鄉試副考官四十七年升侍讀四十九年授廣東廉州府知府五十年遷雷瓊道五十四年正月調陝西潼商道七月丁父憂五十七年服闋授安徽甯池太廣道五十九年署安徽按察使時太和縣邪匪首逆劉之協在楚豫等處煽惑愚民上命兩江總督湖廣河南四川陝甘各督撫嚴緝而劉之協業經河南扶溝縣另案關提太和縣差役余洛等解至扶溝劉之協乘間逃逸六十年以疎縱要犯部議革職上加恩改爲畱任嘉慶十年升貴州按察使十一年入覲以母老奏請畱京供職諭曰宋銘在安

徽道任多年伊母向就養在署茲遠道赴黔難以迎養尙屬實情  
著加恩准其西京授太僕寺少卿十二年遷順天府府尹十三年  
直隸總督溫承惠以永清縣彭元英試暑期滿應請實授咨商順  
天府鎔因元英有未完地糧正銀與例不符咨駁行查承惠不俟  
咨覆遽將鎔銜名併列題請實授鎔據實奏參 上以溫承惠專  
擅下部嚴議十四年以母年八十六歲五世同堂奏 聞 諭曰  
宋鎔之母王氏年逾八旬家絲五世承恩祿養洵爲盛世嘉祥加  
恩特賜御書扁額一面並賞大卷八絲緞二匹小卷八絲緞二匹  
綾三件竹木漆陳設九件以示恩渥其例應賞賚之處仍著原籍  
該撫循例具題十五年正月步軍統領奏煤窰水夫李凱身死訊

係夏太等毆斃請將訪查案犯之遊擊等量子鼓勵順天府奏經  
宛平縣驗明李凱屍身並無傷痕情節互異 上命鎔偕刑部侍  
郎朱理覆加檢驗尋同朱理奏稱李凱委係因病身死 上以步  
軍統領祿康等輕聽屬員藉事邀功下部察議五月擢兵部右侍  
郎八月兼署吏部右侍郎十二月調刑部右侍郎十六年御史劉  
奕煜奏劾吏部銓選錯誤鎔隨同畫橐未能更正下都察院議處  
尋議降一級畱任 命革退署吏部侍郎仍帶降一級畱任十七  
年轉左侍郎十八年因前在府尹任內失察林清等傳習邪教自  
請交部嚴議尋議革職 上加恩改爲畱任十九年正月丁母憂  
四月直隸總督那彥成奏失察逆匪之歷任總督府尹等請分別



示罰得 旨宋鎔罰繳銀一萬兩二十年五月御史石承藻奏參  
湖北候補簡缺知府前任襄陽府王樹勳於乾隆年間在京城廣  
惠寺爲僧名明心假託佛法結交搢紳在京官員爲其蠱惑有從  
伊受戒者嗣還俗捐官爲湖北同知洊升知府請 旨究辦經刑  
部審訊明心爲僧時曾與宋鎔識面後鎔在蕪湖道任內曾送明  
心銀五十兩 上命江蘇巡撫張師誠傳詢宋鎔何以與之相識  
並饋伊銀兩有無受戒情事樹勳還俗捐官後宋鎔仍否與之往  
來鎔稱前在京候補道員時曾至廣惠寺與僧人明心相識並無  
受戒情事後在蕪湖道任內伊來募化給過銀五十兩嘉慶十七  
年有知府王樹勳進京來謁詢知卽係明心還俗捐官奏入 諭

曰宋鎔前與僧人明心往來並無受戒情事尙不至干吏議迨後王樹勳來謁時係身任卿貳且刑部職司法紀知係僧人蒙捐職官卽應奏參乃匿不舉發實屬有心徇隱下部嚴議尋議降三級調用無級可降應行革職 上以鎔於王樹勳爲僧時僅與往來未經受戒加恩免其革職降三級調用十二月因前任府尹時將入官制錢辦理錯誤 諭令賠繳並實降一級服闋之日以正四品京堂補用二十一年服闋二十二年補鴻臚寺卿二十四年京察屆期以原品休致道光六年卒

右 國史館本傳

日本書紀卷之八十一

三

國朝耆獻類徵初編卷一百二目錄

卿貳六十二

莫瞻棗

齊布森

胡時顯

巴爾阿

特成額

嵇承志

秦瀛

戴聯奎

梁上國

窩星額

布彥達賚

--	--	--	--	--	--	--	--	--	--

三  
一  
一  
一  
一  
一  
一  
一  
一  
一

國朝耆獻類徵初編卷 百二

通奉大夫前署江西巡撫江西布政使司布政使湘陰李桓輯

卿貳六十二

莫瞻棗

莫瞻棗河南盧氏人乾隆三十七年進士改庶吉士四十年散館授編修五十年改江南道御史五十一年五月 上以豫省連年荒歉民閒地畝賤價售賣 命河南巡撫畢沅實力查辦令減利聽贖六月瞻棗奏已賣地畝以贖時若不按照見在收成分數當官判結恐胥役高下其手如麥已糶出卽照月報麥價於贖價內坐扣 諭曰莫瞻棗籍隸河南所奏似有所見著將原摺發交畢

沅閣看令其查照該御史所奏如有可行之處卽一面妥協辦理  
一面迅速覆奏尋畢沅覆奏豫省賤買賤賣地畝自奉 旨減利  
聽贖以來愚民具有天良谷知保家守法其已經收麥之地見據  
各屬稟報陸續回贖者甚多兩造並無異詞若照莫瞻菴所奏以  
月報糧價爲憑於原價內坐扣麥收之值辦理轉屬紛紜 諭曰  
此項賤售地畝俱係豫省黎元衣食恆產朕節次降旨諄切勸諭  
爲之調劑變通不過欲貧民復還故業原無取乎煩擾紛更蓋多  
一法卽多一弊全在地方官實心經理使買者賣者兩不偏枯胥  
役無從需索則閭閻自受其福今據畢沅奏見在回贖者紛紛並  
無以麥價低昂互相爭執者則是該撫藩等辦理已有成效卽毋

庸另立規條苛求滋弊所有莫瞻棻奏請按照月報糧價坐扣地  
值之處不必行畢沅摺及莫瞻棻奏一並發鈔通諭知之五十二  
年七月奏四庫館續辦三分書從前校對生監僅二十餘人又止  
校過一次恐多譌謬請將見在詳校官所閱書籍簽改冊檔令原  
校官查對挖改並各迴避原校之書以防迴護仍派大臣一二員  
總覈簽檔其挖補填字紙張匠役及派出各員茶湯等費均令校  
對承辦 諭曰續辦三分書止由該生監等校對一次其中譌謬  
必多見在文淵文源兩閣業經詳校官簽改記檔自應將三分書  
查照挖改以免舛錯著照該御史所奏卽令原辦三分書校對在  
武英殿悉心覆校逐一更正但該御史請令 原校之書以防



迴護一節尙未妥善三分書既係該校對等承辦卽彼此互相閱看皆係原校對之人仍難免心存迴護所有此項書籍著令該校對等覆閱查改後仍交見在派出校勘文淵文源兩閣書籍之大臣等再行詳校如有看出語句狂悖及潦草荒謬者詳校大臣卽行奏明將原校對斤革除書內校出錯字應行填寫並抽換篇葉應令該校對自行繕辦外其紙張匠役及派出各員茶湯等項仍著照文淵文源兩閣之例官爲辦理十月奏此次詳校三閣書冊簽出錯謬甚多請將四庫館纂校議敘應升各員槩行註銷其已經升用之員分別內外任酌罰廉俸從之五十三年正月遷禮科給事中六月授鴻臚寺少卿充浙江鄉試副考官尋轉光祿寺

少卿通政司參議五十四年二月擢鴻臚寺卿九月遷通政司副使五十六年授順天府府尹五十七年七月清河密雲一帶蝗蝻傷稼贍菜並未陳奏 命交部嚴加議處尋議降三級調用奉旨從寬改爲革職兩任嘉慶元年派撥京兵赴河南協勦邪匪上以由京至直隸一帶直隸總督及府尹等辦理無誤俾兵丁行走迅速下部議敘四年正月大學士和珅逮問 上命贍菜籍和珅門下太監呼什圖家產贍菜先訪得宛平縣人孫習方貸和珅家奴劉全銀八千兩飭大興宛平兩縣押追旋赴大城縣李壇鎮將呼什圖房屋查封並訊得呼什圖爲伊弟劉寶梧捐直隸州知州劉寶榆捐守備劉寶杞捐州同銜奏請一並革職從嚴究治

命交軍機王大臣併案覈辦四月擢內閣學士兼禮部侍郎銜仍兼管順天府府尹事務六月因起解和帥家奴劉印等九犯未將起身日期咨覆兵部又馬八十三一犯遲延未解經兵部奏參交部嚴議部議降三級調用上改為革職留任五年正月授工部右侍郎仍兼管順天府府尹事務尋調刑部右侍郎六月調工部右侍郎八月充順天鄉試監臨官十二月偕禮部右侍郎兼管太常寺事務扎郎阿奏請盛京 太廟添設 神龕寶座 上命大學士禮部太常寺敬謹會議並 命盛京將軍禮部侍郎公同丈量詳晰具奏六年正月盛京將軍晉昌等以限於地基未敢擅定覆奏 諭曰盛京城內本未恭建 太廟乾隆四十三年因尊藏

冊 寶始行改建亦未供奉 神牌並無祭祀典禮原與 太廟規制不同見據晉昌等查明限於地基難以安設毋庸輕議更張六月永定河溢 命督辦盧溝橋西決口工程並馳赴永定河下游一帶查勘又 命查勘南苑一帶水勢 上賞撥京倉米二千四百石於長新店盧溝橋一帶設廠賑濟 命借兵部侍郎那彥寶戶部侍郎高杞武備院卿巴甯阿刑部侍郎署直隸總督熊枚經理之七月借那彥寶奏請照乾隆年間江賑豫工成案暫開永定工賑招例下部議行是月 諭令回京借高杞查勘護城河及旱河等處工程奏請於戶工局豫領制錢二萬串趕緊挑濬 上以高杞莫瞻菴不籌及局錢經費有常率爲此請飭之 命於

內務府廣儲司撥銀一萬兩交高杞等上緊興工尋偕高杞自請  
交部嚴議奉 旨高杞著調補兵部左侍郎莫瞻菴著調補禮部  
左侍郎所請嚴議之處著加恩改爲交部議處議罰俸一年十一  
月 命偕高杞疏濬通惠河下游大通橋至通州一帶運道八年  
七月奉安 孝淑睿皇后事儀禮臣會奏措詞錯誤 命交部嚴  
加議處部議革職奉 旨改爲革職畱任八年無過方准開復又  
因咨送議處司員祇宋其沅一人經御史鄭敏行以辦理不公參  
劾奉 旨交部議處部議革職 上改爲降三級畱任時豫省黃  
河北岸衡家樓漫口九月瞻菴奏豫省北岸衝決恐於運河有礙  
黃河漫口宜時籌畫而運河緯道亦宜早爲防範請 敕下山東

撫臣督率該道認真詳勘其隄身如有單薄緊當溜勢者卽鑲埽  
幫護防其汕刷有低矮恐被漫沒者卽加料堅防其衝決或竟有  
已經坍塌者趁其尙未刷寬卽添椿補築務期節節相機搶護足  
資抵禦俟漫工合龍漕船入境時俱得循隄直進不致阻礙上  
從之十二月調工部右侍郎兼管錢法堂事務九年六月署兵部  
右侍郎兼管順天府府尹事務七月轉工部左侍郎十一年三月  
奏河患多由於停淤見屆防汎轉漕喫緊之期專議乞淤恐未能  
遽收速效請 敕下河臣廣備料物實貯在工旣須先事相度補  
其殘缺尤須臨時趕搶防其衝潰又稱洪湖水弱力難敵黃不得  
已而借黃濟運必致淤墊河身倒灌爲患 上韙之 諭江南河

道總督徐端河東河道總督李亨特加意防護熟籌妥辦五月偕  
府尹秦瀛奏請將平糶錢文易銀解部以平市價經戶部議駁  
諭曰五城平糶米麥本以便民其糶出錢文亦爲調劑民間日用  
前經戶部奏准平糶錢文於五六兩月兵餉再加一成搭放此項  
錢文兵丁零星使用自然散布流通錢價可期漸減若如該府尹  
等所奏將平糶錢文彙成總數易銀解部市僧之徒勢必乘此將  
錢文成總易換囤積居奇無益於兵轉爲奸商開牟利之端該府  
尹等並不悉心酌量率逞臆見冒昧陳奏除照部駁不准行外莫  
瞻某秦瀛著交部察議九月通州舉人崔成輔控王文元霸地搶  
割兇毆案已批交大興縣集訊瞻某復札令將王文元保釋又於

私宅傳訊將業主王兆掌責經崔成輔王兆具控於都察院事  
聞 諭曰莫瞻棗於業經委員勘辦之案忽行提訊若非聽情受  
賄因何不會同秦瀛輒在私宅自行訊問實屬專擅違例卽此一  
節已不勝兼尹之任其將原告掌責並將王文元釋放之處種種  
可疑更難保無受賄囑託情弊莫瞻棗著先革去兼管順天府  
尹交部嚴加議處仍著交刑部提集案犯秉公訊究在公所看守  
聽候諭旨部議降四級調用仍帶革職畱任尋訊明並無囑託行  
賄等事奉 旨釋令回家候補十二年授太僕寺少卿十三年丁  
母憂回籍十六年服闋補原官十七年以老病奏請開缺 命以  
原品休致十八年卒



右 國史館本傳

齊布森

齊布森佟佳氏滿洲鑲紅旗人乾隆三十七年五月由方略館議敘補中書科筆帖式十一月充軍機章京四十二年升吏部堂主事四十五年二月京察一等十二月遷員外郎四十七年充坐糧廳監督五十年升郎中五十一年二月京察一等四月授山東道監察御史五月擢山東濟東泰武臨道五十二年調江西吉南贛甯道六十年調山西雁平道嘉慶元年調歸綏道八年擢廣西按察使先是安南國王阮光纘窩畱內地盜犯肆毒海洋六年農耐國長阮福映攻富春阮光纘棄敕印潛逃七年阮福映恭繳敕印至是縛獻通盜全得安南境地遣使請封籲懇以南越名國上

命用越南二字以齊布森充冊封越南使齋送新頒敕印出關宣示十年遷河南布政使十三年五月巡撫清安奏稱該省詞訟積案惟藩司衙門爲最計有一百八十案而齊布森任內卽有一百十七案之多 上以其闕冗下部議處尋議降二級調用授鴻臚寺卿七月升內閣學士兼禮部侍郎銜十月 命以副都統銜爲庫爾喀喇烏蘇領隊大臣旋因前在河南布政使任內於侍郎廣興初次赴豫審案時曾送公幫銀二千兩下部議處部議降調 上以齊布森職任藩司於眾人攢湊銀兩首先出名餽送尤屬不合 命降一級調用作爲頭等侍衛留於庫爾喀喇烏蘇領隊大臣辦事仍帶降四級畱任十四年復因廣興二次三次赴豫時

齊布森同臬司道府等餽送程儀一萬兩下部嚴議部議革職  
上加恩以主事用十五年二月補戶部主事四月擢廣西布政使  
十二月調貴州布政使十八年七月授光祿寺卿十一月復遷內  
閣學士兼禮部侍郎銜十二月兼鑲紅旗蒙古副都統十九年三  
月調正白旗蒙古副都統四月 上御勤政殿聽政齊布森以讀  
本錯誤降二級調用六月補太僕寺卿二十年升都察院左副都  
御史因失察巡城御史伊縣泰蕭鎮通同吏目朱學斐任聽奸商  
運米出城婪贓舞弊部議降調 上加恩改爲降三級畱任二十  
三年京察屆期將已列六法之給事中色成額復劄行吏科改列  
三等照舊供職經給事中李振祐奏參下部嚴議尋議降三級畱

任得 旨降一級以從三品京堂候補二十四年補光祿寺卿道  
光元年復任都察院左副都御史二年升盛京工部侍郎兼奉天  
府府尹三年奏稱承德縣額貯米四萬石因動用較多僅存米四  
千餘石覓在糧少價昂官爲採買誠恐有礙民食請撥復州倉米  
一萬石甯海縣倉米五千石就近運赴承德縣交倉存貯五年復  
因承德縣倉僅存粟八千餘石援照三年成案請撥遼陽倉米一  
萬石鐵嶺縣倉米五千石運赴承德縣倉以備支放均 從之六  
年因病奏請開缺七年卒子蘇章阿雲南布政使孫祥奎兵部員  
外郎祥裕吏部員外郎

右 國史館本傳

胡時顯

烏乎吾又何以銘吾友哉憶歲乙卯余方視貴州學政時君以兵部郎隨大學士福康安貝子在銅仁軍營以慙直屢與同輩鬪余作書規之越月得君手書遜謝若深有感於余所言者自後不通音問者五歲迨己未十一月余以罪謫戍伊犁道出陝甘值同歲生今四川布政使楊君揆同里今邠州知州莊君忻並自漢中軍營回極道君近日行事有人所不能及者云君從經略額勒登保公贊畫軍務屢以事忤經略經略顧能容之每日拔營必首跨一馬與領兵節將偕節將或沿路逗畱君必大聲叱之遇賊則務當賊衝節將前卻君必忼慨獨進怒目視節將節將不敢不前至弁

兵之不進者輒以馬策搃之以是屢得勝仗回營後凡徑路曲折山谷奇險與糧運斷續兵弁或一日二日不食以及雨零日炙器仗敝敗衣履破碎猝遇賊匪狡詭萬端出沒不定之狀又諸將若者有功若者戰不力若敢出賊前若僅尾賊後必一一與經略言之經略知君不欺卽據案定賞罰將弁輕則褫責重則奏請行法以是軍營之畏君也與畏經略等然其憚其公正卒無以閒也夜臥不半刻卽燭治官文書凡屬草及繕寫皆出一手辨色已出營促視諸帳中尋食食畢輒躍馬數步外以待或大營中會語視將弁之畏憚不前者氣必陵出其上或以持重說進君必叱之曰汝安知持重直逗撓耳且畏死無過書生我不畏死汝轉畏死是不

欲死於賊欲死於法耳聞者咋舌君不顧君時已得疾瘦骨立日食不及半升自湖北軍營中須髮已畢白見者不知其爲五十人也余不待三君語畢惕然起曰如是胡君死矣未幾余蒙赦還又未幾而君訃至烏乎祀典所謂以死勤事者君庶無愧乎按狀君諱時顯字行偕一字晴溪先世爲江西奉新人五代時遠祖瓊官常州路刺史遂家武進之安上鄉明禮部尙書諡忠安公淡其後也君爲忠安公十一世孫祖俊父用嘉兩世皆封贈如君官君又嘗出嗣季父直隸高陽縣知縣文英後季父有子君復歸大宗君少而穎異讀書數行並下弱冠出試顧數屈於有司年二十二游京師名公鉅卿咸禮異之歲壬辰適大兵進勦金川倉場侍郎



劉公秉恬奉 命辦理西路糧餉奏君自隨是時君已從國子生  
考取膳錄遂馳驛偕往凡文移案牘無一不出君手侍郎才之奏  
請給中書或國子監學正學錄銜得 旨賞給中書科中書職銜  
越歲侍郎又以君遇事奮勉入奏 特旨遇缺補用及入都引  
見擢主事計君以軍功得官由主事擢員外郎中皆在兵部三次  
京察一等嘗擢選廣東雷州府知府以親老乞畱繼以隨大學士  
福康安貝子勦湖南貴州紅苗功 賞戴花翎以隨參贊額勒登  
保公勦湖北教匪功 賞給內閣侍讀學士銜嗣參贊以功授經  
略君又以隨經略歷涉湖北川陝屢次奏捷功加三品銜實授內  
閣侍讀學士尋擢鴻臚寺卿及以勞瘁卒又 贈光祿寺卿此君

所歷官也君前後在軍營十數年勦川陝教匪獨至五年日日走  
殺蹂烏道人跡所不到之處飢未及食渴未及飲夜枕未及貼中  
間雖屢荷 渥恩然究未嘗一見 天子雖歷官九卿侍從卒未  
嘗一日得立於朝人或以爲君遇合之奇而余以爲君數之奇亦  
已至也烏乎人生二十以內大都在長者膝下其得展尺寸之效  
爭竹帛之名者不過二十至五十卅年內事耳此卅年中君疊遭  
封君及兩繼母憂官兵部者不及十載餘皆短衣匹馬奔走勞苦  
之日也勦金川酋勦苗匪勦教匪其間又嘗隨大學士福康安公  
一至安南國界經畫邊務凡 國家有征勦諸大事君無一不預  
遂至一人之身與軍事相終始以迄窮老盡氣致命遂志乃獲已

國朝典 卷一百一十二 勦六十二

焉且又不止於此方君之以主事入值軍機也 純皇帝悉君才  
行大用矣忽以言語忤人卽日斥出要人所以提君者不遺餘  
力而君之所以抗要人者亦幾不留餘地焉卒至不安於位東西  
不營而其以公事抗貝子抗經略者復如故也君亦可謂百折  
不變者矣君 人交不設城府亦不苟爲言語以悅人與余同官  
京師蹤跡亦不甚密然大節所在未嘗不交相勵余以此重之爲  
文移箋奏頃刻立成曲折如意同輩雖精思不能易一字也尤善  
書官京邸日踵門求者不絕名轉出館閣諸公上君未卒前數月  
尙力疾條奏十事其請增隨征兵役口糧及令巡道稽查轄下營  
伍二事尤蒙 俞旨焉君生於乾隆八年以嘉慶六年八月二十

四日卒於興安軍營年僅五十有九有 旨照三品例賜祭葬子  
之富四川潼川府經歷服闋以知縣升用皆異數也君娶於楊爲  
同里山西壺關縣知縣楊君宸女前 封恭人例晉淑人之富將  
以今年十二月某日葬君於某鄉之某原銘曰

得官於西卒官於西君之遇奇朝入軍機夕出軍機君之數奇雖  
然人皆以爲是而君獨非槐里之折東海兮君或庶幾我荷戈而  
出塞兮不獲殺賊君持刀而行陣兮乃屢克敵雞頭之關待君塞  
燕然之山待君勒生爲蓋臣兮死毅魄烏乎君魂不歸僅歸骨魂  
待西川大功訖我知君心兮鐫墓碣

右墓誌銘洪亮吉撰

臣等謹將所請各案  
分列一二

三

巴甯阿

巴甯阿汪氏正白旗內務府漢軍人由筆帖式於乾隆三十八年補內務府主事洊升郎中五十年授山海關監督五十三年擢上駟院卿五十六年授內務府大臣鑲藍旗蒙古副都統五十七年擢工部侍郎調正藍旗滿洲副都統五十八年正月署長蘆鹽政奏劾前鹽政穆騰額令商人按次繳銀自備貢物共收銀二十五萬兩交卸後始發還本年貢物數件傳商具領僅值銀一萬六千餘兩 上逮治穆騰額是日 命巴甯阿以內務府大臣銜補兩淮鹽政五月 命回京供職補戶部右侍郎六月 諭曰前經降旨令巴甯阿回京供職其兩淮鹽政著董椿去矣巴甯阿惇妃之

兄妃嬪兄弟以之暫管鹽政則可若久於其任究多不便是以令其回京供職見在兩淮鹽政巴甯阿所辦妥協董椿務當做照勿稍廢弛十一月授正黃旗漢軍副都統五十九年署兩淮鹽政全德奏劾巴甯阿任內與總商汪肇泰聯宗認總商洪廣順之子爲門生並在揚州置妾起身時受總商餽贖三萬兩奉 旨革職交王大臣刑部訊明定擬具奏尋擬照枉法貪贓例絞監候 諭曰巴甯阿所犯款蹟止於卑鄙無恥尙不至於死且念其平日辦理工程尙屬熟習著加恩釋放賞給拜唐阿前往熱河在工程處自備資斧效力贖罪嘉慶二年補內務府主事四年四月授淮關監督五年閏四月 命來京以員外郎用尋 諭曰巴甯阿前在兩

淮鹽政任內獲咎係由和坤傾陷尙非自蹈罪愆著補授武備院  
卿六年六月永定河水決奉 命偕戶部侍郎高杞兵部侍郎那  
彥寶工部侍郎莫瞻菴會同署直隸總督熊枚相度地勢籌畫疏  
濬脩築事宜七月奏盧溝橋水勢陡長二尺有餘南北兩岸漫溢  
處先築土隄以杜其旁趨之勢 上韙之十月北岸上頭工合龍  
水勢復歸故道 諭曰巴爾阿從前曾任內務府大臣緣事降黜  
茲辦工出力著加恩授爲內務府大臣仍交部議敘尋奏見築護  
隄土壩情形並將已竣未竣石工及應脩各工段請於本月二十  
日停止俟來春再行脩築挑濬得 旨允行七年二月偕那彥寶  
直隸總督陳大文奏請於永定河淤墊處所分股挑挖兩岸險要



處所補遺舊埽外添設新埽二十餘丈俾資捍衛五月永定河大  
工全竣 諭曰伏秋大汛將至所有新築各工尙當加意防護巴  
甯阿在工已久情形熟悉著往來督察巡防尋奏永定河北岸下  
頭工無埽處所河水驟長變爲迎流頂衝附近隄根督率河員搶  
護平穩報 聞交部議敘七月兼崇文門副監督十二月授盛京  
工部侍郎八年十二月 命查辦高麗溝偷斫木植案犯未能慎  
密致要犯聞風遠颺又輒將各處木廠查封並拏獲商人至數百  
餘名均加以笞杖從輕發落 上以其毫無把握妄拏多人波及  
無辜降爲內務府佐領畱於盛京辦理宮殿歲修工程十年三月  
賞三品頂帶仍授總管內務府大臣六月 命管理三山事務八

月 上幸盛京謁 陵禮成 諭曰此次朕恭謁陪都舉行展謁大典先經派令巴甯阿帶同司員修理各處工程茲大禮告成三陵殿宇各工並 太廟宮闕等處修葺完善巴甯阿督辦有方敬謹整肅著賞給二品頂帶並賞戴花翎九月授正黃旗漢軍副都統十二月授馬蘭鎮總兵兼管內務府大臣事務十二年木門溝紅椿界內有賊犯偷斫木植 上以陵寢重地理應嚴密防護巴甯阿身任總兵毫無覺察 命革職前赴盛京充當披甲尋諭曰已革總兵巴甯阿前於春間召見時奏稱伊自簡任馬蘭鎮總兵於地方諸務俱實力辦理所有紅椿界內隨時策馬親查設遇山勢高險石徑崎嶇之所往往徒步扳援推挽前進伊習而相

安自揣人地相宜懇請暫畱此任以圖報效至於言之泣下似屬  
媿媿可聽何以並未逾時卽查出偷斫木植之案層見疊出似此  
毫無覺察飾詞具奏實屬辜負委任巴甯阿著發往吉林效力贖  
罪十三年奉 旨釋回令自備資斧往河南工次差遣委用十四  
年正月因病回京九月 上以五旬萬壽加恩廢員巴甯阿以內  
務府主事用尋 賞主事俸赴盛京督辦城工十五年充盛京  
陵工監督十七年回京十八年九月卒子景旺三等侍衛景海銀  
庫庫使景興江蘇試用游擊

右 國史館本傳

特成額

特成額姓鈕祜祿滿洲鑲黃旗人由間散挑黏竿拜唐阿擢藍翎侍衛尋擢三等侍衛乾隆三十八年六月奉命赴四川軍營十一月同富興烏什哈達帶兵自資哩北山下攻克美美卡等處賞荷包二箇三十九年正月署貴州威甯鎮總兵十一月同福珠里書麟保甯等分攻榮噶爾博最高峯及康薩爾山半賊礮復同烏什哈達等攻溝內兩旁礮寨並趕築木柵以資聯絡十二月進攻密拉噶拉木山梁第二木城特成額督兵襲之賊潰四十年十一月補威甯鎮總兵四十一年三月調補山西太原鎮總兵四十二年十月授正白旗領侍衛內大臣十一月授正黃旗蒙古都統

四十三年二月授禮部尙書旋授四川成都將軍六月奏添軍標副將衙署四十四年七月同四川總督文綬等酌定金川新疆駐防經費奏定章程九月總督文綬入覲命署理督篆十一月奏詳籌新疆經久事宜經大學士等按款酌覈議行四十五年正月卸督篆籌辦三暗巴賊番情形得旨但當嚴辦毋事遲疑六月攻燬賊巢全獲首夥伏誅安堵旋奏籌三暗巴江卡善後事宜從之七月以審辦賊番同行之犯問擬寬縱特旨嚴飭十月奏新疆存貯倉糧足供十年之用惟軍需所餘米石旣經碾運兼以山谷氣潮殊難久貯而移駐兵丁給領折色自行採買商販居奇挽運不便請照內地常平之例每年借給各兵以資接濟俟秋

成後徵收還倉免其加息倉儲既無紅朽之虞而兵食益臻充裕  
兩有裨益 允之四十六年四月撒拉爾逆回滋事進逼蘭州奉  
旨以曾定金川之兵調往協剿特成額率兵起程嗣陝甘總督  
勒爾謹奏逆回僅據險自守得 旨撤回本營歸伍特成額請以  
兵交副將魁麟等帶歸本營已同提督明亮開道馳抵蘭州稍效  
臂指報 聞尋以阿桂等奏四川地近邊陲令回成都十二月帶  
領土司入 覲四十七年六月總督福康安入 覲 命署理督  
篆疏請借給屯民口糧九月卸督篆十二月奏新疆添設副將仍  
歸松潘鎮統轄四十八年二月以署督任內屬員侵蝕官物不卽  
奏參降二級畱任四月總督福康安升署工部尙書 命暫署督

篆六月疏言川省士民公捐義穀前因籌辦軍需奏明撥給口內  
站夫其沿途運價暫行支用正項俟凱旋後再查所餘義穀變售  
歸款見已將各屬義穀變價收還惟馬邊鹽源兩廳縣地處極邊  
產穀稀少凡遇青黃不接之時均惟義穀是賴應請免其變價以  
裕邊民 從之十一月疏請酌裁新疆塘馬以節糜費四十九年  
正月以新疆戶口加增請分撥地畝給與墾種 特旨嘉獎是月  
授湖廣總督九月以武漢城守營額不敷奏請酌撥標兵以資差  
防十一月奏裁辰州府同知改設建南鎮捕盜同知十二月湖北  
巡撫李綬赴干叟宴暫攝撫篆尋以姑容所屬都司年老戀棧降  
三級畱任五十年三月請裁來鳳縣太旺縣縣丞移駐建始縣之

大石橋旋即撫篆四月以湖南每歲秋讞會奏督臣僅聯一名非崇實之意飭湖南臬司將秋審節略先期呈送商定並奏請嗣後湖廣北南兩省秋審督臣輪流會勘閒歲往巡一次並抽閱營伍奉 硃批是咨部知之六月奏請將苗疆城垣加寬以資保衛七月湖南巡撫陸燿卒暫攝撫篆九月疏言本年湖北被旱災地稍寬江蘇浙江亦因旱歉均藉上游接濟節經勸徠川商米船迅速東下並請撥湖南倉穀碾運湖北以資民食再將官穀出糶以平市價俾四川商販知楚省穀價減落多趨江浙得 旨所辦甚好該督能如此存心不分畛域仰體朕節次降旨一視同仁之意方得大臣之體甚屬可嘉著交部議敘以示獎勵湖北既有湖南接



濟而商販源源而下江浙災歉之區均可無虞略紓朕南顧之憂矣十月卸撫篆請借倉穀以資滿營兵食又請借倉糧月餉以資標鎮各營兵食五十一年正月奏停鶴峯州採買增貯稻穀尋以調濟賑恤合宜交部議敘二月奏言湖北衛昌營原屬苗疆產稻甚少營兵應支月米除春秋二季派撥江陵等縣本色南米供支外其秋季月米係將鶴峯長樂二州縣動碾官穀供支如有不敷卽按每石七錢領銀採買冬季全給折色前署督臣史貽直因兵丁買食維艱題明每石寬給銀三錢俟五年後田地墾熟再照原額折給節經展限九次伏思經費有定誠難例外議增而餉銀久已實給自不當沿襲虛文應請將原請寬給折色銀三錢永爲

恩賞定額以崇實政而裕民食奉 旨所奏是如所請行是月湖北巡撫吳垣卒暫署撫篆六月來京 陛見調補雲貴總督九月以湖廣總督任內命案審結遲延又臨武營僉派微員領餉未能防護致中途有失 敕令自行議罪奏請罰銀自贖十月以湖北孝感縣民人乏食搶奪梅調元等活埋二十餘人經總督李侍堯奏參奉 旨特成額著革職拏問交刑部治罪家產籍沒十二月賞給副都統銜往烏什辦事效力贖罪五十二年四月以湖廣總督任內失察屬員冒領帑項侵扣賑銀奉 旨革職仍以副都統銜留烏什辦事五月以失察私鑄降一級畱任五十三年五月以湖廣總督任內案牘壅積未結 敕令明白回奏七月以荊州

隄工不固多致衝缺奪職逮問論絞五十四年九月釋於獄 賞  
給頭等侍衛銜自備資斧往烏魯木齊代永泰回京五十八年五  
月 命以副都統銜爲烏里雅蘇臺參贊大臣六十年八月授鑲  
黃旗漢軍副都統九月授正白旗護軍統領調鑲藍旗滿洲副都  
統十二月調鑲紅旗漢軍副都統嘉慶元年九月授科布多參贊  
大臣十二月授兵部侍郎是月在科布多任所卒

右 國史館本傳

嵇承志

嵇承志江蘇無錫人由舉人捐納中書乾隆三十九年補授內閣中書四十六年授江西建昌府同知四十九年遷廣東惠州府知府五十年擢高廉道五十一年七月署鹽運使十月調南韶道五十二年遷廣東鹽運使五十四年兼署布政使五十五年丁父憂五十七年服闋授長蘆鹽運使五十九年三月俸滿引 見奉

旨再任三年八月因天津馬家口地方海河漫溢隨同長蘆鹽政徵瑞晝夜搶護幫培堅固得 旨交部優敘又因北倉一帶河水陡長協同倉場侍郎景安竭力搶護修築土埝捐資妥辦 諭曰嵇承志本無地方之責前隨徵瑞搶築馬家口一帶隄工晝夜盡

心茲復於北倉一帶水漲捐資趕辦俾倉廩重地一律得保無虞甚爲出力可嘉著賞給按察使職銜以示鼓勵六十年因病回籍嘉慶六年病痊引見奉旨著照例用時永定河決口數處特蒙召見詢問情形命以原銜隨同侍郎那彥寶辦理堵築事宜九月仍授長蘆鹽運使旋以二十三號壩工合龍賞戴花翎十月以全河水勢復歸故道奉旨交部議敘七年署河東河道總督八年九月奏豫省封邱汎衡家樓無工處所風雨交作南岸灘嘴偏溜北趨以致隄根刷陷過水三十餘丈上以節過霜降水落歸槽茲雖係溜勢湍激人力難施但嵇承志有河防專責平日未能預籌妥協咎無可辭交部嚴加議處旋議降二級調用

恩准抵銷十月 欽差尙書劉權之侍郎那彥寶奏衡家樓北岸  
上游黃沁廳屬水勢陡長嵇承志馳往搶護尋承志偕河南巡撫  
馬慧裕奏請照豫工之例暫開衡工事例 諭曰昨劉權之等奏  
黃沁廳屬水勢陡長嵇承志等由五百里奏到朕以爲必係黃沁  
水勢平穩情形及詳加披閱不過請開衡工事例而於黃沁各工  
如何設法搶護之處並無一字提及實屬不曉事體除將所請衡  
工事例交議速奏外嵇承志馬慧裕均著傳旨申飭九年三月衡  
工大壩合龍 諭曰嵇承志係專司河務疎防之咎較重今能妥  
速堵築功過尙足相抵准其照例開復處分四月偕巡撫馬慧裕  
奏勘估衡工上下兩岸各廳善後事宜查黃河南北兩岸隄工緣

上年河水屢次盛漲以致滌澤等汛河灘更復淤高隄身愈形單薄各須分別增培又灘面溝槽錯出尤爲隱患亦須估築土壩以寬深處鑲作防風層層攔截其衝工上下各汛大隄因赴工料車行走碾壓殘缺兼之被水居民搭棚埋窟亦多圯廢之處均應修補完整至南岸上南廳屬之鄭州汛廢閘迤東灘崖塌卸下南廳屬之鄭州汛祥符下汛五十等堡亦多溝槽勢須幫築土壩又衝工迤上附近之祥符十二堡下北銅瓦鑲曹考李六口南岸睢州下汛十二堡均係緊要之工應築作挑壩其兩岸大隄查較上年盛漲水痕高矮酌量加培隄身之單薄者擇要幫寬並河灘窄狹處所估築壩工以資捍衛其估需銀四十三萬二千餘兩仰懇

敕撥庫帑卽時趕辦又借馬慧裕疏稱大工購料過多歲料難辦請酌加幫價攤徵歸款奏入均如所請行尋諭曰嵇承志本已年老此次因辦理衡家樓大工積勞數月憂懼交增聞其精神益形委頓恐難勝河督之任著來京另候簡用五月奏衡工上下大隄遙遠均須汎弁巡防請將祥符汎改爲封邱汎千總添額外外委一員又添祥符下汎分防外委一員下部議行六月來京召見諭曰嵇承志於署理河東河道總督任內宣防不力以致上年秋閒有衡家樓隄工漫溢之事獲咎甚重經朕格外寬宥嗣以其年老難勝重任仍令來京另候簡用乃伊昨日到京召見時並未懇切面陳感恩愧懼之誠看其精神已就衰頹且伊本係署任



國朝元加表在元集

卷一百一十二

三

河督尙未實授著拔去花翎加恩以四品京堂補用十月授大理寺少卿十年遷順天府府尹十一年三月卒

右 國史館本傳

秦流

秦流江蘇無錫人乾隆三十九年舉人四十一年 上巡幸山左  
召試一等 欽賜內閣中書充軍機章京四十八年丁母憂四  
十九年丁父憂五十二年服闋五十四年升侍讀五十七年二月  
京察一等十月遷戶部江西司郎中五十八年授浙江溫處道五  
十九年調杭嘉湖道嘉慶二年署按察使以擬斬犯婦葉梅氏在  
獄自縊部議降調 上加恩改爲畱任五年閏四月升按察使十  
月調湖南按察使七年因病乞解任 允之九年病痊補廣東按  
察使十年閏六月擢浙江布政使十月入 覲 上以其年逾六  
旬精神漸遜 命以三四品京堂補用十二月補光祿寺卿旋調

四庫全書  
卷一百一十二  
職官六十二

太常寺卿十一年二月疏言廣東濱臨巨海東西延亙三千餘里盜匪不靖出沒重洋橫肆劫掠比年且至登岸始猶遠在高廉一帶上年則廣州所屬且有盜船攔入海上大股盜匪如鄭一烏石二總兵寶朱潰等連踪接艦聲勢甚張內地則順德香山新會三縣上年連有內盜肆劫之案臣前任臬司訪係鶴山會匪梁修平案內逸犯馬觀復及開平盜案內逸犯李英芳爲之渠魁該二犯蹤跡詭祕實與海盜勾結不捕則出而爲患捕之急則遁入海中統兵之將出海勦捕大半藉詞遷延潛匿巒嶼卽與盜遇亦不能盡力追捕以致盜匪不靖夫統領將弁者提督乃黜一孫全謀而魏大斌卽孫全謀之績再黜一魏大斌而繼魏大斌者又恐未必

非魏大斌之續臣愚以爲勦捕之法一曰討軍實水師廢弛則帑  
餉虛糜廣東情形輒以經費不敷爲慮今洋鹽兩商捐輸寬裕惟  
恐經手之員尙有侵漁遺委之將仍復驕情此非立法痛懲難免  
徒資耗費一曰樹聲威盜黨善於偵探非我兵先聲足以警人則  
盜已從而輕我古人用兵以虛運實以寡擊眾自操勝算臣擬兵  
行之日督撫宜舉觴歡飲有功而歸開轅行賞不用命者殺無赦  
一曰戒虛飾舟師擒捕盜匪真假豈能豫必但有一邀功之念勢  
將以假爲真讞成多失其實卽偶有平反亦每以獲盜爲重不復  
深咎嗣後總期真盜弋獲毋縱毋枉至守禦之法尤宜亟講沿海  
分設礮臺原爲防守口岸然口岸多而汛兵少一經調撥倍覺空

虛卽未調撥而無兵之處盜船乘閒直入內港各縣雖設有巡船  
船少不能禦盜且爲盜資又保甲一法僅屬虛名且縱令胥役訛  
索反成厲政欲行保甲團練必須百姓服從一號令而民無不應  
臣以爲嚴防守必先澄吏治澄吏治必先固民心一曰清訟獄粵  
民好訟大小案件頻奉 諭旨嚴飭尙多沈攔始由案之初起遲  
延不辦土棍訟師從而把持遂至供情屢易莫可窮究惟有督飭  
州縣有一案卽清一案務洗慵惰偏私之習一日抑冗濫六計尙  
廉近海州縣有緝盜解犯之費尤宜撙節庶不致虧倉庫而累閭  
閻乃一令到任卽有薦幕友長隨者多人坐食勢不能復爲廉吏  
至雜職武弁惟利是圖武弁稍悍以權卽挾制文員而雜職差委

過多亦滋擾累一曰懲盜役地方官不能不用胥役而不可爲胥役用胥役熟悉地方情形官用胥役胥役卽能用官而轉不爲官用迨至串同官親家屬肆爲民害羽翼已成輒付之無可奈何上官復以人能辦盜曲爲開脫殊不知廣東胥役每有暗通盜匪收受陋規者此尤不可不嚴行懲創也三者旣舉而吏治澄吏治澄而民心固於以舉行保甲團練無不可使之民卽無不可行之法眾志成城守禦有資矣 上以所奏各條俱屬可採 命兩廣總督吳熊光詳細查覈分別酌辦四月擢順天府府尹先是通州舉人崔成輔控告王文元霸地搶割復被兇毆兼尹莫瞻聚令將王文元取保釋放迨原告呈懇親提輒帶至私宅訊供事 聞 命

留京王大臣會同刑部鞠實 上以事在秦瀛未到任以前惟於  
莫瞻棻違例專擅之處不早奏參下部議處尋議降二級留任十  
二年正月升刑部右侍郎八月因湖南省積案未清秦瀛會任按  
察使吏部奏請降二級調用 上加恩改爲留任十三年閒散宗  
室放學恃勢逞兇 命刑部會同宗人府審訊堂司各員故爲開  
脫所敘情節自相矛盾下部嚴議尋議革職 諭曰秦瀛在署專  
辦部務於會審案件未能酌覈允當且亦年老無能著降三級調  
用十四年正月補光祿寺卿三月授都察院左副都御史充會試  
知貢舉四月授倉場侍郎五月 諭曰倉場一切事宜因循怠玩  
諸弊叢生見當整飭之際秦瀛年齒漸衰恐難周到著以二品頂

帶仍補都察院左副都御史六月遷內閣學士兼禮部侍郎銜尋  
擢兵部右侍郎署刑部右侍郎十一月轉左侍郎十五年正月實  
授刑部右侍郎十二月因目疾解任回籍道光元年卒

右 國史館本傳

道光元年秋七月初十日予告刑部右侍郎秦公遂庵以疾卒於  
家是年四月二十三日公嘗致書於新城陳用光曰余衰病增劇  
恐旦暮入地君知我又素知古文敢以他年墓石之文相屬余生  
平治行子弟無能盡知者當略具梗槩屬瓊山張編修岳崧爲行  
狀以授子余得書爲憮然者累日旣得訃益愴然以悲謂公何相  
信之深而自知之審也旣見張編修問以行狀則自海外來過惠



山夫潛見公未幾公弟永平守沆以書及公子緇武所為行狀來  
 速余踐前言余雖不能文然辱公知如是其曷敢辭按狀公諱瀛  
 字凌滄一字小峴晚又號遂庵宋龍圖閣直學士少游先生後也  
 學士子湛致和中為倅於常州因家焉十傳至諱惟楨者始遷於  
 無錫明湖廣巡撫諱耀者公八世祖也入本朝舉雍正己未鴻  
 博歷官至左春坊左諭德諱松齡者公本生高祖也會祖諱實然  
 祖諱春田父諱鴻鈞三世皆以公官 贈光祿大夫兵部左侍郎  
 妣皆 贈一品夫人公兄弟五人於次為長也幼有異稟讀書能  
 兼人學為詩古文輒千言立就外祖徐二礎某及從會祖文恭公  
 皆器之年十六補縣學生年三十二以貢入京師是年遂舉京兆

丙申春 純皇帝巡幸山東公獻賦 行在試以能知題所自出已  
黜而特爲 純皇帝拔置一等 賜內閣中書未幾入直軍機丁  
母憂歸旋丁父憂治喪葬一以禮旣服闋補中書以京察一等擢  
內閣侍讀復以京察一等記名以道府用尋遷戶部郎中癸丑出  
爲溫處兵備道調杭嘉湖兵備道擢浙江按察使調湖南按察使  
壬戌引疾歸嘉慶九年病痊補廣東按察使擢浙江布政使入  
覲乞內用補光祿寺少卿 太常卿順天府府尹擢刑部侍郎緣  
事左遷補光祿寺卿擢左副都御史充會試知貢舉擢總督倉場  
戶部右侍郎旋奉 命以二品頂帶爲左副都御史擢內閣學士  
兼禮部侍郎遷兵部右侍郎調刑部右侍郎以目疾乞病歸自是

家居者十有一年卒時享年七十九公旣以文名而六應禮部試  
俛得復失當直內廷時益訪求 國家掌故爲有用之學性耿直  
而仁恕勇於任事意所不可雖遇權貴持論不少假借而不爲震  
厲之色又勤於其職故雖不爲和珅所喜而不能不循資例以簡  
缺道府薦其特畀以繁劇者 純皇帝知公也公之勇於任事在  
溫處時除永嘉數十年以生監充莊長之弊而民旣免役賦亦無  
逮摧浙江提刑甯紹台大水歲饑甚有司匿不請賑公請於撫軍  
曰預報收成乃約計通屬爲言今猝有水患正可據實上聞何忍  
立視民死力爭得請及調湖南歲又饑長沙衡陽及他縣奸民聚  
眾奪米者事數起公旣設法擒治其渠魁而不爲株連徧曉諭之

匡乃定而衡陽大水漂沒人民田廬無算先一年衡州歉收有司  
匿不報聞而是時陝西奏撥兵米其派及湖南者衡州與焉公言  
災傷如是奈何不議賑而議餉力請於撫軍得截留他縣兵米而  
減價平糶民乃定公之急紆民患如是及其讞獄則寬猛相濟而  
務得其情在溫處時據乾隆初年徐兵備繇永文檄明醜金埋樁  
爲會之非邪教以釋瑞安民池聖功等之罪而訊得仙居縣道士  
李鶴舉以無爲教聚徒眾者計擒治之誅渠寇數人而寬其連染  
者有差提刑浙江促水師提督援定海普陀之盜警撫軍難之而  
制軍卒用公禦盜策以戢盜治韓球闖阿三之獄皆當其罪提刑  
廣東擒治亂民梁修平而以功讓制府倭公治吳蝦喜之結黨於

順德者撫黎民之爲亂於瓊州者懲賭博之號爲白鴿標者而其  
在浙江平反定海難民蔡長興十二人之非盜兩上書於撫軍卒  
得釋及海盜江文五誣其族與某通寶則某嘗首文五於縣有縣  
牘可證撫軍旣以入告而卒能聽公言以釋某尤爲世所難行者  
爲太常時嘗奏陳廣東事宜謂勦捕海盜之法在討軍實樹聲威  
戒虛飾而治內地之奸民句連海賊者則嚴防守必先澄吏治澄  
吏治必先固民心其要在清訟獄抑冗濫懲蠹猾 睿皇帝亟稱  
善焉故旣調府尹而遂任以司寇之職其在司寇屢有平反而糧  
船運丁盜米事發有謂用藥置米中米立溢者公試之不驗以入  
奏則 睿皇帝已手試其藥不驗知其枉因益器公故公雖以事

鐫級一歲六遷而仍畀以司寇蓋知公之耿直而仁恕爲能勝祥  
刑之任也公於詩古文及制舉業皆力追古人風格而能有所自  
得少時爲齊次風杭堇浦所知旣得舉則見重於寶東皋官京師  
與王惕甫魯山木先生以文字相質論及見姚姬傳先生而彌有  
契合焉當官太常時用光嘗質以文公策勵之甚至歲壬申訪公  
於無錫公來舟中語移晷欲畱之游惠山不果自是雖以書相往  
復而不及見公矣有自南來者輒問公近狀知公推其孝友睦嫻  
之意設義田置祭田修家譜而復以其餘修縣志誨誘後進勤懇  
如不及而每與余書較若其意有不釋然於中者蓋公之所志者  
大欲以才副其學而嘗患於不得行其意其官中外及家居旣已

卓卓有所表見矣而欲然猶以爲合於俗之難而力學古人固未  
易言也公所著有淮海公年譜六卷己未詞科錄十卷無錫金匱  
縣志四十卷續修家譜□□卷小峴山人詩文集三十六卷版藏  
於家公生於乾隆癸丑正月二十八日卒於道光辛巳七月初十  
日 誥授榮祿大夫兵部左侍郎配朱夫人前卒 贈一品夫人  
子四人長緇武監生江西候補知縣歷署彭澤峽江樂安宜春縣  
次緇文監生以後其仲叔某皆朱夫人出次緇承殤次緇業幼皆  
側室戴出孫七自緇武出者昌熙昌煦昌烈自緇文出者昌熾昌  
煌昌煜昌焯昌煜府學生其入泮時與公補縣學同歲公所爲賦  
重游泮宮詩者也會孫二人若璜若珩某月 日葬公於某原銘曰

錫山之麓淮海裔日生俊傑昌厥世尙書論德名相次抱仁趨義  
富文字迴翔禁省歷卿寺中粵越楚勤吏事其學旣殫才則試摧  
剛煦柔播威惠抉剔疑似無障翳意所孤行屹不避終達厥誠溥  
厥利其文龍贊才鳳翻 帝惜其歸溫語被一星將終伏衡泌遙慟  
鼎湖惟掩涕公懷坦坦性樂易我昔與游數談藝諾公見屬爲  
公志千秋萬世名不替

右墓誌銘陳用光撰

嘉慶十五年刑部侍郎秦公以目疾乞骸骨歸士大夫送者載道  
咸望其再出而公遂家居講學以終道光元年某月也享年蓋七  
十有幾云惟無錫秦氏世稱有人 聖祖開鴻詞科時與睢州湯



文正公同舉以進士改編修官左諭德學者稱蒼峴先生是爲公  
高祖官翰林院侍講以理學事 世宗學者稱南沙先生是爲公  
從會祖 高宗朝仕至刑部尙書太子太保諡文恭治五禮明五  
刑爲世名臣是爲公從祖公丕嗣前德得古文法於蒼峴得經術  
於南沙得 朝章 國憲於文恭公漉液融根涵泓龐碩疑疑樹  
立績學彌成乾隆三十九年中順天鄉試四十一年 純廟東巡  
獻賦行在授中書公於內閣以中書遷侍讀爲軍機章京於外歷  
溫處道杭嘉湖道浙江湖南廣東按察使於九卿爲光祿寺太常  
寺卿都察院左副都御史於府尹爲順天府於六部爲戶部郎中  
累官兵部刑部工部倉場左右侍郎又嘗知會試貢舉故事非進

士出身不命公以舉人異數也凡仕中外三十四年以按察司刑獄最久事無滯刃以直與法用意至到於浙於廣屢平反海盜之以良被誣者於湖南於浙屢爭收成之不復報災與軍興之不敢請賑者折疑似之獄於一色一言爭讞成之案或至再至三每有所救正然亦以是多齟齬不合擢浙藩入見遂乞內用天子知其才且伉直由京卿遷府尹旋畀以司寇執法如故遇不可以次緦爲疏言雖多格於時議而去後刑部歲更條例猶時見諸施行如公言願公意恆自謙方仁廟竦意嚮用卽以年乞致仕未幾又以疾請解職天子雖勉從所請仍諭候全愈起用而公竟不復出矣里居十數載布衣蔬食蕭然如寒士比卒人猶以爲

未竟其用云公諱瀛字凌蒼號小峴晚自號遂庵言遂其初志也  
好汲引士類孜孜講藝不少倦治古文法尤嚴遺言以墓誌屬新  
城陳司業用光以墓表屬子子重違其意又嘗辱公寵銘其先人  
敢辭不文用揭公於錫山之阡以表公之清德以世秦氏之望

右神道碑陶澍撰

秦瀛字凌滄乾隆三十九年順天舉人四十一年 純皇帝東巡  
召試一等 賜內閣中書遷侍讀出爲浙江溫處道累遷至布  
政使入爲光祿卿終刑部右侍郎在浙時除永嘉數十年以生監  
充莊長積弊立碑永禁甯紹台大水告饑有司預報豐收莫敢請  
瀛言於巡撫得議賑在湖南衡州歲歉陝西奏撥兵米瀛力止之

出入中外屢爲刑官治獄明慎多所開釋瀛少不屑章句詩嗜章  
孟爲齊次風杭堇浦所知古文由方望溪上追歐陽與姚鼐齊名  
著述甚富引疾歸捐義塾田八十畝以課子弟修錫金縣志瀛仕  
浙尤久與巡撫阮元提唱風雅名士翕然歸之弟濂字士蓮乾隆  
四十五年舉人議敘知縣聞父訃號慟嘔血卒工詩文尤篤於友  
誼子緇武國子生任江西彭澤知縣邑多豪猾吏因緣爲奸武治  
以明決眾莫敢欺數平反疑獄旣沒彭澤人思其德集購歸其喪

右傳楊熙之撰

錫山秦氏素以事功經術見稱至對巖學士始擅詞章有蒼峴山  
人集故凌滄以小峴名集在武林數年益以文章山水自任招邀

賢俊屢爲詩酒之會刻前哲遺書又修望湖樓上以供東坡修龍井寺旁隙地建祠以祀少游而詩文日益進

右湖海詩傳張維屏錄

司寇敷歷中外鋤奸除弊風骨嚴峻人不敢干以私任浙時士夫肖像刻石祀之詩謹守唐賢古文希蹤歸方兩家以叫呶狂縱爲才大者當奉爲清涼散也

右羣雅集張維屏錄

小峴先生襟懷瀟灑雖位躋通顯而儀度同於山澤之臞生平愛才禮士藹若春溫及施之政事善於用猛爲廣東臬使時訪拏積匪從嚴懲治匪徒聞風斂跡除莠安良百姓至今德之惜其在任

未久耳

右聽松廬文鈔張維屏撰

西湖龍井寺以秦淮海倅杭時與寺僧辨才往還遂成名勝乾隆二十七年高宗皇帝親奉慈輿省方南服駐蹕湖壖旬日中翠華四幸宸章題詠多至三十一章自來勝刹精藍莫之與比見莊中丞有恭碑記乾隆六十年淮海裔孫小峴侍郎瀛備兵浙右搆建淮海祠侍郎自撰一記一跋而梁山舟侍講爲之書南康謝中丞啟昆有謁祠詩二首同嵌壁閒足稱三絕杭州兩遭兵劫今不知興廢如何矣

秦少司寇瀛小峴山人文集中諸城竇公墓銘後有少司寇自記

云公自浙江學政以左都御史 召還一日富陽董公手執公所  
書金字扇大學士和珅見而語董公曰寫金字善用金無如寶東  
舉者遂取一扇屬董公代乞公書余適趨過董公曰秦君固善東  
舉先生者蓋屬之因以屬余請於公公書就授余還之書款稱致  
齋相國自稱晚生某蓋遵舊例致齋珅號也一日和珅 召見出  
語余曰子見東舉告以有 御製文命其製序散直後卽來領是  
日公隨詣珅宅領歸撰序進呈公歿後編修洪亮吉上書言事以  
前在上書房嘗被公指斥附劾公交結和珅書扇稱師相自稱門  
生其誣公實甚此事關公大節不可不辨云云康祺按諸城風節  
峻峭奪情不起自不至媵娶選懦如吳省蘭輩況小峴侍郎是時

適值機廷情景宛然亦斷非師生黨護之語惟稱稚存太史因同直上齋會被指斥懷挾夙怨至誣人於蓋棺論定之餘此則險巇小人之所爲於太史平生亦殊不類大抵總憲慙直陵人嶽嶽觥觥朝士必多未滿而與和相若離若卽又未嘗不稍斂其鋒棧一時眾口詆譏遂有師相門生之謗在太史禁廷共事所學殊途論古談今兩剛必競一旦偶惑浮言未遑代爲剖釋褊心盛氣白簡遽登古來君子與君子齟齬持論過中亦所常有略迹原心固無損二公品學也

按小峴侍郎與稚存齊年雅故其表稚存墓昭揭學行原本忠孝推服甚至其文亦存集

中然則寶銘書後之詞儻非無稽乎存疑俟考

右紀聞陳康祺撰



--	--	--	--	--	--	--	--	--	--

146-914

戴聯奎

戴聯奎江蘇如皋人乾隆四十年進士改庶吉士四十二年散館授編修四十五年充雲南鄉試正考官四十六年丁母憂尋丁父憂五十一年服闋五十四年充日講起居注官嘉慶元年九月擢詹事府右贊善尋轉左贊善十月遷右中允十一月轉左中允二年遷洗馬四年七月擢右庶子九月轉左庶子十一月擢侍講學士十二月轉侍讀學士五年擢少詹事尋晉詹事六年升內閣學士兼禮部侍郎銜九年遷兵部右侍郎十年三月轉左侍郎四月充殿試讀卷官五月調禮部右侍郎六月復調兵部左侍郎十一年正月 命提督安徽學政十一月仍調禮部右侍郎十二年差

竣回京十三年充武會試正考官十四年轉左侍郎十五年六月  
充江西鄉試正考官八月署吏部左侍郎十六年御史劉奕煜奏  
劾吏部選補錯誤 上以聯奎隨同畫橐茫無定見交都察院議  
處尋議降調 上從寬改爲畱任罷署吏部事十七年二月復調  
兵部右侍郎十一月轉左侍郎十八年三月調吏部右侍郎六月  
詔修明鑑派充副總裁官八月 命提督山東學政尋丁生母  
憂二十年服闋署工部右侍郎二十一年三月補吏部右侍郎大  
月轉左侍郎七月遷都察院左都御史二十二年三月擢禮部尚  
書十二月充經筵講官二十三年三月調兵部尚書五月以纂輯  
明鑑體例未協下部議處尋議降調 上從寬改爲畱任二十四

年充會試正考官二十五年三月 上謁 陵以兵部遺失行在印 命以三品京堂降補嗣經畱京王大臣會同刑部究出當月司員曠誤夜班不自行收管印鑰及隸役私開門徑於庫後牆垣上以聯奎等漫無覺察下部嚴議尋議革職 上宥之仍候補三品京堂四月補太常寺卿六月 命提督浙江學政道光元年八月遷禮部右侍郎仍畱學政任十二月復擢兵部尚書 命回京供職二年卒 諭曰戴聯奎由翰林出身科分較深人亦謹飭經朕復授爲兵部尚書尙未到任遽聞溘逝殊堪軫惜其歷任處分著加恩寬免所有應得卹典該衙門察例具奏尋 賜祭葬子鳴皋三品廕生江西南豐縣知縣一麒候選布政司經歷

右 國史館本傳

道光元年十二月提督浙江學政如臯戴公拜復授兵部尙書之命將回京師有疾明年二月初四日薨撫臣以 聞 天子軫悼悉免在官處分遣大臣致祭給全葬如典禮烏庫公之蒙恩可謂盛矣方嘉慶庚辰春 睿皇帝將謁 東陵兵部不知何時遺失行印諸堂官皆得過失公以本部尙書降太常一月奉 命視學浙江 召對良久退而歎曰 聖恩如此臣何以堪臣老矣死之日當不使有餘布餘粟負國家也 今上登極元年擢復禮部侍郎仍留督學公感時疫且疾思入 覲未敢乞假及得復職回京旨公感泣曰吾瞻 天有日矣促治裝未啟竟以疾終 新天

子於公未嘗一見以獲咎在外之老臣未再期盡復其官方內  
召大用而遽逝 恩綸褒卹優渥至極知公耿耿丹誠九泉下猶  
當瞻依 陛闕也某自嘉慶元年受公知侍公前後十年見公德  
行文章甚悉公歿之歲某奉 命撫粵西未親執紼門下士各以  
所聞知作表狀將上史館而公子以隧道之文屬某其何敢辭謹  
按狀公姓戴氏諱聯奎字紫垣先世以 國初遷江南之如皋遂  
爲如皋人族頌式微考選庵公寄籍大興故公以乾隆三十九年  
鄉試中順天解元明年成進士授庶吉士肄 國書散館授編修  
始改復原籍四十四年遭嫡母憂既闋又遭父憂除喪補編修嘉  
慶元年擢贊善五遷而至詹事擢內閣學士兼禮部侍郎轉兵部

侍郎歷禮部吏部復調兵部十八年遭生母憂逾三年起署工部  
尋補吏部擢左都御史明年晉禮部尚書充經筵講官二十三年  
改兵部尚書署戶部明年兼署左都御史再署吏部後降太常寺  
卿道光元年復禮部侍郎再復兵部尚書公少篤學從邵二雲先  
生受經爲文有聲譽久官翰詹故雖改歷劇要兩充會試同考官  
又充雲南江西正考官充文武會試正考官充殿試及 召試讀  
卷大臣又出爲安徽山東浙江學政惟山東之役以生母憂未行  
故公門下所得士最多公既受 兩朝之知而謹慎小心始終彌  
篤自踏脚試出人 禁圍二十餘年 顧問之語未嘗一洩時有  
密諭深夜自書遺奏至歿人莫能見其草尤好慎言雖家人未

嘗妄發其周密如此與人交無所競大廷議有不合惟以理辨無  
疾言憤色退亦未嘗有所菲薄其和平如此然風節素峻在翰林  
久不遷掌院爲稽文恭相國公座師也將保御史列公名滿掌院  
某公曰吾未識面何以論其才否相國以語公令往見公漫應之  
及舉京察又列公名某公言如前相國怒召公曰是汝自誤也公  
曰有命苟不得徒往無益不然若吾師者豈有所干哉相國咨嗟  
而罷大學士和珅掌院莅任屬官見者皆降禮公獨長揖和訪時  
望爲額駙師或薦邵二雲先生及公邵辭不就和以爲愧欲延公  
堅辭邵先生語公曰吾老矣行移病去子宜爲後計公曰吾師行  
弟子從之矣邵果乞休和曰吾非必相強邵君何爲此悻悻益重



公禮貌有加公持躬儉自少未嘗衣綺貴後燕居乃一緼袍曰秀才時服不可棄每食盤蔬箸肉或疑其矯公曰仕宦者莫不欲有守而或改操華臚累之也惟不受華臚之樂乃不覺淡薄之苦以存吾廉不亦可乎某在京師侍公久公尤愛之嘗語云武侯天才猶一生謹慎我輩何人此心一放則無所不至矣故惟敬爲入德之階子其勉旃某服膺此言數十年然後知公生平之所得力上以結 主知雖偶有升降而 恩遇不衰中以待僚長雖屢拂權要而聲名益泰下以對妻子雖日處狎近而言動無失信乎其有所主也公會祖某祖某皆以公貴 贈光祿大夫考之承安慶知府以公貴晉 贈如公官妣三世及生母皆 贈一品夫人配某

氏 誥封一品夫人子三長鳴皋官某次一芝次一麒麟某某以  
某年月日葬公於某山之原銘曰

川嶽蕩蕩儲瑤英上燭樞斗光天庭貞一在抱晶且誠咳唾燭耀  
含元精上爲 國望下執林彝鼎之重百世欽公曰昭事惟小心  
對揚夙夜一戰兢大哉敬勝右帝箴

右墓誌銘姚瑩代某撰

--	--	--	--	--	--	--	--	--	--

梁上國

太常梁公既卒之明年丙子九月將窆於福州西郭外祭酒嶺之陽其孤來請銘且曰將託是以獻史館壽祺乃謹系其世次諱官敘而銘之敘曰公席十餘世逢掖之澤鬱久而光篤生賢雋少爲學使者紀文達公所賞顏其堂曰書香世業迨入翰林習國書值散館當改除金壇于相國惜其才請仍畱庶吉士故公於國書最明徹鄉後輩經公講畫皆掇高等既丁內艱尋以父疾乞養居里十二年而後還 朝當是時公有鬻弟五人侍奉非不足而公獨不忍貪祿以違其親可謂孝矣公質直好學不蹈脂韋不設戟級與人交必信面規人過而人不怨自陟臺垣歷宮詹所建白多詳

至方楚蜀用兵累年 詔臺臣極陳得失公上疏言平賊六事曰  
正罪名以申 國法尙謀議以籌勝算設統帥以一兵權添士卒  
以壯軍威杜冒濫以收實用妥招撫以淨賊根 上覽疏動容趣  
令更立法紀悉如公所畫軍政由是始肅卒獲以剪除葦蕪保大  
定功自公發其謀也閩南奸民結邨通兵役號曰天地會蔓延他  
郡肆抄掠有司匿不聞公從鄉人訪得其實疏請 敕大吏密察  
掩捕獲其渠餘卹解散一方賴以安巡視南城以爲所轄六門郭  
外遠關多岐徑奸隱易溷因請分邨落定坊戶以便稽察汰冗役  
設鄉約以資講諭參用保甲法而變通之格吏議不果行後十餘  
年逆賊林清構煽營窟適在近郊乃服公之先見比於曲突徙薪

焉巡視漕務釐積痼革陋規桺僕隸復濬引河施遏壩運道以利  
勘泉於盛暑中奔馳數百里雖疾不輟 上聞嘉悅之稽察旗學  
條上四事曰專教習則偷曠除立多師則迪導廣增學額則勞來  
周修費舍則規撫整其他落落大者若請續修 大清會典收撫  
臺灣山後噶瑪蘭皆見施舉裨國家大計公之事 君忠而能謀  
如此所交鄉鄙諸君子及輦下賢士大夫每從之博咨當世急務  
與桑梓利病汲汲以濟時爲心故不爲矯激沽直之行而讜論未  
嘗不見納於 明聖也公分校鄉會試得士多知名今東河總督  
九江李公鴻賓其顯也服官四十年廉約如韋布顏所居曰四知  
爲學政黜浮詭勤考校剔弊習試期輒終日冠服坐堂皇夜分少

假寐或兀坐待旦無倦容有謂公自苦者而公卒忘身盡瘁以歿  
嗚乎哀哉壽祺於公爲後進又與公諸從子交習見公生平無嗜  
好持躬接物一出於禮蓋優爲鄉人士式公逝而典型不可復覩  
矣嗚乎哀哉公所著有駁閩氏古文尙書疏證五卷駁毛氏大學  
證文一卷進 御詩賦一卷山左游記一卷遼瀋游記一卷粵西  
游記一卷詩文集十餘卷又 國朝閩海人文五卷數目通典十  
餘卷未完書系曰公姓梁氏諱上國字斯儀一字九山其先福州  
長樂人 國初徙居省治十五世皆爲郡縣諸生曾祖澄漪祖邦  
柱考劍華並 贈通議大夫詹事府少詹事妣林氏 贈淑人公  
於次四未弱冠補縣諸生乾隆三十三年與仲兄同舉於鄉四十

年成進士選庶吉士散館仍畱學習四十四年冬丁母憂歸服闋  
以父疾乞養尋丁外艱五十五年再散館授編修分纂 國史五  
十七年八月分校鄉試得士林芬等十三人嘉慶二年擢山東道  
監察御史六年分校會試得士冉永淦等十七人是秋充會典提  
調巡視濟甯漕務七年秋遷工科給事中冬除內閣侍讀學士九  
年夏除太常寺少卿秋拜奉天府丞兼提督學政十二年內遷詹  
事府少詹事稽察覺羅官學十四年奉 命祭告北嶽河瀆及歷  
代陵寢是冬以前失察通倉盜米望吏議十五年冬補授內閣侍  
讀學士十八年夏擢太僕寺少卿秋八月提督廣西學政晉太僕  
寺卿十九年晉太常寺卿明年夏五月二十八日以勞卒於慶遠



試院春秋六十有八娶許淑人山西聞喜縣知縣崇楷女子三雲  
銑乙卯科舉人雲鑲附貢生雲鏞太學生女子子三婚媾皆名門  
孫三堯辰□辰拱辰銘曰

性之溫德有隅志之潔行有樞學之篤刊皮膚言之忠安盤盂好  
正直天所孚發文章 帝所愉古醇德執其符身可滅道不渝名  
山峇崑諡自前儒此吾九山先生之系廬

右墓系銘陳壽祺撰

高星額

高星額他塔喇氏鑲白旗滿洲人乾隆四十年考授內閣中書四十六年升侍讀五十一年授江南道監察御史五十五年轉禮科給事中尋轉吏科給事中嘉慶四年二月奏言整儀尉贊鳴鞭官秩居六品由大臣子弟拜唐阿親軍實監生員內選用一經簡放卽屬職官若僅令該衙門堂官自行揀選恐有營求情弊請嗣後照依揀選鳴贊官贊禮郎之例臨期奏請 欽點大臣一二員會同該堂官卽日公同揀選擬定人數交該衙門帶領引 見恭候欽定得 旨議行又奏言親王郡王貝子公等如遇降襲降封爵秩者該屬下設衛典儀等官應一體裁減查減職各官例以各

營旗員揀補但各營俱有出力人員減職官難邀錄用往往因無  
祿資贖有在本門下具呈挑當親軍者亦有在該旗具呈挑當馬  
甲者是此項人員以無罪而竟罷職殊覺屈抑應如何銓補之處  
請 敕所司詳覆尋宗人府議請將裁退之員暫行令食錢糧遇  
該門上缺出揀選報行兵部其五品以上人員帶領引 見補用  
得 旨允行三月擢鴻臚寺少卿兼公中佐領七月授光祿寺少  
卿五年八月升內閣侍讀學士九月擢大理寺少卿六年正月借  
太僕寺少卿裘行簡赴陝西軍營犒軍三月升太僕寺卿四月擢  
太常寺卿五月同裘行簡奏言臣等周歷地勢訪察打仗情形其  
所以未能殄滅者蓋緣勦辦大股之賊易於見功勦辦小股之賊

難於措手謹陳軍營事宜數條一棧道內宜撥兵駐守以防賊匪  
東西奔竄一寶雞鳳翔郡縣宜安兵駐守以嚴備禦庶與省會官  
兵聲息相通一長麟所帶之兵可歸併經略查主將原以帶兵若  
未經戰陣之將轉須分兵護衛卽偶一遇賊伊手下將弁兵勇意  
存保護主將於衝鋒折銳轉覺有所牽掣經略額勒登保見在棧  
西似可就近將長麟所帶兵勇交額勒登保酌量情形或將此項  
兵內分撥若干駐守寶雞鳳翔及棧道一帶其餘兵勇另派得力  
大員帶領庶可以收實效一各處雇覓鄉勇宜詳加覈實臣等訪  
聞惟經略參贊兩營所帶鄉勇久經戰陣已成勁兵餘皆有名無  
實應請 敕下額勒登保將此項人數飭令各處造具花名籍貫

住址以備查覈嗣後如有招募鄉勇之處應令報明經略毋許私自招充一西安省城滿漢官兵覈實訓練查兵丁因連年徵調牽混缺額宜查明綠旗與滿營兵額一律勤加操演以重兵防一各路軍營保劾人員宜交經略覆覈查經略事權最重三省皆其統轄額勒登保接印後卽奏明伊所帶將弁自應保劾其餘各路仍聽帶兵大員自行具奏在額勒登保深避專擅之路圖宜如是然各路帶兵大員儻蹈從前捏飾之弊任意妄保於軍務大有關繫嗣後請統歸經略覆覈庶認真奮勉之人自知出力再臣等面奉諭旨兵力是否不敷尙需添派查陝省兵勇及川楚二省兵丁爲數已八萬有零並川楚二省壯勇約計不下十萬此時統計三

省各股賊匪不過二萬有餘以四倍於賊之兵勇似足以敷勦辦  
今以節省添兵之費爲 施恩犒賞之需則鼓舞振興較之添兵  
似覺費省而得實濟又臣等面奉 諭旨以糧餉是否足用或應  
增撥亦須查明不敷緣由據實具奏伏查各路軍營糧餉經略額  
勒登保將滿漢官兵分例驟頭天價一切據實裁減陸續撥解之  
項足敷支發惟查師行無定而山路遠近平險不齊運腳遂因之  
多寡不一是費用之糜不在多寡而在運腳臣等訪聞廣東餉項  
一到自屬寬裕此時陸有仁自必豫爲籌備奏入 上嘉納之時  
首逆王廷詔就獲解京 諭曰窩星額赴軍營犒賞兵勇備形勞  
瘁並將王廷詔沿途管解均屬出力著賞戴花翎七月永定河漫

口京城附近被潦 命偕通政司副使廣興查勘西路被水情形  
窩星額查至涿州僅開列戶口清單入奏不即辦賑 上以未能  
悉心經理交部議處部議降二級准以加級抵銷八月授內閣學  
士兼禮部侍郎九年卒

右 國史館本傳

布彥達賚

布彥達賚滿洲鑲黃旗人姓鈕祜祿尙書果毅公阿里克子原名  
沙海乾隆四十年奉 旨改今名初由閒散挑親軍是年閏十月  
補藍翎侍衛十一月 命乾清門行走四十一年以其兄公豐昇  
額平金川功襲一等子爵授三等侍衛四十五年晉一等侍衛授  
尙茶正武備院卿四十六年兼公中佐領四十八年二月授鑲黃  
旗漢軍副都統十二月充伊犁領隊大臣五十四年回京授公中  
佐領五十五年調鑲紅旗滿洲副都統五十八年補武備院卿嘉  
慶三年授鑲藍旗護軍統領四年正月擢兵部侍郎兼管鑾儀衛  
事總管內務府大臣是月調戶部侍郎授 御前大臣二月晉戶



部尚書充 實錄館副總裁官 命在紫禁城騎馬三月補鑲紅  
旗漢軍都統四月授正黃旗領侍衛內大臣是年六月初設步軍  
左翼總兵 命管步軍統領事尋以清字奏摺內恭書 孝憲皇  
后尊號繕寫錯誤解總管內務府大臣職八月調鑲紅旗滿洲都  
統十一月奏言步軍統領衙門司員不敷當差請添設郎中一員  
得 旨允行五年正月兵部以神機礮位銹澀不能適用議請改  
鑄據參將克精額之言奏請暫停如法演放即能遠及中牌又以  
派令番役緝獲東安縣積匪捕務認真有 旨議敘仍授總管內  
務府大臣閏四月充文淵閣提舉是月 命總理工程十一月調  
正黃旗滿洲都統六年正月卒 諭曰布彥達賚持躬謹慎奉職

恪勤安靜而能有爲精明而不多事在內廷行走小心匪懈堪爲表率委任部旗及步軍統領各事宜俱能經理得宜年齒方強正資倚畀茲聞溘逝深堪悲悼已派伊姪明安齋賜陀羅經被聞信時朕卽欲親往奠醮經軍機大臣面奏本日正值 祈穀禮成明日又遇齋戒之期再三懇請是以中止二阿哥係布彥達賚之女婿著於初五日前往代朕奠醮並著二阿哥福晉親往視殮派總管內務府大臣縕布隨往俟出殯之日仍令福晉至伊家目送恩賞銀三千兩治喪又給塋前地六十三畝 贈太子太保諡恭勤子熙敏襲子爵

右 國史館本傳

512301  
文科研究所阅览室

K320.49

2

国司月考卷五  
夕二二二

五二